



გერალდს და სარა**ს** მრავალჟამიერ

**ᲜᲐ**%ᲘᲐ ᲚᲐᲛᲔ

უკვე შენთან ვარ! ნაზია ღამე,

მაგრამ აქ ბნელა,

მწვანე ბალახის სიმრუმეში ღამის ცის შუქი ხავსიან ბილიკს სიოთი ნელა მიმოებნევა.

ჯონ კიტსი, "ოდა ბულბულ**ს** 



₱ᲘᲒᲜᲘ <u>Გ</u>ᲘᲠᲕᲔᲚᲘ

1

საფრანგეთის რივიერაზე, მარსელიდან იტალიის საზღვრაფმდე ასე, დაახლოებით შუა გზაზე, ერთ თვალშესავლებ ადქგილზე საუცხოო, ვარდისფერი ოტელის დიდი შენობაა ამართული. პალმების შრიალი აგრილებს სიცხისაგან ალმურადენილ ფასადს და ოტელის წინ თვალისმომჭრელად ელვარეპლაჟი გადაშლილა. ბოლო წლებში იგი მაღალი წრის ხალხისა და ცნობილ პიროვნებათა საზაფხულო აგარაკად იქცა. ათი წლის წინათ კი, აპრილის თვეში იქაური ინგლისური კლიენტურა ჩრდილოეთისკენ რომ გადაინაცვლებდა ხოლმე, ეს ადაგილი მთლად უკაცრიელსა ჰგავდა. ახლა გოსის "Hôtel des Etrangers" მიდამოებში ბევრი ახალი ნაგებობაა, მაშინ კი, კანამდე ხუთი მილის გაყოლებაზე ჩარიგებულ იმდენ ფიჭვება

<sup>1</sup> ოტელი უცხოელთათვის (ფრანგ.).

ში, ათიოდე ძველი ვილის სახურავი თუ მოჩანდა ხავსიანი დუმფარებივით.

ოტელი და იმის წინ ნოხივით გადაშლილი მზისფერი პლაჟი რაღაც მთლიანსა ჰგავდა. სალოცავივით იყო გა**ნათებული** ეს ადგილი შენობის წინ. სისხამ დილით ზ**ღვაში ეშვებოდა** შორეული ანარეკლი ქალაქისა — კანის ძველი, მოვარდისფრომოყვითალო ციხესიმაგრეები, იტალიის მიჯნაზე ლილისფერი ალპები. წყალმცენარეებისაგან რგოლები და ქავლები იხაზებოდა გამჭვირვალე ნაპირზე, ირხეოდა და ზღვაზე გაწოლილი ანარეკლიც თრთოდა. რეა საათისთვის <mark>პლაჟზე</mark> ლურჯ საბანაო ხალათგადაცმული კაცი გამოვიდოდა. ხალათს გაიხდიდა, კარგა ხანს ემზადებოდა, ვიშვიშით, ოხვრითა და ხვნეშით წინასწარ ფრთხილად ტანს აქა-იქ ჯერ ისევ ცივი წყლით დიდი ამბით დაისველებდა, ბოლოს გაბედავდა და ბევრი-ბევრი, ერთი წუთით ჩაყურყუმელავდებოდა ზღვაში. იმის წასვლის მერე პლაჟის ახლომახლო არემარე დაახლოებით ერთ საათს ცარიელდებოდა. ჰორიზონტზე დასავლეთისკენ სავაჭრო გემი გამოჩნდებოდა, ნელა მიცურავდა, თითქოს მიღოღავსო; ოტელის ბიჭები ეზოში ერთმანეთს გასძახოდნენ; ფიჭკებზე ნამი იწყებდა შეშრობას. ერთი საათიც და ნამდვილი, პროვანსული საფრანგეთის სანაპიროდან გამყოფი მავრის არცთუ მაღალი მთაგრეხილის მიხვეულ-მოხვეული შოსედან იქაურობას ჩამოაღწევდა ავტომობილების ხმაური.

ზღვიდან ერთი მილის დაშორებით, იქ, სადაც ფიჭვებს მტვერდაყრილი ალვის ხეები ენაცვლება, ერთი პატარა ბაქანია. ამ ბაქნიდან 1925 წლის ივნისის ერთ დილას გოსის ოტელისკენ ღია "ვიქტორიათი" მიდიოდა ორი ქალი — დედა და შვილი. დედას ჯერ კიდევ შერჩენოდა მომხიბვლელობა, ოღონდ, ძნელი მისახვედრი არ იყო, რომ ჭკნობაშეპარულ სილამაზეს მალე წაშლიდა ძლივს შესამჩნევი წვრილი ძარღვები. გამომეტყველება მშვიდი ჰქონდა, და დაკვირვებულიც; თუმცი, თვალი მაშინვე ქალიშვილისკენ გაგექცეოდათ, უმალ მოგაჯადოებდათ ვარდისფერი ხელისგულები და ღაწვები — საღამო ხანს გრილი წყლით რომ დაბანენ ბავშვებს, შეაჟრიალებთ, და სიწითლე წამოუვლით, თრთოლასავით, — იმგვარად, თითქოს შიგნიდან უნათოდა, ძლივს შესამჩნევად. ოდნავ ხვე-

ული ქერა თმა, ფერფლისა და ოქროსფერი რომ დაჰკრავდა, ფიქალ შუბლზე ჩამოშლოდა. დიდი და კრიალა, ნათელი, წყლიანი თვალები უელავდა, ბუნებრივად თეთრყირმიზი სახის კანზეც კი ეტყობოდა, რომ ნორჩი და ძლიერი გული უცემდა მკერდქვეშ. მთელი სხეულით თითქოს თრთოდა, გეგონება სხლტებაო ბავშვობის მიჯნაზე — თითქმის თვრამეტი წლის იქნებოდა უკვე, მაგრამ ჯერ მაინც შერჩენოდა ცვარნაში ბავშვობისა.

ცა და ზღვა თითქოს ერთურთს შეერწყა, ერთ გავარვა-

რებულ ხაზად იქცა; დედამ თქვა:

"ასე მგონია, აქ მაინც არ მოგვეწონება".

\_ "მე უკვე შინ წასვლა მინდა", მიუგო ქალიშვილმა.

მშვიდად, ხალისით საუბრობდნენ, მაგრამ ცხადი იყო, გუ-ლი არსაით მიუწევდათ და ეს აწუხებდათ. გართობა სურდათ, გახალისება, მაგრამ იმიტომ არა, მოშვებული ნერვები აღეგ-ზნოთ, არა, უფრო იმიტომ, რომ ფიქრობდნენ, ეს მათთვის ახლა საჭირო იყო და ბუნებრივი. იმ ხარბ მოწაფეებს ჰგვანდნენ, მთელი წელიწადი სკოლაში კარგად რომ სწავლობენ და იციან, წლის ბოლოს, დიახაც, ეკუთვნით დასვენება.

"სამ დღეს დავრჩებით და წავალთ. გემის ბილეთებს ახ-

ლავე შევუკვეთავ ტელეგრაფით".

ოტელში მისვლისას, ქალიშვილი კარგი ფრანგულით ლაპარაკობდა, მაგრამ მაინც, ხანდახან — თითქოს რაღაცას იხსენებსო. პირველ სართულზე დაბინავდნენ, ქალიშვილი გაკაშკაშებული შემინული კარებისაკენ გაემართა, რამდენიმე ნაბიჯი წადგა და ოტელის გარშემოვლებულ ქვის ვერანდაზე
გავიდა. ბალერინასავით დადიოდა, გამართული, ზეაწეული;
სიარულისას თითქოს კიდევაც მაღლდებოდა, ძირს კი არა,
ზევით და ზევით იწეოდა. მისი ჩრდილი სხივებქვეშ თითქოს
ლამის მოიჭრა, დაპატარავდა. მცხუნვარება მოაწვა თვალებში და მაშინვე უკან დაიხია, ძალზე კაშკაშებდა მზე და დანახვა ჭირდა. ორმოცდაათი იარდის იქით ხმელთაშუა ზღვა
დროდადრო რომ ამოაჩენდა თავის სილურჯეს, ხარკს უხდიდა
ულმობელი მზის ბრწყინვალებას. აივნის ქვემოთ, ზედ ოტელთან, გახუნებული ფერის "ბიუკი" იხრაკებოდა.

. ყველაფერი თითქოს გარინდდა და მხოლოდ პლაჟზე იყო

სიცოცხლე. სამი ინგლისელი გამდელი თილისმაშეკრულებივით ისხდნენ და რაღაცაზე ლაპარაკობდნენ, უფრო ჭორაობდნენ, თან სვიტერსა და წინდებს ქსოვდნენ ვიქტორიანული
ხანის ინგლისის ორმოციანი, სამოციანი და ოთხმოციანი წლების მოდაზე; ზღვასთან ახლო ასე, ათამდე ქალი და კაცი ზოლიან ქოლგებს შეფარებოდა, მათი ბავშვები მეჩხერზე დაუფრთხობელი თევზის დაჭერას ლამობდნენ, ანდა იწვნენ და
ქოქოსის ზეთწასმულ მოელვარე შიშველ სხეულებს გასარუჯად მზეს უფიცხებდნენ.

პლაჟზე გამოსულ როზმერის თორმეტიოდე წლის ბიჭმა გაურბინა გვერდზე და ყვირილითა და ყიჟინით ზღვაში გადაეშვა. როზმერიმ უცნობი სახეების შემფასებლური მზერა იგრძნო, ხალათი გაიძრო და თვითონაც ზღვაში შევიდა. რამდენიმე იარდი გაცურა და მიხვდა, ქვიშას ეხებოდა, ტორტმანით წამოდგა, წალასლასდა. ნაზი ფეხებით ძლივს მიარღვევდა წყალს. იმ ადგილამდე რომ მივიდა, სადაც წყალი მკერდამდე თუ მისწვდებოდა, მობრუნდა და ნაპირს გამოხედა: ერთი მელოტი, მონოკლიანი კაცი უყურებდა, ტრუსის ამარა იყო, გაბანჯგვლული მკერდი გამოეზნიქა და მუცელი და ამოსკუპული ჭიპი შიგნით შეეგდო. რომელიც გაბანჯგვლულ მკერდში ჩაეკარგა და, ბოთლიდან ჭიქაში რაღაც დაისხა.

როზმერიმ სახე წყალში ჩამალა და სწრაფი კროლით გაცურა ტივტივასაკენ. წყალი საყვარლად მიელამუნა სახეზე, პაჰანაქება სიცხე დაავიწყა, თმა დაუსველა, ტანზე აქა-იქ ჭავლივით დაუარა. როზმერი ნებივრობდა, ნეტარებდა, ადგილზე ირწეოდა. ტივტივასთან მისული, უკვე ძლივსღა ითქვამდა სულს, მაგრამ ვიღაც მზეზე გარუჯულმა თეთრზეთეთრკბილებიანმა ქალმა ისე დახედა, როზმერიმ თავისი სხეულის სიშიშვლე და სითეთრე იგრძნო, ზურგზე გადატრიალდა და წყალს მინებდა. ასე მივიდა ნაპირამდე, სადაც მაშინვე გამოელაპარაკა ის მკერდგაბანჯგვლული კაცი, ხელში ისევ ბოთლი ეჭირა.

"იცით რა, ტივტივას იქით წასვლა არ იქნება. ამბობენ, ზვიგენებიაო". ვერ იტყოდით, რა ეროვნებისა იქნებოდა, მაგ-რამ ინგლისურად ოქსფორდის მანერაზე, ნელა, გაბმით ლა-ბარაკობდა.

"გუშინ ორი ბრიტანელი მეზღვაური გააქრეს გოლფ-ჟუა-ნის ფლოტილიიდან".

"ლმერთო ჩემო!" წამოიძახა როზმერიმ.

"მეტადრე ფლოტილიასთან შემოდიან. იციან, რაღაცას გამორჩებიან".

ისე გაუშტერა თვალი, გეგონებოდა შუშისა აქვსო, და ვითომ, მინდა გაგაფრთხილოთ და იმიტომ გამოგელაპარაკეთო; მერე ორიოდე ნაბიჯით უკან დაიხია და ისევ დაისხა ის რალაცა თავის ბოთლიდან.

როზმერი გრძნობდა, ყურადღებას აქცევდნენ ამ საუბრი-სას და ოდნავ შემცბარმა შეათვალიერა იქაურობა, რომ სადმე დამჯდარიყო. პლაჟის რაღაცა მონაკვეთი იმ თავიანთი ქოლგის ახლო, ეტყობოდა ყველა ოჯახს საკუთრებად მიაჩნდა, ოღონდ, — მიმოდიოდნენ, ერთმანეთს რაღაცას გასძახოდნენ, ერთი სიტყვით, თავიანთი წრე ჰქონდათ და ცოტა უხერხული იქნებოდა და მიძალებაც კი გამოვიდოდა ამ წრეში შეჭრა. ოდნავ მოშორებით, კენჭებითა და დამჭკნარი წყალმცენარეებით მოფენილ ნაპირზე რამდენიმე კაცი და ქალი შენიშნა, როზმერისავით ჯერ არც იმათ მოჰკიდებოდათ მზე და პლაჟის დიდი ქოლგები კი არა, თავიანთი ქოლგები ჰქონდათ. ესენი უფრო ახალბედები ჩანდნენ ამ პლაჟზე. როზმერიმ თავისუფილი ადგილი მოიძია გარუჯულებსა და თეთრებს შუა, ხალათი გაიძრო და ქვიშაზე გაშალა.

მერე ზედ გაწვა, ჯერ მხოლოდ მათი ხმა ესმოდა, გრძნობდა როგორ მიმოდიოდნენ, თითქოს გარს უვლიდნენ იმის სხეულს, ხანდახან ვილაცის ჩრდილი ჩამოეფარებოდა წამით მზეზე. კისერზე რომელიღაც ცნობისმოყვარე ძაღლის თბილი და
ხშირი სუნთქვა მიელამუნა; უკვე გრძნობდა მზის მხურვალებას, თითქოს კანში ატანდა; ტალღების სუნთქვა, მათი წყნარი,
დაქანცული "უააჰ" ჩაესმოდა. თანდათან არჩევდა, ვინ რას ამ,
ბობდა, მთელი ამბავიც კი მოისმინა, კერძოდ ის, რომ თურმე
ვიღაცას, "იმ ჯეილს, ნორთს" რომ ეძახდნენ აგდებულად, კანის რომელიღაც კაფედან წუხელ ერთი ოფიციანტი გაუტაცია, უნდოდა ზედ შუაზე გაეხერხაო; ამას თეთრთმიანი ქალი
ყვებოდა თავგამოდებით, კაბაზე ეტყობოდა, წინა ღამეს წვეულებაზე ყოფილიყო და სამოსის გამოცვლა ვერ მოესწრო, თმა-

ზე ისევ ეკეთა ტიარა, მხარზე კი დამჭკნარი ყვავილი ჩამოჰკიდებოდა საწყლად. როზმერი შეუცნობელმა ანტიპათიამ მოიცვა იმ ქალისა და მთელი მისი კომპანიის მიმართ და შეტრიალდა.

იქითა მხარეს, მოშორებით, ახალგაზრდა ქალს მოჰკრა თვალი. ქოლგის ქვეშ იჯდა და რაღაცას იწერდა ქვიშაზე გაშლილი წიგნიდან. სარაფანი მხრებიდან ჩამოეწია და ნარინჯ-ყავისფრად თანაბრად მზემოკიდებული შიშველი ზურგი მზეზე უბზინავდა. ერთი ასხმა შემღვრეული მარგალიტი ირეკლებოდა ნამზეურ ზურგზე. ლამაზ სახეში ერთდროულად სიმკაცრე და უმწეობა გამოსჭვიოდა. როზმერის შეხედა თითქოს, მაგრამ არც შეხედვა ეთქმოდა. იმის გვერდით მჯდარ მაღალ, მოხდენილ მამაკაცს ჟოკეის ქუდი ეხურა, წითელზოლებიანი ტრუსით იყო; იმის იქით კიდევ ის ძალზე თეთრკბილება ქალი, როზმერიმ ადრე რომ ნახა. ამ ქალმა მაშინვე მოხედა როზმერის, ეტყობა, იცნო; მერე ერთი კაცი, მოგრძო სახით, თმა ლომის ფაფარივითა ჰქონდა, უქუდოდ იყო, ლურჯი ტრუსით, ძალიან სერიოზულად ელაპარაკებოდა შავტრუსიან, აშკარად რომანული წარმოშობის ახალგაზრდა კაცს, ლაპარაკისას ორთავე ქვიშაში ურევდა ხელებს, ხანდახან გამხმარ წყალმცენარეებს ამოაყოლებდნენ ხოლმე. ამერიკელები არიანო, გაიფიქრა, მაგრამ მაინც რაღაცით არა ჰგვანდნენ იმ ამერიკელებს, ამ ბოლო დროს რომ ხვდებოდა როზმერი.

ცოტა ხნის მერე გაიაზრა, ის ჟოკეისქუდიანი თავის კომპანიას რაღაცას უამბობდა; დინჯად ხვეტავდა ნიჩბით ქვიშას და
თან ლაპარაკობდა, ალბათ ძალიან სასაცილოს, თუმცა ისეთი
სახე ჰქონდა, ფარსს მაინცდამაინც ვერ იფიქრებდი. ბოლოს
საქმე იქამდე მივიდა, რაც უნდა ეთქვა, ერთი ხმა კი ამოეღო
და, მის ყველა სიტყვაზე ხარხარებდნენ. როზმერივით, იმათგან ცოტა მოშორებით, სუყველა სმენად ქცეულიყო, ეგება
რამე გავიგონოთო. მთელ პლაჟზე მხოლოდ ის მარგალიტის
მძივიანი ქალი არ იცინოდა. ალბათ თავმდაბლობის გამო,
ამათ ყველა გადახარხარებაზე თავს დაბლა ხრიდა და თავისთვის ფურცლებს აცქერდებოდა.

უცებ, თითქოს ციდან ჩამოვარდაო, როზმერის იმ მკერდგაბანჯგვლული და მონოკლიანი კაცის ხმა მოესმა: "მშვენიერი ცურვა გცოდნიათ".

როზმერიმ იუარა.

"შართლა, ჩინებული; ჩემი გვარი კემპიონი გახლავთ. აქ ერთი ქალი ამბობს, რომ წინა კვირას გნახათ სორენტოში, იცის ვინა ხართ და თქვენი გაცნობა სურს".

როზმერის არ გახარებია, მაგრამ არ შეიმჩნია, მიიხედა, ისინი დაინახა, მზე ჯერ რომ არ მოჰკიდებოდათ, მისკენ იყურებოდნენ და იცინოდნენ. უხალისოდ წამოდგა და მათკენ გაემართა,

"მისიზ აბრამზ — მისიზ მაკისკო — მისტერ მაკისკო — მის-

ტერ დამფრი..."

"ჩვენ გიცნობთ", იმ ქალმა თქვა, ვისაც კაბაზე ეტყობოდა, წუხელ წვეულებაზე ყოფილიყო. "როზმერი ჰოიტი ხართ, მაშინვე გიცანით სორენტოში, და ოტელში კლერკსაც ვკითხე. აქ ყველამ ერთხმად აღიარა, მშვენიერიაო იმ ფილმში და გვაინტერესებს, რატომ არა ხართ ამერიკაში, იმისათვის, რომ ითამაშოთ სხვა ისეთივე მშვენიერ ფილმში".

ფაცაფუცით მიიწ-მოიწიეს, რომ ადგილი გამოენახათ და თავიანთ შორის ჩაესვათ როზმერი. ეს ქალი, სორენტოში რომ ენახა, ებრაელი არ იყო, მიუხედავად თავის გვარისა. იმ ხნიე-რი, "არხეინა ქალების" ჯიშისას ჰგავდა, კარგად ჭამისა და გულგრილობის გამო ყველაფრისადმი, რაც გარშემო ხდება, ყველა თაობას რომ ერგებიან და ვერ გაიგებ, ვისი-რისია.

"გვინდა გაგაფრთხილოთ, პირველ დღეს ძალიან არ დაიწვათ მზეზე", — ხალისით აგრძელებდა ის ქალი ლაპარაკს — "კანს სათუთად უნდა მოეპყრათ, მეტადრე თქვენ, ოღონდ, ამ პლაჟზე ისეთი ხალხია, რომ ვერავის ვერაფერს ვეღარ ეტყვი, შეიძლება გაგლანძღონ, და არ ვიცოდით გვეთქვა თუ არა, ხომ შეიძლება თქვენც გწყენოდათ".

## II.

"ეჭვიც კი გამოვთქვით, იქნებ შეთქმულებაში ურევიაო"ქმისიზ მაკისკომ თქვა. ეს ახალგაზრდა, საკმაოდ ლამაზი სახის ქალი, ერთობ უდიერი ჩანდა, თვალებზეც ეტყობოდა. "აქ ვერაფერს გაიგებ, ვინ არის შეთქმული, ვინ არა. სიტყვაზე, აი ის კაცი, კარგა დიდხანს და გულთბილად რომ ესაუბრებოდა

ჩემი ქმარი, ლამის მოთავე ყოფილა ამ ამბისა, ყოველ შემ-თხვევაში, მოთავის თანაშემწე მაინც — მეორე კაცი".

"შეთქმულება?" გაიოცა როზმერიმ. კარგად ვერ მიხვდა.

"ჩემო ძვირფასო, ჩვენ რა ვიცით, მიუგო მისიზ აბრამზმა, ლაპარაკისას ხანგამოშვებით ჩაიცინებდა ხოლმე, ისე, სქელმა ქალებმა რომ იციან. "ყოველ შემთხვევაში, ჩვენ არა, ჩვენ

არა ვართ გარეული მაგ საქმეში. ჩვენ ქანდარა ვართ".

მისტერ დამფრიმ, ახალგაზრდა ქერა კაცმა, რაღაცით ქალს რომ წააგავდა, შენიშნა: "რაღა შეთქმულება და რაღა ჩვენი მისიზ აბრამზი, თვითონ არის შეთქმულებაო", რაზედაც კემპი-ონმა მონოკლი მოუღერა და უთხრა: "აბა, როიალ, თავი დაანებეთ ეგეთ სიტყვებს". როზმერიმ შეშფოთებით შეხედა მათ, ახლა ერჩივნა და უნდოდა კიდევაც დედა ჰყოლოდა აქ, ეს ხალხი მაინცდამაინც თვალში არ მოსდიოდა, პლაჟის იქითა მხარეს მსხდომთ ადარებდა და ისინი ერჩივნა, დედამისის შეუმცდარი, თავისი წრისთვის ჩვეული ტაქტი და ალღო შველოდათ ხოლმე სწრაფად და იოლად, მოხერხებულად დაეღწიათ თავი უხერხული ვითარებისთვის. სულ რაღაც ექვსიოდე თვე თუ გავიდა მას შემდეგ, რაც როზმერი ცნობილი გახდა, ხანდახან ფრანგული მანერები იჩენდა თავს და ის ამერიკული დემოკრატიული ჩვევებიც, გვიან რომ შეიძინა და ხშირად კიდევაც იბნეოდა.

მისტერ მაკისკოს, ხმელ-ხმელ, ჭორფლიან წითურ კაცს, — ასე, ოცდაათი წლის იქნებოდა, "შეთქმულებაზე" ლაპარაკი სიამეს არა ჰგვრიდა. ზღვას გაჰყურებდა, მაგრამ უცებ ცოლს შეხედა, მერე როზმერის მოუტრიალდა და საკმაოდ მკაცრად და გაჯავრებით, თითქოს რაღაცაზე პასუხს აგებინებსო, ჰკითხა:

"დიდი ხანია ჩამოხვედით?"

"დღეს".

"აჰა".

იფიქრა, საუბარს უკვე სხვა გზა მიეცაო და იქ მსხდომთ

გადახედა, იქნება ახლა მათ ეთქვათ რამე.

"მთელ ზაფხულს აქ აპირებთ დარჩენას?" გულუბრყვილოდ იკითხა მისიზ მაკისკომ, "მაშინ, ალბათ ნახავთ რით გათავდება ეს ინტრიგა". "ღვთის გულისათვის, გაბოლიტ, კმარა ამაზე!" შეუძახა ქმარმა, "სხვა ხუმრობა ნახე, ღვთის გულისათვის!"

"ნერვების ბრალია".

"არავითარი ნერვები", არ დაეთანხმა მისტერ მაკისკო, ლამის ყვიროდა, "ნერვები აქ არაფერ შუაშია".

აშკარად ღელავდა, მონაცრისფრო სახეზე ალმურმა გადაჰკრა, რაც რამ ზედ გამომეტყველება აჩნდა, ერთმანეთში არეოდა. იგრძნო, ვერ იყო კარგად. უცებ წამოდგა და წყალში შევიდა. ცოლიც ადგა. როზმერიმ შემთხვევით ისარგებლა და ისიც მათ გაჰყვა.

მისტერ მაკისკომ ღრმად შეისუნთქა ჰაერი, ხმელთაშუაში შევიდა და მკლავები მოუსვა, თავისი ვარაუდით კროლით უნდა გაეცურა. მალე ჰაერი აღარ ეყო, ფეხზე დადგა და აშკარა გაკვირვებით მიმოიხედა, რადგან არცთუ ისე შორს წასულიყო და ნაპირიდანაც, უეჭველია, ისევ მოჩანდა.

"სუნთქვა ჯერ კიდევ ვერ მისწავლია კარგად. გაოცებასა ვარ, როგორ ახერხებენ ისე ჩაისუნთქონ, რომ კარგა დიდხანს გაჰყვეთ", თქვა და როზმერის შეხედა, თითქოს პასუხს მისგან ელისო.

"წყალში ყოფნისას ამოისუნთქეთ", აუხსნა როზმერიმ, "და მერე ყოველ მეოთხე მოსმაზე თავს ამოყოფთ და ისევ ჩაისუნთქავთ ჰაერს".

"სხვა ყველაფერი იოლია ჩემთვის, აი მხოლოდ სუნთქვა მიჭირებს საქმეს. გავცუროთ?"

ტივზე ის თმალომისფაფრიანი კაცი იწვა. ზღვის ტალღებს აყოლილი ტივი ირწეოდა და როგორც კი მისიზ მაკისკომ ხელი წაავლო, უცბად გვერდზე გადაიხარა და მხარზე მიერტყა. ის თმალომისფაფრიანი კაცი მიეშველა, რომ ზედ ასულიყო.

"შემეშინდა, მაგრად არ მოგხვედროდათ", დაბალი, მორცხვი ხმა ჰქონდა. იმისმა უჩვეულო ნაღვლიანმა სახემ გააოცა როზმერი, იმისმა ინდიელსავით ფართო ყვრიმალებმა, განზე გაწეულმა პირმა და ღრმად ჩამჯდარმა ძალიან დიდმა, მუქ ოქროსფერმა თვალებმა. როგორღაც, პირის ერთი კუთხიდან დაილაპარაკა, თითქოს იმედი ჰქონდა, მისიზ მაკისკომდე რაღაც მიხვეულ-მოხვეული გზით მიაღწევდნენ მისი სიტყვები და ამგვარად აზრი და ძალა შეემატებოდათ. ერთი წუთიც და წყალში გადაეშვა, გრძელი სხეულით ნაპირთან ახლო გაწო-

ლილი, ტალღებს მინებდა.

როზმერი და მისიზ მაკისკო თვალს ადევნებდნენ. როგორც კი ბიძგის ინერცია გამოელია, მაშინვე მკვეთრად შეტრიალდა, წყალზემოთ წამით გამოუჩნდა გამხდარი ბარძაყები და მერე უკვე მთლად გაუჩინარდა. მხოლოდ ქაფიღა მოჩანდა წყალზე იმის თავზემოთ.

"კარგი ცურვა სცოდნია", შენიშნა როზმერიმ.

მისიზ მაკისკომ მოულოდნელი აღშფოთებით მიუგო:

"სამაგიეროდ, უვარგისი მუსიკოსია". და ქმრისკენ შეტრიალდა, რომელიც, ორჯერ წარუმატებელი ცდის მერე, როგორღაც აძვრა ტივზე და სცადა ისე დაეჭირა თავი, ვითომდა რაო, არაფერიო, მაგრამ წაიბორძიკა და კინაღამ დაეცა. "მე ეს-ეს არის ვთქვი, რომ შეიძლება ეიბ ნორთი კარგადაც ცურავს, მაგრამ უვარგისი მუსიკოსია".

"ჰო, ასეა", ჩაიბურტყუნა მისტერ მაკისკომ, ეტყობოდა ამოწმებდა ცოლის სიტყვებს, თითქოს უფლებას არ აძლევდა,

რაც უნდოდა ის ელაპარაკა.

"მე თაყვანს ვცემ ანთეილს". მისიზ მაკისკო ისევ როზმერისკენ შეტრიალდა, როგორღაც თითქოს გამომწვევად. "ანთეილსა და ჯოისს. არ ვიცი, ამ ხალხზე გსმენიათ თუ არა რამე ჰოლივუდში, მაგრამ "ულისეზე" ამერიკაში გამოქვეყნებული პირველი კრიტიკული წერილის ავტორი ჩემი ქმარი გახლავთ".

"კარგია, სიგარეტი მქონდეს", მშვიდად თქვა მაკისკომ.

"მოწევას არაფერი მირჩევნია ახლა".

"ჯოისის ძალა ფარულია, ასე არ არის, ელბერტ?"

უცბად ხმა გაუწყდა. ნაპირიდან არცთუ მოშორებით, მარგა-ლიტის ყელსაბამიანი ქალი თავის ორ ბავშვთან ერთად ბანა-ობდა და სწორედ იმ დროს, მისიზ მაკისკომ ისევ რომ წამო-იწყო ლაპარაკი, ეიბ ნორთმა ჩაყვინთა და მხარზე შესმული ბავშვითურთ წყლიდან ვულკანისებური კუნძულივით ამოი-მართა. ბიჭი შიშისა და აღტაცებისაგან კიოდა. ქალი მშვიდად და ალერსიანად უყურებდა მათ, ოღონდ, არ გაუღიმია.

"მისი ცოლია?" იკითხა როზმერიმ.

"არა, ეგ მისიზ დაივერია. ოტელში არ ცხოვრობენ". თვალები ლამის ფოტოაპარატის ობიექტივად ექცა, ისე ჩაციებით უყურებდა მისიზ მაკისკო იმ ქალის სახეს. ცოტა ხნის მერე მკვეთრად მიტრიალდა როზმერისაკენ.

"ადრე ყოფილხართ საზღვარგარეთ?"

"დიახ, პარიზში ვსწავლობდი".

"ო, მაშინ გეცოდინებათ, რომ თუ კარგი დრო გინდათ გაატაროთ, ჭეშმარიტ ფრანგულ ოჯახებს უნდა გაეცნოთ. რა გაჰყვება ამ ხალხს აქედან?" მარცხენა მხრით მისიზ მაკისკომ ნაპირისაკენ მიანიშნა. "შეყრილან და სხვა ვერავის და ველარაფერს ამჩნევენ. ჩვენ, რა თქმა უნდა, რეკომენდაციით მივედით ცნობილ პარიზელ მხატვრებთან და მწერლებთანაც, ასერომ, კარგად ვცხოვრობდით".

"წარმომიდგენია".

"ჩემი ქმარი თავის პირველ რომანს ამთავრებს ახლა".

"შართლა?" როზმერი ახლა მაინცდამაინც არაფერზე არა ფიქრობდა. ერთი ის აფიქრებდა მხოლოდ, დაეძინებოდა თუ არა დედამისს ამისთანა პაპანაქება სიცხეში.

"იდეა იგივეა, რაც "ულისეში", განაგრძობდა მისიზ მაკისკო. "ოღონდ ჯოისთან რიცდაოთხ საათს ხდება მოქმედება, ჩემი ქმრის რომანში კი მთელი საუკუნეა; წიგნში გამოჰყავს ძველი ფრანგი არისტოკრატი, რომელიც ტექნიკის საუკუნეს ეჯახება…"

"ღვთის გულისათვის, ვაიოლიტ, ნუ იცი ასე, ყველას უყვები ჩემი რომანის იდეას", შეაწყვეტინა მისტერ მაკისკომ, "სანამ წიგნი არ გამოქვეყნდება, არ მინდა, რომ ყველამ გაიგოს".

როზმერიმ უკან, ნაპირისკენ გაცურა. ნამზეური მხრები უკვე ცოტათი ეწვოდა, ხალათი მოისხა და ისევ მზეზე გაწვა ყოკეისქუდიანი კაცი ქოლგიდან ქოლგამდე მიდი-მოდიოდა ხელში ბოთლი და პატარა ჭიქები ეჭირა და ყველასთან მიჰქონ. და. თანდათან თვითონაც და მისი მეგობრებიც უკეთეს ხასიათ ზე დგებოდნენ. ბოლოს ყველამ ერთ ქოლგასთან მოიყარა თავი — სხვა ქოლგები უკვე დაეკეცათ. როზმერი მიხვდა, ვიღაცა წასვლას აპირებდა და გამოსათხოვრისა უნდა შეესვათ პლაუზე. ბავშვებმაც კი იგრძნეს, რომ იმ ქოლგის ქვეშ მეფობდა გართობა და მხიარულება და იმათაც იქით იბრუნეს პირი

Scanned by CamScanner

უნებურად გაიფიქრა, იმ ჟოკეისქუდიანი კაცის წყალობით

ხდება ყველაფერიო.

ცაზეც და ზღვაზეც, ორივეგან შუადღე დადგა. კანის თეთრი ჰორიზონტიც კი, ხუთი მილის დაშორებაზე მირაჟად იქცა,
მაცოცხლებელ და გრილ მირაჟად; კიოტასავით, — იმისმკერდფერა აფრიანი ნავი შემოდიოდა და მუქ ლაჟვარდისფერ კუდს
იქნევდა, იფიქრებდით, სიცოცხლე ამ ადგილს გარდა სანაპიროზე არსად არისო, მხოლოდ აქ, ამ პლაჟზე, მზის სხივებდაფენილი ქოლგების ქვეშ, სადაც ერთი ორომტრიალი ჰქონდათ
და საიდანაც ასეთი მხიარული ხმები ისმოდა.

კემპიონი დაინახა როზმერიმ, მისკენ წამოვიდა, რამდენიმე ნაბიჯის მოშორებით შედგა და როზმერიმ თვალები დახუჭა, თავი მოიმძინარა; ცოტა ხნის მერე ოდნავ გაახილა და ბუნდოვნად რაღაცა გაარჩია ორი ბოძივით — ვიღაცის ორი ფეხი.
ის ვიღაც კაცი ცდილობდა ფეხი შეედგა დიდ, ქვიშისფერ
ღრუბელში, ის ღრუბელი კიდევ სადღაც უსასრულოსა და გავარვარებულ ცაში მიდიოდა. როზმერის მართლა ჩაეძინა.

გაიღვიძა მთლად გაოფლილმა და დაინახა, პლაჟზე აღარავინ იყო იმ ჟოკეისქუდიანი კაცის გარდა, რომელიც იმ ერთადერთ გაშლილ ქოლგასღა კეცავდა. როზმერი წამოდგა, დაბნეული თვალებს ახამხამებდა, ჟოკეისქუდიანი მიუახლოვდა და თქვა:

"მე უკვე მინდოდა თქვენი გაღვიძება წასვლამდე. პირველ

დღეს დიდხანს მზეზე წოლა არ გარგებთ".

"გმადლობთ". როზმერიმ თავის შეწითლებულ ფეხებს დააედა. "ღმერთო ჩემო!" გაიცინა, ხალისიანად; სალაპარაკოდ
მოემზადა, მაგრამ დიკ დაივერი უკვე მიათრევდა თავის დასაკეც კარავსა და პლაჟის ქოლგას ავტომობილისკენ, რომელიც
ბლაჟთან უცდიდა და როზმერი წყალში შევიდა, რათა გაოფლიანებული სხეული გაებანა. დიკ დაივერი ისევ დაბრუნდა,
ქვიშაზე დაყრილი ნიჩაბი, ფოცხი და ცხავი წამოკრიბა და
ქვებსა და ქვებშუა მიმალა. მერე პლაჟს კარგად მოავლო თვალი, რომ აღარაფერი დარჩენოდა.

"ხომ არ იცით, რომელი საათია?" ჰკითხა როზმერიმ. "დაახლოებით ორის ნახევარი". ორთავემ ერთად გახედეს ზღვას. "კარგი დროა", თქვა დიკ დაივერმა. "დღის უარესი დრო

შეხედა და წამით როზმერი მინდობილად და ხალისითაც კი, თვითონვე მოხვდა მისი თვალების კრიალა ცისფერ სამყა-როში. მერე მან მხრებზე მოიგდო თუკი რამ პლაჟზე დარჩე-ნოდა და მანქანისაკენ წავიდა; როზმერი წყლიდან ამოვიდა, ქვიშა ჩამოიბერტყა და ოტელის გზას ნელა გაუყვა.

## İΠ

უკვე თითქმის ორი საათი იქნებოდა, როცა დედასთან ერთად რესტორანში შევიდა როზმერი. ფანჯრებს იქით ქარი არხევდა ფიჭვებს და მზის სხივები და ჩრდილები რაღაც უცნაურ,
რთულ სახეს ფენდა მაგიდებზე. ორი ოფიციანტი, თეფშებს
რომ ალაგებდა და იტალიურად ხმამაღლა ლაპარაკობდა,
მათი შემოსვლისთანავე გაჩუმდა და ტაბლდოტის ყველაზე
ღარიბული ვარიანტი მოართვეს.

"პლაჟიდან შეყვარებული დაგბრუნდი", თქვა როზმერიმ.

"ჰო? ვინ შეგიყვარდა?"

"ჯერ ერთი მეტად სასიამოვნო კომპანია. მერე ერთი კაცი"<u>.</u> "ილაპარაკეთ?"

"ცოტა. ძალიან ლამაზია. ჟღალი თმა აქვს". როზმერი მადიანად ჭამდა. "ისე კი, ცოლიანია — სხვანაირად თითქმის არც ხდება".

როზმერის საუკეთესო მეგობარი იყო დედა. მასზე გადაგებული, მთელ თავის ძალასა და ღონეს როზმერიზე ზრუნვას
ახმარდა. ეს იყო ახლა იმისი საქმე, რაც არც ისე იშვიათია
თეატრალურ გარემოში, მაგრამ მისიზ ელსი სპირსი იმით
გაირჩეოდა, რომ სამაგიეროს არ ითხოვდა, თუნდაც სულაც
მარცხი ეგემა. დასაჩივლელი არა ჰქონდა რა, ორჯერ კარგად
გათხოვდა, ორჯერვე დაქვრივდა და თანდაყოლილი მხნეობა
და ცხოვრებისთვის საჭირო ძალა უფრო მოემატა. პირველი
ქმარი, როზმერის მამა, სამხედრო ექიმი იყო, მეორე—კავალე
რიის ოფიცერი; ორივემ დაუტოვა იმდენი, რომ კარგად ეცხოვრა, ყველაფერი როზმერისათვის სურდა და მისთვის ინახავდა.
ქალიშვილს არ ანებივრებდა და ხასიათი გაუკაჟა, მაგრამ არც

ზრუნვასა და სიყვარულს აქლებდა, ამით თაგის სასიკეთო იდეალიზმს უნერგავდა და — როზმერიც აღმერთებდა დედას, ყველაფერს იმისი თვალით ხედავდა და გულუბრყვილობის მიუხედავად, ორმაგადაც იყო დაცული — დედისა და თავისი ჯავშნით, მოწიფულივით უკვე უნდობლად ეკიდებოდა ყველაფერ უხამსს, მსუბუქსა და ვულგარულს. კინოში როზმერის ასეთი უეცარი წარმატების მერე კი მისიზ სპირსმა იგრძნო, რომ დადგა დრო, როცა მკერდიდან უნდა მოეცილებინა, მაგრამ თუ ეს მომთხოვნი, მღელვარე და ძლიერი იდეალიზმი სხვა რამისკენაც წარიმართებოდა, ტკივილზე მეტად სიხარულს უფრო განიცდიდა.

"ასე რომ, მოგწონს აქაურობა?" იკითხა მან.

"აქ შეიძლება კარგად იყო, იმ ხალხს თუ გაიცნობ. სხვე-ბიც იყვნენ პლაჟზე, მაგრამ ისეთები არა; ვერც დაელაპარაკე-ბი. მე მაშინვე მიცნეს. საოცარია პირდაპირ, სადაც არ უნდა წახვიდე, ყველას ნანახი აქვს "მამიკოს გოგო".

მისიზ სპირსმა დააცადა, აგზნებული პატივმოყვარეობა

დაეცხრო და საქმიანი იერით ჰკითხა:

"მართლა, გამახსენდა, როდის აპირებ ერლ ბრედის ნახვას?"

"შეიძლება ამ საღამოსაც, შენ თუ დაღლილი არა ხარ".

"შენ წადი, მე არ წამოვალ".

"მაშინ ხვალისთვის გადავდოთ".

"მე მინდა, რომ მარტო წახვიდე. აქედან შორს არ არის და — თან, გეგონება ფრანგული ენა არ იცოდე".

"მაგრამ, დედია, თუკი არ მინდა?"

"მაშინ, დღეს არა, სხვა დროს წადი. ოღონდ, ვიდრე აქა ვართ, აუცილებლად უნდა ნახო".

"კარგი, დედა".

საუზმის მერე ორთავე უეცარმა სევდამ მოიცვა. ასე ხშირად ემართებათ ხოლმე ამერიკელებს მყუდრო ადგილას, სხვა კონტინენტზე. არაფერი ახალისებდათ, არსაიდან ბიძგი და ხმები, ვერც თავის ფიქრის გამოძახილს ჰპოვებდნენ სხვებში და ეჩვენებოდათ, რომ სამყარო გაჩერდა და ცხოვრება აღარ გრძელდებოდა.

"სამი დღეც და, წავიდეთ აქედან, ჰო, დედა?" თავიანთ

რთახში დაბრუნებისას თქვა როზმერიმ. ზღვიდან მონაბერი სიო ზანტ სიცხეს ერეოდა და გარეთ, ხეებისკენ მიიწევდა, დარაბებიდან გაჰქონდა ცხელი ჰაერი.

"და ის კაცი, პლაჟზე რომ შეგიყვარდა?"

"შენს მეტი მე არავინ მიყვარს, ძვირფასო დედა".

როზმერი ჰოლში გავიდა და უფროს გოსს მატარებლებზე გამოელაპარაკა. კანტორასთან მოწყენით მდგარი ღია ყავისფერლივრეიანი კონსიერჟი გაშტერებული მიაჩერდა, მაგრამ მალე მოეგო გონს, მიხვდა, თავის დაჭერა მართებდა, ისე, როგორც შეეფერებოდა და პროფესიით მოეთხოვებოდა. როზმერი ვაგზალში გაემგზავრა, ავტობუსში ორი მორჩილი ოფიციანტი იჯდა, მოკრძალებით დუმდნენ და ეს დუმილი აღიზიანებდა როზმერის, უნდოდა შეეძახა მათთვის: "რას გაჩუმებულხართ, მიდით, ილაპარაკეთ, იცინეთ, მე სულაც ხელს არ შემიშლითო".

პირველი კლასის კუპეში სულის შემხუთველი სიცხე იდგა. კომპანიების — არლის აკვედუკ პონ დიუ გარის, ორანჟის ამფითეატრისა და შამონის ზამთრის სპორტის — ბდღვრიალა სარეკლამო პლაკატები უფრო სიგრილეს გგვრიდნენ, ვიდრე თვალუწვდენელი რინდი ზღვა. ამერიკული მატარებლებისაგან განსხვავებით, თავიანთი დაძაბული ცხოვრებით რომ ცხოვ-რობენ და ხალხს არ დაგიდევენ, — ესენი სხვა სამყაროდან არიან, სისწრაფე არ იციანო, ეს მატარებელი ერთი ძარღვთაგანი იყო იმ მიწისა, რომელზეც მიქროდა. მატარებლის ქშინვა პალმის ფოთლებს მტვერს ადენდა, მშრალ ნაკელს ბაღებში წიდა ეყრებოდა. როზმერის ეჩვენებოდა, საკმარისი იყო ხელი გაეწვდინა ფანჯარაში და ყვავილებს მოწყ-გეტდა.

კანის ვაგზალთან ათობით დაქირავებული ეტლი იდგა. ელოდნენ და თვლემდნენ მეეტლეები. სანაპიროზე ჩარიგე-ბულ დიდ ოტელებს, კაზინოსა და ფეშენებელურ მაღაზიებს ზაფხულის ზღვისკენ მიექციათ რკინის ყრუ ნიღბები ფასადებისა. ძნელი იყო დაჯერება, რომ აქ ოდესმე "სეზონი" დგებოდა და როზმერის, რომელზეც ვერ იტყოდით, მოდას არ მისდევსო, თითქოს ეუხერხულებოდა, გეგონება რაღაც ჩამკვდარის მიმართ ჰქონდა არაჯანსაღი გემოვნება და გამ-

გლელებსაც კი ვერ გაეგოთ, ვერ მიმხვდარიყვნენ, რად იყო აქ, ამ სიწყნარეში, გასული ზამთრის მხიარულებასა და მერ-მისის ზამთრის სიხარულშუა, და არა იქ, შორით, ჩრდილოეთ-ში, სადაც ახლა ცხოვრება დუღდა.

როზმერი აფთიაქში შევიდა, ქოქოსის ზეთი უნდა ეყიდა, ექიდან გამოსულმა მაშინვე იცნო ის ქალი, მისიზ დაივერიაო, რომ უთხრეს. წინ ჩაუარა, ტახტის ყურთბალიშებით დატვირ-თული, ტროტუართან მდგარი ავტომობილისკენ მიდიოდა. ავტომობილის ფანჯრიდან შავმა ტაქსამ შეუყეფა. შოფერს ჩაეთვლიმა, გამოფხიზლდა და სწრაფად გაუღო კარი. მისიზ დაივერი მანქანაში ჩაჯდა, გამართული, მოწესრიგებული, მშვენიერ სახეზე ღიმმოუგვრელი. შეუპოვარი მზერა სადღაც, სიცარიელისკენ მიეპყრო, ღია წითელი ფერის კაბა ეცვა, შიშველი ნამზეური ფეხები მოუჩანდა, ჩაუს ჯიშის ძაღლსა-ვით მბზინვარე მუქ ხშირ თმას ოქროსფერი დაჰკრავდა.

მატარებლის მოსვლამდე კიდევ ნახევარი საათი იყო და როზმერი კრუაზეტზე კაფე "კავშირში" შევიდა, სადაც ხეებისაგან მწვანე ბინდბუნდი ედო მაგიდებს. ორკესტრს წარმოსახვაში კოსმოპოლიტი მსმენელები ჰყავდა, მათთვის უკრავდა "საამო საკარნავალო სიმღერასა" და შარშანდელ ამერიკულ მელოდიებს. როზმერის უკვე "Le Temps" და "სეტერდი ივნინგ პოსტ" ეყიდა დედისათვის, ახლა ერთი ჭიქა ლიმონათი დალია და "პოსტში" დაბეჭდილ რომელიღაც რუსი თავადის ასულის მემუარებს გადახედა. ოთხმოცდაათიანი წლების ბუნდოვანი და პირობითი ფრაზები უფრო რეალურად და ბუნებრივად ეჩვენებოდა, ვიდრე დღევანდელი ფრანგული გაზეთების სათაურები. ისევ ის გაუცნობიერებელი სევდა მოეძალა, ოტელშივე რომ იგრძნო, მიჩვეული იყო, რომ კონტინენტური ყოფის გროტესკულობა ან ტრაგედიად იყო ხოლმე ასახული გაზეთებში, ანდა კომედიად და უძნელდებოდა თვითონვე დაენახა ახლა რაიმე არსებითი, და ამიტომაც, ცხოვრება საფრანგეთში მოსაწყენი და ერთფეროვანი ეჩვენებოდა. ამ სევდას კიდევ უფრო უმძაფრებდა უღიმღამო მელოდიები, ის მელანქოლიური მუსიკა ახსენდებოდა, ვოდევილებში აკრობატების გამოსვლისას რომ ასრულებენ და უხაროდა, რომ გოსის ოტელში დაბრუნდებოდა.

მხრები ისე ჰქონდა დამწვარი მზისგან, მეორე დღეს ზღვაზე ვერ გავიდოდა და ამიტომაც, ავტომობილი იქირავეს დედასთან ერთად კარგა დიდხანს კი ურიგდებოდა მძღოლს, როზმერიმ საფრანგეთში იგრძნო პირველად ფულის ფასი და რივიერის, ბევრი მდინარის დელტის გაყოლებაზე გაისეირნეს. შოფერმა, ივანე მრისხანის ხანის ბოიარინს რომ ჰგავდა, ხალისით ითავა გიდობა და ისეთმა საუცხოო სახელებმა; როგორიცაა ნიცა, კანი, მონტე-კარლო, მთელი თავიანთი ბრწყინვალებით გაიელვეს და წარმოჩნდნენ იმათს მოდუნებულ ყოველდღიურ კამუფლაჟში, თითქოს გაცოცხლდნენ მეფეები, რომლებიც აქ ჩამოდიოდნენ, რათა ელხინათ ან მომკვდარიყვნენ, რაჯები, ინგლისელ ბალერინებს ბუდას თვალებს რომ სტყორცნიდნენ, და რუსი თავადები, მთელ კვირებს ბალტიისპირულ მწუხრად რომ აქცევდნენ იმ დღეების მოსაგონებლად, თავზე საყრელად როცა ჰქონდათ ხიზილალა, რუსული სული და რუსების ნაკვალევი ყველაზე უფრო მკაფიოდ იგრძნობოდა და ჭარბობდა მთელ სანაპიროზე. ბევრგან ნახავდით ახლა უკვე დახურულ რუსული წიგნებისა თუ რუსულ საბაყლო მაღაზიებს. იმ წლებში, როცა სეზონი თავდებოდა აპრილში, რივიერაზე მართლმადიდებლური ეკლესია დაიხურა, რუსებმა თავიანთი საყვარელი სასმელი შამპანური ახალ სეზონამდე გადაინახეს, ჩამოვალთო მომავალი სეზონის დამდეგს, თქვეს მაგრამ ამაოდ დარჩა ეს ნათქვამი, წავიდნენ და მერე აღარ დაბრუნებულან.

სიამე იყო უკან, ოტელში დაბრუნება, საღამოთი ქვევით ზღვა ჩანდა, — იდუმალად ფერადოვანი — ბავშვობის ხანის სარდიონები და აგატები, მომწვანო ფერის — რძიანასავით ცისფერი — წყალი გარეცხვის მერე, ღვინო — წითელი. სიამეს ჰგვრიდათ სახლების ჩავლა, დანახვა ხალხის, იმათი, ვინც ვერანდებზე წაიხემსებდნენ; ვაზმოხვეული სოფლურ სახამროს მექანიკური პიანინოს ჟღრიალა ხმაც სიამეს ჰგვრიდათ. როცა მანქანა კორნიშიდან გამოვიდა და გოსის ოტელისკენ დაეშვა, ხეების მრუმ სიმწვანეში გახვეულ აკვედუკის გორახკალთება ახვეულ ნანგრევებს უკვე ნუგეშინივით უცქერდა მთვარე...

რტელის ზევით, სადღაც გორაკებზე სეირნობდნენ, მუსიკის ხმა მთვარის მქრქალ შუქთან ერთად ატანდა როზმერის
ოთახს იმ სარკმლიდან, რომლისთვისაც ქინქლებისაგან დასაცავად ბადე აეკრათ. როზმერიმ ყური მიუგდო, სადღაც მხიარულობდნენ და ის ხალხი გაახსენდა, პლაჟზე რომ ნახა. შესაძლოა ხვალ დილით ისევ შეხვდეს მათ, თუმცა, ეტყობა, გარიყულად ცხოვრობენ, ცალკე იქნებიან, თავიანთთვის, თავიანთ ქოლგებქვეშ, პლედებით, თავიანთი ძაღლებითა და ბავშვებით და პლაჟის ის თავიანთი მონაკვეთიც უხილავი ზღუდით იქნება შემოვლებული. ასე თუ ისე, რაც გინდა იყოს,
ბოლო ორი დღის დილას იმ ხალხს, მაკისკოს კომპანიას აღარ
დაუთმობს.

IV.

ყველაფერი თავისი გზით წავიდა. მაკისკოები ჯერაც არ მოსულიყვნენ პლაჟზე. როზმერიმ, ის-ის იყო, გაიძრო ხალათი და გაწოლას აპირებდა, რომ მარცხენა მხრიდან ჯგუფს ორი კაცი გამოეყო — ჟოკეისქუდიანი და ისა, ოფიციანტების ხერ-ხვის მანია სჭირსო, რომა თქვეს, როზმერისაკენ წამო-ვიდნენ.

"დილა მშვიდობისა", თქვა დიკ დაივერმა და მაშინვე, ესეც ჰკითხა: "გუშინ ალბათ დაიწვით მზეზე, მაგრამ დაიწვით თუ არ დაიწვით, აღარ გამოჩნდით და რა მოხდა? შევშფოთდით".

როზმერი წამოჯდა, ბედნიერად გაიღიმა, რა კარგია, რომ

შეშფოთდნენ როზმერის გამო.

"იქნებ ამ დილით ჩვენკენ გადმოხვიდეთ?" ისევ დიკ დაივერმა თქვა, "საჭმელი არის, დასალევიც გვაქვს, და ურიგო მიწვევა არ უნდა იყოს".

კეთილი იყო და ლამაზი. ხმა თითქოს მფარველობასა და ზრუნვას, უფრო გვიან კი სულ ახალ, უჩვეულო სამყაროს გადაშლას ჰპირდებოდა, დაუსრულებელ, ერთიმეორეზე მომხიბლავსა და მიმზიდველ შესაძლებლობებს. თავის მეგობრებს ისე წარუდგინა როზმერი, რომ მისი სახელი არც წარმოუთ-ქვამს, მაგრამ იმავ დროს, აგრძნობინა, რომ იცნობენ და უნარი შესწევთ პატივიცა სცენ იმის ნებას — როგორც უნდა ისე იცხოვროს. ასეთი ტაქტი და თავაზიანობა, თუ იმ პროფე-

სიონალებს არ ჩავთვლით, კინოში წარმატების მერე რომ დაუმეგობრდა, როზმერის თითქმის აღარავისგან არ ახსოვდა.

ნიკოლ დაივერის ნამზეურ ზურგზე სალუქად მუქი მარგალიტი ირეკლებოდა. წიწილის მერილენდურად მომზადების რეცეპტს ეძებდა თავის წიგნში. როზმერის ვარაუდით, დაახლოებით ოცდაოთხი წლისა უნდა ყოფილიყო, სახეზე როცა შეხედავდით, უმალ იტყოდით, ლამაზიაო, ეს თავისთავად, ერთი შეხედვით, მაგრამ მერე ის შთაბეჭდილება უფრო კრჩებოდათ, თითქოს ეს სახე ძლიერ, როდენისებურ ძალას გამოეძერწა, თავიდანვე ისე იყო ჩაფიქრებული, რომ მშვენიერებასთან ერთად საცნაური ყოფილიყო ხასიათიც და ტემპერამენტიც, ოღონდ სახის ნაკვთებით, ლამის ჩვეულებრივ სილამაზემდე დაჰყავდა იგი, და ყველაზე მეტად ამას ბაგის მიხედვით თუ იტყოდით, გეგონება მოქანდაკე სასოწარკვეთით შეეცადაო თავის საჭრეთლით — კუპიდონის მშვილდივით მოხრილი, ისეთი, ჟურნალების ყდებზე დაბეჭდილ ქალებს რომა აქვთ, ოღონდ მაინც თავისებური, ისევე, როგორც სხვა ნაკვთები.

"დიდი ხნით ჩამოხვედით?" ნიკოლ დაივერმა ჰკითხა; და-

ბალი, ცოტა მკვეთრი ხმა ჰქონდა.

როზმერიმ გაიფიქრა, რომ შეეძლო კიდევ ერთ კვირასაც

დარჩენილიყო.

"არა, დიდი ხნით არა", გაურკვევლად უპასუხა. "უკვე კარგა ხანია ვმოგზაურობთ ევროპაში, მარტში სიცილიაში ჩავედით და იმის მერე ნელ-ნელა ჩრდილოეთისაკენ მივიწევთ. იანვარ-ში, გადაღების დროს ფილტვების ანთება დამემართა და საჭი-რო გახდა ჩემი თავისთვის მიმეხედა".

"ოჰ, რანაირად?"

"ცურვის დროს", არ ეხალისებოდა თავის ამბებზე ლაპარაკი. "თურმე გრიპი მქონდა და არ ვიცოდი, იმ დღეს იღებდნენ ეპიზოდს, როცა მე ვენეციის არხში ვხტები. დეკორაცია
ძალიან ძვირი დაჯდა და გადადება აღარ უნდოდათ, ეს ბევრ
სირთულეს იწვევდა, სხვა გზა არ იყო, მე ერთი ათჯერ მომიხდა წყალში ჩაყვინთვა, მეტჯერ თუ არა. დედამ მაშინვე მოიყვანა ექიმი იქვე, გადაღების ადგილზე, მაგრამ საქმე მაინც
იმით დამთავრდა, რომ ფილტვების ანთებას ვერ გადავურჩი".

დაამთავრა და ჩქარა იკითხა, რომ სხვა თემაზე გადასულიყვნენ:

"მოგწონთ აქ?"

"ამათ არ შეიძლება არ მოეწონოთ ეს ადგილი", ჩაილაპარაკა ეიბ ნორთმა. "თავისით, თვითონ შექმნეს". ნელა მიატრიალა მშვენიერი, კეთილშობილი თავი და ცოლ-ქმარ დაივერებს სიყვარულით, ნაზად შეავლო თვალი.

"მართლა?"

"ეს მეორე წელია რაც ზაფხულში ოტელი აღარ იხურება", აუხსნა ნიკოლმა. "შარშან გოსი დავიყოლიეთ ერთი მზარეუ-ლი, ერთი ოფიციანტი და ერთიც შიკრიკი ბიჭი დაეტოვებინა. ასეც მოიქცა და წელს კიდევ უფრო კარგად მიდის საქმე".

"მაგრამ თქვენ ხომ ოტელში არ ცხოვრობთ".

"ჩვენ სახლი ავაშენეთ ზევით, ტარმში".

"ვარაუდი ასეთი იყო", თქვა დიკმა და ერთი ქოლგა გადააადგილა, რადგან როზმერის მხარს ეცემოდა ახლა მზის სხიგი. "ჩრდილოეთის აგარაკები, როგორც მაგალითად დოვილი,
სავსეა სიცივეს მიჩვეული რუსებითა და ინგლისელებით, ამერიკელები კი უმეტესად ტროპიკულ კლიმატში ცხოვრობენ და
ხალისით ჩამოვლენ აქ".

რომანული გარეგნობის ახალგაზრდა კაცი "ნიუ-იორკ ჰე-

რალდის" პარიზის გამოშვებას ფურცლავდა..

"სცადეთ ერთი და გაიგეთ, რა ეროვნებისაა ეს ხალხი, ძნელი საქმეა", წამოიძახა და ოდნავ ფრანგული აქცენტით ჩაიკითხა: "ვევეში, "პალას ოტელში" ცხოვრობენ მისტერ პანდელი ვლასკო, ქალბატონი სახედარა — არ ვაჭარბებ, ზუსტად ასე წერია — კორინა მედონკა, ქალბატონი პაშე, სერაფიმ ტულიო, მარია ამალია როტო მაის, მოზეს ტიუბელი, ქალბატონი პარაგორისი, მოციქული ალექსანდრ, იოლანდა იოსფუგლუ და ჟენევიევა დე მომუს". ყველაზე მეტად ეს ჟენევიევა დე მომუსი მაგიჟებს. ნამდვილად ღირს ვევეში გასეირნება ამ ჟენევიევა დე მომუსის სანახავად".

უცებ წამოხტა, თითქოს რაღაც მოხვდაო და სწრაფად გასწორდა წელში. დაივერზეც და ნორთზეც რამდენიმე წლით უმცროსი იქნებოდა. მაღალი, ძლიერი აღნაგობის, მაგრამ გამ-ხდარი; მხოლოდ მხრები და მკლავები ჰქონდა ძალუმი; ლამა-ზი მამაკაციაო, იტყოდით, მაგრამ აგდებული იერი ჰქონდა და

ეს უშლიდა. თუმცა ბრაზიანი და თაფლისფერი, ბორგნეული თვალების ელვარება უფრო გამახსოვრდებოდათ და მოწყენისაგან ჟინიანი პირიცა და გულფიცხობის კვალიც, ჭაბუკურ შუბლზე, გავიწყდებოდათ.

"წინა კვირას ჩამოსული ამერიკელების სიაშიც რამდენიმე კარგი გვარი შეგვხვდა", თქვა ნიკოლმა, "მისიზ ივლინ ხამან-

წკა და კიდევ — კიდევ ვინა?"

"კიდევ — მისტერ ს. გვამი", თქვა დაივერმა და ისიც წამოდგა. ნიჩაბი აიღო და საქმეს შეუდგა — ქვიშიდან კენჭებს ყრიდა.

"ჰო, — ს. გვამი, არ აგბურძგნის?"

ნიკოლთან რაღაც საოცარ სიმშვიდეს გრძნობდა; უფრო მეტ სიმშვიდეს, ვიდრე დედასთანო, გაიფიქრა როზმერიმ. ეიბ ნორთი და ფრანგი ბარბანი მაროკოში მომხდარ ამბებზე ლაპარაკობდნენ და ნიკოლმა, რაკი უკვე იპოვა საჭირო რეცეპტი, კერვას მიჰყო ხელი. როზმერი ცნობისმოყვარეობით ათვალიერებდა იმათი პლაჟის უძრავ ქონებას — ოთხ დიდ ქოლგას, კარგ, საიმედო ჩრდილს რომ აყენებდა, დასაკეც კაბინას — ტანსაცმლის გამოსაცვლელად, გასაბერი რეზინის ცხენს; როზმერისთვის ეს ყველაფერი ომისშემდგომი გამოშვების სიახლე იყო, ფუფუნების ახალ-ახალი საგნები, რამაც პირველი მომხმარებლები იშოვა უკვე. ეს ხალხი მაღალ წრეს ეკუთვნოდა და მიუხედავად აღზრდისა და დედის ჩაგონებისა, ასეთ ხალხს უნდა ერიდოო, როზმერის აქ ეს არ შეეძლო, დილით, მზეზე, დროის ნებიერად ტარების დროსაც კი ამათი ამაოება, გააზრებულ, რაღაც მიზნისაკენ მიმართულ უძრაობად ეჩვენებოდა, თითქოს მის წინაშე შეუცნობელი და უჩვეულო რამ სრულდებოდა. როზმერის გონება ვერა სწვდებოდა და არც ცდილა გაერკვია მთელი მათი ურთიერთობა, ახლა მისთვის სხვა უფრო იყო საინტერესო — იმათი ურთიერთობა როზმერისთან, ბუნდოვნად გრძნობდა რაღაცა ხლართს, ვერ გაეგო, მაგრამ შეეძლო ფიქრში, სულაც უბრალოდ, ასე ეთქვა: ძალიან კარგ დროს ატარებენ.

დროდადრო სამივე მამაკაცს უყურებდა. სამთავე — თავისებურად საინტერესო, მშვიდი, თავდაჭერილი მიხრა-მოხრაში, და ეს ბუნებრივი თავდაჭერა სულ არა ჰგავდა მსახიობების თავდაჭერას, ისევე როგორც ადრე შემჩნეული თავაზიანობა და ტაქტი არ ჰგავდა იმ რეჟისორების ტლანქ ურთიერთობას ინტელიგენციას რომ ასახიერებდნენ როზმერის ცხოვრებაში მსახიობები და რეჟისორები — სხვა მამაკაცებს როზმერი არც იცნობდა, თუ კოლეჯის სტუდენტებს არ ჩავთვლით, ერთი დანახვისთანავე რომ სწყუროდათ სიყვარული და წყლის წვეთებივითა ჰგავდნენ ერთმანეთს. იმათ, შარშან, შემოდგომაზე იელის უნივერსიტეტის საღამოზე შეხვდა როზმერი.

ეს სამთავე კი სულ არ ჰგავდა ერთიმეორეს. ბარბანი — გერ იტყოდით, ძალიან თავშეკავებულიაო, უფრო მეტად სკეპ-ტიკური და მქირდავი, ზოგჯერ ცოტა დაუდევარიც ურთიერ-თობაში. ეიბ ნორთს თანდაყოლილ სიმორცხვესთან ერთად ჭარბი იუმორიც ახასიათებდა. ეს იუმორი იზიდავდა და აში-ნებდა კიდევაც როზმერის, რადგან არა სჯეროდა, რომ რაიმე

შთაბეჭდილების მოხდენა შეეძლებოდა ასეთ კაცზე.

დიკ დაივერი კი, — დიკი სხვა იყო, სრულყოფილი. როზმერი აღმერთებდა მას, უხმოდ, უსიტყვოდ. დიკის ნამზეურ,
ქარდაკრულ კანსა და მოკლე თმასაც მოწითალო ფერი დაჰკრავდა. მკლავებიც მზისგან გარუჯოდა, ცისფერი თვალები
უელავდა. ცოტათი წვეტიანი ცხვირი ჰქონდა, ლაპარაკისას
კი — ეჭვიც არ გებადებოდათ ვის მიმართავდა, ამით ძალიან აამებდა მოსაუბრეს, რადგან — განა ასე ხშირად
გვიყურებენ? ბევრი-ბევრი გადმოგხედონ, გულგრილად ან
ცნობისმოყვარედ, ეს არის და ეს. ირლანდიური ჟღერადობის,
ალერსით სავსე ხმა გატყვევებდათ, მაგრამ ამ ხმაში როზმერი
სიმტკიცესა და ძალასაც გრძნობდა, თავშეკავებასაც და ამტანობასაც, იმ თვისებებს, რომლებსაც თვითონაც აფასებდა თავის თავში. ჰო, აირჩია; ნიკოლმა თავი ასწია და მიხვდა ამას,
რაკი წყნარი ოხვრა მოესმა — არჩევანი ხომ სხვისი იყო.

შუადღისას პლაჟზე გამოვიდნენ ცოლ-ქმარი მაკისკოები, მისიზ აბრამზი, მისტერ დამფრი და სენიორ კემპიონი. ახალი, დიდი ქოლგა მოიტანეს, დაამაგრეს, დაივერებს გადახედეს და მერე ყველა, შიგ შეიყუჟნენ, მისტერ მაკისკოს გარდა, თით-ქოსდა ჯიბრით, ეს გარეთ, მზის გულზე დარჩა. დიკმა თავის ნიჩბებიანად სულ ახლოს გაუარა მათ და ქოლგებთან მი-ვიდა.

"ის ყმაწვილები ეთიკის წიგნს კითხულობდნენ ერთად", ხმადაბლა თქვა.

"მაღალ წრეში გარევა და ტრიალი მოსურვებიათ", ჩაილა-

პარაკა ეიბმა.

მერი ნორთი, ყველაზე მზემოკიდებული ქალი, ისა, როზმერიმ პირველ დღეს ტივზე რომ ნახა, ბანაობიდან დაბრუნდა და საკმაოდ უდიერი სიცილით თქვა:

"აჰა, მისტერ და მისიზ არაცახცახებიც აქ მოსულან".

"გაჩერდით, ისინი ამ კაცის მეგობრები არიან", შეახსენა ნიკოლმა და ეიბზე მიუთითა. "რატომ არ მიხვალთ მეგობრებ-თან და არ დაელაპარაკებით? არ მოგწონთ ეს ხალხი?"

"არ მომწონს კი არა, ძალიან მომწონს", თქვა ეიბმა, "მა-

გათზე ვფიქრობ დღე და ღამე".

"ასეც ვიცოდი, ამ ზაფხულს ბევრი ხალხი იქნებოდა აქ". ჩაილაპარაკა ნიკოლმა. "არადა, ეს ჩვენი ადგილია, დიკი თავისი ხელით აგროვებდა კენჭებს, თვითონ გააკეთა ეს პლაჟი". მერე ცოტა დაფიქრდა და ხმადაბლა, ისე რომ მოშორებით მყოფ ძიძებს არ გაეგონათ, დაუმატა: "ისე კი, წლევანდელი ხალხი სჯობია შარშანდელ ინგლისელებს, დილიდან საღამომდე იმათი ხმა ისმოდა პლაჟზე: "რა ცისფერია ზღვა! რა თეთრი ცაა! როგორ გაუწითლდა ცხვირი პატარა ნელის!"

მტრისას ნიკოლის გადაკიდება, გაიფიქრა როზმერიმ.

"მაგრამ თქვენ არ გიყურებიათ ჩხუბისთვის", თქვა ნიკოლმა, "თქვენი ჩამოსვლის წინა დღეს მოხდა. ცოლიანი კაცი, უცნაური გვარი რომა აქვს, მარგარინისა, თუ რაღაც საწვავის სახელს მოგაგონებს…"

"მაკისკო?"

"ჰო, ჰო, — ცოლს წაეჩხუბა, ცოლმა მუჭით ქვიშა შეაყარა სახეში. ამან კიდევ თავი დააღუნინა და ცხვირს ქვიშაში აყოფინებდა. გავშტერდით. მინდოდა დიკი ჩარეულიყო და გაეშველებინა."

"მოვიფიქრე", დაიწყო დიკმა და უაზროდ ჩააშტერდა ჭილოფს, "ყველას ჩამოვუვლი და სადილად დავპატიჟებ".

"არ არის საჭირო", ლამის იყვირა ნიკოლმა.

"მე ვფიქრობ, შესანიშნავი აზრია. რაკი აქ არიან, გავუ<sup>ში</sup>ნაურდეთ კიდევაც".

"ძალიაჩაც ვართ გაშინაურებულები", სიცოლით ამბობდა ნიკოლი, "სულაც არ მინდა ადგნენ და ცხვირ-პირი ჩამაყო-ფინონ ქვიშაში. მე ავი ვარ და უკარება". აუხსნა როზმერის. მერე წამოიწია და ხმამაღლა გასძახა შვილებს: "გაემზადეთ საბანაოდ!"

როზმერიმ იგრძნო, რომ დღევანდელი ცურვა მაგალითივით გაჰყვებოდა მთელ ცხოვრებაში, როცა კი უნდა ყოფილიყო და რაც უნდა ეთქვათ ზღვაზე, მაშინვე თვალწინ ეს დღე დაუდგებოდა. ყველანი ერთად, ხალისით შევიდნენ ზღვაში, ამდენ ხანს ძალაუნებურად უქმად ყოფნისა და პაპანაქება სიცხის მერე, ცხარე საწებლიან გემრიელ საჭმელზე ყინულჩაგდებული თეთრი ღვინის დაყოლებით სიამოვნებამოგვრილი გურმანებივით სიგრილე მოუნდათ და ზღვას მისცეს თავი. ძველი ცივილიზაციის ხალხებივით, დაივერებს დღე ისე ჰქონდათ დაყოფილი, რაც შეიძლება ესარგებლათ, რომ ერთი შეგრძნებიდან მეორეზე გადასვლით სიმძაფრე შეემატებინათ ორივესთვის და როზმერიმ ჯერ კიდევ არ იცოდა, რომ ერთი ასეთი სიმძაფრეც ელოდა — ზღვაში ყოფნის თავდავიწყებიდან პროვანსულ საუზმეზე გადასვლისა, და ახლაც დიკი იყო თითქოს მისი ქომაგი და მფარველობდა, და ამიტომაც ხალისით მიჰყვა ყველას, გეგონება უხმოდ უბრძანეს.

ნიკოლმა ის რაღაცა, მთელი დღე რომ უტრიალებდა, ქმარს გადასცა. დიკი კაბინას. მოეფარა და ცოტა ხნის მერე იქიდან მუხლებამდე შავი მაქმანის ტრუსით გამოვიდა. ამან ერთი ამბავი გამოიწვია პლაჟზე, თუმცა, ახლო რომ ნახეს, შეამჩნიეს, პირისფერი სარჩული ედო.

"იცით რა, ეს უკვე პედერასტის საქციელია", აღშფოთეზით წამოიძახა მისტერ მაკისკომ, მაგრამ მაშინვე მისტერ დამფრისა და მისტერ კემპიონისკენ გაიხედა და დაუმატა, "ბოდიშს ვიხდი".

მაქმანიან ტრუსზე, როზმერიმ, აღტაცებისაგან ლამის იბღავლა. თავისი გულუბრყვილობის გამო იყო, რომ დაივერების აწყვეტილ ხუმრობას აჰყვა და ვერა ხვდებოდა, რომ ეს ყველაფერი არც ისე მიამიტური იყო. როგორცა ჩანდა, რომ ყველა-

Scanned by CamScanner

ფერი გულდასმით მოეფიქრებინათ სააშკარაოზე, ცხოვრების ბაზარზე გამოსატანად და თანაც, რაოდენობას კი არა, ხარისხს შეხედეთო, თითქოს გეუბნებოდნენ, დაკინებით მოითხოვდნენ, ესეც, ისევე, როგორც სხვა ყველაფერი, უბრალოება ურთიერთობაში, სიკეთე და ბავშვური უშფოთველობა, უბრალო ადამიანური ღირსებების ყველაზე მაღლა დაყენება — ლმერთებთან სასოწარკვეთილი, უგუნური გარიგების წილს ხვდომაა და მიღწეულია ისეთ ბრძოლაში, რომელსაც ვერც კი წარმოიდგენდა. დაივერები იმხანად თავიანთი კლასის ევოლუ-ციის მწვერვალზე იდგნენ და ამიტომაც ამათ გვერდით ბევრი მოუქნელი და უხეში ჩანდა, თუმცა უკვე იჩენდა თავს თვისობრივი ცვლილება, მაგრამ ამას როზმერი ვერ შეამჩნევდა.

სხვებთან ერთად ისიც ხერესს სგამდა და ნამცხვარს აყოლებდა. დიკ დაივერმა ცივი, ცისფერი თვალებით შეხედა მას, მერე ძლიერი, ალერსიანი ბაგე გაეხსნა და ფიქრიანად უთხრა:

"ყვავილსა ჰგავხართ, დიდი ხანია თქვენნაირი ქალიშვილი აღარ მინახავს".

ერთი საათის მერე როზმერის დედის კალთაში ჩაერგო თავი და ქვითინებდა.

"მიყვარს, საშინლად მიყვარს, დედა, ვერც კი ვიფიქრებდი, ასე თუ შემეძლო ვინმეს შეყვარება. არადა, ცოლი ჰყავს, და ისიც ძალიან კარგია. რა მეშველება, ძალიან მიყვარს!"

"შემახედა მაინც, როგორია".

"პარასკევს სადილად მიგვიწვია".

"თუ გიყვარს, უნდა გიხაროდეს და იცინოდე, კი არ უნდა ტიროდე".

როზმერიმ დედას ახედა. თავი ლამაზად შეარხია, ცრემლები მოიშორა და გაიღიმა. დედას ყოველთვის დიდი გავლენა ჰქონდა მასზე.

۷

როზმერი მონტე-კარლოში წავიდა. ცუდ ხასიათზე იყო, რამდენადაც საერთოდ შეეძლო ცუდ ხასიათზე ყოფნა. უსწორ-მასწორო და მიხვეულ-მოხვეულმა გზამ ლა-ტურბამდე, გომო-

ნის ძველ სტუდიამდე მიიყვანა. იმჟამად იქ რეკონსტრუქცია მიმდინარეობდა და სანამ როზმერი ერლ ბრედისამდე შეგზავ-ნილ ბარათზე პასუხის მოლოდინში გისოსებიან ჭიშკართან იცდიდა, მოეჩვენა, რომ ჰოლივუდში იყო. ჭიშკრის იქით რომელიდაც უკვე გადაღებული სურათის მერე დარჩენილი ჭრელაჭრულა ხარახურა ეყარა,— მინგრეულ-მონგრეული ინდური დასახლების სცენა, პაპიემაშეს დიდი ვეშაპი, კალათბურთის ბურთებისოდენა ალუბლებიანი რაღაცა ხე, ეგზოტიკურ ხეს, ფერმიხდილ ამარანტსა თუ მიმოზას, ან კორპის მუხასა თუ ჯუჯა ფიჭვს რომ მოგაგონებდათ. მოშორებით გადაღებებისათვის ძველი ფარდულების მსგავსი ორი პავილიონი იდგა, იმათ შუა კი — კაფე-ფარდული, და ყველგან სახეები, შეღებილი, მოლოდინითა და ამაო იმედით სავსე სახეები.

ათი წუთის მერე იადონის ბუმბულის ფერის თმიანმა

ახალგაზრდა კაცმა მოირბინა ჭიშკართან.

"გთხოვთ, მისს ჰოიტ, მისტერ ბრედი გადამღებ ჯგუფთან არის, მაგრამ თქვენ მოუთმენლად გელით. ძალიან ვწუხვარ, ამდენ ხანს რომ ელოდებოდით. ვერ წარმოიდგენთ, რა მომა-ბეზრებლები არიან ეს ფრანგი მანდილოსნები, ზოგჯერ არც კი იცი, რანაირად დააღწიო თავი..."

ამ კაცმა, ალბათ სტუდიის მენეჯერი რომ იყო, ერთ-ერთი პავილიონის ყრუ კედელში გაჭრილი შეუმჩნეველი კარი გამოაღო და როზმერი, უეცრად გახარებული იმით, რომ იცნეს, იმას მიჰყვა და სადღაცა ბნელში შეაბიჯა. აქეთ-იქით ბუნდოვნად ირეოდნენ მისკენ მიმართული ფერფლისფერი სახეები, განსაწმენდელში მყოფ სულებს ჰგავდნენ, შეშფოთებულებს თავიანთ სამყაროში მოკვდავის გამოჩენით. ჩახშობილი, ლამის მოჩურჩულე ხმები, სადღაც შორიდან კი — ფისჰარმონიის მოღუღუნე ტრემოლო მოისმოდა. ფიცრებით შემოზღუდულ კუთხეს შემოუარეს და იმათ წინ თვალისმომჭრელად განათებული ადგილი გაიშალა, აქ ერთმანეთის პირისპირ იდგა ამერიკელი აქტრისა, და — აქტიორი — ეს ფრანგი იყო, გახამებულ პერანგიანი, ღია ვარდისფერ საყელოიანი და მანჟეტებიანი. გეგონება ვიღაცას ეთქვა, რამდენიმე საათს უნდა გაშეშდეთო და იდგნენ ასე, გაშეშებული, მაგრამ ხანი გადიოდა და არაფერი ხდებოდა. გაჩახჩახებული მხარე გამუქდა, ჩაბნელდა,

უსიამო ჟორიალი გაისმა და სინათლე ჩაქრა, მერე კვლავ აინთო. შორიახლო, თითქოს არსაით, ჩაქუჩის ხმა გაისმა საწყლად. ზე-ვით, თვალისმომჭრელ განათებებშუა სახე გამოჩნდა, ბნელ სახურავქვეშ ვიღაცამ რაღაცა დაიძახა და მერე ისევ სიჩუმე ჩამოვარდა. როზმერიმ გაიგონა—

"წინდები არ გაიხადო, ბავშვო, არაფერია, თუნდაც ათი

წყვილი დახიე. ეს კაბა თხუთმეტი გირვანქა ღირს".

ამისი მთქმელი თან უკან-უკან იხევდა, ვიდრე როზმერის არ მიაწყდა, მაშინ იყო, რომ მენეჯერმა თქვა:

•"ჰეი, ერლ—მისს ჰოიტი".

პირველად შეხვდნენ ერთმანეთს. ბრედი მკვირცხლი და ენერგიული იყო. ხელის ჩამორთმევისას თავიდან ფეხებამდე შეათვალიერა — ეს ჟესტი უცნობი არ იყო როზმერისათვის, მისთვის ჩვეულ გარემოში შეჰყავდა ამას, რის გამოც იგი, უპირატესობასა გრძნობდა ხოლმე. თუკი, მას, როგორც პიროვ-ნებას, ყველა აფასებს, რატომაც არა, კიდევაც უნდა ესარგებ-ლა ამით როზმერის.

"ყოველდღე გელოდით". ბრედის ხმას კოკნის აქცენტი დაჰკრავდა, ერთგვარი ძალდატანებაც ეტყობოდა, თითქოს ცდილობდა, ჩვეულებრივზე უფრო უკეთ ელაპარაკა. "კმაყო-

ფილი ხართ მოგზაურობით?"

"დიახ, მაგრამ უკვე შინისკენ მიგვიწევს გული".

"ა-არა", შეეპასუხა ბრედი, "მინდა მოგელაპარაკოთ, მე ვნახე თქვენი "მამიკოს გოგო"; პარიზში ვნახე და მაშინვე ტელეგრაფით გავიკითხე, ახალი კონტრაქტი გაქვთ თუ არა".

"მე ეს-ეს არის..."

"ღმერთო, რა ფილმია!"

როზმერიმ იგრძნო, ახლა გაღიმება სულელურ თანხმობას ნიშნავდა და წარბები შეიჭმუხნა.

"მაინცდამაინც სასიამოვნო არ არის ასეთი ხვედრი <u>ე</u>რთი სურათი".

"ცხადია, ახლა რას აპირებთ?"

"დედა ამბობს, რომ დასვენება მჭირდება. დაბრუნებისას ჩვენ ალბათ ახალ კონტრაქტს დავდებთ "ფეიმეს პლეიერზ-თან", ანდა კიდევ "ფერსტ ნეშნლთან".

"ვინ "ჩვენ?"

"დედა. ჩემს საქმეებს დედა აგვარებს. უიმისოდ მე ვერ

შევძლებდი".

ისევ თავიდან ფეხებამდე შეათვალიერა და როზმერიმ უეცრად როგორღაც, თვითონაც უპასუხა ამ შეხედვახ. არ მოხიბლულა და არ აღფრთოვანებულა, არაფერი იმის მსგავსი, რაც
ამ დილით იგრძნო და რამაც ეგრერიგად მოიცვა პლაჟზე. ეს
რაღაც გაელვებასა ჰგავდა, წამიერს. ბრედის სურდა იგი. და
ქალიშვილურ დათრგუნულ წარმოსახვას ხელი არ შეუშლია
წარმოედგინა, რომ შესაძლოა სულ უშფოთველად, დათმობაზეც წასულიყო. მაგრამ ცოტა ხნის მერე დაავიწყდებოდა —
ისე როგორც ის მსახიობი, ვისაც გადაღებისას კოცნიან ხოლმე.

"სად ცხოვრობთ?" ჰკითხა ბრედიმ, "აჰა, გოსის ოტელში. იყოს ასე, წლევანდელ წელს მეც ყველაფერი ამოვწურე. ოღონდ, ის, რასაც ადრე წერილში გწერდით, ძალაში რჩება. კონი ტოლმეჯის მერე, ეს მაშინ, როცა ნორჩი იყო, მხოლოდ თქვენ თუ გადაგიღებდით".

"იგივე შემიძლია გითხრათ. დიახ, ვითამაშებდი თქვენთან,

ფილმში. რატომ არ უბრუნდებით ჰოლივუდს?"

"ვერ ვიტან მაგ წყეულ ადგილს. აქაც ძალიან კარგადა ვარ. დაიცადეთ — ამ ეპიზოდს ჩავათავებ და ყველაფერს გაჩვე-ნებთ".

ბრედი გადამღებ ჯგუფთან მივიდა, თითქმის ჩურჩულით,

წყნარად უხსნიდა ფრანგ აქტიორს რაღაც-რაღაცას.

ხუთი წუთი გავიდა — ბრედი ლაპარაკობდა და ლაპარაკობდა. ფრანგი კი უსმენდა, დროდადრო ფეხს ფეხზე გადაიდებდა და თავს დაიქნევდა. მაგრამ უცებ შეწყვიტა ლაპარაკი და გამნათებლებს რაღაცა დაუძახა. იმავე წამს ზუზუნი და ზრიალი გაისმა და თვალებმომჭრელად აკაშკაშდა იქაურობა. ლოს-ანკელესი ეძახდა ხმამაღლა როზმერის, იქაური ხმაური ჩაესმოდა. და ამ ხმას მიენდო, მორჩილად მიჰყვა, ისევ იქ სურდა ყოფნა, იმ ტიხრებიანი, თხელკედლებიანი ქალაქის მიხვეულ-მოხვეულებში მიაბიჯებდა უშიშრად. მაგრამ არ უნდოდა გადაღების მერე დაღლილ-დაქანცული ბრედის ნახვა, ჯობდა სხვა დროს ელაპარაკათ. ჯერ ისევ მონუსხული გავიდა ბავილიონიდან და ქვევით დაეშვა. სტუდიასთან ახლო იყო, მისი ბანგი იყნოსა და ხმელთაშუა ზღვის სამყარო უკვე ისე გარიყული აღარ ეჩვენებოდა, ქუჩებშიც სანდომიანი ხალხი დადიოდა და, ვაგზლისკენ მიმავალმა, გზად ესპადრილები იყიდა.

დედას ესიამოვნა, რომ როზმერიმ კარგად შეასრულა რაც კი რამ უთხრა; ოღონდ უნდა ებიძგა ხოლმე, იმის შერეც, რო-ცა გზაზე დააყენებდა, რომ წინ წასულიყო. მხნე იერი კი ჰქონდა მისიზ სპირსს, მაგრამ დაღლილი იყო; მომაკვდავთა სარეცელთან ფხიზლობა ვაი რომ, ღლის ხალხს და იმას ორ-გერ მოუწია ასე ფხიზლობამ.

## VI

ვარდის ღვინის მერე, ლანჩზე რომ შესვა, ნიკოლი თავს კარგად გრძნობდა, მთიან ფერდობზე გაშენებულ თავის საუ-ცხოო ბაღში გავიდა. ხელები გულზემოთ დაეკრიფა და მხარზე მიმაგრებული ხელოვნური კაშელია ლოყაზე ეხებოდა. ერთი მხრით ბაღი სახლს ეკვროდა, ორით— ძველ სოფელს უსაზღ-ვრებოდა, დაქანებული ქვიანი მხრით კი, ზღვისკენ ეშვებოდა.

სოფელთან გამყოფ ქარაბაკთან, ყველაფერი დამტვერილიყო, ჩახვეული ვაზები, ევკალიპტები და ლიმონის ხეები, შემთხვევით დარჩენილი მებაღის ხელნაც კი, რომელიც არც ისე დიდი ხნის წინათ დაეტოვებინათ აქ, თუმცა უკვე მიწას შეზრდოდა და ლპობაც შეპარვოდა. მაგრამ საკმარისი იყო იორდასალების კვლებისთვის შემოეგლო და — ნიკოლი ყოგელთვის ოცდებოდა — თითქოს აქ სულ სხვა სამყარო იყო, შწვანე და გრილი ადგილი, სადაც ფურცელ-ფოთლები ყვავილისა, სათუთად ირხეოდნენ და სინოტივისგან იხვეოდნენ.

ყელზე სოსანისფერი შარფი ეხვია ნიკოლს, აქრომატული მზისგანაც კი სოსანისფერი ფერმკრთალდებოდა და ეს ფერი ედებოდა სახეზეც და იმის ჩრდილსაც, სიარულისას. მკაცრი, თითქოს უწყლო სახე ჰქონდა, მხოლოდ მწვანე თვალების გამოხედვაში გამოსჭვიოდა დაბნეულობა, რაღაც საბრალო. ოქროსფერი თმა ახლა უკვე გამუქებოდა, თუმცა, ოცდაოთხი

წლისას უფრო ჰქონდა მიმზიდველობა, ვიდრე როცა თვრამე-

ტის იყო და ერთ ქალად მისი თმაცა კმაროდა.

ნიყოლი ხეივანს გაჰყვა, ხეივნის გაყოლებაზე თეთრი ქვები ეწყო, იმას იქით ყვავილები ოდნავ ბურუსით იფარებოდა. გზამ იმ გაშლილ ადგილზე გაიყვანა, საიდანაც ზღვა ჩანდა იქ, უზარმაზარ ფიჭვის ხესთან, ბაღში ყველაზე დიდი და ბებერი ხე რომ იყო, სიენის ბაზრიდან მოტანილი დიდი ქლლგა ჩაერჭოთ. იქვე იდგა მაგიდა და წნული სავარძლები. ლეღვის **ხის სიმწვან**ეში დღისით მთვლემარე ფარნები შეყუჟულიყვნენ წამით გაჩერდა ნიკოლი, დაბნეულმა შეათვალიერა ფიჭვის ძირში ამოსული ზამბახები და დედოფლის ყვავილები, ვილაცას თითქოს ძალიან ჩქარა, დაუდევრად მოეყარა პეშვით თესლები, ისე იყვნენ ახლართულები; ყური მიუგდო, — სახლიდან გაჯავრებულ ხმა მოისმა, ალბათ ძიძისა, რაღაცაზე თუ დაობდნენ. ხმაური მიწყდა, ზაფხულის ღამეს შეერია და ნიკოლი ისევ მიჰყვა ხეივანს, ვარდისფერი ღრუბლებივით გადაბუმბლულ კალეიდოსკოპურ იორდასალებს, ყავისფერ და შავ ტიტებს, ფანჯრის რაფების ყვავილებივით იისფერღეროებიან უნაზეს ვარდებს ჩაუარა და უთვალავი ფერების სკერცო, გეგონება გარკვეულ დაძაბულობას მიალწიაო, უცებ თითქმის შუა გზაზე შეწყდა. ამას იქით ქვის დანოტითებული საფეხურები სხვა მხარეს, ხუთი ფუტით ქვემოთ უხვევდა.

წყაროს გარშემო შემოწყობილი ფიცრები მზიან დღეებშიც ტენიანი და სრიალა იყო. გვერდით გაჭრილ საფეხურებს აჰყვა ნიკოლი და ბაღჩაში შევიდა, ჩქარა მიდიოდა, უყვარდა მოძრაობა, თუმცა, უფრო უშფოთველი ჩანდა და გამოუცნობიც, რადგან ბევრს არ ლაპარაკობდა, სიტყვები არა ჰყოფნიდა და არცა სგეროდა სიტყვებისა, ხალხში ჩუმად იყო ხოლმე და ხანდახან თუ იტყოდა რამეს, თითქოს ხარკს უხდისო, ვთქვათ იუმორს, და — ძალიან მჭლედაც. მაგრამ როცა ამის გამო საუბარს ვეღარ აგრძელებდნენ, უცებ ჩაებმებოდა და ისე აჰყვებოდა, ციებცხელებიანივით, მერე კიდევაც უკვირდა ხოლმე და უცებ ისევ გაჩერდებოდა, ლამის მორცხვად, და მწევარივით, ძალზე მორჩილად, გეგონება გაიფიქრა, ძალიან

ბევრი გავაკეთე და მეყოფაო.

ბაღის სალუქი ფერის მწვანეში იდგა, როცა ბილიკზე ფლიგე-

ლისკენ მიმავალი დიკი დაინახა. ნიკოლმა შეიცადა, საწამ დიკი თვალს მიეფარებოდა, ამოწვერილი სალათის მწკრივებს გაუარა და პატარა სამხეცესკენ წავიდა. მტრედების, ბოცვერებისა და თუთიყუშის ერთმანეთში შერეული კადნიერი ხმები შეესმა, ნიკოლის დანახვაზე ახმაურდნენ ასე. აქედან გზა ისევ ქვევით, კლდის პარაპეტშემოვლებული გამოზნექილი მხრისკენ ეშვებოდა. ნიკოლი ზედ დაეყრდნო და გადაიხედა შვიდასი ფუტის ქვევით ხმელთაშუა ზღვა ჩანდა.

ეს ადგილი და ეს გორაკიც ტარმის უძველეს დასახლებას ეკუთვნოდა. დაივერების ვილა და მისი შემოგარენიც გორაკების მოსაზღვრე და ერთმანეთის მიყოლებით ჩამწკრივებული ათიოდე გლეხის პატარა სახლებისგან გაერთიანდა. ხუთი მათგანი ვილად გადაკეთდა, ხუთი სულაც აიღეს და იმ ადგილას ბაღი გააშენეს. გარშემოვლებული ზღუდისთვის ხელი არ უხლიათ და ამის გამო იყო, რომ ქვევით გაჭრილი გზიდან თუ ამოხედავდით, ტარმის რუხ-იისფერი სახლებისა და ხეებისაგან დაივერების კარ-მიდამო გამოცალკევებული არა ჩანდა.

ცოტა ხანსაც გაჩერდა ნიკოლი, ხმელთაშუას უყურებდა. თავისი მოუღლელი ხელებითაც კი, აქაურობას ვერაფერს შემატებდა. იმ წუთში იყო, რომ ფლიგელიდან დიკი გამოვიდა, ხელში ტელესკოპი ეჭირა და კანისკენ მიემართა. ცოტაც და, ნიკოლი გამოჩნდა ტელესკოპში. დიკი ისევ ფლიგელში შებრუნდა და ახლა მეგაფონით გამოვიდა — ბევრი ამნაირი მექა-

ნიზმი ეყარათ სახლში.

"ნიკოლ!" დაიძახა. "დამავიწყდა მეთქვა ჩემს ბოლო მოციქულებრივ ჟესტზე, მისიზ აბრამზი მოვიწვიე, თეთრთმიანი".

"ასეც ვიცოდი. უმსგავსობაა და სხვა არაფერი".

თითქოს დიკის მეგაფონის გამოჯავრებით, სიჩუმეში მკაფიოდ გაისმა ხმა და ახლა უფრო ხმამაღლაც გასძახა: "გაიგონე?"

"ჰო". დიკმა მეგაფონი დაუშვა, მაგრამ მაშინვე ისევ გამეტებით მიიდო პირზე. "სხვებსაც მოვიწვევ, ვთქვათ, იმ ორ ჭაბუკს".

"ჰო, კარგი". დაეთანხმა ნიკოლი.

"მინდა ერთი ხმაურიანი საღამო გამოვიდეს, ჩხუბიც იყოს და ცთუნებებიც, ქალებს გულიც კი მისდიოდეთ, ვიღაცას რაღაც ეწყინოს და ისე წავიდეს. ნახავ, რაც იქნება."

დიკი ისევ ფლიგელში შებრუნდა, მაგრამ ნიკოლი ხვდებოდა, ძველებურ ხასიათზე დამდგარიყო, მხიარულებაატანილი და აგზნებული, მერე რომ ყველას გადასდებდა თავის აგზნებას და ბოლოს კიდევ, უეჭველად შეეცვლებოდა თავისებური მელანქოლიით, თვითონ დიკი მალავდა ამას, ნიკოლი კი გუმანით გრძნობდა, ყოველთვის გრძნობდა. მხიარულების მიზეზი კი ზოგჯერ სულაც უბრალო რამ ხდებოდა ხოლმე, ისიც, ათასფრად შეფერილი, და ამისთანა დროს, სხვა იყო დიკი, რაღაცა ძალით ავსებული და ეს ძალა აიძულებდა სხვებს, აჰყოლოდნენ და ჰყვარებოდათ. მხოლოდ ზოგ-ზოგნი, სუყველაფერი რომ ეეჭვებათ, ისინი თუ არ აჰყვებოდნენ დიკის ამ ძალას. რეაქცია მერე იჩენდა ხოლმე თავს, როცა ფხიზლად შეაფასებდა თავის ახირებასა და არევას, ყველაფერ იმას, რაც ზედმეტი იყო და რაც სიცარიელეს უტოვებდა. უკან მიხედვისას, საკარნავალო სიშმაგესა და შფოთს გაიხსენებდა და ძრწუნდებოდა, ისე როგორც ძრწუნდება ხოლმე ის სარდალი, ხოცვა-ჟლეტას რომ გასცქერის და იცის, მიზეზი თვითონვეა, სისხლმწყურვალი, გულისთქმას და ჟინს აყოლილი.

ვინც მცირე ხნით მაინც მოხვდებოდა დიკ დაივერის სამყაროში, უკვე ვეღარ დაივიწყებდა იმ სამყაროს: ეჩვენებოდათ, რომ დიკს შემთხვევით არ გამოეყო სხვებისაგან და წლითიწლობით ჩაკარგულ იმათ მოწოდებასაც ჩახვედრილიყო. თავისი ყურადღებითა და ზრდილობით ყველას გულს იგებდა დიკი, მშვენივრად ამყარებდა ურთიერთობას და ამას ისე უშუალოდ და ისე იოლად ახერხებდა, ეფექტი ყველა მოლოდინს აჭარბებდა — საბოლოოდ ინადირებდა გულებს და მაშინ, გაუფრთხილებლად, ვიდრე ეს-ეს არის დამყარებული მეგობრობა რაიმეთი დაირღვეოდა, დიკი ფართოდ უღებდა კარს და უშვებდა მათ თავის წარმტაცად თავშესაქცევ სამყაროში. ვიდრე ყველა უსიტყვოდ და მთელი გულით მიჰყვებოდა ამ თამაშს, დიკის საფიქრალი მხოლოდ იმათი ბედნიერება თუ იყო, მაგრამ ოდნავი ეჭვიც რომ შეპარვოდათ თამაშის გამო, დიკი ქრებოდა იმათ თვალში და ნატამალიდა თუ რჩებოდა იმისი, რაც თქვა, გააკეთა.

იმ საღამოს რვა საათსა და ოცდაათ წუთზე, დიკი თავისი პირველი სტუმრების შესახვედრად გამოვიდა, საკმაოდ ცერემონიულად, თვალშისაცემად ეჭირა ხელში კოსტიუმი, ტორეადორი რომ გამოვა მოსასხამით, თითქოსდა ისე. როზმერისა და მისიზ სპირსს მიესალმა და ტაქტიანად შეიცადა, ვიდრე თვითონვე დაიწყებდნენ ლაპარაკს, რომ თავიანთი ხმით რწმენა შემატებოდათ და ახალ გარემოს გაშინაურებოდნენ.

მთის გრილი, სუფთა ჰაერითა და ტარმში ამთსვლით მოგ ხიბლული როზმერი და დედამისი ცნობისმოყვარეობით ათვა. ლიერებდნენ დაივერების საცხოვრისს. ხანდახან არაჩვეულებგ რივი ხალხის ღირსებები სავსებით ჩვეულებრივ გამოთქმაშიც ვლინდება ხოლმე და ვილა "დაიანას" საგახგებო, თვალშისაცეძი სრულყოფილებაც, ყველაფერი გულმოდგინედ რომ მოეფიქრებიხათ, სულ უბრალო და მცირე რამეშიც კი ჩნდებოდა, ვთქვათ თუნდაც უდროო დროს უმიზეზოდ მოახლის გამოჩეხა, ან საცობის უცბად ამოვარდხის ხმა. საღამოს გამო უკვე ღელვაშეპარული პირველი სტუმრები ამათი ყოველდღიური ციოვრების მოწმენიც გახდნეს— დაივერების ბავშვები ტერასაზე გუვერნანტთან ერთად ვახშმობდნენ.

"რა შშვენიერი ბაღია", წამოიძახა მისიზ სპირსმა.

"ნიკოლის ბაღი" თქვა დიკმა. "თავს დასტრიალებს, აწუხებს ლამის თავისი ზრუხვით მცენარეებს, გაძუდმებით იმაზე ფიქრობს, არ დაავადდნენ. სულაც არ გამიკვირდება, რომ ერთ მშვენიერ დღეს თვითონვე შეეყაროს რაღაც, ან ჭრაქი, ან ფიტოპტორია თუ სეპტორია" როზმერისაკენ შეტრიალდა, თითით დაემუქრა და, ხუმრობანარევი კილოთი, პატრონივით უთხრა, "მინდა რაიმე ვიღონო და თქვენს ჭკუა-გონებას ფუშველო, შლაპას გაჩუქებთ, პლაჟისთვის".

ბაღიდან სტუმრები დიკმა ტერასაზე გაიყვანა, კოქტეილისთვის. მოვიდა ერლ ბრედი და ძალიან გაუკვირდა როზმერის დანახვა. გეგონება წამოსვლისას სტუდიის კარიბჭესთან დატოვაო თავისი შერეკილობა, აქ უფრო სხვა ჩანდა იგი. წამით როზმერიმ დიკს შეადარა, დიკთან ერლ ბრედი უხეშიც იყო და ცოტა ბრიყვიც. მაინც, ამ კაცის დანახვაზე თითქოს ისევ დენმა დაარტყა.

ბრედი შინაურულად ელაპარაკებოდა ბავშვებს, რომლებსაც ის იყო, ტერასაზე ევახშმათ და მოსულიყვნენ. "ჰელო, ლანიე, რას იტყვი სიმღერაზე? შენ და ტოპსიმ

მიმღერეთ რამე".

"რა ვიმღეროთ?" ჰკითხა ბიჭმა, საფრანგეთში გაზრდილი ყველა ამერიკელი ბავშვივით, სიტყვებს ესეც გაბმით ამბობდა.

"ის სიმღერა, "Mon ami Pierrot".

და-ძმა მაშინვე გვერდიგვერდ დადგა, არ დაუშორცხვებიათ, და საღამოს სიჩუმეშ<u>ი</u> საყვარლად გაისმა მათი მკივანა ხშა:

> მთვარის ნათელზე ჩემო პიერო, მოყვასო, მომე კალამი, ვწერო.

> > სანთელი ჩაქრა, (ეცხლი არ არი, ღვთის გულისათვის გამიღე კარი.

სიმლერა გათავდა და ჩამავალი მზის სხივებით სახეშეწითლებული ბავშვები იდგნენ და შექებაზე მშვიდად იღიმებოდნენ. ვილა "დაიანა" როზმერის სამყაროს შუაგულად ეჩვენებოდა ახლა. ამისთანა ადგილას შეუძლებელი იყო რაღაცა
უჩვეულო არ მომხდარიყო. ლამის შეხტა, როცა მოესმა, როგორ გაჭრიალდა ჭიშკარი ახალი სტუმრების შემოსვლისას.
ერთბაშად შემოცვივდნენ ცოლ-ქმარი მაკისკოები, მისიზ აბრამზი, მისტერ დამფრი და მისტერ კემპიონი და მაშინვე ტერასისკენ გამოემართნენ.

როზმერის თითქოს პირში ჩალა გამოავლეს, იმედგაცრუებულმა სწრაფად შეხედა დიკს, გეგონება ეკითხებოდა, რად
შეეყარა ერთად ასეთი ჭრელი ხალხი, მაგრამ დიკს ისევ ისეთი
იერი ჰქონდა, ახალ სტუმრებს ისე იღებდა, გეგონება ამაყობს
კიდევაც ასეთი ღირსეული ხალხის მოსვლითო, აგრძნობინებდა, რომ ყველას ძალიან აფასებდა, და იმათ ჯერ კიდევ გამოუვლენელ ნიჭსა და უნარს მიხვედრილიყო, და იმდენად სჯეროდა დიკისა, იმავე წუთში თვითონაც გაიფიქრა, ცხადია, მაკისკო უნდა მოსულიყოო.

"ჩვენ პარიზში შევხვდით ერთმანეთს", მაკისკომ ეიბ ნორთს

უთხრა. ცოლთან ერთად თითქმის ფეხდაფეხ მოჰყვა მათ ეიბი, "თანაც, ერთხელ კი არა, ორჯერ".

"მახსოვს, დიახ", დაუდასტურა ეიბმა.

"კერძოდ, სად?" არ დაკმაყოფილდა მაკისკო.

"მე ვფიქრობ, ეს იყო..." დაიწყო ეიბმა, მაგრამ მობეზრდა თამაში. "არ მახსოვს სად".

ამ რამდენიმე ფრაზამ წუთიერი სიჩუმე შეავსო და როზმერიმ უნებურად იგრძნო, რომ ახლა მისწრება იქნებოდა ტაქტიანად ვინმეს ჩარევა, მაგრამ დიკი არც ცდილა ოდნავ რაღაცა შეეცვალა და ახალი სტუმრების მოსვლით შექმნილი უხერხულობა გაეფანტა. მარტო მისიზ მაკისკოს ქედმაღლური ღიმილი რად ღირდა. მაგრამ დიკი არ ერეოდა, ეს არ იყო ახლა
მთავარი, ისედაც თანდათან, თავისთავად გარკვეოდა ყველაფერი. ძალას იგი სხვა, უფრო საყურადღებო მომენტისთვის
იკრებდა და ინახავდა, როცა შესაძლებელი იქნებოდა ახლებურად დანახვებოდა სტუმრებს და ეგრძნობინებინა მათთვის,
რომ მშვენიერ ადგილას მოხვდნენ.

როზმერი ტომი ბარბანის გვერდით იდგა. ტომი ცუდ გუნე-ბაზე იყო, გაღიზიანებული ჩანდა, მაგრამ თითქოს რაღაცა მი-ზეზიც ჰქონდა საამისო. როზმერის უთხრა, ხვალ მივდივარო.

"სამშობლოში?"

"სამშობლოში? მე არ მაქვს სამშობლო. ომში მივდივარ". "რა ომში?"

"რომელიმე ომში. კარგა ხანია გაზეთი არ წამიკითხავს, ალბათ სადღაც არის ომი, შეუძლებელია, სადმე არ ომობდნენ".

"თქვენთვის რა, სულ ერთია, რისთვის იომებთ?"

"სავსებით, — ოღონდ კარგად მომექცნენ. ავირევი თუ არა და აღარ ვიცი რაღას მივაწყდე, დაივერების სანახავად მოვდი-ვარ, რადგან ვიცი, ცოტა ხანში ომში წასვლა მომინდება".

როზმერი შეცბა.

"მაგრამ თქვენ ხომ გიყვართ დაივერები?"

"რა თქმა უნდა, მეტადრე ნიკოლი, მაგრამ მაგათ ნახვაზე ომში წასვლა მინდება ხოლმე".

როზმერიმ სცადა გაეაზრა, რაც ახლა უთხრეს, მაგრამ ვერ

ჩასწვდა. დაივერებთან სიახლოვისას მას მხოლოდ ის სურდა, არასოდეს გასცლოდა მათ.

"თქვენ ნახევრად ამერიკელი ხართ", ისე თქვა, თითქოს ამით ყველაფერს გაარკვევდა.

"და ნახევრად ფრანგიც, გავიზარდე ინგლისში და მას მერე, რაც თვრამეტი წლისა გავხდი, მოვასწარი რვა ქვეყნის გარში მემსახურა. მაგრამ იმედი მაქვს, ჩემი სიტყვების გამო არ იფიქრებთ, თითქოს არ მიყვარდეს დაივერები. არ მინდა ასეთი შთაბეჭდილება დაგრჩეთ, ძალიან. მიყვარს, მეტადრე ნიკოლი".

"შეუძლებელია არ გიყვარდეს დაივერები", მშვიდად თქვა როზმერიმ.

უცბად მოუნდა ამ კაცს გასცლოდა, მოეჩვენა თითქოს რალაცა უსიამოვნო ჰქონდა ხმაში, როზმერი აღმერთებდა დაიგერებს და არ უნდოდა ტომი ბარბანს თავისი ცინიზმით შეებღალა მისი გრძნობა; გაუხარდა, რომ მის გვერდით არ იჯდებოდა სადილზე. სხვებთან ერთად ბაღში გაშლილი სუფრისკენ
მიმავალს ჯერ ისევ ჩაესმოდა სიტყვები, "მეტადრე ნიკოლი".

ბილიკზე მიმავალი, დიკ დაივერთან ახლოს აღმოჩნდა. ისეთი მშვიდი და ურყევი ჩანდა, თუ რამ ეჭვი ჰქონდა, მაშინვე გაუქრა, დიკს არაფერი შეეშლებაო. ბოლო წელიწადში, და ეს წელი მისთვის მთელ ცხოვრებას უდრიდა. როზმერის ფულიც ჰქონდა და სახელიც საკმაოდ გაითქვა, სახელმოხვეჭილ ხალხსაც ხვდებოდა და ეჩვენებოდა, რომ ისინი მხოლოდ გადიდებული ასლები თუ იყვნენ იმათი, ვისაც ექიმის ქვრივი და მისი ქალიშვილი პარიზის ოტელ-პანსიონში ხვდებოდნენ ხოლმე. რომანტიკული ბუნება ჰქონდა, მაგრამ რომანტიკისთვის მის ცხოვრებაში არც დრო იყო და არც გასაქანი. მისიზ სპირსმა გადაწყვიტა თავისი ქალიშვილისთვის კარიერა შეექმნა და არ დაუშვებდა, რომ როზმერი წუთიერ, არასაიმედო გატაცებას და ყველა მხრიდან მოსალოდნელ ცდუნებას აჰყოლოდა. თვითონ როზმერიმაც უკვე გაიარა ეს ხანა, კინოსა და ილუზიების სამყაროში იმყოფებოდა, მაგრამ ცხოვრებით არ ცხოვრობდა ილუზიებით და როცა სახეზე შეატყო დედას, რომ მოეწონა დიკ დაივერი, მაშ ყველაფერი რიგზე იყო და შეეძლო თავის გულს მიჰყოლოდა.

"გიყურებდით", უთხრა დიკმა და როზმერიმ იცოდა, არ ტყუოდა. "ძალიან შეგვიყვარდით ყველას".

"მე კი მაშინვე შემიყვარდით, როგორც კი გნახეთ", ჩუ-

მად წარმოთქვა.

დიკმა ვითომ ვერ გაიგონა, ვითომ მისი სიტყვები ჩვეუ-

ლებრივზე ჩვეულებრივი ყოფილიყო.

"ახალ მეგობრებთან", ისე თქვა, გეგონება ძალიან საყურადღებო რამეს ეუბნებაო, "ხშირად უკეთესადა ხარ, ვიდრე ძველებთან".

ეს რემარკა, რომლის აზრსაც როზმერი მაინცდამაინც ვერ ჩასწვდა, დიკმა მაშინა თქვა, როცა უკვე მაგიდას უსხდებოდნენ, ბინდი წვებოდა, მაგრამ თანდათან ანთებული ფა<del>რ</del>ნების შუქზე მკაფიოდ ჩნდებოდა იქაურობა. სიხარულის ჟრუანტელმა დაუარა, როცა დაინახა, რომ დიკმა მარჯვნივ მოისვა დედამისი. თვითონ იგი ბრედისა და ლუის კემპიონს შუა მოხვდა.

გრძნობამორეული, ბრედისკენ შეტრიალდა, უნდოდა გული გადაეხსნა, მაგრამ დიკი ახსენა თუ არა, ბრედიმ ისე შეხედა, როზმერი მიხვდა, მისი მოძღვარი ვერ იქნებოდა. თავის მხრივ, როცა ბრედიმ სცადა ხელი ხელზე მოეკიდა, როზმერიმ ხელი არ დაანება, ასე რომ, ვიდრე აიშლებოდნენ, მხოლოდ კინოზე ლაპარაკობდნენ, უფრო სწორად, ბრედი ლაპარაკობდა კინოზე, როზმერი კი თავაზიანად უსმენდა, თუმცა გონება სხვაგანა ქროდა და თვითონვე მიხვდა, არ შეიძლება ბრედის არ ეგრძნო; შეუცნობლად ამთლიანებდა აზრს მხოლოდ იმით, რაც დროდადრო თუ ჩაესმოდა და ეს შველოდა. როგორც ხანდახან საათის რეკვას გაიგონებ, არ გაგიგია რამდენჯერ დარეკა, მაგრამ გონებაში ჩაბეჭდილა და რიტმით აღადგენ.

# VII

როზმერიმ პაუზით ისარგებლა, ნიკოლი ტომი ბარბანსა და ეიბ ნორთს შუა იჯდა და იქით გაიხედა. მისი მბზინავი წაბლისფერი, ჩაუს ბეწვისნაირი თმა სანთლებისა და ფარნების შუქზე ქაფივით ჩანდა. ნიკოლის მჟღერ ხმასა და მალიმალ შეწყვეტილ ლაპარაკს, როზმერიმ მონუსხულივით მიუგდო ყური.

"საწყალი", წამოიძახა ნიკოლმა, "რა ახირებაა კაცის ზუაზე გახერხვა?"

"მინდოდა მენახა რა ჰქონდა ოფიციანტს შიგნით. თქვენ

არ გაინტერესებთ რა არის ოფიციანტის შიგნით?"

"ძველი მენიუები", ივარაუდა ნიკოლმა, იცინოდა, "დამსგვრეული ჭურჭლის ნატეხები, ფული, ფანქრის ნაღრღენი".

"ნაღდია — მაგრამ ამას მეცნიერული დასაბუთება სჭირდება, მერე კიდევ, ხერხი ხომ ჩვეულებრივი არ იყო, არამედ მუსიკალური, მთელი ეშხიც ამაშია".

"თქვენ რა, ოპერაციის დროს დაუკრავდით იმ ხერხით?"

ჩაეკითხა ტომი.

"აქამდე აღარ მისულა საქმე, ყვირილმა შეგვიშალა ხელი, შეგვეშინდა, ვიფიქრეთ, წელში გადაწყდებაო".

"მაინც ძალიან უცნაურია, მე ვერ გავიგე", თქვა ნიკოლმა, "მუსიკოსს სურს გამოიყენოს სხვა მუსიკოსის ინსტრუმენტი, რათა…"

საათზე მეტ ხანს ისხდნენ სუფრასთან და ამ ხნის მანძილზე შესამჩნევი ცვლილება მოხდა — ყველამ თითქოს რაღაც მოიცილა, რაღაცა მოეხსნა — ზრუნვა, წუხილი თუ ეჭვი, ახლა მხოლოდ დაივერების სტუმრები იყვნენ, თავისთავადები, ბუნებრივები, რაც კი რამ კარგი ჰქონდათ ახლა ეხატათ სახეზე და გულგრილობა და მოწყენა კი ის იქნებოდა, მასპინძლებისთვის ეწყენინებინათ და თავგამოდებით ცდილობდნენ ეს არ მომხდარიყო. ამიტომ იყო, რომ როზმერის ახლა თითქმის ყველა უყვარდა, გარდა მაკისკოსი, რომელმაც აქაც მოახერხა გარიყულიყო, თუმცაღა, იმდენად ჯიბრისა და სიავის გამო კი არა, უფრო იმიტომ, რომ საღამოს დაწყებისთანავე კარგ გუნებაზე დადგა და გადაწყვიტა ღვინით შეენარჩუნებინა ეს გუნება. მარჯვნივ ერლ ბრედი ეჯდა და იმის გასაგონად მაკისკომ რამდენიმე გამანადგურებელი შენიშვნა გამოთქვა კინოს თაობაზე, მარცხნივ მჯდომ მისიზ აბრამზს კი არც დალაპარაკებია, საერთოდ არ ამჩნევდა; ბოლოს სკამის ზურგს მიეყრდნო და დიკ დაივერს შემმუსვრელი იუმორის ღიმილით მიაშტერდა, ოღონდ ხანდახან თვითონვე აფუჭებდა ეფექტს იმით, რომ მაგიდის იქითა მხარეს მჯდომი დიკის საუბარში ჩაბმას ცდილობდა.

"თქვენ, მგონი, ვენ დენბი ბიურენის მეგობარი ხართ?"

"მე მგონია ეგეთს არავის ვიცნობ".

"მე ყოველთვის მეგონა, რომ მისი მეგობარი იყავით", არ

იშლიდა მაკისკო.

მისტერ ვენ ბიურენზე იძულებით ლაპარაკი ყელში ამოუვიდა და მაკისკომ ახლა სხვა თემაზე სცადა საუბრის გაბმა,
მაგრამ ისევ ფიასკო განიცადა, დიკი თავაზით ეკიდებოდა და
ისე უსმენდა, მაკისკო იმთავითვე პარალიზდებოდა ხოლმე და
თავისივე მიზეზით შეწყვეტილ საუბარს უკვე უიმისოდ, სხვები აგრძელებდნენ, იმ სხვების ლაპარაკში ჩარევაც სცადა,
მაგრამ ეს ცარიელი ხელთათმანის ხელის ჩამორთმევასა ჰგავდა და ბოლოს და ბოლოს, ბავშვებთან იძულებით ყოფნა რომ
უხდება, იმ მოზრდილივით, ხელის ჩაქნევა ამჯობინა, და შამჰანურზელა გადაიტანა მთელი თავისი ყურადღება.

დროდადრო როზმერი თვალს ყველას ისე მოავლებდა, ისე უნდოდა გაეხარათ, თითქოს სუყველა იმისი გერი გახდებოდა მომავალში. ფერმკრთალ მიხაკებში ჩადგმული ლამპის შუქი მისიზ აბრამზის "ქვრივ კლიკოთი" ავარდისფრებულ სახეს ეფინებოდა და ახალგაზრდულ იერს მატებდა. კარგ ხასიათზე იდგა. გვერდით მისტერ როიალ დამფრი ეჯდა, დამფრის ქალიშვილივით სანდომიანი სახე საღამოს ზეიმურ ვითარებაში იმდენად აღარა გხვდებოდათ თვალში. ამათ მერე კიდევ— ვაიოლიტ მაკისკო, რომელსაც, რაც ბუნებამ კარგი უბოძა, ახლა აშკარად სახეზე ეხატა და თავს არ იტეხდა იმაზე ფიქრით, რომ კარიერისტის ცოლი იყო, თანაც ისეთის, ვერაფერსაც რომ ვერ აღწევდა.

მერე დიკი — სუყველა რომ კარგ გუნებაზე დააყენა და თავის თავზე რომ აეღო ყველას მოწყენა, ზრუნვა-წუხილი;

ისევ ისეთი, — ამ საღამოზე ფიქრით მოცული.

მერე დედამისი — იდეალური, როგორც ყოველთვის.

მერე, ბარბანი, დედამისთან მოლაპარაკე, და ახლა ისევ მოეწონა როზმერის იგი. მერე ნიკოლი. როზმერის ახლა რაღაც სხვაგვარი ეჩვენა და გაიფიქრა, ნიკოლზე ლამაზი ქალი არ მინახავსო. ვიკინგების მადონასა ჰგავდა, და განათებულ სივრ-ცეში თეთრად მორიალე მუმლის მიღმა ფიჭვებში ჩაკარგული ფარნების შუქი ნათელსა ჰფენდა. წყნარად იჯდა, ძალიან

წყნარად, ეიბ ხორთი თავის ბორალურ კოდექსს უხსნიდა: "რა თქმა უნდა, მე მაქვს ჩემი მორალური კოდექსი", დაჟინებით ამბობდა, "არ შეიძლება ადამიანს თავისი მორალური კოდექსი არ ჰქონდეს. ჩემი ის არის, რომ ვერ ვურიგდები ჯადოქრების ცეცხლზე დაწვას, და როცა გავიგებ, რომ სადღაც ჯადოქარი დაწვეს, თავსა ვკარგავ". როზმერიმ ერლ ბრედისაგან იცოდა, რომ ეიბი მუსიკოსია, თავიდან შესანიშნავად დაიწყო, მაგრამ რამდენიმე წელია აღარაფერი შეუქმნია.

შემდეგი კემპიონი იყო, ამან როგორღაც შეძლო მოეთოკა თავისი ახირება და ყველას მიმართ უანგარო ინტერესს იჩენდა. მერე მერი ნორთი, რომელსაც სახე გაბრწყინებოდა და ისე ხალისით იცინოდა იმ თავისი სარკესავით თეთრი კბილებით, გახსნილი ბაგის ყველა სვრეტში ისე ჩაღვროდა სიამოვნება, გინდა, არ გინდა, გაიღიმებდით.

და ბოლოს ბრედი, თანდათანობით უფრო გულწრფელი. ამას ხომ ერთი ის ზნეც სჭირდა, რომ სულიერი სიჯანსაღით მოჰქონდა თავი; არადა ასეთ სიჯანსაღეს სხვათა მიმართ გულ-გრილობით ინარჩუნებდა, იმ სხვათა სუსტი მხარეების არად ჩაგდებით. ახლა ამ ზნესაც თავაზიანობა უფრო სჭარბობდა.

როზმერისთვის, თავისი უშუალობითა და მიმნდობი ხასიათით მისიზ ბერნეტის ერთი ოპუსის გმირს რომ წააგავდა, ეს საღამო შინ დაბრუნებას, ზღვარდაუდებელი იუმორის მერე დასვენებას უდრიდა. ბაღში, სიბნელეში ციცინათელები აციმციმდნენ, სადღაც ქვევით, გორაკის ძირში ძაღლი აყეფდა. მექანიკური საცეკვაო მოედანივით მაგიდა თითქოს ოდნავ მოსცილდა მიწას, გარშემო მსხდომთ ეგონათ, სამყაროს სიბნელეში ისხდნენ, რაც ქვეყნიერებაზე საზრდო გადარჩა, აქ იყო და თვითონ შეექცეოდნენ, რაც სითბო იყო სამყაროში, ამათ ათბობდა. მისიზ მაკისკომ რაღაც საკვირვლად, ჩუმად გაიცინა და თითქოს ეს სიცილი იმას მოასწავებდა, რომ მიწას უკვე საბოლოოდ მოწყდნენ, ორივე დაივერმა ალერსსა და ზრუნვას უმატა, ეფერებოდნენ თავიანთ სტუმრებს, ისედაც რომ ნეტარებდნენ ამდენი ქებით, ეგება რაღაც დარჩათო ძირს მიწას მოწყვეტილებს და ამისათვის მოფერებით უნდოდათ, რომ ხარკი გაეღოთ. ყველას თავიანთ მეგობრობასა და სიყვარულში აჯერებდნენ, სათითაოდ, და იმ წუთებში

მათი მაცქერალი სახეები საშობაო ნაძვის ხის საწყალობელი ბავშვების სახეებს ჰგავდა. მერე ყველაფერი უცბად შეწყ-და— სადილობა მოთაცდა, ზეიმურობამ, ჩვეული მხიარულე-ბიდან სტუმრები ამაღლებული გრძნობების სამყაროში რომ აიყვანა, მანამდე გაიარა, ვიდრე იქაური ჰაერი მოხვდებოდათ, ვიდრე გაიაზრებდნენ, რომ იმ სამყაროში ავიდნენ უკვე.

სამხრეთული ცხელი ღამის სიბნელეს შეპარული მაგია, ხმელთაშუადან აჩრდილივით მოიწევდა და, ახლა დაივერებ-

ში გადავიდა და ამათ შეენივთა.

როზმურიმ გაიგონა ნიკოლისა და დედამისის საუბარი. ნიკოლი დაჟინებით სთხოვდა როზმერის დედას უარი არ ეთქვა და საჩუქრად მიეღო პატარა ყვითელი ჩანთა, რომელიც დედამისს ძალიან მოსწონდა. "ვისაც მოსწონს, იმისი უნდა იყოს", ღიმილით ეუბნებოდა და რაც ყვითელი ფერის რამ ხელთ მოხვდა, შიგ უყრიდა — პატარა ფანქარს, პომადას, პატარა ყვითელ უბის წიგნაკს — "ეს იმიტომ, რომ ერთმანეთს უხდება".

ნიკოლი გაქრა და როზმერიმ შეამჩნია, დიკიც აღარ იყო იქ; სტუმრებიდან ზოგი ბაღში, ზოგიც ტერასისკენ წავიდა.

"არ გინდათ სააბაზანოში შესვლა?" ვაიოლიტ მაკისკომ ჰკითხა როზმერის.

როზმერის ახლა იქ წასვლა არ უნდოდა.

"მე კი შევალ", თქვა მისიზ მაკისკომ. "მე მჭირდება იქ შესვლა". და ყველანაირ პირობითობას აგდებულად რომ უყურებს, იმ ქალივით თამამად გასწია იქით.

როზმერიმ თვალი გააყოლა, არ მოეწონა ეს საქციელი.

ერლ ბრედიმ ზღვისპირა კედლისკენ ჩასვლა შესთავაზა, მაგრამ როზმერიმ გადაწყვიტა, უკვე დიკისთვის ეწილადა დრო, დიკის გამოჩენას დაელოდა და მაკისკოს ბარბანთან კინკლაობას მიუგდო ყური.

"რად გინდათ საბჭოების წინააღმდეგ იომოთ?" ეკითხებოდა მაკისკო. "მე ვფიქრობ, კაცობრიობის ისტორიაში ეს უდიდესი ექსპერიმენტია, ხოლო რიფები? მათი რესპუბლიკა? ჩემი აზრით, თუ ბრძოლაა და გმირობაა, იმათთვის მაინც იბრძო-ლოს კაცმა, ვის მხარეზეც სიმართლეა".

"ეგ როგორ უნდა გაარკვიო?" მშრალად ჰკითხა ბარბანმა. "ყველა გონიერმა კაცმა იცის". "თქვენ კომუნისტი ხართ?"

"სოციალისტი ვარ", თქვა მაკისკომ, "მე თანავუგრძნობ

რუსეთს".

"მე კი ჯარისკაცი ვარ". მხიარულად თქვა ბარბანმა. "ჩემი ბიზნესი ხალხის კვლაა. ვებრძოდი რიფებს იმიტომ, რომ ევ-როპელი ვარ, კომუნისტებს ვებრძვი იმიტომ, რომ საკუთრება უნდათ წამართვან".

"აბა, იცით რას გეტყვით..." მაკისკომ აქეთ-იქით გაიხედა, ბარბანის გონებაშეზღუდულობის აგდება უნდოდა, მაგრაშ არავინ აუბა მხარი. ვერ გაეგო, რისთვის შეეჯახა՝ ბარბანს, მისი იდეების სიმარტივისა და შეზღუდულობის გამო არა, არც მისი წარმოშობისა და აღზრდის სირთულე იყო მიზეზი, მაკისკომ იცოდა რას ნიშნავდა იდეები და ჭკუა-გონების ზრდის პროცესში ბევრი იდეა შეიცნო და დაახარისხა კიდევაც თავისთვის, მაგრამ ამ "რეტიანს", როგორც თავისთვის შეარქვა ბარბანს, არც ერთი მისთვის ცნობილი იდეა არ გააჩნდა, თუმცა ვერც თავის უპირატესობასა გრძნობდა ბარბანის მიმართ და ამიტომ, მაშინვე ჩაეჭიდა მისთვის ხელსაყრელ დასკვნას: ბარბანი ძველი ხნის გადმონაშთი იყო და დიდ ვინმეს არ წარმოადგენდა. ამერიკულ არისტოკრატიასთან კონტაქტისას მაკისკოს ის შთაბეჭდილება შეექმნა, რომ უგერგილო და საეჭვო სნობიზმი სქირდათ, არხეინობა უმეცრების გამო და ერთგვარი უხეშობა, ინგლისელებისაგან რომ გადაეღოთ, მაგრამ უიმფაქტოროდ, რითაც ინგლისურ ფილისტერობასა და ინგლისურ უხეშობას აზრი ეძლევა და ეს სუყველა გადატანილი იმ ქვეყანაში, სადაც სულ მცირე ცოდნასა და თავაზიანობასაც ყველაზე მეტად, ვიდრე სხვაგან, ფასი ედება, ერთი სიტყვით, იმ პოზიციაზე დადგა, რომლის აპოგეადაც 1900 წლის "ჰარვარდის სტილი" ითვლება. ერთ-ერთ ასეთად მიიჩნია ბარბანი. ღვინო მალე მოეკიდა და შიში ამ ტიპის ხალხის მიმართ რომ ჰქონდა, გაუქრა და გათამამდა.

როზმერის რატომღაც რცხვენოდა მაკისკოს გამო; თავისთვის იჯდა, მაგრამ დიკის მოლოდინში ცეცხლი ეკიდა. სუფრიდან ბარბანის, ეიბის და მაკისკოს გარდა, ყველა წამოიშალა, როზმერი ხედავდა აქეთ-იქით ჩარგული მურტითა და გვიმ-

რით ჩრდილდაფენილ ბილიკსა და ქვის ტერასას. განათებული კარის ფონზე ნათლად იკვეთებოდა დედამისის სახე, როზმე- რი სიყვარულით შესცქეროდა მას და ის იყო, წამოიწია, რომ იქით წასულიყო და ამ დროს მისიზ მაკისკო შემოვარდა აქო- შინებული.

აღელვებისაგან სულს ძლივს ითქვამდა. ისე უხმოდ გამოსწია სკამი და დაჯდა, ისე გაშტერებით იყურებოდა და ისე უშრებოდა პირი — თითქოს თქმა უნდა და ვერ ამბობსო, ცხადი იყო, რაღაც იცოდა, და ბუნებრივია, როცა ქმარმა

ჰკითხა, რა მოხდაო ვაიოლიტ, ყველა მას შესცქეროდა.

"ჩემო ძვირფასებო", დაიწყო და მერე მხოლოდ როზმერის შეხედა, "ჩემო ძვირფასო... არა, არაფერი, არ შემიძლია, ვერ ვიტყვი, ძალა არ მყოფნის".

"დამშვიდდით, თქვენ მეგობრებში ხართ", უთხრა ეიბმა.

"იქ, ზევით, ისეთ სცენას შევესწარი…" თავი საიდუმლოდ გადააქნია და თითქოს ენა დაებაო, და სწორედ დროზე, რად-გან ბარბანი წამოდგა და თავაზიანად, მაგრამ საკმაოდ მკვეთ-რად მიმართა:

"არ გირჩევთ გამოთქვათ თქვენი შენიშვნები იმაზე, თუ რა ხდება ამ სახლში".

## VIII

ვაიოლიტმა ერთი ღრმად ამოისუნთქა, თითქოს ამოიოხრაო, და სცადა მშვიდად გამოეხედა.

ბოლოს დიკიც მოვიდა და თითქოს ინსტინქტმა უკარნახა, ბარბანსა და ცოლ-ქმარ მაკისკოებს შუა ჩადგა და მაკისკოს, ცოდნას მოწყურებული უმეცარი კაცის სახით, ლიტერატურა-ზე გაუბა საუბარი, ამით დიდი სიამოვნებაც მიანიჭა მოსაუბ-რეს, მაკისკოსთვის უპირატესობა ცოტა რამ როდი იყო. სხვებს ლამპების სახლში შეტანა სთხოვა, ამაზე უარს ვინ იტყოდა — ლამპებით ხელში ბნელი ბაღი რომ გაეარათ. როზმერიმაც აი-ღო ლამპა, გზად მოთმინებით უსმენდა როიალ დამფრის, ჰო-ლივუდზე რომ ეკითხებოდა ათას რაღაცას და პასუხსაც აძ-ლევდა.

ახლა კი, ფიქრობდა როზმერი — შეიძლება ცოტა ხნით

მარტო დავრჩე მასთან. არ შეიძლება თვითონ არ გრძნობდეს, იმასაც ხომ ის კანონები აქვს ცხოვრებაში, რომლებიც მე დე-დამ მასწავლა.

მართალი იყო — სულ მალე დიკი სხვებს გამოეყო და მარტო აღმოჩნდნენ ტერასაზე. მაშინვე წასვლა მოუნდათ და ზღვისკენ დაქანებული ხრამისკენ დაშვება, იქით საფეხურები

ცოტა იყო და როზმერი ხტებოდა ალაგ-ალაგ.

პარაპეტიდან ხმელთაშუა ზღვას უყურებდნენ. ქვევით, ლერანსის კუნძულიდან, ყურეში გვიან შემოსული პატარა სამოგზაურო ხომალდი, ოთხი ივლისის დღესასწაულზე საჰაერო ბუშტი რომ მოწყდება და ზევ-ზევით წავა, ისე უფეხურივით ჩანდა, ჩამუქებულ პატარა კუნძულებშუა მიდიოდა და მუქ დინებას რბილად აპობდა.

"გასაგებია, ყოველთვის სიყვარულითა და აღტაცებით რომ ლაპარაკობთ დედაზე", უთხრა დიკმა. "მზე ამოსდის თქვენზე. ამერიკაში იშვიათად შეხვდებით ამისთანა გონიერ დედებს".

"დედაჩემი მშვენიერია", ლოცვასავით წარმოთქვა როზმერიმ.

"ერთი რამ მოვიფიქრე და გავუზიარე კიდევაც. მითხრა, რომ არ იცის რამდენ ხანს დარჩებით საფრანგეთში, რომ ამას თქვენ გადაწყვეტთ".

თქვენ, კინაღამ ხმამაღლა თქვა როზმერიმ.

"ჰოდა, რაკი აქ უკვე ყველაფერი დამთავრდა..."

"დამთავრდა?" იკითხა როზმერიმ.

"ტარმს ვგულისხმობ. წლევანდელი ზაფხული მიილია. წინა კვირაში ნიკოლის და გაემგზავრა, ხვალ ტომი ბარბანი მიდის, ორშაბათსაც ეიბ და მერი ნორთები მიდიან. ამ ზაფხულს იქნებ ბევრი კარგი რამაც გველის კიდევ, მაგრამ აქ არა, მინდა კარგად ჩათავდეს ყველაფერი, ხალისიანად და არა სანტიმენტალურად, ამისთვის გავმართე ეს საღამო. მე და ნიკოლი პარიზში მივდივართ, ეიბ ნორთი ამერიკაში ბრუნდება და გავაცილებთ. ხომ არ წამოხვალთ?"

"დედამ რა თქვა?"

"შესანიშნავი აზრიაო, ოღონდ თვითონ არ სურს წამოსვლა, უიმისოდ მოგიწევთ". "რაც მოვიზარდე, პარიზში არ გყოფილგარ", თქვა როზმე-

რიმ. "კარგია, რომ თქვენთან ერთად ვიქნები".

"მიხარია, რომ ამას მეუბნებით". ხომ არ მოესმა როზმერის, რომ ხმამ უცებ თითქოს ლითონივით გაიჟორიალა? "რა თქმა უნდა, მაშინვე ყველამ შეგამჩნიეთ, როგორც კი პლაჟზე გამოხვედით; პროფესიული ხალისი გეტყობოდათ და მიგხვდით, მსახიობი იყავით, ყველაზე უფრო ნიკოლი მიხვდა. ასეთი ხალისი ერთს კი არა, მთელ კომპანიასაც "კი ეყოფა".

უნებურად მიხვდა როზმერი, დიკი განგებ ახსენებდა ნი-

კოლს, შეემზადა, დანებებას არ აპირებდა და მიუგო:

"მეც მაშინვე მომინდა ყველას გაცნობა — მეტადრე თქვენი. ხომ გითხარით, მაშინვე შემიყვარდით, დაგინახეთ თუ არა".

სვლა კარგად იყო მოფიქრებული. მაგრამ ცასა და ზღეას შუა სივრცის უსაზღვროებამ სიფხიზლე მოჰგვარა დიქს, გაუნელა აგზნება, რამაც აქეთ წამოაყვანინა როზმერი, უკეთ ჩახვდა ზედმეტად გულახდილ ძახილს, იგრძნო ამ შეუმზადებელი სცენის ხიფათი, რაც დაუსწავლელ სიტყვებშიც გამოსჭვიოდა.

შეეცადა როზმერის თვითონვე მოსურვებოდა მიბრუნება, მაგრამ ეს არც ისე იოლი იყო, არც დაკარგვა უნდოდა მისი: თითქოსდა ცივმა ჟრუანტელმა დაუარაო, როცა დიკმა გულ-

ღიად, და მისთვის ჩვეული ხუმრობით უთხრა:

"თვითონაც არ იცით რა გინდათ, წადით, დედას ჰკითხეთ

და გეტყვით".

იფიქრა, დამბლა დამეცაო, სახელოზე მოჰკიდა ხელი, სასულიერო პირის შესამოსელივით გლუვი ქსოვილი მოხვდა ხელთ. კინაღამ ჩაიკეცა, მაგრამ, თავი შეიმაგრა და ერთხელაც სცადა გასროლა:

"თქვენ ჩემთვის ყველაზე შესანიშნავი ადამიანი ხართ, ვისაც კი ოდესმე შევხვედრივარ — დედაჩემის მერე".

"რომანტიკულად უყურებთ ყველაფერს".

დიკმა გაიცინა და ამ გაცინებამ აიყვანა ორივენი ისევ ზევით, ტერასაზე, სადაც როზმერი ნიკოლს ჩააბარა დიკმა...

მალე დამშვიდობების დროც დადგა. დაივერებმა იმაზეც იზრუნეს, რომ არავინ გაწვალებულიყო და შინ ყველა მშვიდობით მისულიყო. ტომი ბარბანთან ერთად — რომელსაც თავისი ბარგიც მიჰქონდა, რათა ოტელში გაეთია ღამე და დილით მატარებლისთვის მიესწრო, დაივერების დიდ "იზოტაში"
ჩასხდნენ მისიზ აბრამზი, ცოლ-ქმარი მაყისყოები და კემპიონი ერლ ბრედი მონტე-კარლოში მიემგზავრებოდა, როზმერი
და დედამისი ჩაისვა მანქანაში, ამათ მიიყვანდა და მერე გააგრძელებდა თავის გზას. როიალ დამფრიც ამათთან ჩაჯდა,
რადგან დაივერების მანქანაში მეტი ადგილი აღარ იყო ბაღში, მაგიდასთან, სადაც ისადილეს, ისევ ისე ენთო ფარნები,
დაივურები გვერდიგვერდ იდგნენ, ჭიშკრის ახლო, ნიკოლი
ღიმად ქცეულიყო, და მომხიბვლელობით ავსებდა ღამეს, დიკი ყველას სახელს ამბობდა და მშვიდობის ღამეს უსურვებდა,
ტკიფოლმა გაჰკრა გაფიქრებაზე, რომ თვითონ აქედან წავიდოდა, ისინი კი თავიანთ სახლში რჩებოდნენ ერთად. მერე ისევ
მისიზ მაკისკო გაახსენდა, რა დაინახაო ნეტავ.

## IX

ერთადერთობით მოწყენილ ვარსკვლავს, მჭვირვალედ ბნელო ღამე ეყოდა. წინ მიმავალი "იზოტას" საყვირის ხმას დახუთული ჰაერი ახშობდა. ბრედის შოფერს ნელა მიჰყავდა მანქანა: "იზოტას" უკანა ფარები ხანდახან გამოჩნდებოდა ხოლმე გზის მოსახვევში და მერე სულაც მიეფარებოდა თვალს.
მაგრამ ათიოდე წუთის შემდეგ ისევ გამოჩნდა, გზის პირას'
იდგა, ბრედის შოფერმა სვლა შეანელა, მაგრამ იმავ წამს ისიც
დაიძრა ადგილიდან, ოღონდ ისე ნელა, რომ იოლად გაასწრეს.
ჩავლისას რაღაც ხმაური მოესმათ რესპექტაბელური ლიმუზინიდან და დაინახეს, რომ დაივერების შოფერს თავისთვის
ეცინებოდა. მალე გაასწრეს. მანქანამ სისწრაფეს უმატა, მიჰქროდა გზაზე და გაწოლილ სიბნელეს შიგნავდა, ბოლოს
რამდენჯერმე, მოსახვევებში თავქვე დაეშვნენ და გოსის ვეება ოტელთან გაჩერდნენ.

როზმერის სამი საათით ჩაეძინა, მერე კი რული აღარ მიჰკარებია, იწვა და მთვარიან ღამეს გაჰყურებდა. ეროტიკულ სიბნელეში გახვეულს თავიანთი სავარაუდო შეხვედრები ელანდებოდა. ეს შეხვედრები ბოლოს აუცილებლად კოცნით თავდებოდა, მაგრამ კოცნა რაღაცა უსიცოცხლო იყო, გეგონება კინოშიაო. ვერ ისვენებდა, ტრიალებდა, ეს მისი პირველი უძილო ღამე იყო, სცადა დედამისივით ეფიქ-რა ყველაფერზე, ზოგი რამ წინანდელი საუბრებიდან გაახ-სენდა, ცნობიერებაში ბუნდოვნად რომ ჩარჩენოდა და ცხოვ-რებაში გამოუცდელს ცოტათი ახლა ესეც შველოდა.

როზმერი თავიდანვე მიაჩვიეს საქმეზე ფიქრს, ასე აღზარდეს. ორჯერ დაქვრივების მერე მისიზ სპირსმა, რაც რამ გააჩნდა, ყველაფერი შვილის აღზრდას მოახმარა, თექვსმეტისა
რომ შეიქნა და ყვავილივით გაიშალა, მომხიბლავი და მშვენიერთმიანი, დედამ იგი ექს-ლე-ბენში წაიყვანა და მიწვევას
არ დალოდებია, ისე მიაყენა კარზე იქ სამკურნალოდ-ჩასულ
ცნობილ ამერიკელ პროდიუსერს, მერე კი, ამერიკელი პროდიუსერი ნიუ-იორკს გაემგზავრა და დედა-შვილიც თან გაჰ-

"შენ უფრო საქმისთვის გაგზარდეს, და არა იმისთვის, რომ აუცილებლად გათხოვდე. ახლა შენ პირველი და კარგა მაგარი კაკალი ნახე, ისეთი, გატეხვა რომ ღირს, მიდი და სცადე, არ შეშინდე. გამოვა რამე, ხომ კარგი, არ გამოვა და არც მაგით წააგებ, გამოცდილებას შეიძენ, ეგებ ტანჯვის ფასადაც, შენი თუ სხვისი, მაგრამ ეგ არაფერი. ქალიშვილი ხარ, მაგრამ შემოსავლით — თავისთავადი, და ამ მხრივ ჭაბუკი უფრო გეთქმის".

როზმერი ბევრ ფიქრსა და სჯას მიჩვეული არ იყო, მხოლოდ დედის სრულყოფაზე თუ ფიქრობდა ხოლმე, — მაგრამ
ახლა თითქოს საბოლოოდ მოსცილდაო დედას, ვეღარა და
ვეღარ დაიძინა. ირიჟრაჟა თუ არა და შემინულ კარებს გეგონება ცა ზედ მიეკრა, როზმერი ადგა და ტერასაზე გავიდა
ფეხშიშველი. ქვის იატაკი თბილი იყო გუშინდელ მზისგან.
ჰაერში საკვირველი ხმები ირეოდა, რაღაცა ჩიტი თითქოს
ნიშნისგებით ახმიანდა ჩოგბურთის კორტზე და არა და აღარ
ჩერდებოდა. ოტელის უკანა მხარეს ვიღაცის ნაბიჯები კვალავდა მიწას, ვიღაც მიდი-მოდიოდა და ბეტონის საფეხურებზე მტვრიან გზასა და ღორღზე გავლისას, ჭრიალი მოისმა. მერე უკან გამობრუნების ხმა და, შორით მიჩუმდა ყველაფერი. მელნისფერი ზღვისა და გორაკის მუქი ჩრდილების
მიღმა ცხოვრობდნენ დაივერები. როზმერიმ თითქოს დაინა-

ხა, ერთმანეთის გვერდითა დგანან, ღიღინებენ, სიმღერას ვერ გაარჩევ, ზევით ადენილ კვამლსა ჰგავს იგი, რომელიღაც შო-რეულ ჰიმნს, იმათ ბავშვებს სძინავთ, ღამეა და ჭიშკარი და-კეტილი აქვთ.

შიგნით შევიდა ისევ, ესპადრილები და კაბა ჩაიცვა, ისევ გამოვიდა და ტერასის გავლით თითქმის სირბილით წავიდა ჰოლისკენ, რადგან ჯერ კიდევ ეძინათ იმ ოთახებში, რომლებსაც ჩაუარა. უცებ შეჩერდა, სადარბაზოს თეთრ და განიერ კიბეზე ვილაცა დაინახა. დააკვირდა, ლუის კემპიონი იცნო, საფეხურზე იჯდა და ტიროდა.

კემპიონი ჩუმად, მაგრამ მწარედ ტიროდა, ქალივით უთრთოდა მხრები და ზურგი. ეს ყველაფერი ძალიან წააგავდა ეპიზოდს შარშანდელი ფილმიდან, რომელშიც როზმერი თამაშობდა და ძალაუნებურად გაიმეორა თავისი როლი, მიუახლოვდა და მხარზე შეახო ხელი. მოულოდნელობისაგან, ვიდრე გაარკვევდა ვინ იყო, კემპიონმა წამოიყვირა.

"რა დაგემართათ?" როზმერი დაიხარა, თვალებში შეხედა. ცნობისმოყვარეობის ნატამალიც არ გამოუხატავს, თანაგრძნო-

ბით შესცქეროდა მხოლოდ. "ეგებ შველა შემიძლია?"

"მე ვერავინ მიშველის. თვითონა ვარ დამნაშავე, ხომ გიცოდი, ყოველთვის ერთი და იგივე ხდება ხოლმე".

"იქნებ მითხრათ, რა დაგემართათ?"

შეხედა როზმერის, თითქოს ფიქრობდა, ღირს თუ არა თქმა.

"არა", გადაწყვიტა ბოლოს, "ჯერ ძალიან ახალგაზრდა ხართ და არ იცით რას განიცდის ხალხი, როცა უყვართ. ეს აგონიაა. დრო მოვა და თქვენც გაიგებთ. მაგრამ რაც გვიან შეგიყვარდებათ, მით უკეთესი. პირველად არ დამმართნია; მაგრამ ახლა რაღაც საშინელებაა და მერე როდის — როცა მეგონა, რომ ყველაფერი კარგად იყო და…"

თენდებოდა, კემპიონს რაღაც საძაგელი სახე ჰქონდა, როზმერის ოდნავაც არ გამოუხატავს თავისი ზიზღი, კუნ-თიც კი არ შერხევია, არსაითაც არ გაუხედავს, მაგრამ კემ-პიონმა უტყუარი ალღოთი იგრძნო და უცებვე სხვა თემაზე სცადა საუბრის გადატანა.

"ეიბ ნორთი სადღაც აქ არის".

"როგორ, ის ხომ დაივერებთან ცხოვრობს".

"ჰო მაგრამ წამოვიდა იქიდან. — არ იცით, რა მოხდა?" მესამე სართულზე ვიღაცამ დარაბა ხმაურით გამოაღო დ ლანძღვას მოჰყვა. ხმაზე ეტყობოდა, ბრიტანელი იქნებოდა.

"არ შეიძლება ხმადაბლა ილაპარაკოთ?!"

შემცბარი როზმერი და ლუის კუმპიონი ქვევით, იმ გზაზე გავიდნენ, პლაჟისკენ რომ უხვევდა და გზის პირას, გრძელ სკამზე ჩამოსხდნენ.

"მაშ არაფერი იცით? ჩემო ძვირფასო, დაუგერებელია... კემპიონი გამხიარულდა, ეტყობოდა, ახალი ამბის მაუწყებელ კაცის როლი კარგ გუნებაზე აყენებდა, "და რაც შთავარია ეს ისე უცნაურად და სწრაფად მოხდა, მე მუდამ ვერიდები გულფიცხ ხალხს, მშლიან და კარგა ხნით ავადა ვხდები ხოლ. მე".

გამოხედვაშიც ეტყობოდა, გიჟდებოდა, ისე უხაროდა როზმერის ვერ გაეგო, რაზე ლაპარაკობდა, რა უხაროდა.

"ჩემო ძვირფასო", თქვა ლუის კემპიონმა, მუხლზე დაადო ხელი და წინ გადაიხარა ვითომ — სხვათა შორის არ ვიქცევი ასე, ვიცი რასაც ვამბობ და დამიჯერეთო. "დუელი იქნება".

"ho-s?"

"დუელი... ჯერ ცნობილი არ არის რით".

"დუელი? ვისი? ვისთან?"

"ახლავე გიამბობთ, თავიდან ბოლომდე". ღრმად ამოისუნთქა და იმისთანა რიხით დაიწყო, იფიქრებდით, როზმერის ბატივს არ მიაგებს რასაც ეტყვის, მაგრამ, სხვა გზა არ არის, არ დაუმალავს და ეუბნებაო: "თქვენ ხომ სხვა მანქანით მოდიოდით, ესეც თქვენი ილბალია, მე მთელი ორი წლის სიცოცხლე მაინც დავკარგე, ისე ელვის სისწრაფით მოხდა ყველაფერი…"

"რა, რა მოხდა?"

"არ ვიცი როგორ და რით დაიწყო, ჯერ იმ ქალმა წამოიწყო ლაპარაკი..."

"306?"

"ვაიოლიტ მაკისკომ". ხმას დაუწია, გეგონება სკამის ქვეშ ვიღაცები ისხდნენ და ყურს უგდებდნენ, "დაივერები არ ახსენოთ, ისე იმუქრებოდა, ერთი გაებედა და ვინმეს რამე ეთქვა მაგათზე". "ვინ იმუქრებოდა?"

"ტომი ბარბანი. ასე რომ, თქვენ არსადა თქვათ, ჩემგან თუკი რამე შეიტყვეთ. მაინც ვერ გავიგეთ, რისი თქმა უნდოდა ვაიოლიტს, რადგან ბარბანი აწყვეტინებდა ხოლმე, მერე უკვე ქმარი ჩაერია და ახლა, ჩემო კარგო, დუელი იქნება. დღეს, დილის ხუთზე, ზუსტად ერთი საათის მერე". ღრმად ამოიოხრა, ისევ თავისი უბედურება მოაგონდა. "მე მაინც ვიყო იმათ მაგივრად, მოვმკვდარიყავი, სულ ერთია, სიცოცხლე უკვე არაფრად მილირს". მწუხარედ ირწეოდა აქეთ-იქით.

ისევ გარახუნდა დარაბა ზევით და ისევ იმ ბრიტანელის

ხმა მოისმა:

"რა ამბავია, ბოლოს და ბოლოს! არ გაათავებთ?!"

სწორედ ამ დროს ეიბ ნორთი გამოვიდა ოტელიდან. რალაც დაბნუულად მიიხედ-მოჩხედა აქეთ-იქით, როზმერი და
კემპიონი დაინახა; ინათა, ზღვას უკვე თეთრი ცა დაჰყურებდა
და ორთავე კარგად ჩანდნენ. ეიბს გამოლაპარაკება უნდოდა,
მაგრამ როზმერიმ თავის გაქნევით ფრთხილად ანიშნა და
გზის პირასვე, ოღონდ მოშორებით, სხვა სკამზე გადასხდნენ.
როზმერიმ შეამჩნია, ეიბი ცოტათი მთვრალი იყო.

"თქვენ რაღად არ გძინავთ?" ჩაეკითხა ეიბი.

"მე ეს-ეს არის გამოვედი". როზმერის უნდოდა გაეცინა, მაგრამ დროზე გაახსენდა ის ბრიტანელი და თავი შეიკავა.

"ბულბულის ხმამ მოგაჯადოვათ?" თქვა ეიბმა და დაუმატა: "არა, უთუოდ ბულბულის ხმამ მოგხიბლათ... უკვე გიამბოთ ამ ჭრა-კერვის წრის წევრმა რა ამბავიც მოხდა?"

კემპიონმა ღირსებით აღსავსე კაცის იერით მიუგო:

"მე მხოლოდ ის ვიცი, რაც ამ ყურებით გავიგონე".

წამოდგა და ჩქარა გასცილდა იქაურობას. ეიბი როზმერის გვერდით დაჯდა.

"ასე ცუდად რად ექცევით?" ჰკითხა როზმერიმ.

"ვითომ ცუდად მოვექეცი?" გაიოცა ეიბმა. "მთელი დილაა ასე ლნავის."

"იქნება რამე უჭირს".

"შეიძლება".

"ეს რაღა მითქმა-მოთქმაა დუელზე? ვისა აქვს დუელი და Scanned by CamScanner ვისთან? არადა, შევამჩნიე, იმ მანქანას რომ ჩავუარეთ, ყვე-

ლაფერი რიგზე არ იყო. მართალია?"

"კაცმა რომ თქვას, მამლაყინწაობაა და მეტი არაფერი, მაგრამ ასეა თუ ისე, მართალია".

#### X

ეტყობა არეულობა მანამდე დაიწყო, ვიდრე ერლ ბრედის მანქანა დაივერების გზის პირას გაჩერებულ მანქანას გაუსწრებდა — ეიბის თანაბარი ხმა რიჟრაჟს მოყოლილ იდუმალ ხმაურს ერეოდა — ვაიოლიტ მაკისკო მისიზ აბრამზს .რაღაცას უამბობდა დაივერებზე; ზევით ასვლისას, ისეთი რამ ვნახე, გავშტერდიო. ტომი კი, როცა დაივერებს ეხება საქმე ქოფაკივით არის, ცუდად არავის არაფერს ათქმევინებს მაგათზე. ისე, უნდა ითქვას, ეს მისიზ მაკისკო აუტანლად ძნელი და გამომწვევი ვინმეა. მაგრამ ეს არ არის მთავარი. საქმე ის არის, რომ დაივერებს, ორთავეს, თავიანთი მეგობრების ცხოვრებაში გამორჩეული ადგილი უჭირავთ, იმაზე მეტი, ვიდრე ბევრ მათგანს ჰგონია. რა თქმა უნდა, ასეთ ურთიერთობაში რაღაც იკარგება, იმათთან ყოფნისას ზოგჯერ გგონია, მომხიბლავ საბალეტო წყვილს უყურებ, ბალეტი კი, მოგეხსენებათ, ყურადღებას იტაცებს და გხიბლავთ, მაგრამ აქ უფრო რთულადაა საქმე, მთელი ამბები უნდა იცოდე, ისე ძნელია გაგება. ასეა თუ ისე, ტომი ერთი იმათგანია, ვინც დიკის გამო ნიკოლსაც დაუახლოვდა და როგორც კი მისიზ მაკისკომ თავისი ამბის მოყოლა დაიწყო, მაშინვე ეცა:

"მისიზ მაკისკო, თუ შეიძლება გაათავეთ ლაპარაკი მისიზ

დაივერზე".

"თქვენ, არ გელაპარაკებით", შეეპასუხა იგი.

"თავი დაანებეთ დაივერებს, ძალიან გთხოვთ".

"რა, სალოცავები არიან?"

"დაივერებს თავი დაანებეთ, მისიზ მაკისკო. სხვა რამეზე ილაპარაკეთ".

მანქანაში ერთ გადასაშლელ სკამზე ტომი იჯდა, მეორეზე

კი კემპიონი და იმან მიამბო ყველაფერი.

"თქვენ ნუ მასწავლით", გაბრაზდა ვაიოლიტი.

ხომ იცით როგორც ხდება ხოლმე, როცა გვიან ღამით მან-

ქანით ბრუნდებიან წვეულებიდან, ჩურჩული, ჭორაობა, ზოგს კი აღარც ახსოვს რა იყო საღამოზე და თავისაზე ფიქრობს, ზოგო დაქანცულია და ეძინება. აქაც ასე, არავინ იცის რა მოხდა, სანამ მანქანა არ გაჩერდა და ბარბანმა კავალერისტივით არ დაიძახა:

"ოტელამდე ერთ მილზე მეტი არ იქნება და ფეხით წაბრძანდით, არა და, ვიცი როგორც წახვალთ, მოკეტეთ თქვენც

და თქვენმა ცოლმაც!"

"თქვენ შარზე ხართ", დაიყვირა მაკისკომ, "დიდ გულზე ხართ იმიტომ, რომ ჩემზე მაგარი კუნთები გაქვთ, მაგრამ მე თქვენი არ მეშინია, სამწუხაროა, რომ არა გვაქვს დუელის კოდექსი".

აი აქ დაუშვა შეცდომა, დაავიწყდა, რომ ტომი ფრანგია. ხელი მოუქნია და გაარტყა მაკისკოს, მერე კი შოფერმა, ეტყობა იფიქრა, დროაო და მანქანა ადგილიდან დაძრა. მაშინ იყო, რომ თქვენ გაუსწარით. ქალებმა კივილი ატეხეს. მთელი

ეს ამბავი ოტელში მისვლამდე გრძელდებოდა.

ტომიმ კანში დაურეკა თავის მეგობარს და სეკუნდანტო-ბა სთხოვა. მაკისკოს კემპიონი არ უნდოდა სეკუნდანტად, — სხვათა შორის არც ამას გამოუხატავს დიდი სურვილი, და მე დამირეკა, ტელეფონით არ უამბნია და აქ ჩამოსვლა მთხოვა. ვაიოლიტ მაკისკოს გული წაუვიდა, მისიზ აბრამზმა თავის ოთახში შეიყვანა, წამალი მისცა და ამასაც მშვიდად ჩაეძინა. როცა ჩამოვედი და გავიგე რაც მოხდა, ვცადე ტომისთვის გადამეთქმევინებინა, მაგრამ მოითხოვა, მაკისკომ ბოდიში მოიხადოსო, მაკისკო კი დიდ გულზეა და ბოდიში არც უფიქ-რია.

ეიბმა მოყოლა დაამთავრა და შეფიქრიანებულმა როზმერიმ ჰკითხა:

"დაივერებმა იციან, რომ ყველაფერი იმათ გამო მოხდა?" "არა — და არც არასოდეს გაიგებენ. ამ იდიოტ კემპიონს თითქოს მეტი საქმე არა ჰქონდა, რომ დადგა და ყველაფერი დაფქვა თქვენთან, მაგრამ ამას აღარაფერი ეშველება. შოფერი კი გავაფრთხილე, თუ ხმას ამოიღებ, ჩემს ძველ მუსიკალურ ხერხს გამოვცდი-მეთქი. მაგრამ ტომის ეს ორთაბრძო⊶ ლა არ უშველის, მაგას მართალი ომი სჭირდება."

"იმედია, დაივერები არაფერს გაიგებენ", თქვა როზმერიმ. "შაკისკოსთან უნდა წავიდე, ვნახოთ ერთი. ხომ არ გამომყვებით? გაუხარდება, არავინა ჰყავს, საწყალს ალბათ თვალიც

**არ** მოუხუჭავს".

როზმერიმ ცხადად დაინახა, რა დღეში იქნებოდა ეს უშნო, ჭინჭყლი და ბრაზმორეული კაცი. წუთით შეყოყმანდა, მერე სიბრალულმა სძლია ზიზღს და დათანხმდა, დილაადრიანი ძალ-ღონით სავსემ აირბინა კიბე ეიბთან ერთად.

შაკისკო საწოლზე ჩამომჯდარიყო, სიმთვრალისა და დიდ გულზე ყოფნისა, აღარაფერი ეტყობოდა, თუმცა, შამპანურის ჭიქა ისევ ხელში ეჭირა. ფერი აღარ ედო, ძალაგამოცლილი, გალიზიანებული ჩანდა. ეტყობა მთელი ღამე წერდა და სვამდა, დაბნეულად შეათვალიერა ეიბი და როზმერი.

"უკვე დროა?"

"არა, ოცდაათი წუთი კიდევ დარჩა".

მაგიდაზე ქაღალდები ეყარა, ალბათ ერთი გრძელი წერი-ლის ფურცლები. ძლივს მოუყარა თავი და დაალაგა. ბოლო გვერდების სტრიქონები გაკრული ხელით ეწერა და ძნელი გასარკვევი იყო. რიჟრაჟის მოძალებისას თანდათან მიმქრალლამპის შუქზე წერილს ბოლოში ხელი მოაწერა და ეიბს გაუ-წოდა.

"ჩემს ცოლს გადაეცით".

"მიდით, თავი ცივ წყალს შეუშვირეთ", ურჩია გიბმა.

"თქვენ ფიქრობთ, საჭიროა?" დაეჭვებით ჰკითხა მაკისკომ, "მთლად გამოფხიზლება არც მინდა".

"საშინელი შესახედი ხართ".

მაკისკო მორჩილად წავიდა სააბაზანოსკენ.

"საშინლად არეულ საქმეებს ვტოვებ", დაიძახა მან. "არ ვიცი რანაირად დაბრუნდება ამერიკაში ვაიოლიტი. დაზღვეულიც კი არა ვარ, ვერც ამას მოვაბი თავი".

"რას როშავთ, ერთი საათის მერე მშვიდად ისაუზმებთ

ოტელში".

"ჰო, ვიცი, რა თქმა უნდა". მალე დაბრუნდა. თმა სველი ჰქონდა. შეფიქრიანებულმა ისე შეხედა როზმერის, თითქოს პირველად ხედავსო, მერე უცებ თვალები ცრემლებით აევსო.

"რომანი მაინც ვერ დავამთავრე. ყველაზე მეტად ესა მტანჯავს. თქვენ კარგი თვალით არ მიყურებთ", როზმერის უთხრა, "მაგრამ რას იზამ, უწინარესად მე მწერალი ვარ". ისე
სევდიანად ამოიოხრა, თითქოს გული ამოაყოლაო და უიმედოდ გააქნია თავი. "ბევრჯერ შევცდი ცხოვრებაში, ძალიან
ბევრჯერ, მაგრამ მე მაინც ერთ-ერთი გამოჩენილი ადამიანი
ვარ, ასე თუ ისე..."

ვეღარ დაამთავრა და ჩამქრალ სიგარეტს დაუწყო ქაჩვა.

"როგორ არ გიყურებთ კარგი თვალით", უთხრა როზმერიმ, "ოღონდ მე ვფიქრობ, ეს დუელი არ უნდა მოხდეს".

. "ჰო, კარგი იყო ბარბანი ერთი მაგრად მიმებეგვა, აი ეს კი ლირდა, მაგრამ რაც არის არის, რაღას ვიზამ, ისეთ საქმეში გავები, რისი უფლებაც მე არა მქონდა, ძალიან ფიცხი ვარ…"

ეიბს დაკვირვებით შეხედა, თითქოს მოელოდა, რომ შეედავებოდა. მერე უცნაურად გაიცინა და ისევ ჩამქრალი სიგა-

რეტი მიიტანა პირთან. ხშირ-ხშირად სუნთქავდა.

"მთელი უბედურება ის არის, რომ მე თვითონ წამოვიწყე დუელზე ლაპარაკი. ვაიოლიტი მაინც რომ გაჩერებულიყო, კიდევ რაღაცას გავხდებოდი. ცხადია, ახლაც არ არის გვიან, შეიძლება სულაც ავდგე და სადღაც წავიდე ან ყველაფერზე გავიცინო, მაგრამ მეშინია, ვაიოლიტი არასოდეს მაპატიებს".

"სულაც არა", თქვა როზმერიმ, "უფრო მეტ პატივსაც

გცემთ".

"თქვენ არ იცნობთ ვაიოლიტს. თუ უპირატესობასა გრძნობს ვინმეს მიმართ, ან თვითონ უფრო ძლიერია, მაშინ ძალიან მკაცრია ხოლმე. თორმეტი წელია ცოლ-ქმარი ვართ, გოგონა გვყავდა, შვიდი წლისა მოგვიკვდა, მერე ხომ იცით, როგორცა ხდება, თავს ნება მივეცით და განზე დავიწყეთ ყუ-რება, არაფერი სეროზული, მაგრამ მაინც, როგორღაც კი დავ-შორდით. გუშინ, ლაჩარი ხარო, დამიძახა".

როზმერი შეწუხდა, ვეღარაფერი უთხრა.

"კარგი, შევეცდებით ისე ჩაიაროს ყველაფერმა, რომ მაინცდამაინც არ დავზარალდეთ". თქვა ეიბმა და ტყავის ბუ-დე გახსნა. "ბარბანის სადუელო რევოლვერებია, თან წამო-

Scanned by CamScanner

ვიღე, რომ წინასწარ ნახოთ რაც არის. ბარბანს სულ თან დააქვს". ეიბმა ერთ-ერთი ძველებური რევოლვერი აიღო ხელში, სიმძიმე გაუსინჯა. როზმერიმ უმწეოდ შეჰყვირა, მა-კისკომ შეშფოთებულმა შეხედა რევოლვერებს.

"რა აუცილებელია, რომ ერთმანეთს ამ ძველი, ორმოცდა-

ხუთკალიბრიანებით ვესროლოთ".

"არ ვიცი", შეუბრალებლად მიუგო ეიბმა. "საერთოდ მიჩნეულია, რომ გრძელლულიანი რევოლვერით უფრო იოლია დამიზნება".

"მანძილი?" ჰკითხა მაკისკომ.

"ამაზეც გავიგე ყველაფერი. თუ ორივე მხარე მოწინააღმდეგის მოკვლაზე ფიქრობს, რვა ნაბიჯს ნიშნავენ, თუ ბოღმა უნდათ გახეთქონ, ოც. ნაბიჯს, ხოლო თუ ღირსების დაცვაა მიზანი, ორმოც-ნაბიჯს ითვლიან".

"კარგია".

"საინტერესო დუელია აღწერილი პუშკინის<sup>1</sup> ერთ მოთხრობაში", გაიხსენა ეიბმა. "მოწინააღმდეგეები ორივენი უფსკრულის პირას დგანან, ამ დროს, სულ მცირე ჭრილობაც კი დაღუპვას ნიშნავს".

ეტყობა, მაკისკო ვერ უსმენდა, ან ძლივს გაიგო რა თქვა

ეიბმა და ჰკითხა:

"hs?"

"არ გინდათ ერთი ჩაყვინთოთ წყალში? გამოცოცხლდებით".

"არა, არა, აბა რა ცურვის ჯავრი მაქვს ახლა", ამოიოხრა

მაკისკომ. "ვერ გამიგია", უმწეოდ თქვა, "რა მრჯის?"

ეს პირველი რამ იყო, რასაც ცხოვრებაში აკეთებდა; მაკისკო იმ ხალხს ეკუთვნოდა, რომელთათვისაც გრძნობადი სამყარო არ არსებობს, და როცა კონკრეტული ფაქტის წინაშე აღმოჩნდა, დაიბნა, გაკვირდა.

"უკვე შეიძლება წასვლა". ხედავდა მაკისკო რა დღე<sup>ში</sup>ც

იყო და ეიბმა ადგომა ამჯობინა.

"კარგი". მაკისკომ კარგა ბლომად მოსვა ბრენდი, მათარა

ჯიბეში ჩაიდო, ველურივით იყურებოდა: "ვთქვათ და მე მოვკალი — ციხეში ჩამსვამენ?"

"იტალიის საზღვარზე გადაგსვამთ".

როზმერის შეხედა და მერე დამნაშავესავით მიმართა ეიბს:

"წასვლამდე რაღაცაზე მინდა ცალკე გელაპარაკოთ".

"იმედი მაქვს, ერთი თქვენგანიც არ დაიჭრება", თქვა როზმერიმ, "სისულელეა ეს დუელი და ყველაფერი უნდა იღონოთ, რათა თავიდან აიცილოთ".

# XI.

ქვევით, ცარიელ ვესტიბიულში როზმერი კემპიონს შეხვდა.

"დაგინახეთ, ზევით რომ ადიოდით". აღელვებით თქვა.

"მაკისკო როგორ არის? დუელი როდის იქნება?"

"არ ვიცი", არ მოეწონა კემპიონის ხმა, თითქოს ცირკს ეხებოდა საქმე და მაკისკო კი ტრაგიკული მასხარა ყოფილიყო.

"წამოხვალთ ჩემთან ერთად?" ისე თქვა, ერთი "ზედმეტი ადგილიაო", რომ იტყვიან, "მანქანა შევუკვეთე ოტელში".

"არ მინდა წასვლა".

"რატომ? მართალია ერთი ორი წლის სიცოცხლე დამაკლდება, მაგრამ ასეთ რამეს უნდა შეხედო, მერე მოყოლით რას გაიგებ. შეგვიძლია მანქანა გავაჩეროთ, იქამდე არც მივიდეთ და შორიდან ვუყუროთ".

"იქნებ, მისტერ დამფრის უთხრათ, და ის წამოგყვეთ".

კემპიონს მონოკლი ჩამოუვარდა, ამჯერად ვეღარსად ჩაემალებოდა იგი. გაიმართა და უპასუხა:

"მე მასთან საქმე აღარა მაქვს".

"სამწუხაროდ, არ შემიძლია წამოვიდე. დედას ეს არ გაუხარდება".

როზმერი თავის ოთახში შევიდა, მეორე ოთახში საწოლმა გაიჭრიალა და მისიზ სპირსმა ნამძინარევი ხმით იკითხა:

"სად იყავი?"

"არ მეძინებოდა და გარეთ გავედი. დაიძინე, დედა".

"შემოდი". როზმერიმ გაიგონა, დედა რომ წამოჯდა, შევიდა და რაც მოხდა, უამბო. "ბოლოს და ბოლოს, მოშორებით გაჩერდები, იქნება რა დას-

ქირდეთ და შენი შველა საქიროც გახდეს".

როზმერო მერყეობდა, ამ სანახაობის შემყურე თავისი თავი წარმოიდგონა და არ მოეწონა მისიზ სპირსი კი ჯერ ისევ ძილ-ღვიძილში იყო, აზრები ერეოდა. თავისი წარსულიდან, როცა ექიმის ცოლი იყო, ღამით მომაკვდავთან თუ უბედური შემთხვევის ადგილზე გამოძახება გაახსენდა. "მე მინდა, რომ უჩემოდ, შენ თვითონ იცოდე სად წახვიდე და რა გააკეთო, რეინის სარეკლამო ტრიუკებისთვის ხომ გააკეთე უფრო ბევრი რამ და უფრო ძნელიც".

მაინც ეჭვობდა, რად უნდა წავიდეო, მაგრამ დედის მკაფიო და დამაჯერებელ ხმას დაემორჩილა, როგორც მაშინ, როცა თორმეტი წლისა იყო და დედამ პარიზში მკაცრად უთხრა, "ოდეონში" მსახიობების შესასვლელიდან შედიო. მერე კი მიეფერა და წარმატება მიულოცა.

კიბეზე იდგა, ჯერ ისევ ფიქრობდა, როცა მაკისკო და ეიბი დაინახა, უკვე მანქანაში ისხდნენ და მიდიოდნენ. როზმერიმ შვებით ამოისუნთქა. მაგრამ თითქმის მაშინვე ოტელის მანქანამ გამოუხვია კუთხიდან. ლუის კემპოონმა ხრინწიანი ხმით შეჰყვირა, როზმერის მანქანის კარი გაუღო და გვერდზე მოისვა

"განგებ დავიმალე, არ დაგვიშალონ-მეთქი. არადა, ხომ

ხედავთ, კინოაპარატიც კი წამოვიღე".

როზმერიმ, მეტი რომ ვეღარაფერი თქვა, გაიცინა. იმდენად საზიზღარი იყო, რომ ზიზღსაც აღარ იწვევდა, უბრალოდ, აღამიანს აღარა ჰგავდა.

"საინტერესოა, რატომ არ უყვარს მისიზ მაკისკოს დაივე-

რები?" იკითხა როზმერიმ, "ისინი კარგად ექცეოდნენ".

"როგორ არ უყვარს. საქმე ის არის, რომ მისიზ მაკისკომ იმათთან რალაცა დაინახა. ჩვენ კი ვერა და ვერ გავიგეთ — რა. ბარბანის ბრალია".

"ესე იგი, თქვენ ამის გამო არ იყავით შეწუხებული?" "არა, რას ამბობთ!" ხმა გაუწყდა, "ის ამბავი ოტელში დაბრუნების მერე მოხდა, მაგრამ ახლა ჩემთვის უკვე სულ ერთია — მე ხელები დამიბანია, ამაზე ფიქრიც აღარ მინდა". ეიბის მანქანას მიჰყვებოდნენ, ჟუან-ლე-პენს ჩაუარქს, სადაც ახალი კაზინოს კარკასი აღემართათ უკვე და სანაპირო გზით აღმოსავლეთის მხარეს გაუყვნენ. დილის ოთხ საათზე მეტი იყო. ცას მოლურჯო-მონაცრისფრო ფერი ედო, მეთევზეთა პირველი ნავები ჭრიალით გადიოდნენ ზღვაში. ცოტა ხნის მერე მანქანებმა მთავარი გზიდან გადაუხვიეს და ეს ადგილიც უკან მოიტოვეს.

"ახლა გოლფის მინდორი გამოჩნდება!" დაიძახა კემპიონმა.

"ეჭვი არ მეპარება, რომ დუელი იქ იქნება"..

კემპიონი მართალი იყო, ეიბის მანქანა გაჩერდა. დილიდანვე ეტყობოდა, ცხელი დღე იქნებოდა. აღმოსავლეთით ცას
წითელ-ყვითელი ზოლები აჩნდა, რაც ყოველთვის პაპანაქებას
მოასწავებს ხოლმე. კემპიონმა და როზმერიმ შოფერს ფიჭვნარში გააჩერებინეს მანქანა და თვითონ ტყის პირას ჩრდილში მიდიოდნენ, გარშემო უვლიდნენ იმ მინდორს, სადაც ეიბი და მაკისკო — ხანდახან "შეშინებული ბოცვერივით რომ
წაიგრძელებდა ხოლმე კისერს, სიცხისაგან გადათეთრებულ
ბალახზე დადიოდნენ, და მაშინ, გოლფის ბურთის "მორეულ
სანიშნესთან ვიღაცები გამოჩნდნენ, ბარბანი და მისი ფრანგი
სეკუნდანტი იყვნენ, აქეთ "მოდიოდნენ, სეკუნდანტი უკან
მოჰყვებოდა ბარბანს, იღლიაში რევოლვერებიანი ყუთი ამოედო.

შემცბარი მაკისკო ეიბის ზურგს უკან ამოეფარა და ბრენდიანი მათარა მოიყუდა. მერე ხველებ-ხველებით, ფეგონება ყელში რაღაც გაეჩხირაო, სწრაფად წავიდა პირდაპირ და ალბათ დაეჯახებოდა მისკენ მომავალ მოწინააღმდეგეს, ეიბს რომ არ შეეჩერებინა. თვითონ ეიბი ფრანგთან მოსალაპარაკებლად

მიდიოდა. მზე წითლად ამოსულიყო.

კემპიონი მხარში ჩაეჭიდა როზმერის.

"არა, ამის გაძლება არ შემიძლია", ლამის უხმოდ დაიწრიპინა. "ეს უკვე მეტისმეტია ჩემთვის, ორი წლის სიცოცხლე მაინც..."

"თავი დამანებეთ!" დაუყვირა როზმერიმ, შეტრიალდა და მხურვალედ მოჰყვა ლოცვას ფრანგულად.

დუელანტები ერთმანეთის პირისპირ დადგნენ, ბარბანს იდაყვზემოთ აეწია სახელოები. თვალები უელავდა მზეზე,

აწრიალებულივით იხედებოდა, თუმცა ხელისგული აუჩქარებლად და მშვიდად შეიმშრალა შარვალზე. ბრენდმა მაკისკოს
გამბედაობა შემატა, ტუჩები წინ გამოეწია, თითქოს უსტვენსო, ან ვითომც აქ არაფერიო და სანამ ეიბი ცხვირსახოცით
ხელში ერთი ნაბიჯით წაიწეოდა, გრძელი ცხვირი შეათამაშა.
ფრანგი სეკუნდანტი მეორე მხარეს იყურებოდა. როზმერი
ლამის იხრჩობოდა საცოდაობით, ლამის კბილებს აკრაჭუნებდა, ისე სძულდა ახლა ბარბანი. მერე:

"ერთი — ორი — სამი!" დაჭიმული ხმით დაიძახა ეიბმა.

ორივემ ერთდროულად გაისროლა. მაკისკო შექანდა. მაგრამ მაშინვე თავი შეიმაგრა. ორივემ ააცდინა.

"საკმარისია!" დაიძახა ეიბმა.

დუელანტებმა წინ წამოიწიეს. ყველამ სათითაოდ **შეხედა** ბარბანს.

"ვაცხადებ, რომ არა ვარ დაკმაყოფილებული".

"რა? დაკმაყოფილებულიცა ხართ და მეტიც", მოუთმენ-ლად თქვა ეიბმა. "ეგ არის, რომ ჯერ ვერ მიმხვდარხართ".

"თქვენი კლიენტი უარს ამბობს მეორე სროლაზე?"

"რას ჩმახავთ, ტომი. თქვენ თქვენსას მოითხოვდით და ჩემმა კლიენტმაც ის შეასრულა, რაც მოეთხოვებოდა."

ტომიმ აგდებულად გაიცინა.

"მანძილი სასაცილო იყო", თქვა მან. "ასეთ ფარსებს მიჩვეული არა ვარ. თქვენს კლიენტს უნდა ახსოვდეს, რომ ამერიკაში არ იმყოფება".

"ამერიკაზე ცოტა ფრთხილად ილაპარაკეთ", საკმაოდ მკვეთრად უთხრა ეიბმა და მერე უფრო შემრიგებლური ხმით მიმართა, "საკმაოდ შორს შევტოპეთ, ტომი". ერთ წუთს ჩუმად რაღაცაზე დაობდნენ, მერე ბარბანმა თავი დაიქნია და ყოფილ მოწინააღმდეგეს შორიდან ცივად დაუკრა თავი.

"ხელის ჩამორთმევა?" იკითხა ფრანგმა ექიმმა.

"უკვე იცნობენ ერთმანეთს", მიუგო ეიბმა.

ეიბი მაკისკოსკენ მიტრიალდა.

"წავიდეთ, გავათავეთ".

ნაბიჯი წადგეს წასასვლელად და აგზნებული მაკისკო მკლავში სწვდა ეიბს.

Scanned by CamScanner

"მოიცადეთ", უთხრა ეიბმა. "ტომის რევოლვერი უნდა მივცეთ, კიდევ გამოადგება".

მაკისკომ რევოლვერი გაუწოდა ეიბს.

"ეშმაკსაც წაუღია მაგისი თავი", ჭირვეულად დაიძახა მაკისკომ, "უთხარით, რომ მას შეუძლია…"

"ვუთხრა, რომ გსურთ მეორედ სროლა?"

"კარგად გავედი დუელში!" მაკისკომ, როცა გზას დაადგნენ, მაშინ იყვირა. "ასე არ არის? ძალიან კარგად. უღიმღამოდ და ისე კი არა".

"მთვრალი იყავით", მოუჭრა ეიბმა.

"არა, მთვრალი არა".

"არ იყავით, ჰო, იყოს ასე".

"თუკი კიდევაც დავლიე ცოტა, მერე რა მოხდა, ამით ვითომ რა შეიცვალა?"

თანდათანობით გულდაჯერებული მაკისკო რიხით ლაპარაკობდა და დროდადრო უკვე ბოღმამორეულიც გახედავდა ხოლმე ეიბს.

"ჰო, ამით რა შეიცვალა?" ჩააცივდა ეიბს.

"თუკი არ გესმით, ახსნაც არა ღირს".

"არ იცით, ომში ყველა თვრებოდა?"

"მოგრჩეთ. რაც იყო იყო".

"მაგრამ კიდევ დარჩა რაღაც, მთლად დამთავრებული არა ჩანდა ეს ამბავი. ბალახზე ვიღაც მორბოდა, სირბილით ეწეოდა მათ. დაინახეს, ექიმი იყო, სულს ძლივს ითქვამდა.

"Pardon, messieurs", აქომინებულმა მიმართა ორივეს. "Voulez — vous régler mes honoraires? Naturellement c'est pour soins médicaux seulement. M. Barban n'a qu'un billet de mille et ne peut pas les régler et l'autre a laissé son porte-monnaie chez lui"!.

"ფრანგი რის ფრანგია, თუ ასე არ მოიქცა", თქვა ეიბმა

და მერე ექიმს ჰკითხა: რამდენი?

"მე გადავიხდი", თქვა მაკისკომ.

"არა, ჩემზე იყოს. ერთი ხიფათი გველოდა ყველას".

¹ ბოდიშს ვიხდი, ბატონებო, მე ხომ ჩემი ჰონორარის მიღება მინდა? საექიმო შემწეობისათვის, რაღა თქმა უნდა. მესიე ბარბანს არ შეეძლო გადახდა, რადგან მხოლოდ ათასფრანკიანი აქვს და, მეორე ბატონს კი საფულე შინ დაჩა (ფრანგ.).

სანამ ეიბი ექიმს უხდიდა, მაკისკო უცებ ბუჩქებში შევარდა და აღებინა. იქიდან გამოსულს ფერი აღარ ედო. ნელა მიჰყვა ეიბს მანქანამდე. დილის მზე უკვე ვარდისფრად ანათებდა.

ჩირგვნარში ზურგზე იწვა კემპიონი და სული ეხუთებოდა, ის დაზარალდა ამ დუელში. როზმერიმ, რომელსაც უცებ ისტერიკული სიცილი აუტყდა, სანდლის წვერი წაჰკრა კემპიონს და ვიდრე ზეზე არ წამოდგა, აღარ მოეშვა. ახლა მისთვის ერთი რამ იყო უმთავრესი — რამდენიმე საათის მერე პლაუზე იმას ნახავდა, ვისაც ჯერ ისევ "დაივერებს" ეძახდა ფიქრით.

# XII

ვუაზენთან ნიკოლს ელოდნენ, ექვსივე, როზმერი, ნორთები, დიკ დაივერი და ორი ახალგაზრდა ფრანგი მუსიკოსი. ისხდნენ და რესტორანის სხვა კლიენტებს აკვირდებოდნენ დიკი ირწმუნებოდა, ჩემსავით არც ერთ ამერიკელ მამაკაცს არ შეუძლია ხალხში ბუნებრივად თავის დაჭერაო, ამათ კი სურდათ, საპირისპირო რამ დაენახათ, მაგრამ თითქოსდა ჯიბრზე, ათი წუთი გავიდა და ერთი კაციც არ შემოსულა რესტორანში, რომ სახეზე არ წაევლო ხელი.

"ტყუილად აღარ ვატარებთ გაწკეპილ და შეღებილ ულვაშს", თქვა ეიბმა. "მაგრამ მაინც, იმის თქმა, თითქოს დიკი ერთადერთია, ვისაც კარგად უჭირავს თავი, არ არის სწორი".

"სწორია", მიუგო დიკმა.

"ერთადერთი, ვისაც კარგად უქირავს თავი, თუ ფხიზელია", შემოვიდა კარგად ჩაცმული ამერიკელი ორ ქალთან ერ-თად, ლაღი მიხრა-მოხრით, ლაპარაკ-ლაპარაკით მივიდნენ ერთ თავისუფალ მაგიდასთან და დასხდნენ. ამერიკელმა უცებ იგრ-ძნო, რომ უყურებდნენ და მაშინვე კაშნეზე წაივლო ხელი, არადა, ყველაფერი წესრიგში ჰქონდა. სხვა მამაკაცი ხომ, სანამდე ადგილს შესთავაზებდნენ და დაჯდებოდა, წამდაუწუმ წაივლებდა სახეზე ხელს, — ამ კაცს კიდევ სხვა კაციც ახლდა, ის, უნებურად, ჩაუქრობელ სიგარას ხან ზევით ასწევდა, და ხან დაუშვებდა. სხვები შედარებით კარგ დღეში იყვნენ, ზოგი სათვალეს ათამაშებდა ხელში და ვიღაცა კიდევ, ხალზე ამო-

Scanned by CamScanner

სულ თმას იწვალებდა. ზოგნი, უქმად ყოფნის გამო, სხვა ვერაფერი მოეფიქრათ და`პირზე იდებდნენ ხელს ან ყურის გიგილოს ისე ექაჩებოდნენ, ლამის ჩამოეგლიჯათ.

ახლა კარგად ცნობილი გენერალი შემოვიდა და ეიბ ნორთმა, იმის იმედით, რომ პირველ წლიდანვე უესტ პოინტში ისეთი წვრთნაა, რასაც ვერც ერთი კადეტი ვერ ასცდება და რაც მერე ყველას უკვე ძვალ-რბილში უჯდება ხოლმე, დიკს ხუთ დოლარზე დაუდო სანაძლეო.

გენერალს ხელები ჩამოეშვა, მშვიდად იდგა და იცდიდა, როდის შესთავაზებდნენ ადგილს, რომ დამჯდარიყო. უცებ ორივე ხელი ჯამბაზ თოჯინასავით უკან გაიქნია და ის იყო, დიკმა კინაღამ წამოიყვირა სიხარულით, რომ გენერალი ისევ გაიმართა და ყველამ შვებით ამოისუნთქა — ტყუილუბრალოდ შეშფოთდნენ თურმე, ბიჭმა სკამი შესთავაზა და... გაჯავრე-ბულმა მხედართმთავარმა ჭაღარაზეღა წაივლო ხელი და მოიფხანა.

"ხომ დაინახეთ", რიხით თქვა დიკმა, "ერთადერთი ვარ".

როზმერისთვის, მაინც ეს ასე იყო. დიკი ხედავდა, მშვენიერი აუდიტორია ჰყავდა და ისე გაამხიარულა და შეაკავშირა ყველა, რომ თავიანთ გარდა ვეღარავის ამჩნევდა როზმერი. ორი დღის წინათ ჩამოვიდნენ პარიზში, მაგრამ თითქოს ჯერ ისევ პლაჟზე, ქოლგებქვეშ ისხდნენ. როცა წუხელ პაჟთა კორპუსის მეჯლისზე მისთვის უცხო გარემოში მოხვდა, ჰოლივუდის საღამოებს ჯერ კიდევ შეუჩვეველი როზმერი აქაც ცოტა დაიბნა, მაგრამ დიკი იქ იყო, ის შველოდა; მეგობრულად ხვდებოდა ყველას, რჩეულთა შორის რჩეულებს, რადგან დაივერებს ხომ ყველგანა ჰყავდათ მეგობრები. მაგრამ, ეტყობა, ერთმანეთს ხშირად არ ხვდებოდნენ და ამიტომ იყო, რომ, სად დაიკარგეთ, აღარ ჩანხართო, შესძახებდნენ ხოლმე და მაშინათვე ისევ შეიკვრებოდა ვიწრო წრე ახლობლებისა, და ყველას, ვინც კი ამ წრის გარღვევას შეეცდებოდა, თავაზიანი, მაგრამ ირონიით სავსე აცილება, ერთგვარი Coup de grâce¹ ელოდა. როზმერის უკვე ეჩვენებოდა, რომ ოდესღაც თვითონაც იცნობდა ამ ხალხს. რომ მას შემდეგ დიდი ხანი გავიდა, და არ

<sup>1</sup> გამანადგურებელი დარტყმა (ფრანგ.).

იყო ის დრო კარგი დრო და დაშორდა მათ, მეხსიერებიდან

ამოშალა.

ამათი კომპანია საოცრად ამერიკული იყო, მაგრამ ხანდახან თითქოს არც არაფერი ეცხო ამერიკული. დიკი სუყველას შველოდა, რათა თავის თავს დაბრუნებოდა ყველა და უკვე ბევრი წლის კომპრომისებით წაშლილი სახე აღედგინათ.

კვამლიან და ჩაბნელებულ, საჭმლის მძაფრი არომატით გაჟლენთილ რესტორანში, ნიკოლის ღია ცისფერმა კოსტიუმმა გარედან კარგი ამინდივით შემოანათა. ყველამ აღტაცებით შეხედა ნიკოლს და ამანაც გაბრწყინებული, მადლიერი ღიმილი შეაგება. ეფერებოდნენ ერთმანეთს და ქათინაურებს არ იშურებდნენ, თავაზად იქცნენ. მერე მობეზრდათ ეს ყველაფერი და ხუმრობა იწყეს, ქარაგმებითაც ლაპარაკობდნენ და ქილიკობდნენ კიდევაც. ბოლოს ისა თქვეს, რას აპირებდნენ მომავალში. ბევრს იცინოდნენ და გულიანადაც, თუმცა, რომ გეკითხათ, ერთიც ვერ გაიხსენებდა რაზე ან რისთვის; კაცებმა სამი ბოთლი ღვინო დალიეს. სუფრასთან სამი ქალი იჯდა, ამ სამეულში მრავალსახიანი ამერიკული ცხოვრების ნაკადი სახიერდებოდა, ნიკოლი შნოთი გამდიდრებული ამერიკელი კაპიტალისტისა და გრაფ ფონ ლიპე ვაისენფელდის შვილიშვილი იყო. მერი ნორთი — ქარგლის ქალიშვილი და პრეზიდენტ **ჯონ** ტაილერის შთამომავალი, როზმერი — საშუალო კლასის ოჯახიშვილი, დედის მცდელობით ჰოლივუდის უსახელო მწვერვალზე ატყორცნილი.

სხვა ამერიკელ ქალებს არ ჰგვანდნენ და სწორედ ამით ჰგვანდნენ ერთმანეთს. სამივე მამაკაცების სამყაროში არსებობ. და და ბედნიერებიც იყვნენ ასეთი არსებობით, მით უფრო რომ იმავე მამაკაცების წყალობით და არამც და არამც იმათ თან შეჯახებით, თავისთავადობას ინარჩუნებდნენ. ყველა მათ განს შეეძლო კარგი ცოლობა გაეწია, ან კარგი კურტიზანც ყოფილიყო, წარმოშობის გამო კი არა, ამაზე უფრო მეტის გამოც, იმის მიხედვით, შეხვდებოდა თუ არ შეხვდებოდ ცხოვრებაში კაცს, რომელსაც იგი სჭირდებოდა.

ასე რომ, როზმერის სიამოვნებას ჰგვრიდა რესტორანში ამათთან ყოფნა, და კარგი იყო, რომ შვიდნი იყვნენ, არც მეტი, არც ნაკლები და შესაძლოა თვითონ იგი, ახალბედა ამათ

Scanned by CamScanner

ფორის, თავისი ყოფნით კატალიზატორივით მოქმედებდა და აიძულებდა გამოევლინათ ბევრი რამ, რასაც აქამდე ერთმა-ნეთს, უნდოდათ, მაგრამ ვერ უმხელდნენ. სუფრიდან რომ წა-მოიშალნენ, ოფიციანტმა როზმერი იმ ჩაბნელებულ კუნჭუ-ლამდე მიაცილა, რაც ყველა ფრანგულ რესტორანსა აქვს. მქრქალ ნარინჯისფერ ნათურის შუქზე როზმერიმ ცნობარში "ფრანკო ამერიქენ ფილმზის" ტელეფონი მოძებნა და დარეკა. რაღა თქმა უნდა, ჰქონდათ "მამიკოს გოგონას" ფირი, ოღონდახლა იგი წაღებულია, რამდენიმე დღის მერე კი შეიძლება მი-სი ჩვენება, საკმარისია მისს ჰოიტი მივიდეს მისამართით—341, რუ დე სენტ ანჟ და იკითხოს მისტერ კრაუდური.

ტელეფონი ვესტიბიულის გასასვლელთან იდგა და როცა მილს დებდა, როზმერის ჩურჩული მოესმა, ხუთი ფუტის მოშორებით, პალტოების საკიდარს იქიდან ისმოდა ჩურჩული.

"...მაშ, გიყვარვარ?"

"მეკითხები კიდევაც!"

როზმერის ნიკოლის ხმა ეცნო, შეყოყმანდა და კარებში

გაჩერდა, მერე დიკის ხმა მოესმა:

"მინდიხარ, საშინლად და ახლავე, ოტელში წავიდეთ". ნიკოლს შეკავებული ოხვრა აღმოხდა. ერთხანს მხოლოდ სიტყვები ესმოდა როზმერის, ვერ იგებდა რას ამბობდნენ იმ სიტყვებით, მაგრამ ტონი აგებინებდა, და მისი იდუმალება თრთოლასავით უვლიდა.

"მინდიხარ..."

"ოტელში მოვალ, ოთხისთვის".

ხმები მიიკარგა. როზმერი ჯერ ისევ ისე, სუნთქვაშეგუბებული იდგა. გაკვირდა კიდევაც პირველად — მათი ურთიერთობა რატომღაც უფრო შეკავებული, უფრო მიღმური წარმოედგინა და უცებ კი სულ სხვა, ახალი გრძნობა მოერია,
სულ უცნობი და ღრმა და არ იცოდა რა იყო ეს — აღტაცება თუ სიძულვილი, შეძრა კი ამან და რესტორანში შებრუნებისას, საშინლად ეული ეგონა თავი, აგზნებულიყო, ყურებში
ისევ ჩაესმოდა ნიკოლის მადლიერი, ვნებაგარეული ხმა, "მეკითხები კიდევაც!" უნებლიეთ მოსმენილი საუბრის ჭეშმარიტ
არსს ჯერ ვერ ჩასწვდენოდა, ეს მერე იქნებოდა, მაგრამ
გრძნობდა, ყველაფერი რიგზე იყო. არც ის ანტიპათია დაუფ-

ლებია, ფილმებში სასიყვარულო სცენების გადაღებისას რომ მოიცავდა ხოლმე.

თუმცა როზმერის არ ეხებოდა ეს ამბავი, მაინც გულგრილად ვერ იხსენებდა უნებლიეთ გაგონილ სიტყვებს. ნიკოლთან ერთად მაღაზიებში სიარულისას ბევრს ფიქრობდა ამათ
ჰაემანზე, ალბათ უფრო მეტს, ვიდრე თავად ნიკოლი. ახლებურად, სხვა თვალით შესცქეროდა და აკვირდებოდა და ახლა უფრო მიმზიდველი ეჩვენებოდა იგი, ნიკოლზე ლამაზი ქალი ჯერ არ შემხვედრიაო, ფიქრობდა. იმისი სიმკაცრეც გიზიდავდათ, პირგამეხებაც, თავდადება, ლოიალურობა და კიდევ
რაღაცა მოუხელთებელი, რაც როზმერისთვის, ყველაფერს
ახლაც თავისი დედის თვალით რომ ზომავდა, ნიკოლის ფულთან მიმართებაში ვლინდებოდა. როზმერის შრომითა ჰქონდა
ეს ფული და ხარჯავდა ახლა, — ევროპაში კი იმიტომ იყო,
რომ იანვრის ერთ დღეს, დილიდანვე სიცხიანი, 99°-დან 103°მდე რომ აუწია, ერთი ექვსჯერ გადაეშვა წყალში, ვიდრე დედამისი არ ჩაერია საქმეში და არ შეაჩერა.

ნიკოლის დახმარებით როზმერიმ თავისი ფულით ორი კაბა, ორი შლაპა და ოთხი წყვილი ფეხსაცმელი იყიდა. ნიკოლს ორგვერდიანი სია ჰქონდა და იმ სიის მიხედვით ყიდულობდა რაც სურდა. რაც ვიტრინაში მის ყურადღებას მიიქცევდა, იმასაც ყიდულობდა. შესაძლოა თვითონ ვერ მოეხმარა, მაგრამ მეგობრებისთვის იძენდა. ფერადი მძივები, ხელოვნური ყვავილები, გასაბერი ბალიშები პლაჟისათვის, ჩანთები, შალები, თაფლუჭი და ერთი ათი საბანაო კოსტიუმი იყიდა, და კიდევ: გასაშლელი საწოლი, რეზინის ნიანგი, თოჯინების სახლის ავეჯ-სამკაული, პატარა თუთიყუშები, მოდაში ახალშემოსული ქსოვილი, სადაფის ელვარება რომ დაჰკრავდა, სპილოს ძვლისგან გაკეთებული მოოქრული საგზაო ჭადრაკი, თხელი ტილოს დიდი ცხვირსახოცები ეიბისთვის, ორი ნატის ქურთუკი მაღაზია "ჰერმესში" — ერთი ზღვისფერი და მეორე — შემღვრეული შინდისფერი. ნივთებს ისე კი არ ყიდულობდა, როგორც ვინმე კურტიზანი ქალი, რომლისთვისაც ძვირფასეულობა და თეთრეული პროფესიული აღჭურვილობაცაა და კაპიტალის დაგროვებაც. არა, აქ სულ სხვა რამე იყო. ნიკოლის ქვეყნად არსებობას დიდი მოხერხებულობა და მახვილგონიერება ხმარ

დებოდა, მისი გულისთვის მიქროდნენ მატარებლები კონტინენტის დიდ ფაშვზე, მატარებლები, ჩიკაგოდან რომ იწყებდნენ თავიანთ გზას და ვიდრე კალიფორნიამდე; იკვამლებოდნენ საღეჭი რეზინის ფაბრიკები და უფრო და უფრო სწრაფად ბრუნავდნენ დაზგები ქარხნებში; გეჯებში ურევდნენ კბილის პასტას და სპილენძის დიდი როფებიდან ასხამდნენ მერე. აგვისტოში ქანცგაწყვეტილი ქალიშვილები ძლივს ასწრებდნენ პამიდვრის დაკონსერვებას, საშობაოდ კი წელში ვეღარ იმართებოდნენ — ნაძვის ხისთვის ყველაფერი აჟურში უნდა ყოფილიყო. მეტისები წაქცევას იყვნენ ბრაზილიის ყავის პლანტაციებში, ხოლო მეოცნებე გამომგონებლებს, ერთ მშვენიერ დღეს, როცა უცებ შეიტყობდნენ, რომ თავიანთი გამოგონების პატენტი სხვებსა რგებია, სახე ეცვლებოდათ, ესენიც და კიდევ სხვებიც, ნიკოლს მეათედს უხდიდნენ ბოლოს, ეს მთელი სისტემა იყო, რთული, გამუდმებით და შეუფერხებლად მბრუნავი გრიალსა და რყევაში, და რაკიღა ნიკოლი ამ სისტემას ეკუთვნოდა, მისი ყველა საქციელი, მაღაზიებში სიარული და ნივთების ყიდვაც კი, რაღაცა შუქით ნათღებოდა, საცეცხლურის წინ მეცეცხლურის იმ სახესავით, ცეცხლის ალი რომ დასთამაშებს. მეტად უბრალო პრინციპების ილუსტრატორი იყო ნიკოლი, თავისივე ბედისწერა, მაგრამ კარგი ილუსტრატორი, მომხიბვლელი, ისეთი, რომ როზმერის ახლა მოუნდა მისთვის მიებაძა.

უკვე ოთხი იყო თითქმის. ნიკოლი მაღაზიის შუაგულში იდგა, მხარზე თუთიყუში შემოესვა, ლაპარაკს მოჰყვა, რაც იშვია-თად ხდებოდა ხოლმე.

"ხომ შეიძლებოდა ზამთრის იმ ერთ დღეს წყალში არ გადაშვებულიყავით... საოცარია, ზოგჯერ ისე უცნაურად მოხდება ხოლმე ყველაფერი. მახსოვს, ომამდე ბერლინში ვცხოვრობდით, მაშინ დედა ცოცხალი იყო. მე თორმეტი წლისა ვიყავი. ჩემი და, ბები, მიწვეული იყო სასახლის მეჯლისზე და
საცეკვაო ბარათში სამი ცეკვა ეწერა ბრწყინვალე პრინცებთან — ეს ყველაფერი ერთი კამერჰერის მეშვეობით მოგვარდა. ის იყო, ოცდაათი წუთის მერე უნდა წასულიყო, რომ
უცებ სიცხემ აუწია და ტკივილი იგრძნო. ექიმმა თქვა, აპენდიციტია და სასწრაფო თპერაციაა საჭიროო. მაგრამ დედას

თავისი გეგმები ჰქონდა, ასე რომ, ბები მეჯლისზე წავიდა და ღამის ორ საათამდე ცეკვავდა, სამეჯლისო კაბის ქვეშ კი ყინულიანი ბუშტი ჰქონდა მიმაგრებული. დილის შვიდზე ოპერა-

ცია გაუკეთეს.

მაშ, ისე ჩანს, თითქოს ულმობელობა საჭიროა; ყველა კარგი ხალხი ულმობელია თავის მიმართ. ამასობაში უკვე ზუსტად ოთხი შესრულდა. როზმერი დიკზე ფიქრობდა, ახლა ის
ოტელშია და ნიკოლს ელის. რატომ არ მიდის, რად აცდევინებს, წავიდეს. ფიქრით აჩქარებდა ნიკოლს, "რად არ მიდიხართ?" და ლამის უცებ წამოიყვირა: "თუ თქვენ არ გინდათ,
მაშინ მე წავალ!" მაგრამ ნიკოლმა კიდევ ერთგან შეიარა,
როზმერისთვის და თავისთვის კორსაჟები იყიდა, ერთიც მერი
ნორთს გაუგზავნა და ეტყობა მხოლოდ ამის მერე გაახსენდა,
დაბნეულმა მიიხედ-მოიხედა და ტაქსის მოუხმო.

"კარგად კი გავიყვანეთ დრო, თქვენ რას იტყვით?" დაემ-

შვიდობა იგი.

"შესანიშნავად", მიუგო როზმერიმ. არ ეგონა ასე ძნელი თუ იქნებოდა; უყურებდა, როგორ დაიძრა ტაქსი, თანდათან თვალს ეფარებოდა. მთელი მისი არსება პროტესტს მოეცვა.

# IIIX

დიკმა ტრავერსს შემოუარა და ფიცრებგადაფარებულ ტრანშეაზე განაგრძო სვლა. გზად პერისკოპი დაინახა, ერთ-ხანს გაჩერდა, მერე სასროლ საფეხურზე ავიდა და მიწაყრი-ლიდან გადაიხედა. მღვრიე წყაროსფერი ცის ქვეშ ბომონ-ჰამელი მოჩანდა, მარცხნივ კი ის ავბედითი ტიპვალის გორაკი. დიკმა თვალებთან მიიტანა საველე ჭოგრიტი, ისეთი სევდა და ნაღველი მოეძალა და ისე მოაწვა ყელში, ლამის დაიხრჩო.

გზა განაგრძო, ტრანშეას გასცდა და მომდევნო ტრავერსთან დაეწია ყველას. ერთი სული ჰქონდა სხვებისთვისაც გადაედო თავისი მღელვარება, სხვებსაც ეგრძნოთ და გაეგოთ;

არადა, თვითონ არა, და, ეიბ ნორთი იყო ბრძოლაში.

"იმ ზაფხულს ამ მიწის თითო ფუტს ოცი ადამიანის სიცოცხლე შეეწირა", უთხრა როზმერის დიკმა.

როზმერიმ საწყლად მოავლო თვალი ჯუჯა ხეებჩარიგებულ

ველს, დიკს რომ ეთქვა ახლა გვბომბავენ, ცეცხლს გვიშენენო, დღეს ამასაც დაუჯერებდა. უკვე ისე უყვარდა, უკვე იმ გღვარამდე მივიდა მისი სიყვარული, რომ ტკივილი და სასო- წარკვეთა ეწყებოდა. რა ექნა, ანდა რა ეღონა — კარგია დედა აქა ჰყავდეს და ელაპარაკოს.

"იმის მერე კიდევ ბევრი ხალხი დაიხოცა და მალე ჩვენც

ყველა დავიხოცებით". ანუგეშა ეიბმა.

როზმერი დაძაბული შეჰყურებდა დიკს, ჩქარა უნდოდა

ისევ იმას ეთქვა რამე და ელაპარაკა.

"იმ პატარა მდინარეს ხომ ხედავთ, — აქედან ორი წუთის სავალიც არ არის. ბრიტანელებს კი მაშინ იქამდე თვე დას- ჭირდათ, რომ მისულიყვნენ. მთელი იმპერია მიიწევდა წინ, წინა რიგებში ეცემოდნენ და უკანანი ცვლიდნენ. სხვა იმპე- რია კიდევ უფრო ნელა იხევდა, დღეში ერთი დუიმით და და- ხოცილები სისხლიანი ნაგლეჯებივით ეყარა ყველგან. ასეთი რამ აღარ იქნება ჩვენი თაობის ცხოვრებაში, ევროპის არც ერთი ხალხი არ გაბედავს ამას".

"თურქეთში ახლახან შეწყდა ომი", თქვა ეიბმა. "მაროკო-

ში ქი..."

"ეგ სხვა საქმეა. დასავლეთის ფრონტის გამეორება ევროპაში შეუძლებელია. მალე აღარ მოხდება ეს. ამაოდ ჰგონიათ
ახალგაზრდებს, რომ ამის თავი აქვთ. მარნის პირველი ბრძოლა კიდევ შეიძლება, მაგრამ ის რაც აქ იყო — არამც და არამც;
რაც აქ მოხდა, იმას ბევრი რამე დასჭირდა, ღმერთის რწმენა,
სიუხვის წლები, გაძლება, იმ ხანის კლასთა ურთიერთმიმართება. იტალიელები და რუსები ამ ფრონტისთვის არ გამოდგებოდნენ. საჭირო იყო შენზე უხნესი, აღარც რომ გახსოვს, ისეთი გრძნობისა და მთლიანი სულის აღჭურვილობა. საჭირო
იყო გხსომებოდა საშობაო დღეები და ღია ბარათები კრონპრინცისა და მისი საცოლის პორტრეტებით, ვალანსის პატარა კაფე და ლუდხანები უნტერ დენ ლინდენზე, ქორწინება მერიიში და დერბისკენ გამგზავრება და პაპაშენის ქილვაშები".

"ბრძოლის ასეთი ტაქტიკა ჯერ კიდევ გენერალმა გრანტ-

მა მოიგონა ათას რვაას სამოცდა ხუთში პიტერსბერგთან".

"არა, ასე არ არის. გენერალმა გრანტმა მხოლოდ ის გააკეთა, რომ ჩვეულებრივი მასობრივი ჟლეტა მოაწყო. მე რაზეც ვლაპარაკობ, ეს ლუის კეროლისა და ჟიულ ვერნის საქმეა, კიდევ იმ გერმანელისა, "უნდინა" რომ დაწერა, კეგლის თა-მაშის მოყვარული დიაკვნებისა და მარსელელი ნათლიდედე-ბის, ვიურტემბერგისა და ვესტფალიის მიყრუებულ ადგილებ-ში შეცდენილი ქალიშვილებისა. კაცმა რომ თქვას, აქ ხომ სა-სიყვარულო ბრძოლა გაიმართა, ბურჟუას სიყვარულის საუკუ-ნე გავიდა ბრძოლის ამ ველზე. ეს იყო სიყვარულის უკანას-კნელი ბრძოლა".

"თქვენ გინდათ, რომ ამ ბრძოლის თავი და თავად დ. ჰ.

ლორენსი გამოაცხადოთ". უთხრა ეიბმა.

"მთელი ჩემი მშვენიერი, მომხიბლავი, ბედნიერი სამყარო ფეთქებადი სიყვარულის ძალით აიტყორცნა აქ, ჰაერში", ვეღარ დაშოშმინდა დიკი. "არა, როზმერი?"

"მე არ ვიცი", სერიოზულად მიუგო მან. "თქვენ იცით

ყველაფერი".

ისინი სხვებს ოდნავ დაშორდნენ. უცებ სეტყვასავით წამოვიდა მიწის გორახები და კენჭები და შორიახლო ტრავერ-

სიდან ეიბის ხმამაღალი შეძახილი მოისმა:

"ჩემში ძველი მეომრის სული იღვიძებს ისევ. ჩემს ზურგს უკან მთელი საუკუნის სიყვარულია ოჰაიოსი, ჰოდა, ახლა დავ-ბომბავ ამ ტრანშეას". ეიბმა თავი ამოყო მიწურიდან. "თქვენ რა, თამაშის წესები არ იცით? მოკლული ხართ, ბომბი გესრო-ლეთ".

როზმერიმ გაიცინა და დიკმაც; ის იყო პეშვით კენჭები

წამოკრიფა, მაგრამ მაშინვე გადაყარა.

"არა, არ შემიძლია ამ ადგილას მასხარაობა, თავის მოტყუება იქნება", თითქმის დამნაშავესავით ჩაილაპარაკა მან. "ვიდრემდის არა შესცვალოს საბელი ვეცხლისა და არა შეიმუსროს გამოცდა ოქროსა…" და როგორც არის მერე, მაგრამ მე ძველი რომანტიკოსი ვარ და რას იზამ, ამას აღარაფერი ეშველება".

"მეც რომანტიკოსი ვარ".

ზედმიწევნით რესტავრირებულ ტრანშეას გასცდნენ და ბრძოლის ველზე დაცემული ნიუფაუნდლენდელების ძეგლ-თან აღმოჩნდნენ. როზმერი უცებ აქვითინდა. ქალების უერავ-ლესობასავით, ამასაც უყვარდა ჩაეგონებინათ და ეთქვათ მის-

თვის, რა როგორ ეგრძნო, და მოსწონდა, დიკი რომ ასწავლიდა, ეს სასაცილოა, ეს კიდევ სამწუხაროო. მაგრამ ყველაზე მეტად ისა სურდა, გაეგო დიკს, რა ძალიან უყვარდა ახლა, როცა ამ სიყვარულმა ყველაფერი თავდაყირა დააყენა, როცა გრძოლის ველზეც კი ისე დადის, თითქოს მშვენიერ სიზმარშიაო.

მერე თავიანთ მანქანაში ჩასხდნენ და ისევ ამიენს დაბრუნდნენ. ჯუჯა ხეებსა და ბუჩქნარზე თბილი წვიმა ცრიდა. აქეთიქით დროდადრო წააწყდებოდნენ ხოლმე თითქოს უზარმაზარი დასამარხავი კოცონისთვის მიზიდულ ჭურვებს, მასრებსა და ბომბებს, ყუმბარებს, და სხვადასხვა ამუნიციას, ჩაჩქნებს, ხიშტებს, თოფის კონდახებს, შვიდ წელს მიწაში გდებისაგან დამპალ ღვედებს და უცებ, გზის მოსახვევს იქით, აქაფებული ტალღებივით გამოჩნდა საფლავების მთელი ზღვა. დიკმა შოფერს მანქანა გააჩერებინა.

"შეხედეთ, იმ ქალიშვილს ისევ თანა აქვს ყვავილები".

უყურებდნენ, როგორ გადმოვიდა მანქანიდან და იმ ქალიშვილისკენ გაემართა, ხელში დიდი გვირგვინი რომ ეჭირა და დაბნეული იდგა სასაფლაოს ჭიშკართან. იქვე ელოდებოდა ტაქსი. ეს ის ტენესელი ჟღალთმიანი ქალიშვილი იყო, ამ დილას რომ შეხვდნენ და გაიცნეს მატარებელში; ნოქსვილიდან ჩამოვიდა, რათა თავისი ძმის საფლავზე ყვავილები დაეწყო. ახლა გაღიზიანებული, ნამტირალევი ჩანდა, სახეზე ისევ ჩამოსდიოდა ცრემლები.

"სამხედრო დეპარტამენტში, ეტყობა შეეშალათ და სხვა ციფრი მომცეს". აზლუქუნდა დიკის დანახვისას. "იმ საფლავზე სხვა სახელი აწერია. ორ საათზე ჩამოვედი და მერე სულ გეძებ, მაგრამ აქ იმდენია, რას იპოვი".

"ადექით და რომელიმე საფლავზე დააწყვეთ ეგ ყვავილები". ურჩია დიკმა.

"თქვენი აზრით, ასე უნდა მოვიქცე?"

"მე მგონია, ისიც ამასვე ინდომებდა, რომ ასე მოქცეულიყავით".

უკვე ბინდდებოდა და წვიმამაც უმატა, ქალიშვილმა ყვავილები ჭიშკართან ახლო, ერთ-ერთ საფლავზე დააწყო და ხელად დაეთანხმა დიკს, რომ ტაქსი გაუშვა და ამიენში ამათთან ერთად ჩასულიყო.

სხვისი უბედურების შემყურეს ისევ ტირილი მოერია როზმერის — ერთი სიტყვით, ყველანაირად სველი გამოდგა ეს დღე; მაგრამ მაინც, ეჩვენებოდა თითქოს ამ დღემაც რაღაც შესძინა, რაღაცას მიხვდა ახალს, თუმცა ზუსტად ვერ იტყოდა — რას. გვიან კი ამ დღეს რომ იხსენებდა, უბედნიერესად მიაჩნდა თავი, მშვენიერი იყო — ხომ ხდება ხოლმე, არაფრით გამოირჩევა ესა თუ ის დღე, გუშინდელი სიხარულის ხვალინდელში გადასვლა თუ გგონია მხოლოდ, არადა, სწო-

რედ მაშინ ყოფილხარ თურმე ბედნიერი.

ამიენს, მოიისფრო და ხმაურიან ქალაქს, ჯერ ისევ აჩნდა ომის კვალი, რაღაც ნაღველი დაჰკრავდა, როგორც ზოგიერთ ვაგზალს, ვთქვათ ჩრდილოეთის ვაგზალს ან უოტერლოოს ვაგზალს ლონდონში. დღისით ასეთი ქალაქები წუხილსა გგვრიან, ძველებური ტრამვაი მირახრახებს დაცარიელებულ, რუხი რიყის ქვით მოკირწყლულ ტაძრისწინა სკვერზე, ჰაერიც კი დამძიმებული გეჩვენება, ამინდი ძველი ფოტოსავით გაცრეცილია, მაგრამ ბინდდება და ყველაფერი, რითაც ასე მიმზიდველია ფრანგული ყოფა, ქუჩებში იფინება — ხარხარა მეძავები, კაფეში მსხდარი კაცები, — ამათ ლაპარაკსა და კამათს ხომ ბოლო არ უჩანს და ზედ ერთი ასჯერ დააყოლებენ "Voilà!" ერთმანეთს ჩაკრული მოსეირნე წყვილები, არსადაც რომ არ ეჩქარებათ. მატარებლის მოლოდინში დიდ თაღოვანში შევიდნენ და მაგიდას მიუსხდნენ, მუსიკა, კვამლი და ხმაური ირეოდა თაღებქვეშ და ავსებდა იქაურობას. იმათ პატივსაცემად ორკესტრმა "ჰო, ჩვენ აღარ გვაქვს ბანანები" შეასრულა და ამათაც ტაში დაუკრეს, რაკი დირიჟორს კმაყოფილი იერი ჰქონდა, ტენესელ ქალიშვილს თავისი დარდი გადაავიწყდა და დიკთან და ჟიბთან ტრფიალება მოუნდა, კეკლუცად არხევდა ტანს და გამომწვევად იხედებოდა, ესენიც აჰყოლოდნენ და ახალისებდნენ.

მერე მატარებელი მოვიდა და პარიზს გაემგზავრნენ. უკან დარჩა თბილწვიმადადენილი მიწა, რომლის ქვეშაც ლპებოდნენ, იხრწნებოდნენ ვიურტემბერგელები, პრუსიის გვარდიის ჯარისკაცები, ალპიელი მსროლელები, მანჩესტერელი ფეიქრეგი და იტონის სკოლის აღზრდილები. ვაგზლის რესტორანში გოლონიური ძეხვისა და "ბელ პაეზე" ყველის ბუტერბრო-დებს შეექცეოდნენ, ზედ ღვინოს, "ბოჟოლეს" აყოლებდნენ. ნიკოლი დაბნეული ჩანდა, ნერვულად იკვნეტდა ტუჩებს ცნობარში თავჩარგული — დიკს წამოეღო თან, რომ ყველა გზაცა და ყველა ადგილიც კარგად ენახათ და არაფერი გამორჩენოდათ. დიკმა მართლაც ცუდად როდი შეისწავლა ამიენის ბრძოლის ამბები, ზოგი რამ კიდევაც გაამარტივა და საბოლოდ ცოტათი თავიანთ სახლში გამართულ ერთ-ერთ საღამოსაც დაამსგავსა.

# XIA

პარიზში ჩასული ნიკოლი ძალიან დაღლილი ჩანდა საიმისოდ, რომ საღამოთი, როგორც ადრევე დათქვეს, ისიც დეკორატიული ხელოვნების გამოფენაზე წასულიყო. ნიკოლი ოტელ
"მეფე გეორგში" მიიყვანეს და როცა იგი ვესტიბიულში, მინის კარებში ჯვარედინად არეკლილი სხივების ზოლებს მიეფარა, როზმერიმ შვება იგრძნო. ნიკოლი ძალა იყო, მაგრამ
ალბათ მაინცდამაინც სანდო და კეთილი არა, იმასთან აბა,
რას მიხვდებოდი, წინასწარვე თუ არ იცოდი. დედასთან ასე
არ იყო, როზმერის ცოტათი კიდევაც ეშინოდა ნიკოლის.

თერთმეტი საათისთვის როზმერი, ნორთები და დიკი სენაზე ახალგახსნილ კაფე — ტივტივაში შევიდნენ, ლივლივა წყალში ციმციმებდა ხიდის ფარნები, და უთვალავი ცივი მთვარეც
შიგ ირწეოდა. დედასთან ერთად პარიზში ყოფნისას, კვირაობით ზოგჯერ ორივე პატარა გემით სიურენამდე მიდიოდნენ
ხოლმე და გზად თავიანთ მომავალზე ბჭობდნენ, ფული ცოტა
ჰქონდათ, მაგრამ მისიზ სპირსს სჯეროდა როზმერის სილამაზისა და პატივმოყვარეობისაც, რაც თვითონვე ჩაუნერგა და
რისკზე უნდოდა წასულიყო, მერე როზმერი, ფეხზე დამდგარი, დედის ამაგს გადაიხდიდა...

პარიზში ეიბ ნორთი ყოველდღე სვამდა. ღვინისა და მზისგან თვალები ჰქონდა ჩაწითლებული. იმ საღამოს როზმერიმ პირველად შეამჩნია, ეიბი ლამის ეძებდა ისეთ ადგილებს, სადაც დალევა შეეძლებოდა და გაიფიქრა, მერი ნორთს ალბათ

Scanned by CamScanner

დიდად არ სიამოვნებსო ეს ამბავი. მერი ჩუმად იყო ხოლმე, ხშირად იცინოდა, მაგრამ ცოტას ლაპარაკობდა, იმდენად ცო-ტას, რომ როზმერიმ ბევრი ვერაფერი გაუგო, როზმერის მოს-წონდა მისი სწორი, ხშირი შავი თმა, უკან სადად გადავარცხ-ნილი, მხოლოდ კისერთან ტალღასავით რომ ეშლებოდა, დრო-დადრო საფეთქლებთან ჩამოეშლებოდა ჯიუტად, ხედვას უშ-ლიდა და მაშინ თავის გაქნევით გაისწორებდა ხოლმე.

"ამაღამ ადრე წავალთ, ეიბ, ეს ბოთლი დაიცლება და წავალთ". მშვიდი ხმა ჰქონდა მერის, მაგრამ შეშფოთება მაინცა სჭვიოდა იმის ხმაში. "ხომ არ გინდა, ამ ნავზე ღვინოდ დაიქ-

G0".

"კარგა გვიანია", თქვა დიკმა. "სუყველა წავალთ". მაგრამ ეიბის ღირსებით სავსე გამოხედვაში სიჯიუტე ჩანდა, გადაჭრით, ოღონდ, მძიმედა თქვა:

"არა, არა". და ცოტა ხნის მერე დაუმატა, "არა, ადრეა,

ერთ ბოთლ შამპანურს კიდევ მოვასწრებთ".

"მე მეტს აღარ დავლევ". თქვა დიკმა.

"როზმერი კი დალევს, მე ასე მგონია, მართლა, ალკოჰო-ლიკია. სააბაზანოში ყოველთვისა აქვს გადანახული ერთი ბოთლი ჯინი, ლოთია, რა გგონიათ, მისიზ სპირსმა მითხრა".

ეიბმა ბოთლი დაცალა — როზმერის შეუვსო ჭიქა შამპანურით. პარიზში ჩამოსვლის პირველსავე დღეს იმდენი ლიმონათი დალია, ლამის ცუდად გახდა როზმერი და იმის მერე არანაირ სასმელთან მიკარება აღარ უნდოდა, მაგრამ ახლა შამპანურით შევსებული ბოკალი ასწია და მოსვა.

"ამას რას ვხედავ!" წამოიძახა დიკმა, "აკი მითხარით, არასოდეს დამილევიაო".

"მაგრამ არ მითქვამს, არც არასოდეს დავლევ-მეთქი".

"დედა რას გეტყვით?"

"ერთ ბოკალს შევსვამ, ეს შეიძლება".

უცებ ძალიან მოუნდა ბოლომდე შეესვა ეს ერთი ბოკალი შამპანური. დიკი სვამდა, ბევრს არა, მაგრამ, სვამდა და იქნებ, თუკი თვითონაც დალევს, დააახლოებს ეს დალევა, შეაძლებინებს იმის ჩადენას, რაც იზრახა და გულში იფიქრა. ერთბაშად გადაკრა თითქმის ბოლომდე, სასულეში გადასცდა

და — ესეც არ იყოს, გუშინ ჩემი დაბადების დღე იყოო, — ამოთქვა, "თვრამეტის გავხდი".

"როგორ არ გვითხარით!" წყენით უთხრეს.

"განგებ, რომ არ შეწუხებულიყავით". როზმერიმ ბოლომდე შესვა თავისი შამპანური. "ჩათვალეთ, რომ დღეს ვიხ-

დით".

"არავითარი, ასე იოლად არ გამოვა", შეესიტყვა დიკი. ხვალ საღამოს საზეიმო სადილს გავმართავთ დაბადების დღის აღსანიშნავად და კეთილი ინებეთ და არ დაგავიწყდეთ, რო-გორი საქმეა — თვრამეტი წელი".

"ყოველთვის მეგონა, რომ ის, რაც თვრამეტ წლამდე ხდე-

ბა, უმნიშვნელოა, არაფერი", თქვა მერიმ.

"ეგრეც არის", მაშინვე დაეთანხმა ეიბი. "და რაც მერე ხდება, ისიც ისევ არაფერია".

"სანამ ნაგზე ზის, ყველაფერი სულ ერთია ეიბისათვის". თქვა მერიმ, "წელს კი, ჩავა თუ არა ნიუ-იორკში, ბევრი რამის გაკეთებას აპირებს, სერიოზული გეგმები აქვს". თითქოს დაღლილიყო იმის თქმით, რასაც მისთვის აზრი აღარა ჰქონდა, თითქოს უკვე ყველაფერი, რითაც თვითონ და თავისი ქმარი ცხოვრობდნენ ახლა, მხოლოდ განზრახვა და გეგმები იყო.

"ეიბი შტატებში მიდის, რომ მუსიკა წეროს, მე კი მიუნხენში მივდივარ, სიმღერის უკეთ სწავლისათვის და როცა ისევ

შევეყრებით ერთმანეთს, წინ აღარაფერი დაგვიდგება".

"რა კარგია!" წამოიძახა როზმერიმ, შამპანურს უკვე თავისი

გაჰქონდა.

"კიდევ, შამპანური ისევ როზმერის, რომ უკეთესად გაიაზროს თავისი ლიმფური ჯირკვლების მოქმედება. ფუნქციონირებას თვრამეტი წლის ასაკიდან იწყებს ჯირკვლები".

დიკმა ლმობიერად გაიცინა — უყვარდა ეიბი და დიდი ხანია

ხელი ჩაიქნია მასზე.

"მედიცინისთვის ეს უცნობია და, საერთოდ — წავედით". ეიბმა ხმაში ჩაავლო დიკს, როგორღაც მფარველობდა და დაუდევრად შენიშნა:

"გული მითქვამს, ჩემი ახალი პარტიტურა ბროდვეიზე ბევრად უფრო ადრე გავა, მანამდე, სანამ თქვენი მეცნიერული ტრაქტატი დაიწერება". "იმედი მაქვს", ისევ ისე მშვიდად მიუგო დიკმა. "იმედი მაქვს. მე შეიძლება სულაც მივაგდო ეს რაღაც, როგორც

ოქვენ თქვით, "მეცნიერული ტრაქტატი".

"ო, დიკ!" გეგონება თავზარი დაეცაო, ისეთი ხმით შესძახა მერიმ. როზმერის მანამდე არ ენახა ასეთი დიკი — სახეზე არც არაფერი ეხატა და გუმანით მიხვდა, ის, რაც ახლა თქვა, უბრალოდ არ თქვა და კინაღამ თვითონაც მერისთან ერთად წამოიძახა: "ო, დიკ!"

მაგრამ დიკმა ისევ გაიცინა.

"მივაგდებ და სხვას დავიწყებ", დაუმატა და ადგა.

"მოიცა, დიკ, ცოტა ხანს გაჩერდით, მინდა გავიგო..."

"სხვა დროს გეტყვით. ღამე მშვიდობისა, ეიბ. ღამე მშვი დობის, მერი".

"ღამე მშვიდობის, დიკ, ძვირფასო".

მერი ისე იღიმებოდა, გეგონება იმაზე ბედნიერება აღარაფერი იქნებოდა, რომ იმ ღამეს თითქმის ცარიელ კაფე-ნავზე მოუწევდა ფხიზლობა. სხვა რა გზა ჰქონდა. შეუპოვარი ქალი იყო, იმედს იოლად არ კარგავდა. მზად იყო ყველაფერში მიჰ-კოლოდა ქმარს და იმისი ცხოვრებით ეცხოვრა; სცადა, მაგრამ ერთხელაც ვერ გადაახვევინა გზიდან ეიბს, ეს გზა კი თაკისიც იყო და ზოგჯერ გულგატეხილი ფიქრობდა, რომ საიდუმ-ლოს ეიბში ჰქონდა ფესვები ღრმად გადგმული, მაინც ყო-კელთვის ავგაროზივით, იღბლიანი გეგონებოდათ...

# XV

"რის მიგდებას აპირებთ?" იკითხა როზმერიმ, ტაქსიში რომ ჩასხდნენ და სერიოზული სახით შეხედა დიკს.

"ისეთი არაფერია",

"თქვენ მეცნიერი ხართ?"

"მე ექიმი ვარ".

"რას ამბობთ!" გაუხარდა და გაიცინა, "მამაჩემიც ექიმი იყო. მაგრამ, რატომ არ..." ვეღარ დაამთავრა და გაჩუმდა.

"აქ ავბედითი საიდუმლო არა არის რა. ჩემი პროფესიისთვის არ მიღალატია და არც არავის გამოგქცევივარ, კი არ

Scanned by CamScanner

ვიმალები რივიერაზე, ახლა, უბრალოდ, პრაქტიკა არა მაქვს,

ერთ მშვენიერ დღეს კი, შეიძლება ისევა მქონდეს".

როზმერიმ ნელა მიუახლოვა სახე, რომ დიკს ეკოცნა. თითქოს ვერ მიხვდა დიკი, მხრებზე ოდნავ მოხვია ხელი და როზმერის სათუთ ლოყას ლოყით შეეხო. მერე შეხედა, დააკვირდა.

"მშვენიერი გოგონა", ფიქრიანად ჩაილაპარაკა.

როზმერიმ გაუღიმა; ორივე ხელით უნებლიეთ ეხებოდა

დიკის პიჯაკის კალთებს.

"შემიყვარდით, თქვენც და ნიკოლიც, ეს ჩემი საიდუმ-ლოა — ვერავის ველაპარაკები თქვენზე, არ მინდა სხვამაც იცოდეს, რომ ასე კარგი ხართ. მართლა, მართლა გეუბნებით, მიყვარხართ, თქვენც და ნიკოლიც".

ვინ დაითვლის რამდენჯერ მოესმინა დიკს ასეთი რამ, სიტ-

ყვებიც კი იგივე იყო.

უცებ ისე ახლო აღმოჩნდა როზმერი, რომ მისი ჯერ კიდევ ბავშვური სახის ნაკვთები ზედ თვალებთან აერია დიკს და სუნთქვაშეკრულმა აკოცა. თითქოს როზმერი, არც რამდენი წლისაც არ ყოფილიყო.

როზმერი მკლავზე მიეყრდნო და ამოიოხრა.

"გადავწყვიტე უარი ვთქვა თქვენზე", თქვა მან.

დიკი შეკრთა — განა რაიმე საბაბი კი მისცა როზმერის, რად იფიქრა, რომ ოდნავი უფლება მაინც ჰქონდა დიკზე?

"ეს კი უმსგავსობაა", განგებ მხიარულად თქვა. "სწორედ

მაშინ, როცა რაღაც ინტერესი ვიგრძენი".

"მე ისე შემიყვარდით... ასე მგონია, უკვე რამდენიმე წე-ლია". ხმაში ტირილი გაერია. "ი-ი-სე შემიყვარდით".

მერე, იმის მაგივრად, რომ ალბათ უნდა გაეცინა, დიკს

თავისივე სიტყვები ჩაესმა:

"თქვენ მხოლოდ ლამაზი კი არა, ძალიან კარგი და თავისთავადიცა ხართ, და რასაც არ უნდა გამოხატავდეთ, ვითომ გიყვართ თუ ვითომ მორცხვი ხართ, — სულ ერთია, მაინც გიხდებათ ყველაფერი".

როზმერი ისევ ახლოს მიიწია, ტაქსიში გამოქვაბულივით ბნელოდა და ნიკოლის რჩევით შეძენილი სუნამოს სუნი ტრიალებდა. დიკმა აკოცა. უღიმღამოდ. ხვდებოდა, რომ იწვოდა იგი, მაგრამ ვნება ოდნავადაც არ ეტყობოდა ტუჩებსა და გამოხედვაში. როზმერის სუნთქვას შამპანური დაჰკრავდა, კილევ უფრო მაგრად, სასოწარკვეთით მიეკრა, მაგრამ დიკს გრძნობას უნელებდა მისი ბაგისა და თვალების უმანკოება, თვალებისა, იმწუთას ქვეყნიერებისა და ღამის უსასრულობაში რომ იცქირებოდნენ. როზმერიმ კიდევ არ იცოდა, რომ ნეტარება შიგნით, გულშია. ოდესმე მიხვდება, გაიგებს ამას, მოიცავს ვნება, მთელ სამყაროს რომ მოსდებია და მაშინ დიკი, არც დაფიქრდება, არც ინანებს, ისე მიიღებს.

ოტელში როზმერის ოთახი დაივერების ოთახის იქითა მხარეს, ოდნავ გეზად, ლიფტთან ახლო იყო. კართან მისვლისას

ტოზმერიმ უცებ თქვა:

"ვიცი არ გიყვარვართ — ამის იმედი არცა მქონია, მაგრამ თქვენ მისაყვედურეთ, რომ ჩემი დაბადების დღეზე არაფერი გითხარით. ახლა ხომ იცით, უკვე გითხარით, და მინდა ამ დღისთვის საჩუქარი მივიღო თქვენგან — შემოდით ჩემთან ერთი წუთით, რაღაც მინდა გითხრათ. მხოლოდ ერთი წუთით",

შევიდნენ, დიკმა კარი ჩაკეტა და როზმერისკენ შებრუნდა; სულ ახლოს იდგა, მაგრამ ერთმანეთს არ შეხებიან. ღამისაგან მთლად ფერმიხდილი, როზმერი ახლა ფერმკრთალზე უფრო ფერმკრთალი ჩანდა, მეჯლისის მერე დავიწყებულ თეთრ მი-ხაკს ჰგავდა.

"როცა იღიმებით..." ისევ ჩვეული, ხუმრობანარევი და მამობრივი ტონი დაიბრუნა, შესაძლოა, ნიკოლის უხილავი სიახლოვის წყალობით, "როცა იღიმებით, ყოველთვის მგონია, რომ ნაკბილარს დაგინახავთ პირში — მოცვლილი სარძევე კბილის ადგილას".

მაგრამ უკვე გვიანი იყო რაიმეს თქმა — როზმერი უფრო ახლო მიიწია, მიეკრა და საწყალობლად, განწირულივით ჩაი-ჩურჩულა.

"ამიყვანეთ".

"აგიყვანოთ? სად?"

დიკი გახევდა გაკვირვებისგან.

"გთხოვთ", ჩურჩულებდა, ისე მომექეცით, როგორც ხდება, თუნდაც უსიამოვნო იყოს, არ ვიცი,— ამაზე ფიქრიც კი

Scanned by CamScanner

მეჯავრებოდა ყოველთვის, მაგრამ ახლა არა, მინდა თქვენ იყოთ ჩემთან"-

თვითონვე გაუკვირდა თავისი თავის, ვერასოდეს იფიქრებდა, ასე ლაპარაკს თუ შეძლებდა. ეს გამოძახილი იყო ყველაფრისა, რაც ესმოდა და რასაც კითხულობდა, რაზეც ფიქრობდა და ოცნებობდა წლების მანძილზე, სამონასტროში. თანაც გუმანით ხვდებოდა, რომ თავისი ყველაზე დიდი როლიც
იყო თითქოს და მთელი ძალით მისცემოდა ამ როლის თამაშს.

"სხვა რაღაც გინდათ თქვათ", დიკმა სცადა გონზე მოეყვანა. "იქნებ შამპანურის ბრალია? კარგი, დავანებოთ თავი ამ

ლაპარაკს".

"აჰ, არა, ახლა, ახლა მინდა, რომ ჩემთან იყოთ, თქვენი ვარ, მინდა მთლად თქვენი ვიყო".

"ჯერ ერთი, გიფიქრიათ იმაზე, რომ ნიკოლს ეს ტკივილს

მიაყენებს?"

"ის ვერ გაიგებს, ეს სულაც არ ეხება მას".

დიკმა ალერსით, ნაზად უთხრა:

"მერე კიდევ, გავიწყდებათ, რომ მე ნიკოლი მიყვარს".

"მაგრამ, ხომ შეგიძლიათ კიდევ ვინმე გიყვარდეთ? მე ხომ მიყვარს დედა და მიყვარხართ თქვენც — უფრო მეტად, ახლა თქვენ უფრო მეტად".

"...თანაც, თქვენ ახლა არ გიყვარვართ, მერე კი შეიძლება შეგიყვარდეთ და რა გამოვა, თავიდანვე აგერევათ მთელი ცხოვრება".

"არა, სიტყვას გაძლევთ, აღარასოდეს შევხვდებით მერე დედას გამოვიძახებ და ჩამოვა თუ არა, ამერიკაში წავალთ".

დიკმა ეს ფიქრი მოიშორა. კარგად ახსოვდა, ძალიან კარგად, მისი ბავშვური ტუჩები, და ტონი შეიცვალა.

"გაგივლით, ახლა ხართ ამ ხასიათზე თორემ, გაგივლით".

"არა, თუ შეიძლება, არ მეშინია, თუნდაც ბავშვი გამიჩნდეს. მექსიკაში წავალ, სტუდიაში ერთი მსახიობი ასე მოიქცა ადრე არ მიგრძვნია ასეთი რამ. ყოველთვის მძაგდა, როცა სერიოზულად მკოცნიდნენ". დიკი ხედავდა, რომ მაინც სჯეროდა ეს მოხდებოდა. "ზოგს ისე დიდი კბილები ჰქონდა, მაგრან თქვენ სულ სხვა ხართ, ლაშაზი, კარგი, მინდა თქვენი გავხდე". "მე მგონია ფიქრობთ, რომ არსებობს რაღაც არაჩვეულება რივი კოცნა და გინდათ მე გაკოცოთ ისე".

"დამცინით, ბავშვი აღარა ვარ. ვიცი, არ გიყვარვართ. ამისი იმედი არცა მქონია". უცებ გაჩუმდა, დაშოშმინდა. "თქვენ ალბათ არარაობად მთვლით".

"სისულელეა. მაგრამ მე ჯერ ისევ ბავშვი მგონიხართ". და თავისთვის, ფიქრში დაუმატა: "და ჯერ ბევრი რამე უნდა ისწავლოთ".

როზმერი ხმას აღარ იღებდა, დაძაბული სუნთქავდა, ელოდა, ისევ დიკს ეთქვა რამე:

"და ბოლოს, ცხოვრებაში ისე არ ხდება, როგორც გინდათ".

როზმერიმ თავი ჩაღუნა, წყენითა და გულის ტკივილით მოშორდა დიკს. ის იყო, დიკმა უნებურად დაიწყო:

"ჯობია, მე და თქვენ, უბრალოდ..." მაგრამ სიტყვა გაუწყდა, დაინახა, როზმერი საწოლზე ჩამომჯდარიყო და ტიროდა.
თვითონაც დაჯდა. უცებ თავგზა აებნა, იმიტომ კი არა, რომ
დაეჭვდა თავის ზნეობაში — არა, სხვაგვარად ვერ მოიქცეოდა,
ეს გამორიცხული იყო, — უბრალოდ თავგზა აებნა და მოქნილობამ, ასე ძალიან რომ უხდებოდა, და დაურღვეველმა სულის სიმშვიდემ, წუთით უმტყუნა.

"ვიცოდი, არ მოინდომებდით", ქვითინებდა როზმერი. "რისი იმედი უნდა მქონოდა".

დიკი ადგა.

"ღამე მშვიდობისა, ბავშვო. თავი დავანებოთ, სიგიჟეა ეს ლაპარაკი. ჩავთვალოთ, ვითომ არც არაფერი ყოფილა". რამ-დენიმე დამამშვიდებელი სიტყვა გარკვეული დოზით, ძილის წამალივით მიჰგვარა დიკმა. "თქვენ ძალიან ბევრს შეუყვარდე-ბით, და როცა თვითონაც შეგიყვარდებათ, გაგიხარდებათ, რომ პირველ სიყვარულს უმანკო და ხელუხლებელი მიეგებე-ბით სულითაც და სხეულითაც, ეს ცოტა ძველმოდური აზრია, არა?" როზმერიმ თავი ასწია და დაინახა, კარისკენ მიდიოდა დიკი. უყურებდა და ოდნავადაც ვერა ხვდებოდა თუ რა ხდე-ბოდა იმის გულში. ხედავდა, როგორ გადადგა კიდევ ერთი ნა-ბიჯი, შემობრუნდა და გამოხედა, და იმწუთას როზმერის მოუ-ნდა გამოკიდებოდა, მკლავებში ჩავარდნოდა, ეგრძნო იმისი

ბაგე, ყურები, პიჯაკის საყელო, უნდოდა შემოხვეოდა, გულში ჩაეკრა; მაგრამ დიკს უკვე კარის სახელურზე ედო ხელი, მორ-ჩა, მეტი აღარაფერი შეიძლებოდა მომხდარიყო. კარი რომ მი-იხურა, საწოლიდან წამოდგა, სარკესთან მივიდა და სლუკუნ-სლუკუნით თმის ვარცხნას მოჰყვა, ას ორმოცდაათჯერ გადაი-სვამდა ხოლმე თმაზე ჯაგრისს ყოველ საღამოს, მერე კიდევ ას ორმოცდაათჯერ. როზმერი მანამ ივარცხნიდა თმას, სანამდე ხელი არ ეტკინა, მერე მეორე ხელით მოჰყვა ვარცხნას...

### IVX

ღამემ დააცხრო როზმერი, გაღვიძებულს სირცხვილი წვავდა. სარკეში თავისი მშვენიერი სახის დანახვამ სიმშვიდე არ მოჰგვარა, პირიქით, უფრო გაუმძაფრა გუშინდელი ტკივილი; არც დედისაგან გამოგზავნილმა იმ ბიჭის ბარათმა უშველა, შარშან იელის მეჯლისზე რომ წაეყვანა როზმერი, იტყობინებოდა, რომ პარიზში ჩამოდიოდა,—ახლა ეს უკვე წარსული იყო. თავისი ოთახიდან გამოვიდა, დაივერებთან შეხვედრას ღელვით მოელოდა, დღეს ორმაგად მტანჯველი იქნებოდა იმათი ნახვა. მერე მკერავთან უნდა შეევლოთ, არა, ვერაფერს შეამჩნევდნენ, ნიკოლივით ამასაც რაღაც შეუღწევადი გარსი ექნება შემოვლებული. მაინც ესიამოვნა, როცა ნიკოლმა ერთი დამთხვეული გამყიდველი ქალის გამო მართებულად შენიშნა: "რატომღაც ძალიან ამძაფრებენ ხოლმე სხვების აზრს თავიანთ თავზე, ეს ბევრს სჩვევია; გეგონება იმათ მოწონებაზე ან ანტიპათიაზე ფიქრობდეს ყველა". ასეთ შენიშვნაზე, ექსპანსიური როზმერი გუშინ გულში აღშფოთდებოდა, მაგრამ დღეს გაუხარდა — იმდენად დიდი სურვილი ჰქონდა დაეჯერა, რომ ირც არაფერი მომხდარა, და იხიბლებოდა ნიკოლის ჭკუით, სილამაზით, და თანაც, პირველად თავის სიცოცხლეში — ეჭვიანობდა. გოსის ოტელიდან წამოსვლის სწორედ წინა დღეს იყო, დედამისმა ნიკოლზე რომ თქვა, მშვენიერიაო, სხვათა შორის შენიშნა, მაგრამ როზმერიმ იცოდა, ეს შენილბვა იყო. თავის მრავლისმეტყველ აზრს ამ ხმაზე, კაზუალური ტონით იტყოდა ხოლმე. ამჯერად — შენ ასეთი არა ხარო, აგებინებდა, მაგრამ ოდნავადაც არ სწყენია. თავიდანვე დიდად არ გაუნებივრებიათ თავისი გარეგნობის გამო, დიდი ხანი არ არის რაც მის სილამაზეზე ალაპარაკდნენ და ესეც რაღაც მისდა სა კეთილდღეოდ მოპოვებული და შეძენილი რამ ეგონა მხო. ლოდ, როგორც, ვთქვათ, თუნდაც ფრანგულის ცოდნა. ახლი კი, მიუხედავად ამისა, ნიკოლის გვერდით ტაქსიში მჯდომი უნებლიეთ თავის თავს ადარებდა მას. ნიკოლი თითქოს რო. მანტიკული სიყვარულისთვის გაჩენილიყო, მისი აშოლტილი სხეული, იმისი ნაზი, ხან მოკუმული, ხან ოდნავ გაპობილი დ მიმნდობი მოლოდინის გამომხატველი ბაგე. ნიკოლი პატარაო. ბიდანვე ლამაზი იყო და ასეთიც დარჩებოდა მაშინაც, როც ამოზიდულ ყვრიმალებზე გამხმარი პირის კანი შემოეჭიმებო. და. სახის ასეთი წყობა არ იცვლება. წინათ საქსონელივით ვარდისფერსა და ქერა ნიკოლს, თმა გამუქებოდა და უფრო მიმზიდველი ჩანდა, ვიდრე იმხანად, როცა ქერა თმა, შუბლს მოოქროსფრო ღრუბელივით შემოვლებოდა და თმალამაზი მთლად ლამაზს სჯობდა.

რუ დე სენ პერზე უცებ ერთ სახლზე მიუთითა როზმერიმ: "აქ ვცხოვრობდით".

"საოცარია. როცა თორმეტი წლისა ვიყავი, დედამ, ჩემმა დამ ბებიმ და მე, ამ ქუჩაზე გავატარეთ ზამთარი, აი იმ ოტელ-ში".

ნიკოლმა ის ოტელი დაანახვა. ორი გახუნებული შენობის ფასადი — ბავშვობის ორი ბუნდოვანი გამოძახილი აქეთ-იქი-დან.

"მაშინ სახლს ვაშენებდით ლეიკ ფორისტში და მომჭირნეობით უნდა გვეცხოვრა", განაგრძო ნიკოლმა. "უფრო სწორად, ვიჭირვებდით მე, ბები და გუვერნანტი, დედა კი მოგზაურობდა".

"ჩვენც მომჭირნეობით უნდა გვეცხოვრა", თქვა როზმერიმ, რა თქმა უნდა, ხვდებოდა, ამ სიტყვას მათთვის სხვადასხვა აზრი რომ ჰქონდა.

"ამაზე ლაპარაკისას დიდ სიფრთხილეს იჩენდა ხოლმე დედა, "იაფფასიან ოტელს" კი არა, როგორიც იყო", ნიკოლმა თავისი გადამდები, მიმზიდველი სიცილით ჩაიცინა, — "პატარა ოტელს" იტყოდა ხოლმე. ჩვენი ყოყლოჩინა მეგობრებიდან, თუ მისამართს გვკითხავდა ვინმე, იმას კი არ ვეტყოდით, ჯომ — "აპაშების კვარტალში ვცხოვრობთ, საძაგელ, მინგრეულ-მონგრეულ ქოხმახში, სადაც, წყალი თუ იქნა, ესეც დიდი შეღავათია", არა, ყოველთვის ვამბობდით, რომ "პატარა
ოტელში" ვცხოვრობდით. თითქოს ყველა დიდი ოტელი ჩვენთვის ზედმეტად ხმაურიანი და ვულგარული იყო. რაღა თქმა
უნდა, მეგობრები იოლად ხვდებოდნენ და საცა კი მოხვდებოდათ, ამაზე ყველას უამბობდნენ. მაგრამ დედა თავისას არ
იშლიდა, გვეუბნებოდა, ევროპაში ცხოვრების უნარი უნდა
გქონდესო, მას ჰქონდა ეს უნარი, რა თქმა უნდა, ის ხომ გერმანიაში დაიბადა, მაგრამ დედა ჰყავდა ამერიკელი, თვითონ
კიდევ, ჩიკაგოში გაიზარდა და ამერიკული უფრო მეტი ეცხო,
ვიდრე ევროპული".

ერთ-ორ წუთში სხვებსაც შეხვდებოდნენ და სანამ ლუქსემბურგის ბაღის პირდაპირ რუ გინემერზე ტაქსი გაჩერდებოდა, როზმერიმ ერთხელაც მოასწრო გარდასახვა. ნორთებთან უნდა ესაუზმათ, სხვენისძირა, უკვე მირღვეულ-მორღვეულ და ფოთოლხშირი ხეებით დაჩრდილულ იმათ ბინაში.
როზმერის ეჩვენებოდა, რომ გუშინდელი და დღევანდელი
დღე ცა და მიწასავით ჰგვანდნენ ერთმანეთს. მაგრამ, პირდაპირ
აღმოჩნდა თუ არა დიკთან და თვალებში შეხედეს ერთმანეთს,
თითქოს ჩიტებმა გაჰკრესო ცაში ფრთები, იმწამსვე, სიხარულით აივსო როზმერი. ყველაფერი კარგად იყო, მშვენიერი
იყო. იგრძნო, უკვე თითქმის უყვარდა დიკს და გიჟივით გაუხარდა, თბილი ჟრუანტელი მოერია სხეულს. რაღაც ფარული
და მშვიდი ხმის მღერა მოესმოდა, ძლიერდებოდა, თანდათანობით ღრმავდებოდა ის ხმა, თითქმის არც კი უყურებდა დიკს,
მაგრამ გრძნობდა, რა კარგად მიდიოდა ყველაფერი.

საუზმის მერე დაივერები, ნორთები და როზმერი "ფრანკო ამერიქენ ფილმზს" ეწვივნენ. იქ მოვიდოდა კოლის კლეიც, მისი ნიუჰეივენელი მეგობარი, რომელსაც ტელეფონით შეუთანხმდა როზმერი. ეს ჭაბუკი, ვისაც ჩრდილოეთ შტატებში სწავლის მისაღებად წასული ყველა სამხრეთელივით, მეტისმეტი პირდაპირობა და ტრაფარეტულობაც კი ახასიათებდა, წარმოშობით ჯორჯიიდან იყო. შარშან ზამთარს, სანდომიანი, მოხდენილი ყმაწვილიაო, ფიქრობდა როზმერი და როცა ერთხელ მანქანით ნიუ-ჰეივენიდან ნიუ-იორკამდე ერთად იმგზავრეს, მთელ გზაზე ხელიხელჩაკიდებული ისხდნენ.

ახლა მისთვის იგი, უბრალოდ აღარ არსებობდა.

დარბაზში როზმერი კოლის კლეისა და დიკს შუა იჯდა, აპარატს რაღაც მოეშალა და სანამ მექანიკოსი "მამიკოს გო. გონაზე" ჯახირობდა, ადმინისტრაციიდან ვიღაცა ფრანგი თავს ევლებოდა როზმერის, თან სულ ახალი ამერიკული სლენგით ცდილობდა ელაპარაკა, ჟარგონითვე მიმართავდა მექანიკოს. საც: "გავაფრენ და ეგ არის, გიჭო". ბოლოს რაღაც ხმაური გაისმა, გატკაცუნდა, კიდევ რაღაც ზუზუნი და, როგორც იქნა მარტო აღმოჩნდა დიკთან. სიბნელეში შეხედეს ერთმანეთს.

"როზმერი, ძვირფასო", ჩაიჩურჩულა დიკმა. მათი მხრები ერთმანეთს შეეხო. იმ რიგის ბოლო სკამზე მჯდარი ნიკოლი შეიშმუშნა, ეიბი დიდხანს ახველებდა და ცხვირს იხოცავდა;

მერე ყველა დაწყნარდა და ფილმი დაიწყო.

ესეც ის — შარშანდელი მოწაფე, ტანაგრის სტატუეტივით უკან გადაწეული და ბეჭებზე ჩაშვებული თმით, ის — ასეთი ნორჩი და უმანკო, დედის ალერსიანი ზრუნვის ნაყოფი, ისა — მთელი მოდგმის ხორცშესხმული ინფანტილიზმი, ვისი მეძავუ- რი გონის საამებლადაც ახალი თოჯინა გამოეჭრათ მუყაოსაგან. როზმერის სინორჩისა და სინედლის შეგრძნება გაახსენდა, მაშინდელი, ის ახალი და სრიალა აბრეშუმის კაბა რომ ეცვა.

მამიკოს გოგონა. ასეთი პაწაწკინტელა, არადა, რაღა არ გადახდა საბრალოს. ჟღურტულა, შეუპოვარი პაწაწა ჟღურტულა. მისი ერთი ბეწო მუშტის წინაშე უკან იხევდა ავხორცო-ბა და გარყვნილება, უფრო მეტიც, ბედიც კი სხვაგვარად ტრიალდებოდა, სილოგიზმი, დიალექტიკა, საღი აზრი — ყველა ძალას ჰკარგავდა. ქალებს დავიწყებოდათ, გასარეცხი თეფშები რომ ეყარათ შინ და ქვითინებდნენ. თვითონ ფილმშიც ერთი ქალი იმდენს ქვითინებდა, კინაღამ როზმერისაც აჯობა. ტიროდა დეკორაციებში, — გადაღებისას მთელი მათი ავლადიდება; დანქენ ფაიფის სასადილო ოთახში, აეროპორტში, მდინარეზე, აფრიანი ხომალდების გასწრებისას, — აქედან ფილმში მხოლოდ ორი კადრი შევიდა; მეტროპოლიტენის ვაგონსა და ბოლოს — სააბაზანოში. მაგრამ გამარჯვება მაინც როზმერის დარჩა, ხასიათის შეურყევლობამ, კეთილშობილებამ და გამბედაობამ უშველა გაეძლო ქვეყნად გამეფებული

ლამსობისთვის, სახეზე ეწერა, რაც გადახდა, ამის სახე ნომ გერაც ნიღბად არ ქცეულიყო. ისეთი უნებური და გულისშემ-ძვრელი ჩანდა, რომ იმ რიგში ყველა, მოხიბლული და გულ-აჩუყებულები, დროდადრო მისკენ იხედებოდნენ და უყურებ-დნენ. ფილმი ერთი ინტერვალით აჩვენეს და სინათლე აინთო თუ არა, ყველამ თავისი აღტაცება გაუზიარა, ხმაური და ტა-შისცემა რომ მინელდა, დიკმა უბრალოდ და გულწრფელად უთხრა: "თქვენ გამაოცეთ, ეჭვიც არ მეპარება, ერთ-ერთი საუკეთესო მსახობი დადგებით მალე".

მერე ქი ისევ "მამიკოს გოგონა" ეკრანზე. გათავდა წუხი-ლი და დადგა უფრო ბედნიერი დღეები. როზმერიმ და მამა-მისმა ერთმანეთი იპოვეს და ყველაფერი დამთავრდა მათი შეხვედრის სცენით, სადაც ოიდიპოსური კომპლექსი ისე ცხა-დი და გულისამრევად სანტიმენტალური იყო, რომ დიკს თა-ვისი თავისა და ყველა ფსიქიატრის გამოც, ეუხერხულა. ფილ-მი დამთავრდა, სინათლე აინთო და დადგა ის წუთი, რომელიც

უნდა დამდგარიყო.

"მე ერთი სიურპრიზიცა მაქვს თქვენთვის", ყველას გასაგონად გამოაცხადა როზმერიმ. "დიკისთვის სასინჯი გადაღების საქმე მოვაგვარე".

"hom?"

"სასინჯი კინოგადაღება, ახლა მიიწვევენ".

საშინელი სიჩუმე ჩამოვარდა; მერე ვიღაცამ — ნორთი იყო, მერი ან ეიბი, — სიცილი ვერ შეიკავა. როზმერის თვალი არ მოუშორებია დიკისთვის, მეტყველ ირლანდიურ სახეზე ამჩნევდა, რომ თანდათან ხვდებოდა სიტყვების აზრს, მაგრამ მაშინვე იმასაც მიხვდა, რომ თავისი კოზირის გამო რაღაც შეცდომა დაეშვა, ოღონდ, ჯერ კიდევ ვერ გაეგო, რომ თვითინ ბანქო არ უვარგოდა.

"სასინჯ გადაღებაზე მე არ წავალ", მტკიცედ თქვა დიკმა; მაგრამ მთელი სიტუაციის გააზრების მერე უფრო გულითადი ტონით განაგრძო: "მიკვირს, როზმერი, რამ მოგაფიქრათ, კინო შესანიშნავი კარიერაა ქალისთვის, მაგრამ, ღმერთო ჩემო, ჩემგან რა კინომსახიობი უნდა დადგეს. რა მზეჭაბუკი მე მნახეთ ნეტავ, ჩემი სახლისა და მეცნიერების იქით სხვა არაფერი არა გიცი რა".

ნიკოლი და მერი ირონიულად აქეზებდნენ, ხელიდან არ გაეშვა შემთხვევა; ცოტათი კიდევაც სწყინდათ, რომ თვითონ არ მიიწვიეს. მაგრამ დიკმა სხვა თემაზე გადაიტანა საუბარი, მსახიობებზე გამოთქვა თავისი აზრი და საკმაოდ მკვეთრადაც.

"ყველაზე მაგრად იმ კარს კეტავენ, რომელსაც არსად არ შევყავართ", თქვა მან, "ალბათ იმიტომ, რომ სიცარიელე უშ-

ნოა და რცხვენიათ".

როზმერი დიკთან და კოლის კლეისთან ერთად ჩაჯდა მანქანაში — კოლისს მიიყვანდნენ თავის ოტელში და მერე დიკი როზმერის ერთ საღამოზე წაიყვანდა, ნიკოლმა და ნორთებმა უარი თქვეს იმ აუცილებელი და გადაუდებელი საქმეების გამო, ეიბმა ბოლოსთვის რომ მოიტოვა. ტაქსიში როზმერიმ უსაყვედურა დიკს.

"მე მეგონა, თუ გადაღება წარმატებით ჩაივლიდა, ფირს თან, კალიფორნიაში წავიღებდი. იქ კი, თუკი მოეწონებოდათ, იქნებ მიეწვიეთ კიდევაც და ახალ ფილმში ჩემი პარტნიორი

გახდებოდით".

დიკი გაშტერდა.

"ძალიან მიხარია, ასე რომ ფიქრობთ ჩემზე, როზმერი, მაგრამ ის უფრო მირჩევნია, კინოში თქვენ გიყუროთ. ამ სურათში მშვენიერი ხართ".

"მაგარი ფილმია", თქვა კოლის კლეიმ. "მეოთხეჯერ ვნახე. ერთ ბიჭს ვიცნობ, ნიუჰეივენელია, ათჯერ მაინც ნახა, ერთხელ საგანგებოდაც კი წავიდა ჰარტფორდში, მაგრამ როზმერი რომ ნიუ-ჰეივენში ჩამოვიდა, ისე შერცხვა, შეხვედრაზე უარიც ყი თქვა. როგორია? ეს პატარა გოგო ყველას ძირს აწვენს".

დიკმა და როზმერიმ ერთმანეთს გადახედეს; ერთი სული ჰქონდათ ორივეს, მარტო ყოფნისა, მაგრამ კოლისს აზრადაც არ მოსდიოდა მათი დატოვება.

"ჯერ თქვენ მიგიყვანთ", თქვა მან. "მე "ლუტეციაში" ცცხოვრობ, აქვეა".

"არა, ჩვენ მიგიყვანთ", უთხრა დიკმა.

"არაფერია, მიგიყვანთ, ჩემთვის იოლია".

"მე მგონია, ჯობია, რომ ჩვენ მიგიყვანოთ".

"მაგრამ..." დაიწყო კოლისმა და გაჩერდა, ბოლოს და ბო-

ლოს მიხვდა და როზმერის გაუბა ლაპარაკი, ისევ სად და რო-

დის შევხვდეთო, ეკითხებოდა.

გოლოს, როგორც იქნა წავიდა, დიდი არაფერი, მაგრამ მაინც ზედმეტი იყო, ტვირთად აწვათ მესამე პირი. მანქანა გულდასაწყვეტად მალე და მოულოდნელად გაჩერდა იმ სახლ-თან, სადაც მიდიოდნენ. დიკმა ღრმად ამოისუნთქა.

"რა ვქნათ, შევიდეთ?"

"როგორც გინდათ, ჩემთვის სულ ერთია", თქვა როზმერიმ. "როგორც თქვენ იტყვით".

. დიკი დაფიქრდა.

"არა, უნდა მივიდე — იმ ქალს რამდენიმე სურათის ყიდვა სურს ერთი ჩემი მეგობარი მხატვრისგან, რომელსაც ძალიან სჭირდება ფული".

როზმერიმ თმაზე ოდნავ გადაისვა ხელი, იგრძნო, ცოტათი არეული ჰქონდა და გაისწორა.

"ხუთი წუთით და წამოვიდეთ", თქვა ბოლოს დიკმა. "თქვენ ეს ხალხი არ მოგეწონებათ".

ალბათ მოსაწყენი ხალხია, სტერეოტიპები, გაიფიქრა როზმერიმ, — ან სმას გადაყოლილები და აბეზრები, ისეთები, ვისიან ურთიერთობასაც დაივერები ერიდებიანო. არ ეგონა, რომ ახვა სცენას ნახავდა და სხვა შთაბეჭდილება დარჩებოდა.

## XVII

სახლი რუ მესიეზე იდგა. კარდინალ დე რეტცის გადაკეთებული სასახლე გახლდათ, მაგრამ სასახლისაგან კარკასიღა დარჩენილიყო. შიგნითაც აღარაფერი მოგაგონებდათ წარსულს,
არც აწმყოს, იმას, რაც როზმერიმაც იცოდა. უფრო იმასა ჰგაგდა, რომ ძველებური აგურის კედლები მყოფადს მოიცაგდა,
ასე რომ, ვინც იმ სახლის ზღურბლს, — თუ ზღურბლი იყო, —
გადააბიჯებდა, ისეთი გრძნობა ეუფლებოდა, თითქოს დენმა
დაარტყაო, ან კიდევ საუზმედ შვროის ფაფა ჰაშიშთან ერთად
მოართვესო. გრძელი ჰოლი უნდა გაევლო, მოლურჯო ფოლადს
აქ ოქროცურვილი ვერცხლი ენაცვლებოდა და ეს ყველაფერი
სარკეების მირიად უცნაურ წახნაგებში ირეკლებოდა. აქ სულ
სხვა შთაბეჭდილება გრჩებოდათ, ისეთი არა, როგორიც,

გთქვათ, დეკორატიული ხელოვნების გამოფენაზე, სადაც ყველაფერს გარედან უყურებ, აქ კი, თვითონ, შიგნით ექცევი როზმერის უცხო, ყალბი და ჭრელი მოეჩვენა აქაურობა, ასე ეგონა, სცენაზე გაიყვანესო და ხვდებოდა, რომ სხვებსაც იგი. ვე გრძნობა ჰქონდათ.

ოცდაათამდე კაცი იყო, უმთავრესად ქალები და ყველა ლუიზა მ. ოლკოტისა თუ მადამ დე სეგიურის თარგზე გამოჭ რილი, შუშის წამახულ ნამსხვრევებს რომ წამოკრებს ხელი, იც ხელივით ფრთხილად და გამოზომილად მიმოდიოდა ამ სცენაზე. აქ არ იგრძნობოდა გარემოსა თუ ნივთების მიმართ თა ვისუფლება, რაც ხელოვნების საგნების მფლობელ კაცს უჩნ. დება ხოლმე, თუნდაც მეტად თავისებური და ეზოტერული იყოს ის საგნები. რა ოთახი იყო, ვერ გაიგებდით, რასაც გინდათ დაარქმევდით, ოლონდ ოთახს კი არა. იქ ყოფნა ისეგე ძნელი იყო, როგორც გაპრიალებულ მოძრავ კიბეზე ზევ-ზევით ასვლა, საამისოდ ისევ იმ შუშის ნამსხვრევების ფრთხილად ამკრები ხელის წაშველება სჭიროდა კაცს და ეს სიფრთხილი თუ გამოზომვა იყო იქ მყოფთა ზნეც და ბუნებაც, — თითქმის ყველასი.

ორნაირ ხალხს მოეყარა თავი. ერთ ჯგუფში შედიოდნენ ამერიკელები და ინგლისელები, მთელი გაზაფხულისა და ზაფხულის მანძილზე თავაშვებული ცხოვრებით რომ ცხოვრობდნენ და ისევ თავიანთ ნებაზე მიშვებულებს, ზოგჯერ თვითონაც არ ესმოდათ რა უნდოდათ და რას აკეთებდნენ. ერთხანს რომ მეტად წყნარად იყვნენ, მოდუნებული და ყველაფრისადმი გულგრილები, უცებ ჩხუბს წამოიწყებდნენ, ერთ ამბავს ატეხდნენ და ცთუნებასაც აჰყვებოდნენ. მეორე ჯგუფი საქმოსნების, უფრო ფხიზელი და საღი გონების ხალხისაგან შედგებოდა. ამათ რაღაცა მიზანი ჰქონდათ ცხოვრებაში და დროს ეგრე იოლად სისულელეებზე არ დაკარგავდნენ. ესენი უკეთ ეგუებოდნენ ამ გარემოს და ტონსაც აძლევდნენ იქაურობას, რამდენადაც ეს შეიძლებოდა ისეთ ადგილას, სადაც განათების უახლესი ხერხებით ეფექტის მიღწევა იყო მთავარი.

ამ ფრანკენშტაინმა შთანთქა დიკი და როზმერი, წამში ჩაყ-ლაპა, შესვლაც ვერ მოასწრეს, რომ ორთავე ცალ-ცალკე აღ-მოჩნდა და გაოცებულმა როზმერიმ, თავისსავე თავს შეამ-

ჩნია, — პატარა ფარისეველი იყო, განგებ ხმამაღლა მოლაპარაკე, და გულგალეული ელოდა რეჟისორის მოსვლას, რომ
წარემართა მისი ცხოვრება. ერთი სიტყვით, აქ ყველას ფრთეგი ჰქონდა გამოსხმული, და ისე ატყლაშუნებდნენ ამ ფრთებს,
რომ თვითონაც მოუნდა არ ჩამორჩენოდა სხვებს, გამოცდილება და წვრთნაც შველოდა; რამდენჯერმე შეტრიალება, —
გაიარ-გამოიარა და, უცებ აღმოაჩინა, რომ უკვე გაება საუბარი ერთ მეტად მოხდენილ, სანდომიან ქალიშვილთან, ლამაზ
ბიჭს რომ უგავდა სახე; საუბარი კი გაება, მაგრამ ფაქტიურად
ოთახის სხვა მხარეს, ოთხიოდე ნაბიჯის იქით საქვემეხო ლითონისაგან ჩამოსხმულ კიბესთან მდგომებისთვის მიეგდო ყური
და ლამის სიტყვა-სიტყვითაც კი ისმენდა იმათ ლაპარაკს.

სამი ახალგაზრდა ქალი ჩამომჯდარიყო ამ კიბის ქვედა საფეხურზე, სამივენი მაღლები და მოხდენილები, ლამაზი პატარა თავებითა და მანეკენებივით თმადავარცხნილები. ლაპარაკისას თავებს გრძელყუნწიანი ყვავილებივითა თუ კობრებივით შეარხევდნენ ხოლმე თავიანთ მუქ, მამაკაცისნაირ კოს-

ტიუმებზე.

"არა, უნდა ითქვას, რომ ძალიან კარგ საღამოებს მართავენ", თქვა ერთმა დაბალი, მჟღერი ხმით. "ფაქტიურად, ყველაზე კარგი საღამოები პარიზში მაგათია. არარაობა უნდა ვიყო, რომ ეს უარვყო. ოღონდ, მაინც..." ამოიოხრა, "მისი გაუთავებელი ფრაზები, წამდაუწუმ რომ იმეორებს — "აბორიგენები, ჭიები რომ ხრავენ..." კარგი, ერთხელ შეიძლება გაიცინო, მაგრამ..."

"მე უფრო ისეთ ხალხს ვანიჭებ უპირატესობას, ვინც მაგათსავით კარგად ვერ ააწყო თავისი ცხოვრება". თქვა მეო-

რემ, "ის ქალი კი სულ არ მომწონს".

"მაინცდამაინც არასოდეს აღვფრთოვანებულვარ მაგ ხალხით, მაგათი კომპანიით ხომ... თუნდაც ის მისტერ ნორთი, მთლად წყალწაღებულია".

"მაგაზე ზედმეტია ლაპარაკი, ეგ არც ითვლება". თქვა ისევ პირველმა. "მაგრამ თვითონაც იცით, რომ ის, ვისაც ვგუ-ლისხმობთ, მომხიბვლელია, ძნელად შეხვდები მაგისთანა კაცს".

ახლაღა მიხვდა როზმერი, რომ დაივერებზე ლაპარაკობდ-

ნენ და აღშფოთებისგან ლამის გაშეშდა. ამასობაში ეს ქალიშვილი, როზმერისთან მოლაპარაკე, — ცისფერთვალება, ვარდისფერღაწვებიანი, გახამებული ბლუზითა და შესანიშნავი ნაცრისფერი კოსტიუმით სარეკლამო ტიპს რომ ჰგავდა, — გაცხოველებით მოჰყვა ლაპარაკს, და ლამის იერიშზე გადავიდა. მთელი ამ ხნის მანძილზე, იმის შიშით, რომ როზმერი კარგად ვერ შეხედავდა, ცდილობდა ერთი ბეწოც აღარაფერი დარჩენილიყო იმათ შორის, იუმორის თხელი საფარიც კი, ბოლოს და ბოლოს, მოახერხა, როზმერიმ კარგად დაინახა და ლამის შეზიზღდა, ისე არ მოეწონა.

"იქნებ ერთად გვესაუზმა ან გვესადილა სადმე, ხვალ ან

ზეგ?" ის ქალიშვილი სთხოვდა როზმერის.

როზმერიმ მიიხედ-მოიხედა, თვალებით დიკს ეძებდა, დაინახა, დიასახლისთან ერთად იდგა; რაც აქ მოვიდნენ, სულ იმას ელაპარაკებოდა და ეტყობა, ჯერ ვერ შეთანხმებოდა. მათი თვალები ერთმანეთს შეხვდა, დიკმა ოდნავ დაუქნია თავი და ესეც კმაროდა, სამმა კობრამ იმწამსვე შეამჩნია როზმერი და მოხედეს, კისრები კიდევ უფრო დაუგრძელდათ, თავით ფეხებამდე შეათვალიერეს. როზმერიმ გამომწვევად შეხედა, აგრძნობინა, რომ გაიგონა, რაცა თქვეს. მერე საჩქაროდ, მაგრამ თავაზიანად, ისე, როგორც დიკმა იცოდა, დაშორდა თანამოსაუბრეს და დიკთან მივიდა. დიასახლისი, ესეც კიდევ\* ერთი მაღალი ქალიშვილი, ეროვნული კეთილდღეობის უზრუნველად მომკელი მდიდარი ამერიკელი, დიკის უგულისყურობას არ დაგიდევდათ და ათას კითხვას აყრიდა. რაღას არ ეკითხებოდა გოსის ოტელზე, ეტყობა, მალე იქით გასწევდა. როზმერის დანახვისას გაახსენდა, დიასახლისის ვალი უნდა მოეხადა და მაშინვე ჰკითხა: "საინტერესო ხალხს გაეცანით? კარგად ისაუბრეთ? ნახეთ მისტერ..." თვალებით დაუწყო ძებნა მამაკაცს, "შესაფერისს", როზმერისათვის, მაგრამ დიკმა ჩვენი წასვლის დროაო და მაშინვე წავიდნენ, იმ სახლს, იმ მიჯნას გასცდნენ თუ არა, უცებვე ქვის ფასადის ჩრდილში, წარსულში ჩაინთქნენ.

"საშინელება იყო", თქვა დიკმა.

"როზმერი!"

<sup>&</sup>quot;საშინელება", მორჩილად მიუგო როზმერიმ.

ტოზმერი გაირინდა, ხმა ჩაუვარდა.

"რა?"

"საშინლად მოვიქეცი".

როზმერი ხმამაღლა, გულით ატირდა, მხრები უთრთოდა ქვითინისგან.

"ცხვირსახოცი მომეცით", ენა ებმოდა, ისე სთხოვა დიკს.

მაგრამ ტირილისთვის ვის ეცალა, ან ამის დრო სად იყო. შეყვარებულები ხარბად ჩაეკვრნენ, რამდენიმე წუთს ასე იყვ-ნენ, ტაქსის მინებში მწუხრს შერეული სიმწვანე ჩანდა, უკ-ვე სიმრუმე ემატებოდა და უშფოთველი წვიმის ფარდაში ელექტრონივით — ლურჯ და ცეცხლისფრად, ხანაც მავისფერ-მწვანე კვამლივით ჩნდებოდა და ინთებოდა რეკლამები. საღამოს ექვსი ხდებოდა, ქუჩებში მოძრაობამ იმატა, ბისტროების სარკმლებიდან უკვე შუქი გამოდიოდა, როცა ვარდისფერსა და დიდებულ თანხმობის მოედანს ჩაუარეს და მანქანამ ჩრდი-ლოეთისკენ აიღო გეზი.

როგორც იქნა შეხედეს, სახელებს ჩუმად ამოთქვამდნენ, ავგაროზებად. ორი სახელი ერეოდა სათუთად ჰაერს, სხვა სიტყვებზე, სხვა სახელებზე, სხვა მუსიკაზე უფრო მეტად და

ხანგრძლივად ჩაესმოდა გონებას.

"არ ვიცი გუშინ რა დამემართა", თქვა როზმერიმ, ალბათ შამპანურის ბრალი იყო? ადრე ასე არ დამმართნია".

"უბრალოდ, ისა თქვით, რომ მე გიყვარვართ".

"მართლა მიყვარხართ — ამას აღარა ეშველება რა". ახლა კი დადგა დრო, ეტირა და როზმერიც ატირდა, ცხვირსახოცს იფარებდა.

"მგონია, მეც მიყვარხართ", თქვა დიკმა, "და კარგი იქნე-

ბოდა, ეს არ მომხდარიყო..."

ისევ ორი სახელი, — მერე გადაეხვივნენ, ისე, თითქოს ტაქსიმ მიაგდო ერთმანეთსო. მკერდით მიეკვრნენ, როზმერის ბაგე, სულ სხვა და თბილი, დიკის ბაგეს შეერთო და აღარაფერზე ფიქრობდნენ ახლა, ვეღარაფერს ხედავდნენ და ამის გამო ლამის ტკივილნარევ შვებას განიცდიდნენ; ერთმანეთის სუნთქვა ესმოდათ და ერთმანეთს ეძებდნენ. თითქოს ნამთ-ვრალევი და დაქანცულები, ორთავ მოიცვა ამ ბინდისფერმა, წყნარმა დაქანცვამ, როიალის სიმებივით დაჭიმული და წნუ-

ლი სკამივით მოჭრიალე ნერვები მოუდუნდათ. ასე მგრძნობი და გაშიშვლებული ნერვები უნდა შეხებოდა ერთიმეორეს,

ბაგე ბაგეს და მკერდი მკერდს...

ჯერ ისევ სიყვარულის უბედნიერეს ეტაპზე იყვნენ, მშვენიერ, ყველაფერს გადაწვდენილ, ილუზიების მირაჟში ხედავდნენ ერთმანეთს, და მათი არსებათა შერთვა თითქოს რაღაც
არაჩვეულებრივ სამყაროში ხდებოდა, სამყაროში, სადაც
სხვა ურთიერთობები არა იყო რა და ორივემ თითქოს საკვირვლად უცოდველი გზით მოაღწია აქამდე, შემთხვევების
ჯაჭვმა შეჰყარა ერთურთს, იმდენმა შემთხვევამ, რომ ბოლოს,
სხვა გზა არ იყო და დაიჯერეს — ერთმანეთისთვის გაჩნდნენ
ამქვეყნად, სუფთა ხელებით გამოიარეს აქამდე ეს გზა, ასე
ეგონათ. და არც ვინმე ცნობისმოყვარე და გულდახურული
შემოხვდომიათ ამ გზაზე მავალთ.

მაგრამ დიკისთვის დიდხანს როდი გაგრძელდა ეს გზა:

ტაქსის ოტელთან გაჩერებამდე გამოფხიზლდა.

"არ შეიძლება, არ გამოვა", ლამის შიშით თქვა, "მიყვარხართ, მაგრამ წუხელ საღამოს რაც გითხარით, არ შეიცვლება".

"ჩემთვის ახლა სულ ერთია. მე მხოლოდ ის მინდოდა, შეგყვარებოდით. რაკი გიყვარვართ, სხვა ყველაფერი სულ ერთია".

"სამწუხაროდ ასეა, მიყვარხართ. მაგრამ ნიკოლმა არ უნდა იცოდეს, იოტისოდენა ეჭვიც არ უნდა გაუჩნდეს. მე არ შემიძლია დავშორდე ნიკოლს და მხოლოდ იმიტომ კი არა, რომ არ მინდა — აქ უფრო სხვა რამეა".

"ერთხელაც მაკოცეთ".

დიკმა აკოცა, მაგრამ როზმერისთან აღარ იყო.

"ნიკოლი არ უნდა დაიტანჭოს — გუყვარვარ და მეც მიყგარს, მინდა, გაიგოთ ეს".

როზმერის ესმოდა — ეს ყოველთვის კარგად ესმოდა — ტკივილი არ უნდა მიაყენო სხვას. იცოდა, რომ დაივერებს უყვარდათ ერთმანეთი, თავიდანვე იცოდა, არ შეშლია. ოღონდ, ეჩვენებოდა, რომ ეს უკვე ჩამქრალი გრძნობა იყო, უფრო იმ სიყვარულს წააგავდა, როგორითაც როზმერის და დედამისს უყვარდათ ერთმანეთი. როცა ამდენ დროს იმეტებენ სხვები-

Scanned by CamScanner

სათვის — ვინც უნდა იყოს, განა ეს იმას არა ნიშნავს, რომ ერთმანეთისგან იმათ უკვე ბევრი აღარა სჭირდებათ რა?

"ეს ჭეშმარიტი სიყვარულია", გეგონება მიუხვდაო როზმერის ფიქრებს. "ნამდვილი — თანაც, აქ უფრო რთულად არის საქმე, ძნელია თქმა. იმიტომაც მოხდა ის იდიოტური დუელი".

"საიდან იცით იმ დუელზე? მე მითხრეს, რომ ვერ გაიგებ-

დით".

"გგონიათ ეიბს საიდუმლოს შენახვა შეუძლია?" ხმაში მკვეთრი ირონია გაერია დიკს. "თუ რაიმე საიდუმლო გაქვთ, შეგიძლიათ გადასცეთ რადიოთი ან ბულვარულ ფურცლებზე გამოაქვეყნოთ, მაგრამ არამც და არამც არ ანდოთ იმ კაცს, ვინც დღეში სამჯერ ანდა ოთხჯერ და მეტჯერაც სვამს".

როზმერი დაეთანხმა და გაიცინა, მაგრად მიეკრა დიკს.

"ასე რომ, იცოდეთ; ნიკოლისა და ჩემი ურთიერთობა რთულია, გარეგნულად ჯანმრთელი კი ჩანს, მაგრამ ისე სუს-ტია ნიკოლი და საერთოდ, ბევრიც სხვა რამ არის".

"ამაზე სხვა დროს. ახლა მაკოცეთ — ახლა გიყვარდეთ, ამის მერე კი მე ისე ჩუმად მეყვარებით, ნიკოლი სულაც ვერ გაიგებს".

"რა საყვარელი ხართ".

ოტელის ვესტიბიულში შევიდნენ, როზმერი ოდნავ ჩამორჩა, რათა შორიდან ეცქირა დიკისათვის, აღტაცებით შეეხედა
და თაყვანი ეცა. თითქოს ძნელი რაღაცის ახდენის მერე ბრუნდებოდა და ახლა კიდევ უფრო ძნელ საქმესთან შესახვედრად
მიიჩქაროდა, ისე მოქნილად მიდიოდა დიკი. ის იყო ყველა მხიარულების მოთავე, ბედნიერებისა და გახარების ძვირფასი განძის მცველი; ხელში მძიმე ჯოხი ეჭირა, ხელთათმანები — ყვითელი, შლაპა კი — შლაპა საუცხოო ეხურა. სადაც დიკია, ხალისია, კარგი საღამო გველისო, გაიფიქრა როზმერიმ.

მეხუთე სართულამდე ფეხით აუყვნენ კიბეს. პირველი კი-ბის თავში შეჩერდნენ და აკოცეს ერთმანეთს; მეორეზე როზ-მერის სიფრთხილე უნდა გამოეჩინა, მესამეზე—— მით უფრო. მომდევნოზე — კიდევ ორი იყო— — როზმერი გამოსათხოვარი წამიერი კოცნისთვის შეჩერდა. მერე ორთავე ერთი კიბით დაბლა დაეშვნენ — ასე სურდა დიკს — და ამის მერე კი შეუჩერებლივ ავიდნენ ზევით. კიბის ბოლოში დაემშვიდობნენ

ერთმანეთს, დიდხანს ვერ უშვებდნენ მოაჯირზე გაწვდენილ ხელებს, ბოლოს გაუშვეს, როგორც იქნა, დიკი ისევ ქვევით ჩავიდა, რათა იმ საღამოს თადარიგი დაეჭირა, როზმერი კი, თავის ოთახში შესული, დედასთან წერილის საწერად დაჯდა, სინდისი ქენჯნიდა, რომ ბოლო ხანს არც მონატრებია.

#### XVIII

დაივერებს აპათიაც კი გასჩენოდათ მაღალი წრის ცხოვრებისადმი, მაგრამ მაინც იოლად ვერა თმობდნენ და მიჰყვებოდნენ ამ წრის ცხოვრების რიტმს, მაჯისცემას — დიკის საღამოებზე ყველაფერი ამაღელვებელი იყო, არავინ მოიწყენდა, ხანდახან ღამით სუფთა ჰაერზე გავლის შანსი ხომ, კიდევ უფრო ამძაფრებდა სიამოვნებას.

ის საღამო კომედიური ფარსის ტემპში ტრიალებდა. თორმეტნი იყვნენ, მერე თექვსმეტი, მერე ოთხ-ოთხად ჩასხდნენ ავტომობილებში, პარიზის მიდამოებში უცაბედი ოდისეისთვის. ყველაფერი უკვე წინასწარ მოეფიქრათ. თითქოს ჯადოსნურად, გზადაგზა, უცებ სულ ახალი ხალხი ჩნდებოდა; ერთხანს ამათი თანმხლებნი ხდებოდნენ და მეგზურებივით, საქმის ალღოთი მიჰყვებოდნენ, მერე და მერე კი უკვალოდ ქრებოდნენ და ახლა სულ სხვა, ვინმე ახალი გამოჩნდებოდა იმათ მაგივრად, ახლა ახლები მიჰყვებოდნენ კვერთხის ხელახალ გაელვებამდე. როზმერისათვის ეს ყველაფერი, იქაური დიდებულების მიუხედავად, ოდნავადაც არა ჰგავდა ჰოლივუდში გამართულ ლხენას. გართობა იყო სპარსეთის შაჰის ავტომობილით გასეირნებაც. არავინ იცოდა საიდან, რა გზით მოახერხა ამ ავტომობილის შოვნა დიკმა. როზმერიმ იგი მიიჩნია ერთერთ იმ საოცრებათაგან, რაც ასე ხშირად ხდებოდა იმის ცხოვრებაში ამ ბოლო ორი წლის მანძილზე. ავტომობილი სპეციალური შეკვეთით გაეკეთებინებინათ ამერიკაში. ბორბლები ვერცხლისა ჰქონდა, რადიატორიც. ძარის შიგნით უთვალავი შუშა ბრჭყვიალებდა. ერთი კვირის მერე, მანქანა თეირანს რომ ჩავიდოდა, იუველირი პატიოსანი თვლებით შეცვლიდა მათ. უკან მხოლოდ ერთი ადგილი იყო, შაჰთან დაჯდომას ვინ გაბედავდა, და რიგრიგობით ჯდებოდა ყველა იმ ადგილ-

Scanned by CamScanner

ზე. სხვები კი ამ დროს ძირს დაგებულ კვერნის ტყავზე იკა-

ლათებდნენ.

მაგრამ მთავარი დიკი იყო. როზმერი დედას, ვისაც ფიქტით არ შორდებოდა, აკერებდა, რომ თავის დღეში არ ენახა იმაზე კარგი, საყვარელი, მომხიბვლელი ვინმე, ვიდრე დიკ იიყო იმ საღამოს. როზმერი მას იმ ორ ინგლისელს ადარებდა, ვისაც ეიბი ახირებულად "მაიორ ჰენჯისტსა და მისტეო ჰორსას" ეძახდა, კიდევ — სკანდინავიის ერთი ქვეყნის ტახტის მემკვიდრეს, რუსეთიდან ახლახან დაბრუნებულ მწერალს, თავად ეიბს, ყოველთვის თავზეხელაღებულსა და მახვილგონიერს, კოლის კლეის, სადღაც გზად რომ შემოეყარათ, და გრძნობდა, დიკისთანა არავინ იყო, დიკს ვერავის შეადარებდა. როზმერის ხიბლავდა მისი მონდომება და ძალა, მისი გულუხვობა და თავდაუზოგაობა, დიკის უნარი, გამოეცოცხლებინა სხვადასხვა ბუნებისა და გუნების ხალხი, რომლებიც თავიანთ წილ-ყურადღებას ისე ელოდნენ, როგორც ინფანტერიის ბატალიონის კარისკაცები თავიანთ ულუფას და ამას მეტად იოლად, ძალდაუტანებლად აკეთებდა, ყველასათვის ჰყოფნიდა ძალა.

...მერე ახსენდებოდა ის ბედნიერი წუთები, ამ საღამოს რომ ერგო. ჯერ ის, როცა დიკთან ცეკვავდა და იმის სიახლოვეს თავისი თავი საკვირველად ლამაზი ეჩვენებოდა, დიკი ხომ მაღალი, ძლიერი იყო — როგორც კარგ სიზმარში, ისე დადიოდნენ, დადიოდნენ კი არა, ლივლივებდნენ. დიკი ხან აქეთ, ხან იქით, ისე სათუთად შემოატრიალებდა ხოლმე, თითქოს ხელში ყვავილები თუ ძვირფასი ქსოვილი უჭირავს და ერთ ორმოცდაათ თვალს ანახვებსო. დროდადრო არც კი ცევ-ვავდნენ, უბრალოდ, ერთ ადგილას იდგნენ და ერთმანეთის სიახლოვით ნეტარებდნენ. ერთხელაც, უკვე გათენებულზე, როგორღაც მარტო აღმოჩნდნენ და როზმერის ნორჩი და ნოტიო სხეული აბრეშუმივით მიეკრა დიკს და ასე გაყუჩდა ვიღაცების შლაპებისა და წამოსასხამების გროვასთან...

მოგვიანებით კი, ყველაზე ბევრი იმაზე იცინა, რომ ექვსივენი, ამ თავშეყრის რჩეულნი, ნაღები საღამოისა, "რიტცის" ჩაბნელებულ ვესტიბიულში იდგნენ და ღამის კონსიერჟს ძლივძლივობთ აგებინებდნენ, რომ გარეთ გენერალი პერშინგი იცდიდა და ხიზილალასა და შამპანურს ითხოვდა. "იმას ლოდინი და გადადება არ უყვარს. ხალხიც და იარაღიც მაგას ემორი ჩილება". მაშინვე საიდანღაც გამოიშალნენ ოფიციანტები, თავგზაარეული მირბი-მორბოდნენ და მალე ვესტიბიულშივე გაიშალა სუფრა, კარებში გენერალი პერშინგი, ეიბი გამოცისიმდერებიდან ადგილები ახსოვდათ, ჩააბულბულეს. მერე მოენათ, რომ ოფიციანტებს ეწყინათ ეს გათამაშება და ისე მარდად აღარ ტრიალებდნენ. ამაზე, ადგნენ და სასჯელად ოფიციანტსაჭერი ხაფანგის მოწყობა იზრახეს. რაც კი ავეჯი იყო ვესტიბიულში, ერთად მიდგეს, აახუხულავეს და გოლდაგერგის კარიკატურის მსგავსი რაღაც უცნაური და ახირებული ნაგებობა აღმართეს. ამის შემყურე ეიბი საეჭვოდ აქნევდა თავს.

"ის უფრო კარგი არ იქნება, მუსიკოსებს ხერხი წავართვათ და..."

"კარგი, კარგი, საკმარისია", შეაწყვეტინა მერიმ. "რაკი ხერხზე მიდგა საქმე, ეს უკვე იმას მოასწავებს, რომ შინ წასვლის დროა".

როზმერის გაუზიარა თავისი შეშფოთება:

"ეიბი შინ უნდა წავიყვანო. ხვალ თერთმეტზე მიდის მაგის მატარებელი. გემზე თუ დააგვიანდა, ყველაფერი ჩაიშლება. გული მიგრძნობს, რომ ეიბის ცხოვრება ახლა უკვე ამ წასვლაზეა. მაგრამ დაიჯერებს თუ რა, მე ერთს ვეტყვი და ის უკუღმა იქცევა".

"ვცდი, იქნებ მე დავიყოლიო", შესთავაზა როზმერიმ.

"გგონიათ შეძლებთ?" დაეჭვებით ჰკითხა მერი ნორთმა. "თუმცა შეიძლება".

მერე დიკი მივიდა როზმერისთან.

"მე და ნიკოლი მივდივართ, კარგი იქნება თქვენც თუ წამოხვალთ".

ცისკარი ჯერ კიდევ არ ცისკრობდა, დაღლილობისაგან ფერმიხდილი ჩანდა როზმერი. ღაწვებზე, სადაც დღისით სიწითლე გადაჰკრავდა, ახლა ორი მუქად მიმქრალი ნიშანი აჩნდა.

"არ შემიძლია", მიუგო მან. "მერი ნორთს შევპირდი, დავ-

რჩები-მეთქი. მარტო თავს ვერ გაართმევს, გაუჭირდება ეიბის

წაყვანა. იქნებ თქვენ იღონოთ რამე?"

"უნდა იცოდეთ, რომ ასეთ საქმეში ვერავის და ვერაფერს უშველით", დარიგებასავით შენიშნა დიკმა... "ეიბი რომ კო-ლეჯელი ბიჭი იყოს, თავის სიცოცხლეში პირველად რომ დათ-ვრა, კიდევ ჰო, ახლა მაგასთან ვერაფერს გახდები".

"სულ ერთია, მაინც დავრჩები. ეიბი ამბობს, მთავარ ბაზარში თუ გამყვებით, მერე წავალ და დავიძინებო". ცოტა

არ იყოს, გამომწვევად მიუგო მან.

დიკმა საჩქაროდ აკოცა იდაყვთან.

"როზმერის მარტო ნუ გამოუშვებთ", თქვა ნიკოლმა, როცა მერის დაემშვიდობა, "დედამისის წინაშე ჩვენ ვაგებთ პასუხს".

...ერთი საათის მერე როზმერი და ნორთები, ჭყვირილა თოჯინების ფაბრიკის ერთი ნიუარკელი მეპატრონე, კოლის კლეი — სადაც არ გაიხედავდი, ყველგან თვალში რომ გეჩხირებოდა, და ნავთობის მაგნატი, საუცხოოდ ჩაცმული ვეება კაცი, წარმოშობით ინდიელი, ჯორჯ ტ. მეცხენეს რომ ეძახდნენ — ყველანი სტაფილოთი დაზვინული ბაზრის ფურგონით მიდიოდნენ. სიბნელეში სტაფილოს წვერებზე შერჩენილი მიწის საამო და ტკბილი სურნელი ტრიალებდა. როზმერი სულ მაღლა შემომჯდარიყო, ქუჩაში ფარნები მხოლოდ აქაიქ ენთო და ბინდში ძლივს არჩევდა თავისი თანამგზავრების სახეებს. იმათი ხმები შორიდან ისმოდა. გეგონება ცალკე და სხვა მხარეს, შორს მიდიოდნენ. გულით კი — გულით დიკთან იყო. ნანობდა ნორთებს რომ წამოჰყვა, ნატრობდა, ნეტავი ახლა ოტელში ვიყო, ჩემს ოთახში, დერეფნის იქითა მხარეს კი დიკი იქნება მძინარეო, ან კიდევ, უფრო კარგი იქნება აქვე ქვევით, თბილ ბინდთან იყოს, სიახლოვესო.

"ზევით ნუ ამოდიხართ!" დაუყვირა კოლისს, "სტაფილო ჩამოიყრება". მერე ერთი ცალი სტაფილო აიღო და ეიბს გა-დაუგდო, მზიდავის გვერდით რაღაც ბებრულად იჯდა ეიბი.

ბოლოს. როგორც იქნა შინ მიიყვანეს, უკვე კარგად გათენებულზე, სენ-სიულპისს ზემოთ მტრედები გარიკრიკებულიყვნენ. უცებ ყველას სიცილი აუტყდა — ქუჩაში ხალხს ჰგონია, ეს-ეს არის გათენდა, ჩვენ კი ვიცით, წუხანდელი ღამე გრძელდებაო. "ესეც ასე, ცხოვრების ფერხულში ჩავები", გაიფიქრა როზმერიმ. "მაგრამ დიკის გარეშე რა ხალისია". გულმტკივნეულად მოიწყინა, მაგრამ იმწუთას რაღაც დაინახა, ირხეოდა,
უზარმაზარი, აყვავებული წაბლი იყო, ღვედით მიემაგრებინათ
გრძელ სატვირთო პლატფორმაზე და ელისეს მინდვრებზე გადაჰქონდათ; იწვა და, თანაც, სიცილისგან იჭაჭებოდა და ჯაგჯაგებდა, ძალიან ლამაზ ვინმესავით, მისთვის შეუფერებელ
ვითარებაში რომ მოხვედრილა, მაგრამ სულ ერთია, მაინც
სცოდნია, რომ ლამაზია; როზმერი კმაყოფილი უყურებდა,
გაიფიქრა, რომ ეს წაბლი თვითონ იყო, ამაზე გაეცინა და

## XIX

მატარებელი სენ-ლაზარის ვაგზლიდან თერთმეტზე გადიოდა. ჭუჭყისაგან დალექილი მინის გუმბათქვეშ — სამოცდაათიანი წლების ბროლის სასახლის ეპოქის ნაშთი იყო ეს გუმბათი, — ეიბი მარტო იდგა. ოცდაოთხ საათს სმისგან მოლურჯომიწისფერი გახდომოდა ხელები და პალტოს ჯიბეებში ჩაეწყო, რომ თითების კანკალი დაეფარა. შლაპა არ ეხურა და ეტყობოდა, თმაზე საჩქაროდ გადაესვა სავარცხელი, ზემოთა
ჰქონდა მხოლოდ ოდნავ გადავარცხნილი; სადღა იყო ის მოცურავე გოსის პლაჟიდან.

ჯერ ადრე იყო; მარტო თვალებით იხედებოდა აქეთ-იქით; თავიც რომ მიეტრიალებინა, ან საერთოდ, განძრეულიყო, ნერ-გების დაძაბვა იყო საჭირო და ახლა ამისი ძალა არ ჰქონდა. გვერდით კეწკეწი ჩანთები გაატარეს; ვიღაც შავგვრემანი კა-ცუნები, ალბათ ეიბის მომავალი თანამგზავრები, ჩახლეჩილი, ყურთწამღები ხმით გაიძახოდნენ რაღაცას.

ერთი კი გაიფიქრა, იქნებ მოვასწრო ბუფეტში შესვლა, რომ გადავკრაო და ჯიბეში დაჭმუჭნილი და ნოტიო ათასფრან-კიანები მოსინჯა, რომ ამ დროს კიბის თავში ნიკოლს მოჰკრა თვალი. დააკვირდა — ნიკოლის სახე ახლა თითქოს, გამოუთქ-მელსა და ფარულ რაღაცას ამჟღავნებდა. ასე ხშირად ეჩვე-ნებათ მათ, ვინც მოფარებითა დგანან და თვითონ კი უკვმ უყურებენ, ვისაც ელიან. ოდნავ წარბშეჭმუხნილი ნიკოლი

თავის შვილებზე ფიქრობდა, იმდენად გულაჩვილებით არა, უფრო საქმიანად, კატასავით — როცა თათით მიითვლის კნუ-

ტებს..

ეიბის დანახვაზე სახე შეეცვალა. იქაურობას დილაადრიანი, ნაღვლიანი შუქი დაჰკრავდა და ეიბი უფრო გულდამძიმებული და საცოდავი ჩანდა. მზედაკრულს, მაინც ეტყობოდა ჩაშავებული თვალის უპეები, გრძელ სკამზე ჩამოსხდნენ.

"მთხოვეთ მოვსულიყავი და იმიტომ მოვედი". თითქოს

თავს იცავსო, ისე თქვა ნიკოლმა.

ეიბს აშკარად არ ახსოვდა, როდის ან რად უნდა ეთხოვა ასეთი რამ, და ნიკოლმაც ამვლელ-ჩამვლელ მგზავრებს დაუწ-ყო თვალიერება.

"თქვენს გემზე პირველი ქალი ის იქნება, მამაკაცები რომ ემშვიდობებიან. ნახეთ, როგორ აცილებენ, ხომ იცით რისთ-ვის იყიდა ასეთი კაბა?" ნიკოლმა თანდათან უმატა ლაპარაკს. "მხოლოდ ტრანსოკეანური კრუიზის პირველ ქალს შეეძლო ასეთი კაბის ყიდვა და იცით რად? იცით? არა? გაიღვიძეთ ბოლოს და ბოლოს! ეს კაბა და თვითონ ქსოვილიც, ძვირფასია და მგზავრობისას, ვიღაცა, ძალიან რომ მოიწყენს, მივა და ჰკით-ხავს რაიმეს, რადგან იმ კაბაზე ლირს ლაპარაკი."

ბოლო სიტყვები ჩქარა წარმოთქვა, თითქოს ენაზე იკბინაო; ამდენ ლაპარაკს ჩვეული არ იყო და ისე გაირინდა, ეიბს თითქმის არა სჯეროდა, რაიმე თუ თქვა; ეიბმა თავს ძალა დაატანა, წელში გაიმართა, ასე მჯდომარე გეგონებოდა ფეხზე

დგასო.

"გახსოვთ ის უცნაური მეჯლისი, თქვენ რომ წამიყვანეთ წმინდა ჟენევიევას დღეს, თუ არ ვცდები..." დაიწყო მან.

"მახსოვს, ძალიან ვიმხიარულეთ, არა?"

"მე არა, საერთოდ, თქვენთან მხიარულების დრო გათავდა ჩემთვის, ორთავემ ძალიან დამღალეთ და თუ ეს აშკარად არა ჩანს, მხოლოდ იმიტომ, რომ მეც უფრო მეტად დაგღალეთ თქვენ — თვითონაც იცით. ენთუზიაზმი აღარა მაქვს, თორემ ახალ მეგობრებს გავიჩენდი".

ნიკოლმა დარტყმა მოიგერია, კარგა მაგარი "ხაოიანი". ჰქონდა ველვეტის ხელთათმანი:

"სისულელეა ეიბ, არ გიხდებათ. მთლად ასეც არ ფიქ-

რობთ, მე ვერ გავიგე, ყველაფერზე უცებ ხელი რად ჩაიქნიეთ?"

მაშინათვე არ უპასუხა. ხველა და ცხვირის მოხოცვა უნდოდა, მაგრამ ძალიან ხმამაღლა არ მომივიდესო ეშინოდა.

"ალბათ იმიტომ, რომ ყველაფერი მომბეზრდა, თანაც, თავიდან ვერ დავიწყებ, მიბრუნებისას გრძელი გზის გავლა მომიხდება".

მამაკაცი ქალის წინაშე ხშირად ახერხებს უმწეო ბავშვის როლის თამაშს, მაგრამ ამას ყველაზე ძნელად მაშინ აღწევს, როცა მართლა უმწეო ბავშვივით არის ხოლმე.

"მაგითი თავს ვერ გაიმართლებ", მკაცრად მიუგო ნიკოლმა.

ეიბი თანდათან უარესი ხდებოდა. ენაზე მხოლოდ მწარე სიტყვები ადგა. ნიკოლი ერთ ადგილს მიშტერებოდა, ხელები კალთაზე დაეწყო, ეტყობა ჩათვალა, რომ მისთვის უფრო შესაფერი ეს პოზა იყო ახლა. დროებით ყველანაირი ურთიერთობა შეწყდა მათ შორის. ორივე თავისთვის მიექანებოდა, თავისი წილი ჰაერით უნდოდათ ესუნთქათ და თავისი წილი ცა დაენახათ, საყვარლები არ იყვნენ და წარსულიც ამად არა ჰქონდათ, და რაკი ცოლქმრული წყვილი არ იყო — არც მომავალი; არადა, ამ დილამდე ნიკოლს დიკის მერე ეიბი მოსწონდა ყველაზე მეტად, ეიბს კი წლების მანძილზე ძნელი და მძიმედ გადასატანი სიყვარულით უყვარდა ნიკოლი.

"დამღალა ქალების სამყაროში ყოფნამ", უცებ ხმამაღლა თქვა ეიბმა.

"მერე, რატომ არ იქმნით საკუთარ სამყაროს?"

"დავიღალე მეგობრებით. ყველას პირმოთნე სჭირდება". ნიკოლი ფიქრით მიერეკებოდა ვაგზლის საათის წუთების ისარს, მაინც ვერ ასცდა შეკითხვას: "მეთანხმებით?"

"მე ქალი ვარ და ჩემი , საქმე ყველაფრის შეკავშირე-

"ჩემი კი — ყველაფრის დაშლა, განადგურება".

"ამდენი სმით თქვენივე თავს ანადგურებთ მხოლოდ, სხვას არაფერს". ცივად მიუგო ნიკოლმა, მაგრამ ხმაში შიში შეერია, ცოტა დაბნევაც. ვაგზალში ხალხი მატულობდა, მაგრამ იმათ-გან ერთსაც არ იცნობდა. ბოლოს ვიღაც მაღალ ქალიშვილს

მოჰკრა თვალი, ჩალისფერი თმა მუზარადივით დაევარცხნა. ნიკოლმა შვება იგრძნო. ის ქალიშვილი წერილს უშვებდა საფოსტო ჭრილში.

"ერთს მინდა გამოველაპარაკო, ეიბ. ეიბ, გამოიღვიძეთ,

სულ გამოშტერდით!"

ეიბმა გულგრილად გააყოლა თვალი. ნიკოლი რომ მიუახლოვდა, ქალიშვილმა რაღაც შიშით მოხედა და ეიბს მოეჩვენა, რომ პარიზში სადღაც ენახა იგი. ნიკოლის არყოფნით ისარგებლა და ცხვირი ხმამაღლა მოიხოცა, მერე დიდხანს მაგრად ახველა ცხვირსახოცში. დაცხა, საცვალი მთლად დაუსველდა ოფლისაგან. ხელები ისე უკანკალებდა, ასანთი ოთხჯერ გაჰკრა და მეოთხეჯერ ძლივს მოუკიდა სიგარეტს; მეტი აღარ შეიძლებოდა, უნდა დაელია, და ის იყო, ბუფეტისკენ წასვლა დააპირა, რომ ნიკოლიც დაბრუნდა.

"ფიასკო", ცოტა ცივად, მაგრამ იუმორით აუწყა ეიბს. "რამდენჯერ, ლამის შემეხვეწა, ოღონდ მეწვიეთო, ახლა კი ძლივს შემომხედა". რაღაც ისე გაიცინა, სხვა ოქტავას რომ გადასწვდები ორი თითით და სხვა ხმას გაიღებს. ცოტა მღელ-

ვარედაც. "მოდი და ენდე ხალხს".

ეიბს სასულეში გადასცდა სიგარეტის ბოლი, სული მოითქვა და შენიშნა:

"საქმე ის არის, რომ როცა ფხიზელი ხარ, არავის დანახგა არ გინდა, და მთვრალი თუ ხარ, არავის უნდა შენი დანახ-30",

"ამას ჩემზე ამბობთ?" ნიკოლმა ისევ გაიცინა; წელანდელმა შეხვედრამ, რატომღაც კარგ გუნებაზე დააყენა.

"არა, ჩემზე".

"თქვენთვის ლაპარაკობთ. მე კი მიყვარს ხალხი, ბევრი ხალხი, მიყვარს..."

უცებ როზმერი და მერი ნორთი დაინახა, ნელა მოდიოდნენ, ეიბს ეძებდნენ. ნიკოლმა თითქმის ხმამაღლადაც კი დაუძახა: "ჰეი! აქეთ!" გაიცინა, ხელში შეხვეული ცხვირსახოცები ეჭირა ეიბისთვის და დაუქნია.

გაჩუმებულები უხერხულად იდგნენ, იმათ წინაშე ჩაძირული ხომალდის უზარმაზარი ჩონჩხივით ამართულიყო ეიბი და სამივეს თრგუნავდა. უმწეოსა და შესაბრალისს, გამოფიტულსა და გესლიანს — მაინც გავლენა ჰქონდა მათზე, მაინც გრძნობდნენ მის დიდ ღირსებას, ახსოვდათ მისი წარ-მატებები, თუნდაც არასრული და მერე მოშლილი; მაგრამ აშინებდათ მისი შეუნელებელი, ადრე სიცოცხლის, ახლა კი

სიკვდილისაკენ მიმსწრაფი ძალა.

მოვიდა დიკი, და ყველას სამყოფი სითბოც თან მოიტანა. სამივე ქალმა შვება იგრძნო, ლამის მაიმუნებივით სტოდნენ, დიკის საუცხოოდ ჩაკეცილ შლაპას ეტანებოდნენ, მხრებზე ეხებოდნენ, ხელჯოხის ოქროს ბუნიკს ჰკიდებდნენ ხელს.
ახლა წამით მაინც არად ჩააგდებდნენ ეიბის ესოდენ გულგრილობას. მაშინვე მიხვდა დიკი, რა დღეშიც იყვნენ და
რითაც უნდა ეშველა მათთვის. ყველა ადგილიდან დაძრადა ვაგზლის ორომტრიალში გაიყვანა. მოშორებით ამერიკელები ხმაურით ემშვიდობებოდნენ ერთმანეთს. ძველ, ჩაჟანგებულ აბაზანაში წყლის ბუყბუყივით მოისმოდა იმათი
ხმები. ვაგზალში ყოფნისას პარიზი სადღაც შორს ეგონათ
და უჩვენებოდათ, თითქოს იქვე, სულ ახლო იყო ოკეანე
და უკვე თავის სასწაულს ახდენდა ზღვა, მოლეკულებში ატომების გადაადგილებით ცვლილება შეჰქონდა კაცთა მოდგმა-

ვაგზალში მოსულ შეძლებულ ამერიკელებსაც სხვა იერი ედოთ. უფრო გულღია, გონიერი და თავაზიანები ჩანდნენ, ფიქრიანები — თავისი და სხვისი აზრებით. ხანდახან თუ ინ-გლისელი გამოერეოდათ, მაშინათვე გამოარჩევდით. პლატფორმაზე უკვე ბევრმა ამერიკელმა მოიყარა თავი, შთაბეჭ-დილება იმათ სიქველესა და ფულზე ცოტა შენელდა და თანდათან იმ ეროვნულ საბურველად იქცა, თვალს რომ უხვევდა და და აბრმავებდა თვითონ იმათაც და შორიდან იმათ მაც-ქერლებსაც.

უცებ ნიკოლი მკლავში სწვდა დიკს და დაიყვირა, "დიკ, შეხედე!" დიკი სწრაფად მიტრიალდა, სწორედ რომ დროზე, რადგან წუთის მერე იმათგან ორი ვაგონის იქით, პულმანის შესასვლელთან მოხდა ის, რამაც მკვეთრად დაარღვია გაცილების ერთფეროვნება. ის ჩალისფერთმიანი ახალგაზრდა ქალი, ცოტა ხნის წინათ ნიკოლი რომ მიუახლოვდა, ვიღაც მამაკაცს ელაპარაკებოდა, უცებ რაღაც უცნაურად გაიწია,

თითქოს გახელებულმა სწრაფად წაიღო ჩანთისკენ ხელი და პერონზე რევოლვერის ორჯერ გასროლამ გააპო შეხუთული ჰაერი. თითქმის იმწუთას ყურთწამღები სტვენა გაისმა, მატარებელი ადგილიდან დაიძრა და წამსვე თითქოს ნაცარტუტად აქცია ეს ამბავი. ეიბს ხომ სულაც არ მიუქცევია ამისთვის ყურადღება, ფანჯარაში თავი გამოეყო და მეგობტებს ხელს უქნევდა. მაგრამ, ვიდრე ხალხი შეჯგუფდებოდა, ამათ მოასწრეს დაენახათ, ის ტყვიანაკრავი კაცი მიწაზე მძიმედ რომ დაეშვა.

ერთი ასი წელი მაინც გავიდა, სანამ მატარებელი გაჩერდებოდა. ნიკოლი, მერი და როზმერი პლატფორმის ბოლოში
იცდიდნენ, ხოლო დიკი გზას მიიკვლევდა. ხუთიოდე წუთის
მერე როგორც იქნა დაბრუნდა, ამასობაში ხალხი ორად გაიყო, უკვე ჯალამბარზე დაეწვინათ ის კაცი და ზოგი იმას მიჰყვებოდა და ზოგი ქალიშვილს, რომელიც ორ ჟანდარმს შუა
მიაბიჯებდა. ჟანდარმები დაბნეული ჩანდნენ, ეტყობა,
გონს ჯერ ვერ მოდიოდნენ. ქალიშვილს ფერი აღარ\_ედო,
მაგრამ მაგრად ეჭირა თავი.

"მარია უოლისი იყო", აჩქარებით თქვა დიკმა. "ის კაცი კი ინგლისელია, ძალიან გაჭირდა ვინაობის დადგენა, რადგან ტყვიამ საბუთები გაუხვრიტა". მატარებელს გასცდნენ, ხალ-ხთან ერთად სწრაფად მიიწევდნენ გასასვლელისკენ. "უკვე გავიგე, პოლიციის რომელ უბანშიც მიჰყავთ, ახლავე წა-ვალ…"

"მაგრამ, მარია უოლისის და ხომ პარიზში ცხოვრობს", თქვა ნიკოლმა. "იმას უნდა დავურეკოთ, რატომ არავის გა-გვახსენდა? ქმარი ფრანგი ჰყავს და ჩვენზე უფრო მეტს ის გააკეთებს".

დიკი შეყოყმანდა, მერე თავი გადააქნია და წასვლა დაა-

"მოიცადე!" დაუძახა ნიკოლმა, "სისულელეა, შენ იქ რას გახდები, თანაც შენი ფრანგულით".

"რაც უნდა იყოს, მივხედავ, ვნახავ".

"გაშვებით, სულ ერთია მაინც არ გაუშვებენ", აჯერებდა ნიკოლი, "ესროლა, ბოლოს და ბოლოს. ჯობია ახლავე დავურეკოთ ლორას, რაც ლორას შეუძლია, ჩვენ იმას ვერ შევძლებთ".

მაგრამ დიკს არ უნდოდა დაეთმო და თანაც ცოტათი როზ-

მერისაც თავს აჩვენებდა.

"თქვენ აქ დამელოდეთ", გადაჭრით თქვა ნიკოლმა და ტელეფონის ჯიხურისკენ გაიქცა.

"რაკი ნიკოლმა თვითონ მოჰკიდა საქმეს ხელი, იქ აღარ

უნდა ჩაერიო", ხუმრობით შენიშნა დიკმა.

დღევანდელ დღეს პირველად ხედავდა როზმერის. სწრაფად შეხედეს ერთმანეთს, გუშინდელი დღის კვალის დანახვას და ამოკითხვას შეეცადა ორთავე და წამით თითქოსდა მოეჩვენათ, არც არაფერი ყოფილაო, მაგრამ ორივეს მაშინვე ისევ უხმოდ, თბილად მოედო სიყვარული.

"თქვენ გიყვართ, რომ ყველას უშველოთ, ხომ ასეა?"

თქვა როზმერიმ.

"უფრო თავს ვაჩვენებ".

"დედასაც უყვარს ყველას შველა, მაგრამ, ცხადია, იმას ამდენი არ შეუძლია". როზმერიმ ამოიოხრა. "ზოგჯერ ვფიქ-

რობ, რომ ყველაზე დიდი ეგოისტი ვარ ქვეყანაზე".

ახლა როზმერის დედის ხსენებამ წყენა უფრო მოჰგვარა დიკს, არ გახარებია. სურდა გაეფანტა ბურუსი ბავშვობისა, რისთვისაც როზმერის თავი ვერ დაეღწია და დიკისა და თავის ურთიერთობასაც ჯერ ისევ იმ ბურუსში ხვევდა. მაგრამ იმასაც გრძნობდა, რომ ამ იმპულსის გამოვლენა არ ეგებოდა — რა იცის, როგორ იქნებოდა ახლა როზმერი, ერთი წუთითაც რომ დაეშვა და აჰყოლოდა. ლამის შიშით, ცხადად შეიგრძნო, რომ ყველაფერი განელდა თითქმის. არადა, ურთიერთობა ერთ ადგილზე ვერ იარსებებს, უნდა გაგრძელდეს, ან თუ არა და თანდათან უკან უნდა იხევდეს; უცებ პირველად გაუელვა, რომ როზმერის უფრო მაგრად ეპყრა სა- ჭე, ვიდრე მას.

სანამ ბოლომდე მოიფიქრებდა რაღაცას, ნიკოლიც დაბ-

"ველაპარაკე ლორას. ჩემს დარეკვამდე არაფერი იცოდა. ტელეფონში რაღაც უცნაურად ისმოდა მისი ხმა, ხან იკარგებოდა, ხან ისევ ძლიერდებოდა, გეგონება, სადაცაა გული წაუვა, მაგრამ თავს ძალას ატახს და მაგრდებაო. თქვა, ვგრძნობდი, დღეს რაღაც უბედურება უნდა მომხდარიყოო".

"მარია პირდაპირ ზედგამოჭრილი იქნებოდა დიაგილევისთვის", ამათ დასამშვიდებლად გაიხუმრა დიკმა, "რიტმის გრძნობაზე რომ არაფერი ვთქვათ, დრამატიზმით არის აღსავსე. რა ხდება ვერ გაიგებ, ერთი მატარებელი არ გავა ისე, რომ სროლა არ ატყდეს".

ჩქარა ჩაუყვნენ ფოლადის კიბეს.

"მენანება ის საწყალი კაცი", თქვა ნიკოლმა. "ახლა კი მესმის, რად მელაპარაკებოდა მარია ისე უცნაურად, თურმე, ნუ იტყვით საბრძოლველად ემზადებოდა".

ნიკოლმა გაიცინა, როზმერიმაც გაიცინა, მაგრამ მშვიდად ვერ იყვნენ, შემცბარიყვნენ, ძალიან სურდათ დიკს ეთქვა რამე, რომ თვითონ არ ემტვრიათ თავი ამ ამბავზე. თუმცა ბოლომდე ვერ შეეცნოთ ეს სურვილი, მით უფრო როზმე-რის, რომელიც მიჩვეულიყო ასეთივე აფეთქებების ფრაგ-მენტულ ცვენას თავის გარშემო. მაინც, ესეც შეშფოთებული ჩანდა. თავისი ახალი გრძნობით შეპყრობილი დიკი კი, ვე-ღარ ახერხებდა გუნების შეცვლას, ის ძველი ძალა ერთმეო-და, ქალებიც მიმხვდარიყვნენ, რომ დიკი ისე ვერ იქცეოდა, რაღაცა აკლდათ და შეწუხებულებს ვეღარა ეთქვათ რა.

მერე კი, თითქოს არაფერი მომხდარაო, დაივერები და მათი მეგობრები პარიზის ქუჩებს შეერივნენ.

მაინც ბევრი რამ მოხდა — ეიბის წასვლამ და იმავე შუადღით ზალცბურგში მერის მოახლოებულმა გამგზავრებამ ზღვარი დაუდო პარიზში გატარებულ დღეებს. ან, შესაძლოა იმ ორჯერ გასროლამ, რამაც ღმერთმა იცის, რა ბნელ საქმეს მოუღო ბოლო, დაასრულა მათი პარიზული ცხოვრება. ამ ორ გასროლას კარგა ხანს ვერ დაივიწყებდნენ ცხოვრებაში: თითქოს ექოსავით აედევნათო, ვაგზლის გარეთ, ტაქსის მოლოდინში ქვაფენილზე რომ იდგნენ, ორი მებარგულის ხმა მოესმათ, მომხდარ ამბავზე ლაპარაკობდნენ.

"დაინახე რევოლვერი? ისეთი პატარა, ფაქიზი — სათამაშოსავით".

"მაგრამ მართლა ისვრის". ბრძნულად შეუბრუნა მეორე

მებარგულმა. "პერანგი დაინახე? იმდენი სისხლი ეცხო, შეიძლებოდა გეფიქრა, რომ ომში ვიყავით".

### ХХ

მოედნის თავზე შედედებული გამონაბოლქვი ნელა იწვოდა ივლისის მზეზე. საშინლად ცხელოდა. კარგი, თაკარა სიცხე არ იყო. სოფლისკენაც არ გაგიწევდათ გული, ესეც ვერ გიშველიდათ, რადგან გზებიც მყრალი სიცხისაგან შეხუთული გეჩვენებოდათ. ლუქსემბურგის ბაღის პირდაპირ კაფეში შესულები ვერანდაზე რომ საუზმობდნენ, როზმერი მოითენთა, აგზნებულიყო, ეტყობა ადრევე, ვაგზალშიც ვერ იყო კარგად და შეიძლება იმიტომაც თქვა, ეგოისტი ვარო.

დიკს არ შეუმჩნევია მისი უეცარი უგუნებობა; საშინლად უბედური იყო და ბრმავდებოდა იმის მიმართ, რაც გარშემო ხდებოდა. უწინდებურად ფიქრიც უჭირდა და ლაპარაკიც ეძნე-ლებოდა.

ყავას რომ სვამდნენ, იტალიელი სიმღერის მასწავლებე-ლი შემოუერთდათ — მერი ნორთს გააცილებდა ვაგზალზე. იმათი წასვლის მერე როზმერიც წამოდგა, სტუდიაში უნდა მი-ვიდე საქმეზეო.

"მართლა" — სთხოვა მათ — "ვიდრე აქა ხართ, თუ კოლის კლეი გამოჩნდა, ხომ იცით, ის სამხრეთელი ყმაწვილი, გადაე-

ცით, რომ მე არ შემეძლო დაცდა; ხვალ დამირეკოს".

როზმერის ასეთმა თავქარიანობამ, რითაც უფრო ბავშვური ჩანდა, და რაც ალბათ ამასწინანდელი მღელვარების რეაქცია თუ იყო, დაივერებს თავიანთი შვილები და მათდამი სიყვარული გაახსენა; მაინც არ შერჩა როზმერის, ნიკოლმა მაშინვე მიუგო: "ჯობია ოფიციანტი გააფრთხილოთ", ულმობელი და ცივი იყო ნიკოლის ხმა, "ჩვენ აქ დარჩენას არ ვაპირებთ".

როზმერი მიხვდა, მაგრამ არ სწყენია.

"იყოს, სულ ერთია, ნახვამდის, ჩემო ძვირფასებო".

დიკმა ანგარიში მოითხოვა. ცოტა ხანს დაივერები ისვენებდნენ, უგულისყუროდ ისხდნენ.

"ასე..." თითქმის ერთდროულად წარმოთქვეს.

დიკმა თვალი შეასწრო, ოდნავ შესამჩნევმა მწარე ღიმილ-

მა გადაუარა ნიკოლს ტუჩებზე, მხოლოდ დიკს შეეძლო ამის შემჩნევა. შეეძლო ისეც დაეჭირა თავი, თითქოს ახლა არც დაენახოს. რაზე ფიქრობდა ნიკოლი? როზმერი იმათ მიემატა მხოლოდ, ვისი გულიც ამ ბოლო წლებში მოინადირა დიკმა: ფრანგი კლოუნი, ეიბი და მერი ნორთები, მწერალი, მხატვარი, მოცეკვავე წყვილი, თეატრ "გრან გინიოლის" კომედიანტი ქალი, თითქმის შეშლილი პედერასტი რუსული ბალეტიდან, დიდი იმედისმომცემი ტენორი, დაივერებმა სწავლისთვის ერთი წლით მილანში რომ გაამგზავრეს. ნიკოლმა კარგად იცოდა, როგორ აფასებდა ეს ხალხი დიკის ენთუზიაზმსა და ინტერესნ, მაგრამ ნიკოლმა ისიც იცოდა, რომ მათი ცოლქმრული ცხოვრების ექვსი წლის მანძილზე, დიკი ერთ ღამეს არ ყოფილა უიმისოდ, გარდა იმ ხნისა, როცა მათი ბავშვები გაჩნდნენ. დიკს ხიბლი ჰქონდა და შეუძლებელი იყო სხვისთვის არ გადაედო იგი. ასეთი კაცი ისე იზიდავს ხალხს, თანაც იმათ, ვინც სულაც არ სჭირდება, რომ ამაზე თვითონ არცა ფიქრობს.

ახლა გულჩახვეული იჯდა დიკი. წინათ, მარტო რომ დარჩებოდნენ, გაოცებული იტყოდა ხოლმე, რომ ბედმა გაუღიმა და ერთმანეთს შეეყარნენ. ახლა კი, წუთი წუთს მისდევდა და არც ჟესტითა და არც სიტყვით, ის თავისი გაკვირვება არ გამო-

უხატავს.

მაგიდებშუა ვიწრო გასასვლელში გამოჩნდა სამხრეთელი ყმაწვილი — კოლის კლეი და შორიდანვე შინაურულად შესა ძახა დაივერებს. დიკი ვერ იტანდა ასეთ შეძახილებს. ეს "ოჰ" და "ჰეი", არ უყვარდა, ან როცა ერთად იყვნენ და მარტო მას, ან — მარტო ნიკოლს მიმართავდნენ. იცოდა თავისი ეს ხასიათი და უგუნებობისას ხშირად გაცლას ამჯობინებდა. ვინა მეს ოდნავი დაუდევრობაც კი კარგა ხანს ამოაგდებდა ხოლა მე კალაპოტიდან.

კოლისმა, რომელიც სულაც არ გრძნობდა თავს იმ სტუმარივით, "რომელსა არა ემოსა სამოსელი საქორწინე", მოსვლისთანავე თქვა: "ვგონებ დავიგვიანე, ჩიტი გაფრენილა", დიკმა ძლივს მოითმინა, ძლივს აპატია, რომ ჯერ ნიკოლს არ დაუკრა თავი.

თითქმის მაშინვე, ნიკოლი ადგა და წავიდა, დიკი ისევ კთ-

ლისთან ერთად იჯდა, რომ ბოლომდე დაელია თავისი ღვინო. საერთო ჯამში მოსწონდა კიდეც კოლისი, ეს ომისშემდგომი ფორმაციის ყმაწვილი, სამხრეთელების უმრავლესობაზე უფ-რო იოლად ასატანი. იმ სამხრეთელებისა, ამ ათი წლის წინათ ნიუ-ჰეივენში რომ ხვდებოდა დიკი. ეღიმებოდა, დიდი ამბით და აუჩქარებლად რომ ტენიდა კოლისი ჩიბუხს და ენასაც არ აჩერებდა. ცოტა ხნის წინათ თითქმის ცარიელი ლუქ-სემბურგის ბაღი თანდათან ივსებოდა ბავშვებითა და ძიძებით. შუადღე დგებოდა, ამ რამდენიმე თვის მანძილზე დიკმა პირ-გელად მისცა თავის თავს ნება, შუადღისას ასე მჯდარიყო.

უცებ, თითქოს სისხლი გაეყინა, ნელ-ნელა ჩასწვდა კო-

ლისის ნდობით ნათქვამ მონოლოგს.

"...ისეთი ცივიც არ არის, თქვენ რომ გგონიათ. მეც კარგა დიდხანს ვფიქრობდი, ცივია-მეთქი, მაგრამ ერთხელ ისე მოხდა, ნიუ-იორკიდან ჩიკაგოში მივდიოდით აღდგომაზე და მატარებელში რაღაც ისტორია შეემთხვა ჩემს მეგობართან, ერთი ბიჭია, გვარად ჰილისი, ისიც ნიუ-ჰეივენელია. როზმერისთან ერთად კუპეში ჩემი ბიძაშვილი იყო, ჰოდა, ამ გოგომ მაშინვე შეამჩნია, რომ როზმერის და ჰილისს მარტო უნდოდათ ყოფნა და ესეც ადგა და ნაშუადღევს ჩვენს კუპეში შემოვიდა. იქ ბანქოს ვთამაშობდით. ორი საათის მერე გამოვდიგართ კუპედან და ვხედავთ — როზმერი და ჰილისი კართან დგანან და კონდუქტორს რაღაცაზე ეკამათებიან. როზმერის მიტკლის ფერი ადევს. თურმე კუპეში ჩაკეტილან, თანაც ფანჯარაზე ფარდა ჩამოუშვიათ და მე თუ მკითხავთ უქმედაც არ ისხდებოდნენ. ამასობაში კონდუქტორი მივიდა, რომ ბილეთები გაესინჯა და კარზე დააკაკუნა. ამათ ჯერ იფიქრეს, რომ ჩვენ ვიყავით და ვითომ არევა გვინდოდა, ამიტომ არ გაუღეს კარი, ბოლოს, როცა გააღეს, კონდუქტორი უკვე ბრაზისაგან ცახცახებდა. მიადგა ჰილისს, თქვენია ეს ადგილი თუ არა და ცოლ-ქმარი ხართ თუ არა, და თუ არა, რად ჩაკეტეთო კარი. ჰილისმა სცადა აეხსნა, რომ ცუდი განზრახვა გულშიც არ გაუვლიათ, და აუგად სათქმელი არაფერი მომხდარა, მაგრამ ვერ დააჯერა და თვითონაც დაკარგა მოთმინება, ყვირილს მოჰყვა, კონდუქტორმა როზმერის შეურაცხყოფა მიაყენაო და საჩხუბრად იწევდა, მაგრამ კონდუქტორს შეეძლო

საქმე უფრო გაერთულებინა და ძლივს დავაშოშმინე ორივე,

და დამიჯერებთ თუ არა, დიდი ჯაფა კი დამადგა".

სანამ უსმენდა, სანამ ვაგონში მომხდარი ამბის ყველა დეტალს გაიაზრებდა და შურით შესცქეროდა გოგო-ბიჭის შეყრის ცდის სავალალო დასასრულს კუპეს კართან, დიკში რალაცა უცნაური ცვლილება ხდებოდა. ვიღაც მესამის, თუნდაც უკვე დიდი ხნის დავიწყებული სახის შემოჭრაღა აკლდა, რომ საბოლოოდ დარღვეოდა სულის სიმშვიდე, ტკივილს, სევდას, სასოწარკვეთასა და ვნებას უწყალოდ დაერია მისთვის ხელი. ვიღაცის თითები როზმერის ლოყაზე, გახშირებული სუნთქვა ჩაკეტილ კართან. ვიღაცის გაავება, მიუწვდომელი, იდუმალი სითბო.

...ხომ არ გეწყინებათ, ფარდას თუ ჩამოვუშვებ? ო, არა. მართლა რა თვალისმომჭრელი სინათლეა...

კოლის კლეი უკვე ნიუ-ჰეივენის სტუდენტური ძმობის პოლიტიკაზე ლაპარაკობდა იმავე ტონით და ისეთივე გაცხოველებით. დიკმა იცოდა, რომ კოლისს რაღაც უცნაური, დიკისთვის გაუგებარი სიყვარულით უყვარდა როზმერი. ჰილისთან ისტორიას, ეტყობა არავითარი ემოციური შთაბეჭდილეგა არ მოუხდენია კოლისზე, შეიძლება უფრო გაახარა კიდევაც, რადგან ამ შემთხვევის წყალობით გაიგო, რომ როზმერისთვის უცხო არ იყო ის, რაც "ადამიანურია".

"ჩონჩხმა" შესანიშნავ ბიჭებს მოუყარა თავი", ამბობდა იგი. "კაცმა რომ თქვას, ცდა არავის დაგვიკლია. ახლა ისე გაიზარდა ნიუ-ჰეივენი, ისე ჭრელია, რომ სამწუხაროდ, ბევრს

უკვე უარს ვეუბნებით".

...ხომ არ გეწყინებათ, ფარდას თუ ჩამოვუშვებ? ო, არა. მართლა რა თვალისმომჭრელი სინათლეა...

...დიკმა მთელი პარიზი გაიარა თავის ბანკში მისასვლე-ლად — ჩეკის გამოწერის მერე შემინული კანტორის იქით გამწკრივებულ მაგიდებთან მსხდარ ბანკის მოხელეებს კარგა ხანს ათვალიერებდა, ვერ გადაეწყვიტა, რომელი მათგანისთვის მიეწოდებინა, მანამდე კი, მერხზე დახრილი, კალამს სინჯავდა, ყველა ასო გულმოდგინებით გამოჰყავდა, ერთხელ ფოსტის დეპარტამენტისკენაც გაიხედა და თვალი გაუშტერდა, მაგ-რამ ისევ თავის საქმეს მიუტრიალდა და ჩეკს ჩააცქერდა.

Scanned by CamScanner

ვინ იყო ისეთი, არ შეემჩნია, რა თავგზა ჰქონდა აბნეული, რომელმა იცოდა სხვებზე ცოტა ლაპარაკი, რომ საუბარი არ წამოეწყო. იქ ნიუ-იორკელი პერენი ზის, უულღია და თავა, ზიანი, რამდენჯერმე რომ შესთავაზა დიკს, ერთად ვისპუზ, მოთო ამერიკულ კლუბში, იქ კი ესპანელი კასასუსი, ყოველ თვის საერთო მეგობრებზე რომ ესაუბრებოდა ხოლმე, თუმცა იმ მეგობრებს კარგა ათი წელია აღარ შეხვედრია დიკი, იქით კიდევ — მუხჰაუსი, ერთსა და იგივეს რომ ეკითხებოდა ყველა მისვლაზე, თავისი ანგარიშიდან სურდა დიკს ფულის მილება თუ ცოლის ანგარიშიდან.

ჩეკის არშიაზე თანხა აღნიშნა, ქვეშ ორჯერ გაუსვა ხაზი და გადაწყვიტა პირსისთვის მიემართა. პირსი ახალგაზრდა კა-ცია, იმასთან დიდი ფარსის თამაში არ მოუწევს. ისე კი, ხში-რად, ის უფრო იოლია, ფარსი შენ თვითონ გაითამაშო, ვიდ-რე უყურო, როცა ამაზე სხვა ცოდვილობს.

ოღონდ, ჯერ თავისი კორესპონდენცია მოიკითხა. იმ ქალმა, კლიენტების ფოსტა რომ ებარა, წერილები მიაწოდა, მაგიდიდან რაღაც ქაღალდი ძირს ვარდებოდა, მკერდით შეაკავა და დიკმა გაიფიქრა, მამაკაცის სხეულისთვის ასეთი მოძრაობა უცხოაო. გვერდზე გადგა და წერილების გახსნა დაიწყო: გერმანული ფირმის ანგარიში ჩვიდმეტი წიგნისათვის, ფსიქიატრიას რომ ეხება; ანგარიში ბრენტანოს წიგნის მაღაზიიდან; ბაფალოდან გამოგზავნილი მამის წერილი, წლითიწლობით სულ უფრო ძნელი გასარჩევი ხდებოდა მისი ხელი; ზედ ფესის შტემპელდაკრული სახუმარო ღია ბარათი ტომი ბარბანისგან, ციურიხელი ექიმების ორი წერილი, ორივე გერმანულ ენაზე დაწერილი; მებათქაშეს სადავო წერილი კანიდან; ანგარიში მეავეჯესგან; ბალტიმორის სამედიცინო ჟურნალის გამომცემლის წერილი; ბევრი სხვადასხვა სახის უწყება; მოსაწვევი ჯერ უცნობი მხატვრის გამოფენაზე; ამისა, სამი წერილი ნიკოლისთვის და ერთიც — დიკის სახელზე, როზმერისთვის გადასაცემად.

...ხომ არ გეწყინებათ, ფარდას თუ ჩამოვუშვებ?

პირსისკენ წავიდა, მაგრამ პირსს ერთი კლიენტი ქალი ჰყავდა და ტანმა უგრძნო, სხვა გზა არ იყო, კასასუსისთვის უნდა მიემართა. კასასუსი პირსის გვერდით იჯდა და არავინ

3903000.

"როგორა ხართ, დაივერ?" კასასუსს გულწრფელად გაუხარდა მისი დანახვა. წამოდგა, ღიმილისაგან განზე გაეწია ულვაშები. "ამას წინათ გაგიხსენეთ, ფედერსტოუნზე წავიდა ლაპარაკი და, ხომ იცით, ახლა კალიფორნიაშია".

დიკმა თვალები დააჭყიტა და ცოტათი წინ გადაიხარა.

"კალიფორნიაში?!"

. "აბა, ასე გავიგე".

ჩეკი ჯერ ისევ გაწვდილ ხელში ეჭირა დიკს; ძალიან უნდოდა კასასუსს მაშინვე საქმისთვის მიეხედა და პირსისკენ
შეტრიალდა, მეგობრულად ჩაუკრა თვალი; ეს ძველებურიშეხუმრება იყო, სამი წლის წინათ პირსი ერთ ლიტველ გრაფინიასთან ფრიად რთულ ურთიერთობაში რომ გაეხვია, იმ
დროიდან მოყოლებული, შეხვედრისას თვალს ჩაუკრავდა
ხოლმე. პირსი მაშინვე მიხვდა ხუმრობას, ჩაიცინა და სანამ
ესენი თვალებით ელაპარაკებოდნენ ერთმანეთს და ეღიმებოდათ, კასასუსმა ჩეკიც გააფორმა. დიკს კარგი თვალით-უყურებდა, ცოტა ხანსაც უნდოდა შეეყოვნებინა, მაგრამ საბაბი
ცერ მონახა, ზეზედა წამოდგა, პენსნე დაიმაგრა და გაიმეორა:
"ჰო, ფედერსტოუნი ახლა კალიფორნიაშია".

ამასობაში დიკმა პერენს შეხედა, მაგიდების თავში იჯდა და თავის კლიენტს ელაპარაკებოდა, დიკმა იცნო მსოფლიოს ჩემპიონი მძიმე წონაში; პერენმა ქეშად გამოხედა, დიკი მიხვ-და, უნდოდა დაეძახა მისთვის და ჩემპიონი გაეცნო, მაგრამ

გადაიფიქრა.

დიკმა კარგად გაართვა თავი ყველაფერს, რითაც კასასუსის სოციალურ ჟინს დააცხრობდა, ესე იგი, შემინულ კანტორასთან ჯერ გულისყურით დახედა და შეისწავლა ჩეკი, მერე
ბანკირის მარჯვნივ მარმარილოს პირველი სვეტის იქით რაღაცამ მიიპყრო მისი ყურადღება და დააკვირდა; ხელიდან ხელში გადაიტანა ხელჯოხი, შლაპა და წერილები, ბოლოს თავი
დაუკრა, გამოეთხოვა და გასასვლელისკენ გაემართა. კარისკაცს
უხვად ასაჩუქრებდა ხოლმე ფულით და ამანაც იცოდა თავისი საქმე, ტროტუართან უკვე ტაქსი იცდიდა.

"კინოსტუდია "ფილმ პარ ექსელანსში" მიმიყვანეთ —

პატარა ქუჩაა პასიზე. პორტ დე ლა იუეტისკეს გადით, იქ

აგიხსნით და მიხვდებით მერე".

ბოლო ოცდაოთხი საათის ამბებმა ისე გარდაქმნა და არია, რომ ახლა თვითონაც არ იცოდა რა უნდოდა და რის გაკეთებას აპირებდა; პორტ დე ლა მუეტზე ტაქსი გაუშვა, ფეხით განაგრძო გზა სტუდიისკენ, მაგრამ სანამ იმ შენობამდე მივიდოდა, ქუჩის იქითა მხარეს გადავიდა. გარეგნულად ღირსებაშენარჩუნებული, ელეგანტურად ჩაცმული, მაინც ისეთი დაბნეული ჩანდა, გეგონება მდევარი მოსდევსო, სიმშვიდეს მაშინ თუ აღიდგენდა, თუ მთლიანად წაშლიდა წარსულს, დაივიწყებდა ბოლო ექვსი წლის დაძაბულ ცხოვრებას. ტარკინგტონის რომანის იმ შტერი ბიჭივით, უთავბოლოდ უვლიდა კვარტალს და იმისი შიშით, ვაითუ სტუდიიდან გამოსვლისას როზმერი ვერ დავინახოო, მოსახვევებში ხშირად ტრიალდებოდა ხოლმე. იქაურობას საკმაოდ ნაღვლიანი იერი დაჰკრავდა. სტუდიის გვერდით ფირნიში შენიშნა: "1000 პერანგი". მთელ ვიტრინას აუარება პერანგი ავსებდა, დაკეცილები და შეკრულები, ანდა მხრებზე შემობურული, ბეგრიც, ვითრმდა დაუდევრად დაყრილი ვიტრინის ძირში. "1000 პერანგი" — მიდი ერთი და დათვალე! მეორე მხარეს დიკმა წაიკითხა: "საწერი ქაღალდი", "საკონდიტრო", "მიყიდვა". — აქვე იყო რეკლამა, კონსტანცა ტოლმეჯი "მზიურ საუზმეში". მერე უფრო სევდიანი შინაარსის აბრები ეკიდა: "საეკლესიო შესამოსელი", "უწყებები გარდაცვალებაზე", "დამკრძალავი ბიურო". სიცოცხლე და სიკვდილი.

იცოდა, რასაც ახლა აკეთებდა, იმით ბევრი რამ შეიცვლებოდა მის ცხოვრებაში — იმდენად არ შეესაბამებოდა ეს ყველაფერი იმას, რაც ადრე იყო, არ შეესაბამებოდა იმ შთაბეჭდილებას, რაც სურდა და შეიძლებოდა მოეხდინა როზმერიზე. როზმერის თვალში იგი ყოველთვის კორექტულობის ნიმუში იყო, ამ კვარტალში სიარული კი შემოჭრას ჰგავდა. მაგრამ დიკისთვის ეს საქციელი, მისი აქ მოსვლა, თავის თავში რაღაც ორმად ჩამარხულის გამოვლენას უფრო ნიშნავდა. მოუსვლელობა არ შეეძლო, მოვიდა და იდგა აქ, ანდა დადიოდა, მაჯებზე კარგად მორგებული სახელოებით, სახელოები პიჯაკისა კი — ყალიბივით მორგებული პერანგისაზე, საუცხოო თარგის საყელო ეხებოდა ყელს, ჟღალი თმა — კარგად შეკრეჭილი, დენდივით ხელში ჰქონდა პორტფელი — მოვიდა, რადგან არ შეეძლო არ მოსულიყო, როგორც იმ ერთ კაცს, ფერარაში გომ მივიდა და დადგა ტაძრის წინ, ტანზე ჯვალოშემოხვეული, და ფერფლწაყრილი. დიკი თითქოსდა ხარკს უხდიდა რაღაც წაუშლელს, უაღსარებოდ ჩავლილსა და დაუვიწყებელს.

## IXX

ორმოცდახუთი წუთი გავიდა რაც იცდიდა, და უცებ ვიღაცა გადაეყარა. ეს ერთი ისეთი შემთხვევა იყო, ჩასაფრებულივით რომ გამოუხტებოდა ხოლმე სწორედ მაშინ, როცა არც ვინმეს ნახვა და არც ვინმესთან დალაპარაკება არ უნდოდა და ასეთ დროს, რაც უფრო მეტად შეეცდებოდა, თავის დაფარვას, მით უფრო მეტად მჟღავნდებოდა, იმ მსახიობივით, კარგად როცა არა თამაშობს, დაძაბულია და ბოლოს და ბოლოს ეხმარება მაყურებელს, შეავსოს ხოლმე სიცარიელე, თამაშისა. ანდა კიდევ: ხშირად იმათ არ თანავუგრძნობთ, ვისაც სწყურია თანაგრძნობა, და იმათ კი ვწყალობთ, ვინც სხვადასხვა გზით ახერხებს და თავს შეგვაბრალებს.

შეიძლება, თვითონ დიკსაც ასე ემსჯელა, ამ შეხვედრაზე თუ იფიქრებდა. რუ დე სენტ ანჟზე იგი ოცდაათიოდე წლის ამერიკელმა შეაჩერა, გამხდარი, ფერმკრთალი სახე ჰქონდა, რაღაც ავბედითად ჩაიცინა და სიგარეტის მოკიდება სთხოვა. დიკმა. მაშინვე იმ ტიპებს მიამსგავსა, ჭაბუკობისას რომ შეხვედრია. ასეთები თამბაქოს დუქნებში დაყიალებენ, ხელები დახლზე ჩამოუწყვიათ და ცამ თუ იცის, გონების რომელ ჭუჭრუტანიდან უყურებენ შემსვლელ-გამომსვლელთ; გარაჟებში შინაურებივით გრძნობენ თავს და საეჭვო საქმეებს აგვარებენ, საპარიკმახეროებში იციან ჩამოსხდომა და თეატრის ფოიტებში წრიალებენ; ასეთ ტიპებს მოამსგავსა. ეს სახები ზოგჯერ ტადის კარიკატურებზეც გაიელვებდა ხოლმე — ბიჭობისას დიკს რამდენჯერ, შიშით ატანილს უცდია ბნელით მოცული დანაშაულის სამყაროსათვის შეეხედა, სამყაროსათვის, რომლის მიჯნაზეც იდგა თვითონ.

"მოგწონთ პარიზი, მეგობარო?"

პასუხს არ დალოდებია, დიკს გვერდით ამოუდგა და მიჰ. ყვა.

"საიდანა ხართ?" გამამხნევებელი ტონით ჰკითხა.

"ბაფალოდან".

"მე კი სან-ანტონიოდან, ისე კი, რაც ომი დაიწყო, აქა ვარ".

"არმიაში იყავით?"

"აბა როგორ! ოთხმოცდამეოთხე დივიზია გაგიგიათ?"

ოდნავ წინ გაუსწრო და ჯიქურ შეხედა დიკს, კეთილი არ ჰქონდა გამოხედვა.

"პარიზში ცხოვრობთ, მეგობარო? თუ ისე, გავლითა ხართ?"

"გავლით".

"რომელ ოტელში?"

დიკს თავისთვის ჩაეცინა — ეტყობა, გუნებაში აქვს ამ ღამით პირწმინდად დაუცარიელოს ოთახი. მაგრამ ის ტიპი მიუხვდა, არ მოერიდა და მაშინვე უთხრა:

"ასეთ კაცს, მეგობარო, ჩემი არ უნდა შეგეშინდეთ. პარიზში ქვეყნის მაწანწალა დაეხეტება და ამერიკელ ტურისტებზე

ნადირობს, მაგრამ ჩემი რად უნდა გეშინოდეთ".

დიკს მობეზრდა და შეჩერდა. "დრო გლეჯვაზე გაქვთ, გეტყობათ".

"არა, რატომ — პარიზში მე საქმეს ვაკეთებ".

"რა საქმეს?"

"გაზეთებს ვყიდი".

ასეთი უწყინარი საქმიანობა და იმის უხამსი მანერები ერთმანეთს არ ეხამებოდა. ეს კაცი თავისას ერეკებოდა:

თქვენ რა გგონიათ — შარშან ფულს ვშოულობდი, დღეში ათი, და ხან ოცი ფრანკი "სანდი ტაიმზზე", ფასი კი ექვსია".

გახუნებული საფულედან სურათი დააძრო, გაზეთიდან ამოჭრილი, და თავის შემთხვევით თანამგზავრს მიაჩეჩა. სუ- რათზე ამერიკელები რაღაც ნაკადად გადმოდიოდნენ ოქროთი სავსე ხომალდიდან საბიჯელაზე.

"ორასი ათასი. მარტო ერთ ზაფხულს აქ ათი მილიონი რჩებათ".

"პასიზე რაღამ მოგიყვანათ?" ყმაწვილმა ფრთხილად მიიხედ-მოიხედა. "კინომ", დაღვრემილმა ჩასჩურჩულა, "აქ ამერიკული კინოსტუდიაა. ხანდახან სჭირდებათ ხოლმე ინგლისურად მოლაგარაკე. მეც შემთხვევას ვუცდი".

დიკმა საბოლოოდ გაცლა და მისი თავიდან მოშორება ამ-

ჯობინა.

ცხადი იყო, სანამ იგი კვარტალს უვლიდა, როზმერიმ მოასწრო სტუდიიდან გამოსვლა, ანდა, დიკის ამ არემარეზე გამოჩენამდე წავიდა უკვე. კუთხეში მდებარე ბისტროში შევიდა, ტყვიის ჟეტონი იყიდა და სამზარეულოსა და აშმორებულ ტუალეტს შუა, თალარქვეშ შესულმა ოტელ "მეფე გეორგის" კომუტატორს გამოუძახა. სუნთქვაზე შეატყო თავის თავს, რომ ჩეინ-სტოკსის ერთ-ერთი სიმპტომი იყო, მაგრამ ამანაც უფრო გაუძლიერა ისედაც უკვე მძაფრი გრძნობა. ოტელის შიფრი თქვა, მერე კარგა ხანს ეჭირა ტელეფონი და კაფეს მიშტერებოდა; ბოლოს საოცრად უცნობი ხმით, "ალო!" გაის-

"დიკი ვარ. არ შემეძლო არ დამერეკა".

პაუზა — მერე გაბედული, მის გუნებას საკვირვლად აყოლილი და შეხამებული პასუხი:

"ძალიან მიხარია, რომ დარეკეთ".

"სტუდიასთან მოვედი, მეგონა შეგხვდებოდით, პასიზე ვარ, მეორე მხარეს, ბისტროში შევედი და იქიდან გელაპარაკებით: გიფიქრე, გნახავ და ბულონისკენ გავივლით-მეთქი".

"აჰ, მე იქ მხოლოდ რამდენიმე წუთით შევიარე, რა საწ-

ყენია!" სიჩუმე.

"როზმერი!"

"ჰო, დიკ?"

"უცნაური რამ მემართება თქვენზე ფიქრისას. როცა ბავშვი შუახნის ჯენტლმენს მოსვენებას დააკარგვინებს, იმისი საქმე წასულია".

"სულაც არა ხართ შუახნისა, დიკ, თქვენ ყველაზე ახალ-

გაზრდა ხართ ქვეყანაზე".

"როზმერი!"

ისევ პაუზა. თაროს მიაშტერდა, ზუსტად თავის პირდაპირ მწკრივად ეწყო საფრანგეთის შედარებით სუსტი შხამებით სავსე ბოთლები — ოტარ, რომ სენ-ჯეიმზ, მარი ბრიზარ, პუნშ

Scanned by CamScanner

ორანჟად, ანდრე ფერნე ბლანკო, შერი როშე, არმანიაკ. "მარტო ხართ?"

...ხომ არ გეწყინებათ, ფარდას თუ ჩამოვუშვებ?

"კიდევ ვინ უნდა იყოს, როგორ ფიქრობთ?"

"ხომ ხედავთ, თვითონაც არ ვიცი რას ვამბობ. ნეტავი თქვენთან მამყოფა ახლა".

სიჩუმე. მერე ამოოხვრა და ძლივს გასაგონი:

"მეც მინდა ახლა ჩემთან იყოთ".

ოთახი ოტელში, იქ, ტელეფონის ციფრებს მიღმა წევს იგი და მუსიკის ხმა შხაპუნა წვიმად ეცემა ახლო, იმის გარშემო...

"მხოლოდ მე და შენ, შორს, ტაიტიზე,

ვიქნებით მარტო, ერთად, ოორი-ვე".

ნამზეურ კანზე ფიფქივით მოყრილი პუდრი — ახსოვდა, როცა აკოცა, თმის ძირებში კანი ნოტიო ჰქონდა. უეცრად გაფითრებული სახე გაკრთა დიკის სახესთან, და დაქანებული მხრები.

"არა, შეუძლებელია," თავისთავს უთხრა. ერთი წუთის მერე უკვე ქუჩას მიუყვებოდა პორტ დე ლა მუეტისკენ, ან იქნებ, სულაც საპირისპირო მხარეს მიდიოდა. ერთ ხელში პატარა პორტფელი ეჭირა, მეორეში — ოქროს ბუნიკიანი ჯო-ხი, ხმალივით.

როზმერი საწერ მაგიდასთან მიბრუნდა და დედასთან გასაგზავნი წერილის წერა დაამთავრა.

"...მხოლოდ რამდენიმე წუთით ვნახე, მაგრამ მაშინვე საოცრად ლამაზი მეჩვენა და მაშინვე შემიყვარდა (რა თქმა უნდა, დიკი უფრო ძალიან მიყვარს, მაგრამ ხომ იცი, რისი თქმა მინდა). მისი ახალი ფილმის საქმე უკვე აჟურშია და ხვალვე მიემგზავრება ჰოლივუდში, ასე რომ, მე ვფიქრობ, ჩვენც უნდა წავიდეთ. კოლის კლეი ჩამოვიდა აქ, ძალიან კარგი ბიჭია, მაგრამ თითქმის იშვიათად ვხვდები დაივერების გამო, დაივერები ღვთაებრივები არიან, ამისთანა მომხიბლავ ხალხს ჯერ არ შევხვედრივარ. დღეს ცოტა შეუძლოდა ვარ და წამალს ვსვამ, თუმცა, მგონია, არც არის საჭირო. მეტს ალარაფერს მოგწერ, მალე გნახავ; გნახავ და რაც იყო, ყველაფერს გეტყვი, გიამბობ!!! როგორც კი ამ წერილს მიიღებ, ტეფის გეტყვი, გიამბობ!!! როგორც კი ამ წერილს მიიღებ, ტე-

ლეგრამა გამოგზავნე, ნუ მომწერ, შემატყობინე ტელეგრამით! ჩამოხვალ თუ მე გამოვყვე სამხრეთში დაივერებს?"

ექვს საათზე ნიკოლს დაურეკა დიკმა.

"რა გეგმები გაქვს საღამოსთვის?" ჰკითხა მან. "იქნება მშვიდად გავატაროთ ეს საღამო— ოტელში ვისადილოთ და მერე თეატრში წავიდეთ?"

"კარგი, როგორც შენ გინდა. ცოტა ხნის წინათ როზმერის დავურეკე, თავის ოთახში სადილობს. ამდილანდელმა ამბავმა

მაინც ყველას თავგზა აგვიბნია".

"მე სულაც არა", უთხრა დიკმა. "თუ ძალიან არ დაიღა-ლე, მოდი რაღაცა მოვიფიქროთ, ძვირფასო, თორემ ჩავალთ რივიერაზე და მთელ კვირას იმაზე ვილაპარაკებთ, როგორ დაგვემართა, რომ ბუშე ერთხელაც ვერა ვნახეთო. თანაც, ესა სჯობია იმას, რომ ვისხდეთ და ვწუხდეთ…"

ამის თქმა წინდაუხედაობა იყო, წამოსცდა, ნიკოლს არ

გამოპარვია.

"ვწუხდეთ — რაზე?"

"მარია უოლისზე".

ნიკოლი დაეთანხმა თეატრში წასვლაზე. თავიდანვე ასე იცოდნენ, თითქოს დათქვესო, დაუღლელები ყოფილიყვნენ ყველაფერში, მათი აზრით, ასე უფრო კარგი დღეები ექნებოდათ, ხოლო, თუ ხანდახან, ცხადია, მაინც იქანცებოდნენ, შეიძლებოდა ზოგი საღამოს გადადება, მაგრამ ამას თავიანთ თავს არ აბრალებდნენ, — ეტყობა ვიღაც დაიღალა და სული მოითქვას, გადავდოთო. სანამ ოტელიდან გავიდოდნენ, — მათ შეხედვას ხომ არაფერი სჯობდა და უფრო ლამაზ წყვილს ძნელად თუ შეხვდებოდი მთელ პარიზში, — როზმერის შეუარეს, კაკუნზე არავინ გამოეხმაურა, იფიქრეს, რომ უკვე ეძინა და ქვევით ჩავიდნენ, ფუკეს ღამის ბნელ ბარში ვერმუტი და მწარე ლუდი დალიეს და პარიზის თბილსა და მათრობელ ღამეს შეერივნენ.

ნიკოლმა გვიან გაიღვიძა და სანამ თავის გრძელ წამწამებ! გახსნიდა, სიზმარგამოყოლილმა, რაღაცა ჩაიბუტბუტა, დიკი! საწოლი ცარიელი იყო — მხოლოდ ცოტა ხნის მერე მიხვდა რომ კარზე ვიღაც აკაკუნებდა და ამან გააღვიძა.

"დიახ!" დაიძახა, მაგრამ არავინ უპასუხა. ხალათი მოისხ და კარის გასაღებად გაემართა. კართან პოლიციელი იდგა

ზრდილობიანად დაუკრა თავი და შიგნით შემოვიდა.

"მესიე ეფგენ ნორთი — აქ არის?"

"ვინ? არა — ამერიკაში გაემგზავრა".

"როდის გაემგზავრა, მადამ?"

"გუშინ დილით":

პოლიციელმა ჯერ თავი გადააქნია და მერე გამეტებით

მოჰყვა საჩვენებელი თითის ქნევას.

"გუშინ საღამოს იგი პარიზში იყო. ამ ოტელშია რეგისტრირებული, მაგრამ იმის ოთახში არავინ არის. მე მირჩიეს ან ოთახში მოვსულიყავი, რომ თქვენთვის მეკითხა".

"უცნაურია, ვერაფერი გამიგია — გუშინ დილით გავაცი-

ლეთ ჰავრის მატარებელზე".

"როგორც არ უნდა იყოს, დღეს დილით აქ ნახეს. საბუთებიც კი შეუმოწმეს. ასე რომ, რაღა ეჭვი შეიძლება გქონდეთ".

"ჩვენ არაფერი ვიცით ამაზე", წამოიძახა გაოცებულმა ნი-

კოლმა.

პოლიციელი რაღაცაზე ჩაფიქრდა. კარგი გარეგნობის კაცი იყო, მაგრამ ყარდა.

"გუშინ საღამოს თქვენთან არ იყო?"

"არა! რანაირად?"

"ერთი ზანგი დავაპატიმრეთ. ეს სწორედ ის ზანგია, და, ბოლოს და ბოლოს, როგორც იქნა დავაპატიმრეთ".

"იცით რა, არ მესმის, რაზე ლაპარაკობთ. თუ თქვენ მისტერ ებრეჰემ ნორთზე მელაპარაკებით, დიახ, მას ვიცნობთ, მაგრამ თუ იგი კიდევაც პარიზში იყო გუშინ საღამოს, არ გაგვიგია".

კაცი თავს იქნევდა, ზედა ტუჩი შიგნით შეეწია, ეტყობოდა, მაინც რაღაც ეეჭვებოდა. "მაინც, რა მოხდა?" ახლა ნიკოლმა იკითხა.

. პოლიციელმა ხელები გაშალა, მოკუმული პირი გააღო. თანდათან მიხვდა, რა მიმზიდველი იყო ნიკოლი და თვალები

აუციმციმდა.

"რა მოხდებოდა, ხომ იცით, მადამ, ზაფხულია, ბევრი ხალხი ტრიალებს. მისტერ ეფგენ ნორთი გაძარცვეს და პოლიციაში განაცხადა. ჩვენ დავიჭირეთ არამზადა. ახლა საჭიროა, რომ მისტერ ეფგენ ნორთმა იცნოს იგი და ბრალდება დადგინდეს".

ნიკოლმა ხალათი მჭიდროდ შემოიხვია, კიდევ ერთხელ გაუმეორა, მეტი აღარაფერი ვიციო და დაითხოვა პოლიცილი; გაოგნებულმა შხაპი მიიღო და ჩაიცვა. უკვე ათს გადაცილებული იყო. როზმერის დაურეკა, მაგრამ ტელეფონი არ პასუხობდა — მერე პორტიეს დაუკავშირდა და გამოირკვა, რომ დილის შვიდისთვის ეიბი მართლა მოსულიყო ოტელ "მეფე გეორგში", ოთახი აეღო. მაგრამ თითქმის არც გაჩერებულა. ნიკოლი მისაღებში დაჯდა და დაელოდა, რომ იქნება დიკს დაერეკა, მაგრამ დიკი არ ჩანდა, ბოლოს ხელი ჩაიქნია და გარეთ გასვლა დალპირა. სწორედ ამ დროს ქვევიდან დაურეკეს:

"თქვენ გკითხულობთ მისტერ კროუშოუ, ზანგია".

"რა საქმეზე?"

"იგი ამბობს, რომ გიცნობთ თქვენც და დოქტორსაც. ამბობს, რომ მისი მეგობარი ვინმე მისტერ ფრიმენი ციხეში ზის, რომ მას ყველა იცნობს, იგი ამბობს, რომ ეს შეცდომაა, უსამართლობაა, და სურს ნახოს მისტერ ნორთი, უნდა მიასწროს, თორემ შეიძლება თვითონაც დაიჭირონ".

"ჩვენ არაფერი ვიცით". ნიკოლმა, თითქოს მთელი ჯა**ვრი** ამაზე ამოიყარაო, გაბრაზებით დაახეთქა ტელეფონი და ამით მოუღო ბოლო მთელ ამბავს.

პარიზში ეიბის ექსცენტრულმა გამოჩენამ ნიკოლს აშკარად დაანახვა, როგორ დაქანცა იმისმა თავაშვებულმა, გატიალებულმა ცხოვრებამ. თავიდან ამოიგდო ეიბზე ფიქრი და მკერავთან წასვლა გადაწყვიტა. იქ როზმერის შეხვდა და ორივე რუ დე რივოლიზე გავიდნენ ხელოვნური ყვავილებისა და ფერადი შუშის მძივებისთვის. ნიკოლის დახმარებით როზმერიმ დედისთვის ბრილიანტის ქინძისთავი იყიდა, და შარფები და მოდური პორტსიგარებიც, რასაც კალიფორნია-ში ჩასვლისას თავის ჰოლიფუდელ მეგობრებს აჩუქებდა. ნი-კოლმა მხოლოდ სათამაშო ჯარისკაცები, რომაელი და ბერძენი მეომრების მთელი არმია იყიდა ვაჟიშვილისთვის, რაც ათას ფრანკზე მეტი დაუჯდა, და ახლაც სხვადასხვანაირად ხარჯავდნენ ფულს, როზმერის კვლავაც აღტაცებას ჰგვრიდა ნიკოლის მეთოდი ფულის ხარჯვისა. ნიკოლმა იცოდა, და კარგადაც იცოდა, რომ თავის ფულს ხარჯავდა, როზმერის კი სულ ეგონა, რომ რაღაც სასწაული მოხდა, ეს ფული ასესხეს და ფრთხილად უნდა ყოფილიყო, გამოეზოგა.

კარგი იყო, გაგიხარია, მზიან დღეს უცხო, დიდ ქალაქში სიარული და ფულის ხარჯვა. დადიხარ ნამზეური ჯანსაღი სხე-ულით, სახეატკრეცილი, თავით ფეხამდე გალაღებული, ხელს გაიწვდენ, მოძრაობ და გრძნობ, რა მომხიბლავი ხარ და ქა-

ლურად მიმზიდველი, გჯერა შენი თავისა.

ოტელში უკვე ელოდებოდათ დიკი, ხალისიანი და დილასავით ცინცხალი, ნიკოლმაც და როზმერიმაც, მის დანახვაზე მთლად ბავშვებივით გაიხარეს.

დიკმა უამბო — ცოტა ხნის წინ თვითონ ეიბს დაურეკია და ულაპარაკია მასთან; თურმე მართლა პარიზშია და დილან-დელს აქეთ სადღაც იმალება.

"ჩემს სიცოცხლეში არ მომისმენია ამისთანა უცნაური

ლაპარაკი ტელეფონში".

მარტო ეიბი კი არ ლაპარაკობდა დიკთან, ერთი ათი კაცი მაინც იყო კიდევ ჩართული და ყველა თითქმის ერთნაირად იწყებდა: "...აქ ერთ კაცს უნდა თქვენთან ლაპარაკი ამ საქ-მეზე, ეს ამბობს, ეგ სულაც რა შუაშიაო — როგორ? რა?"

"თქვენ ეი, მოკეტეთ, არაფერი ისმის — ერთი სიტყვით, გაება ამბავში და შინ ვერ მიდის. მე თუ მკითხავთ, ჩემი აზ-რია, მე თუ მკითხავთ..." აქ ტელეფონში რაღაც "ბუყბუყის მსგავსი ხმა გაისმა და რა უნდა ეკითხათ მისთვის, გაუგება-რი დარჩა.

ტელეფონის ხმაურში ახლა სულ სხვა რამ გაარჩია:

"მე მინდა მოგმართოთ, როგორც ფსიქოლოგს..." ეს ვილაცა, ასეთი აზრებით შთაგონებული, ეტყობა მოაცილეს ტელეფონს და ასე და ამრიგად, ვეღარ ელაპარაკა დიკს, ვეღარც როგორც ფსიქოლოგს და ვეღარც ისე.

მერე საუბარი დაახლოებით ასე წარიმართა:

"ალო!"

"დიახ?"

"რა დიახ, ალო!"

"ვინა ხართ?"

"ჰო". ისევ ჩაერთო ვიღაც, ეცინებოდა. "ახლავე ვინმეს

გადავცემ ყურმილს".

დროდადრო, ყურმილის დახეთქების ხმასა და ტელეფონთან ატეხილ ღრიანცელში, ძლივს გასაგონ წყვეტილ ფრაზებში "არ გინდათ, მისტერ ნორთ, მე არ..." და რაღაც ამისთანა, დიკს ეიბის ხმაც ესმოდა. მერე ვიღაცამ მკვახედ უთხრა:

"თუ თქვენ მართლა მისტერ ნორთის მეგობარი ხართ, მო-

დით და წაიყვანეთ აქედან".

ახლა თვითონ ეიბი ჩაერია, ხმაური იმდენად აღარ ისმოდა, ეტყობა ყველა მისწი-მოსწია და დიდი ამბით, მძიმედ მოჰყვა ლაპარაკს.

"დიკ, ჩემი მიზეზით რასობრივი ჩხუბი ატყდა აქ, მონმარტრზე. ახლა ფრიმენის გამოსაშვებად მივდივარ, ციხეშია. თუ იქ ერთი ზანგი მოვიდა — კოპენჰაგენში ვაქსის ფაბრიკა აქვს — ალო, კარგად ისმის? — თუ იქ ვინმე მოვიდა…" ისევ ერთი ათი ხმა მაინც ჩაირთო.

"როგორ მოხვდით ისევ პარიზში?" ჩაეკითხა დიკი.

"ევრემდე ჩავედი და მერე გადავწყვიტე თვითმფრინავით დავბრუნებულიყავი, რომ ევრე და სენ-სიულპისი შემედარე-ბინა ერთმანეთისთვის. ის კი არა, რომ სენ-სიულპისი პარიზ-თან ვერ მოვა. ბაროკოს არა ვგულისხმობ, არა. სენ-სიულპი-სი კი არა, უფრო სენ-ჟერმენი მაქვს მხედველობაში. ღვთის გულისათვის, მოითმინეთ, ერთი წუთით, მე თქვენ ოტელის მსახურთან გალაპარაკებთ".

"ღვთის გულისათვის, არ გინდათ".

"მომისმინეთ — რა ქნა მერიმ, წავიდა?"

"30"·

"დიკ, ერთ კაცს მინდა დაელაპარაკოთ, ამ დილით გავიცა-Scanned by CamScanner ნი აქ, საზღვაო ოფიცრის ვაჟიშვილია, ყველა ექიმი მოიარა ევროპაში, ვიღასთან არ ყოფილა, ახლავე ყველაფერს გეტყვით..."

აქ კი დააგდო დიკმა ყურმილი, შესაძლოა, ცოტა უმადურადაც კი მოიქცა, — გონების დოლაბს რომ ეტრიალა, და-

საფქვავი მარცვალი იყო საჭირო.

"ეიბი ისეთი კარგი იყო", როზმერის უამბობდა ნიკოლი —
"საოცრად კარგი. მას შემდეგ კარგა ხანი გავიდა. მე და დიკი
ახალდაქორწინებული ვიყავით. სამწუხაროა, რომ მაშინ არ
იცნობდით ეიბს. კვირიდან კვირამდე ჩვენთან იყო ხოლმე და
თითქმის ვერ ვამჩნევდით სახლში იმის არსებობას. ხან უკრავდა, ხან ბიბლოთეკაში იჯდა ისე, საათობით, თავის შეყვარებულ მუნჯ პიანინოსთან. ერთი მოახლე გვყავდა — გახსოვს,
დიკ? — ეიბი მოჩვენება ეგონა, უყვარდა ეიბს ამ მოახლის
შეშინება, დერეფანში დაუდარაჯდებოდა და გამოჩნდებოდა
თუ არა, დაიძახებდა: "უუ!" ერთხელაც, ამისთანა შეშინება
მთელ ჩაის სერვიზად დაგვიჯდა, ხელიდან გაუვარდა; მაგრამ
არაფრად ჩაგვიგდია".

ასეთი მხიარული ცხოვრებით ცხოვრობდნენ მაშინაც, დიდი ხნის წინათ, როზმერის შეშურდა კიდევაც, თვითონ ხომ არასოდეს ეცხოვრა ასე, არა სცალოდა, მაგრამ აფასებდა

მოცალეობას, როგორც ყველა ძნელად მოცლილი.

"მერე რა დაემართა?" იკითხა. "სმა რად დაიწყო?"

ნიკოლმა თავი გააქნია, მარჯვნივ და მარცხნივ, მე არაფერ შუაში ვარო.

"რამდენი გონიერი და არაჩვეულებრივი კაცი იკარგება ჩვენს დროში".

"როდის, რომელ დროში არ იყო ასე?" ჩაერია დიკი. "არაჩვეულებრივ კაცს ყოველთვის თამაში უხდება ზღვარზე,

ყველა ვერ უძლებს ამას და ბოლოს ხელს ჩაიქნევს".

"მიზეზი მაინც უფრო ღრმაა", არ დაუთმო ნიკოლმა, თან ცოტა გაბრაზდა, რომ დიკი როზმერის თანდასწრებით შეე-პასუხა. "რამდენი დიდი ხელოვანია, ვთქვათ, თუნდაც, ფერ-ნან ლეჟე, — სულაც არ იხრჩობენ ღვინოში თავს. რაღა მაინც-დამაინც ამერიკელები ლოთდებიახ?"

ამ კითხვაზე იმდენნარი პასუხის გაცემა შეიძლებოდა, რომ

დიკმა ამჭობინა სულ არ ეპასუხა, დარჩეს ასე ნიკოლისათვის. ბოლო ხანს დიკმა შეამჩნია, თითქოს კრიჭაში ედგა ნიკოლს და თუმცა იგი ულამაზესი იყო მათ შორის, ვინც ცხოვრება-ში შეხვედრია, და უხვადაც ჰქონდა მიმადლებული ყველაფერი, რაც დიკს სჭიროდა, გრძნობდა, უკვე შორს აღარ იყო შეჯახება და თავს იკაყებდა, დროს არ კარგავდა. მიჩვეული არ იყო შეღავათს თავისი თავისადმი და ახლა ცოტათი რცხვენოდა კიდევაც ასეთი შეღავათისა, თვალს ხუჭავდა, იმის იმედით — ნიკოლი ხომ ვერაფერს ამჩნევს, მხოლოდ იმას, რომ აღტაცებას მგვრის როზმერის მშვენებაო, არადა, გუშინ თეატრში როზმერის ხსენებისას, ნიკოლმა ლამის მიახალა, როზმერი ისევ ბავშვიაო.

სამივე დაბლა ჩავიდა და ხალიჩებიან მყუდრო დარბაზში ისაუზმეს; ჩქამიც არ ისმოდა, ისე მიდი-მოდიოდნენ ოფი-ციანტები .სულ აღარ ჰგავდნენ იმ თავგზააბნეულ კაცებს, აქეთ-იქით რომ აწყდებოდნენ იმდღევანდელ სუფრაზე; მოშორე-ბით ამერიკელები ისხდნენ თავიანთი ოჯახებით და სხვა ამე-რიკელებს უყურებდნენ, ესენიც ცოლ-შვილთან ერთად იყვ-ნენ და ძალიან ცდილობდნენ ერთმანეთს როგორმე დალა-ბარაკებოდნენ.

გვერდით მაგიდასთან რამდენიმე ქალი და ერთი კაცი იკდა, ვერ გაიგებდით ვინ იყვნენ. კაცი უფრო მდივნის ტიპი
იყო, ახალგაზრდა, სახეზე ღიმილი ეფინა, თავაზიანი მიხრამოხრა ჰქონდა და სულ იმის ცდაში იყო, ვისთვის რა ესიამოვნებინა; ქალები ბევრნი იყვნენ, ოცამდე მაინც, არც ახალგაზრდები ეთქმოდათ, არც ხანშესულები, რომელ სოციალურ
ფენას ეკუთვნოდნენ, ამის მიხვედრაც ჭირდა. მაგრამ ერთი კი
იყო, სუყველა რაღაცნაირად დაახლოებულები ჩანდნენ, თითქოს უფრო მეტად, ვიდრე, ვთქვათ ცოლები, ერთად რომ
შეყრილან და სანამ ქმრები სათათბიროზე თათბირობენ, ამათ
დრო გაჰყავთ. იმაზე უფრო ახლობლებიც ჩანდნენ, ტურისტულ ჯგუფში რომ არიან ხოლმე.

ის იყო, რაღაც სასაცილო უნდა ეთქვა მათზე, რომ დიკმა უნებურად ენას კბილი დააჭირა და ოფიციანტს სთხოვა, გაიგეთ, რა ხალხიაო.

"ესენი გმირების დედები არიან", აუხსნა ოფიციანტმა.

საშთავემ ხმადაბლა ამოიოხრა. როზმერის თვალებზე ცრემლები მოადგა.

"უფრო ახალგაზრდები, ალბათ ცოლები არიან", თქვა ნი-

კოლმა.

თავის ღვინის ბოკალში ისევ გახედა მათ დიკმა. იმათ კეთილ სახეებში და დიდ სიმშვიდეში, გარშემო ყველას რომ
ედებოდა, დიკმა ძველი ამერიკის ღირსება დაინახა. თავიანთი
მკვდრების დასატირებლად, იმის საწუხარად, რასაც ვერაფერს უშველიდნენ, შორიდან მოსული ქალების აქ ყოფნა
იქაურობას ამაღლებულს და მშვენიერს ხდიდა. იმ წამით დიკი ბავშვობას დაუბრუნდა, მამის მუხლზე შემომჯდარიყო და
აჩუ-აჩუს გაიძახოდა, ირგვლივ კი დუღდა ძველი ვნებები,
თავდადება და მისწრაფებები. თავს ძალა დაატანა, რომ თანმხლებ ქალებს დაბრუნებოდა, შეეხედა მთელ იმ ახალ საშყაროსათვის, რომელსაც იგი მინდობოდა.

...ხომ არ გეწყინებათ, ფარდას თუ ჩამოვუშვებ?..

#### XXIII

ეიბ ნორთი ისევ ოტელ "რიტცის" ბარში იყო, დილის ცხრიდან აქ ჩაჯდა. თავშესაფრის ძებნაში ოტელს რომ მიად-გა, ყველა ფანჯარა გაეღოთ და დიდებულ სხივებს ამოჰქონდა და ამოჰქონდა მტვერი გაკვამლული ხალიჩებიდან თუ სავარ-ძლებიდან. ოტელის მსახურები ქარივით დაქროდნენ დერეფნებში, გეგონება უსხეულონი არიან, ეს-ეს არის დედამიწას მოსცილდნენ და სივრცეში მიდი-მოდიანო. მთავარი ბარის წინ მეორე ბარი იყო, ქალებისთვის, ერთი ბეწო ჩანდა, გაგიკვირდებოდათ, რანაირად იტევდა ამ ხალხს შუადღის მერე.

თავად ცნობილი პოლი, კონცესიონერი, ჯერ არ მოსულიყო, მაგრამ კლოდმა, ჯერ უადგილო გაკვირვებით აიხედა
და მერე მოსცილდა საქმეს, რომ ეიბისთვის აპერიტივი მოემზადებინა. ეიბი კედელთან ახლო, მერხზე ჩამოჯდა, ორჯერ
გადაკრა და უკეთ იგრძნო თავი, ბევრად უკეთ, ისე რომ,
საპარიკმახეროშიც კი ავიდა და გაიპარსა. ბარში რომ დაბრუნდა, პოლი უკვე იქ იყო, თავისი ახალი მანქანა კაპუცინების

გულვარზე დაეყენებინა მოხერხებულად. პოლს მოსწონდა ეიბი, გვერდით მიუჯდა და საუბარი გაუბა.

"ამ დილას შტატებში უნდა წავსულიყავი", თქვა ეიბმა. "არა, დღეს არა, გუშინ დილას, თუ — როგორც არის".

"მერე რად გადაიფიქრეთ?" ჰკითხა პოლშა.

ეიბი ჩაფიქრდა და ბოლოს მიზეზი გამოძებნა: "რომანს გკითხულობდი, "ლიბერტეში" იბეჭდება გაგრძელებებით. შემ-დეგი საცაა გამოვა პარიზში და გამომრჩებოდა, როდისღა წა-მეკითხა თუ წავიდოდი".

"ეტყობა საინტერესოა".

"საშშ-შ-ინლად".

პოლი წამოდგა, ჩაიცინა და სკამის ზურგს დაეყრდნო.

"მისტერ ნორთ, თუ თქვენ მართლა გინდათ წასვლა, ხვალ ორი თქვენი მეგობარი მიემგზავრება "საფრანგეთით". სლიმ პირსონი და მისტერ — რა გვარია, მისტერ — ახლავე გავიხსენებ — მაღალი, ამას წინათ წვერი მოუშვა".

"იარდლი", მიეშველა ეიბი.

"მისტერ იარდლი. ორივენი "საფრანგეთით" მიდიან".

პოლმა დააპირა თავის საქმეს მიბრუნებოდა, მაგრამ ეიბმა სცადა ცოტა ხანს კიდევ შეეყოვნებინა.

"მე შერბურის გავლით უნდა წავიდე. ჩემი ბარგი ამ გზით წაიღეს".

"ბარგს ნიუ-იორკში მიიღებთ", უთხრა მიმავალმა პოლმა.

ამ შენიშვნის ლოგიკურობას ეიბი მაშინვე ვერ ჩასწვდა, მაგრამ გაუხარდა, რომ ვიღაცა ფიქრობდა და ზრუნავდა მას-ზე, ან უფრო, გაუხარდა, რომ ჯერჯერობით კიდევ შეეძლო არც არაფერზე ეზრუნა.

ამასობაში ბარში ხალხი მატულობდა. პირველი მაღალი დანიელი მოვიდა, რომელსაც ეიბი ადრე სხვაგანაც შეხვედ-როდა. დანიელმა მოპირდაპირე კედელთან ამოირჩია ადგილი და ეიბი მიხვდა, მთელ დღეს იქ გაატარებდა, დალევდა, ისაუზმებდა, გაზეთებს წაიკითხავდა, ანდა სულაც ვინმეს გამოელაპარაკებოდა. ეიბს უცებ მოუნდა იმაზე დიდხანს მჯდარიყო აქ. თერთმეტ საათზე კოლეჯის ბიჭებმა შემოიარეს, ერთიმეორის მიყოლებით შემოდიოდნენ; დაახლოებით ამ დროს იყო, რომ ეიბმა მსახურს სთხოვა, ტელეფონით დაივე-

რებთან დაეკავშირებინა; მაგრამ სანამ მათ დაუკავშირდებოდა, ეიბს სხვა, ახალი მეგობრები გამოუჩნდნენ, გადაწყვიტა
ისინიც ჩაერთო ლაპარაკში და ამის გამო იყო, რომ კაცი ვერ
გაიგებდა, ვინ და რას გაიძახოდა ტელეფონში. დროდადრო
ეიბის გონებაში წამოტივტივდებოდა ხოლმე ფაქტი, რომ უნდა ამდგარიყო და წასულიყო, და ციხიდან ფრიმენი გამოეყვანა, მაგრამ ყველანაირ ფაქტს თავიდან ღამის კოშმარივით
იშორებდა.

პირველი საათისთვის ბარი უკვე სავსე იყო. არეულ ხმებსა და ხმაურში ოფიციანტები თავიანთ საქმეს აკეთებდნენ, თავიანთ კლიენტებს გასაგები ენით აგებინებდნენ, რამდენი დაელიათ და რა უნდა გადაეხადათ.

"ასე, ორი ვისკი... და კიდევ ერთი... ორი მარტინი და მერე ერთიც... თქვენთვის არაფერი აგიღიათ, მისტერ ქუოტერლი... ესე იგი, ორჯერ სამ-საში. თქვენგან სულ სამოცდათხუთმეტი ფრანკი, მისტერ ქუოტერლი. მისტერ შეფერი ამბობს,
რომ მეტი არაფერი შეუკვეთია — ბოლოს მხოლოდ ვისკი
მოგართვით... ჩემი საქმეა შევასრულო, რასაც მომთხოვთ...
უღრშესი მადლობა".

აურზაურსა და ღრიანცელში ეიბი უადგილოდ დარჩა და ახლა ფეხზე იდგა, ბარბაცებდა და თავის ახალ ნაცნობებს ელაპარაკებოდა. ვიღაცის ფოქსტერიერი თასმით გამოედო და ფეხებში ებლანდებოდა, მაგრამ ეიბმა მოახერხა და მოიცილა, ისე, რომ არც არაფერი გადაუყირავებია და ვიღაცამ რომ ერთი ათჯერ ბოდიში მოიხადა, იმასაც მოუსმინა. მერე ლანჩზე მიიწვიეს, მაგრამ იუარა, საცაა უკვე ბრიგლითია, აუხსნა ეიბმა, და ბრიგლითზე რაღაც საქმე მაქვსო. ცოტა ხნის მერე მეტად თავაზიანად, იმ მანერით, ალკოჰოლიკებს დროთა ვითარებაში რომ უჩნდებათ ხოლმე, და ძალიანა ჰგავს პატიმრისა თუ ძველი მსახურის მანერებს — თავი დაუკრა ყველას და შეტრიალდა; შეამჩნია, რომ ციებცხელება ბარში ისეფე ჩქარა ჩამქრალიყო, როგორც დაიწყო.

მოპირდაპირე მხარეს დანიელი .თანამეინახეებთან ერთად საუზმობდა. ეიბმაც შეუკვეთა საუზმე, მაგრამ პირი თითქმის არ დაუკარებია, თავისთვის იჯდა მხოლოდ და ლამის ნეტარებით განიცდიდა წარსულს. ღვინო თავისას აკეთებდა, გარდასული ბედნიერი დღეები და მოგონებები გაუახლდა, ახლანდელს შეერია, თითქოს იგივე ხდებოდა და უფრო მეტიც, გერმისსაც ედებოდა, თითქოსდა მერეც ისევ ისევე იქნებოდა.

ოთხ საათზე მსახური მიუახლოვდა ეიბს.

"ერთი კაცი გკითხულობთ, ფერადია, გვარად პიტერსონი, ჟიულ პიტერსონი".

"ღმერთო ჩემო! რანაირად მომნახა?"

"მე არ მითქვამს, რომ აქა ბრძანდებით".

"საიდან გაიგო?" ეიბი შექანდა, კინაღამ ჭურჭელს დაემ-

ხო ზედ მაგიდაზე, მაგრამ თავს მოერია და გასწორდა.

"უთხარით, რომ აქ არა ვარ..." ის იყო მსახური უკვე წასასვლელად გაემართა, რომ ეიბმა, ეტყობა გადაიფიქრა და ჰკითხა: "აქ შემოუშვებენ?"

"ახლავე გავიგებ".

მსახური პოლს მიუახლოვდა და შეეკითხა. პოლმა მიიხედმოიხედა, თავი გააქნია, მერე ეიბი დაინახა და თვითონ გამოემართა მისკენ.

"ბოდიშს ვიხდი, მისტერ ნორთ, მაგრამ ნებას ვერ დავრთავ".

ეიბმა ძლივს აიტანა ტანი, წამოდგა და რუ კამბონზე გაგიდა.

# VIXX

თავისი პატარა ტყავის პორტფელით ხელში, რიჩარდ დაიცერი მეშვიდე უბნის კომისარიატიდან გამოვიდა, მარია უოლისს ბარათი დაუტოვა, ქვეშ "დიკოლი" მიაწერა, როგორც
თვითონ და ნიკოლი აწერდნენ ხოლმე თავიანთი სიყვარულის პირველ ხანებში მეგობრებისადმი გაგზავნილ წერილებს,
და პერანგების ატელიეში გაეშურა. დიკის იქ მისვლისას ერთი ფაცაფუცი შეიქნებოდა ხოლმე, თითქმის არაპროპორციული იმ ფულისა, რასაც დიკი უხდიდა მათ და რცხვენოდა ამის გამო. ეჩვენებოდა, რომ ამ ღარიბ ინგლისელებს
აბნევდა თავისი დახვეწილი მანერებით, შეცდომაში შეჰყავდა თავისი ისეთი თავდაჭერით, გეგონება ამ უზრუნველი
ცხოვრების გასაღები ამას ეგდო ხელთ, იმისიც რცხვენოდა,

მკერავს თუ ეტყოდა, აბრეშუმის სახელო სულ ოდნავ ასწიეთო. იქიდან დიკი ოტელ "კრიიონის" ბარში შევიდა და ყავა

და ცოტა ჭინი დალია.

ოტელის ვესტიბიულში შესულს, ძალიან განათებული ეჩგენა იქაურობა და გაუკვირდა; გარეთ გამოსვლისას მიხვდა,
უკვე საღამოვდებოდა და იმიტომაც ჩანდა ისე. ქარი ღრუბელ-ნისლს მიერეკებოდა, ოთხ საათზე თითქმის შეღამდა,
ელისეს მინდვრებზე ტრიალ-ტრიალით სწყდებოდა ფოთლები ხეებს და არეულად, აქა-იქ ეყრებოდა მიწას. რუ დე რივოლიზე თავის ბანკში მისასვლელად, რომ იქ ფოსტისთვის
მიეკითხა, დიკმა ორი კვარტალი ფეხით გაიარა, მერე ტაქსი
გააჩერა და ელისეს მინდვრების გავლით ოტელისკენ წავიდა.
წვიმა წამოვიდა. რახარუხით ეცემოდა სახურავს. მარტო იჯდა სიბნელეში, თავის სიყვარულთან ერთად.

ორი საათის წინათ ოტელ "მეფე გეორგის" დერეფანში როზმერისა და ნიკოლის სილამაზე ილუსტრაციების ქალი-შვილისა და ლეონარდოს ქალის სილამაზეს შეედრებოდა. მანქანიდან გაჰყურებდა ელისეს წვიმიან მინდვრებს, დაღ-გრემილი და შეშფოთებული, თითქოს რამდენიმე სხვადასხვა კაცის ვნებებით მოცული და, გამოსავალსა და მარტივ გზას

გერ ხედავდა.

როზმერიმ თავისი ოთახის კარი გააღო, რომ იტყვიან, ნერგები "დაგლეჯაზე" ჰქონდა ახლა — დღე-ღამე გავიდა და თავი ვერაფერს მოაბა. მაგრამ ეს სხვამ არავინ, თვითონ იცოდა
მხოლოდ — ფიქრი აერია, სურათ-გამოცანასავით იყო ყველაფერი, ცალ-ცალკე მიყრილი ვერ აეწყო და ვერ გაემთლიანებინა და იმ მიყრილი სურათებივით მიითვლიდა წარმატებებსა და იმედებს, ერთ ძაფზე ასხამდა მძივებივით დიკს, ნიკოლს, თავის დედას, გუშინდელ რეჟისორს "ფილმ პარ ექსელანსიდან" და კრიალოსანივით მარცვლავდა.

კარზე დიკმა რომ დააკაკუნა, როზმერის ის იყო, ჩაეცვა და სარკმლიდან წვიმას უყურებდა. რომელიღაც ლექსის სტრიქონებს იხსენებდა და თვალწინ ბევერლი-ჰილზის ნიაღვრებიანი არხები ედგა. კარი გააღო და დიკი დაინახა.

ჩამოსხმული, ღვთაებრივი, მარადიული და შეუცვლელი, როგორც ყოველთვის ეჩვენებათ ხოლმე უმცროსებს უფროსები. დიკს კი უნებლიედ ცოტათი იმედი გაუცრუვდა როზმერის პირველ დანახვაზე. მეორე წუთში კი ისევ მოაჯადოვა
მისი ღიმილის უმწეო მშვენიერებამ, ზუსტად შექმნილი
მისი სხეულის სილამაზემ, კოკორს რომ ჰგავდა, სულ მალე
კი ყვავილივით გაიშლებოდა. სააბაზანოს ღია კარიდან იმისი
სველი ნატერფალი ნოხი მოჩანდა.

"მისს ტელევიზია", ხუმრობის კილოთი, რაც ასე არ ეხამებოდა გუნებას ახლა, ისე თქვა დიკმა. პორტფელი და ხელთათმანები ტუალეტის მაგიდაზე დადო, ხელჯოხი კედელთან
მიაყუდა. ნიკაპი თითქოს ჯიუტად იგერიებდა დარდის ნაოჭებს, ბაგის გარშემო დალაგების საშუალებას არ აძლევდა,
ზევით, შუბლისკენ, საფეთქლებისკენ ერეკებოდა, იმ შიშსავით, სხვამ არავინ შეამჩნიოსო.

"მოდით, აქ, მუხლზე დამიჯექით", ალერსით უთხრა.

"ახლო იყოს მშვენიერი პატარა ბაგე".

როზმერიმ გაუგონა, სარკმელს იქით წვიმის ხმაური ნელნელა მიწყდა, წკაპ-წკა-აპ. ტუჩები თავისი წარმოსახვით შექმნილ მშვენიერ, ცივ სახეს მიადო.

მერე თვითონ კოცნიდა დიკს, უცბად, ჩქარ-ჩქარა და დიკს ისევ და ისევ აოცებდა როზმერის კანი — აბრეშუმი; არც არაფერი უნახავს ასეთი თვალისმომჭრელი. მაგრამ სილამაზის ერთი თვისება ისიც არის, რომ გამოავლენს, რაც რამ კარგია ამ სილამაზით მოხიბლულ კაცში; შესაძლოა ამიტომაც ფიქრობდა ახლა დიკი ნიკოლზე, იმაზე, რომ დერეფანში სულ რაღაც ორი კარის იქით იყო იგი. თავის მოვალეობაზე ფიქრობდა დიკი.

"წვიმამ გადაიღო", თქვა მან. "სახურავებს შეხედეთ, უკ**ვ**ე მზე დანათის".

როზმერი წამოდგა, დიკისკენ დაიხარა:

"რა მსახიობები ვართ! ორივე — მეც და თქვენც". ყვე-

ლაზე გულწრფელი რამ, რაც კი დიკისთვის ეთქვა.

როზმერი პატარა მაგიდასთან მივიდა და როგორც კი საგარცხელს დასწვდა, კაკუნი გაისმა კარზე, ხმადაბლა, მაგრამ დაჟინებით აკაკუნებდნენ. ორთავე ადგილზე გაშეშდა; კაკუნი გამეორდა და ახლა უფრო ხმამაღლადაც. როზმერიმ უცებ გაიაზრა, რომ კარი ჩაკეტილი არ იყო, სწრაფად გადაისვა თმაზე სავარცხელი, თავი დაუქნია დიკს, უკვე რომ მოესწრო გადასაფარებლის გასწორება საწოლზე, სადაც ორივე იჯდა, და კარის გამოსაღებად გაემართა. დიკმა მშვიდად და ბუნებრივად თქვა, არცთუ ხმამაღლა:

"...ჰო, თუ მაინცდამაინც არსად გინდათ წასვლა, ვეტყვი ნიკოლს და ამ საღამოს ძალიან წყნარად, შინაურულად გავატარებთ".

ტყუილუბრალო სიფრთხილე იყო, რადგან ისინი, ვინც კართან იდგნენ, იმდენად მოეცვა საკუთარ საზრუნავს, რომ უბრალოდ, ვერც კი შეამჩნევდნენ იმას, რაც ახლა იმათ არ ეხებოდა. კართან იდგნენ ეიბი, ერთ დღე-ღამეში რამდენიმე თვით რომ დაბერებულიყო, და საშუალო ტანის შავკანიანი, ნაღვლიანი და შეშინებული კაცი. ეიბმა გააცნო, მისტერ პიტერსონი სტოკჰოლმიდანო.

"საშინელ დღეშია ჩავარდნილი და ჩემი ბრალია", თქვა ეიბმა. "იქნება კარგი რჩევა მოგვცეთ".

"ჩვენთან წავიდეთ", უთხრა დიკმა.

ეიბმა დაჟინებით მოითხოვა, რომ როზმერიც გაჰყოლოდათ და ყველანი დაივერების ოთახებისკენ გაემართნენ; ჟიულ პიტერსონი, დინჯი და თავაზიანი ზანგი, თავისი ადგილი რომ იცოდა, სასაზღვრო შტატების რესპუბლიკელთა მომხრე, უკან მიჰყვებოდა.

როგორც გამოირკვა, პიტერსონი შემთხვევითი მოწმე ყოფილა იმ ჩხუბისა, მონპარნასის ერთ-ერთ ბისტროში რომ
ატყდა; ეიბს უარი არ უთხრა, პოლიციაში წაჰყვა და ოფიციალური ჩვენება მისცა, დავინახე, ვიღაც ზანგმა როგორ
გამოსტაცა ხელიდან ეიბს ათასფრანკიანიო. საჭირო იყო ზანგის პიროვნების დადგენა. ეიბი და ჟიულ პიტერსონი პოლიციელთან ერთად ბისტროში დაბრუნდნენ და იქ თითქოს შეიცნეს კრიმინალი, მაგრამ ერთ საათსაც არ გაევლო და გამოირკვა, რომ ის ეჭვმიტანილი ზანგი ბისტროში ეიბის წასვლის
მერე მისულიყო, პოლიციამ უფრო აურ-დაურია საქმე, როცა
ცნობილი ზანგი რესტორატორი ფრიმენი დააპატიმრა, ფრიმენი

გისტროში ცოტა ხნით შესულა და თანაც ძალიან ადრე, სანამ იქ ალკოჰოლური ბურუსი ჩამოწვებოდა. ნამდვილი დამნაშა-ვე კი, ვისი მეგობრებიც საერთოდ ამტკიცებდნენ, მხოლოდ ორმოცდაათი ფრანკი გამოართვა, რომ იმ სასმელისთვის გა-დაეხადა, ეიბმა მთელი კომპანიისთვის რომ მოითხოვაო — სულ ცოტა ხნის წინ გამოჩნდა და თანაც, საკმაოდ ავისმო-მასწავებელ როლში.

ერთი სიტყვით, რაღაც ერთ საათში ეიბმა მოახერხა და თავი ჩაიგდო ლათინური კვარტალის ერთი აფრო-ევროპული და სამი აფრო-ამერიკული ბინადრის ცხოვრების, სინდისისა და ვნებების რთულსა და ერთმანეთში გადახლართულ ამბებ-ში და რანაირად, რა გზით დაეღწია თავი აქედან, ვერ მოესაზ-რებინა. ჯერჯერობით მთელი დღე იმაში გავიდა მხოლოდ, რომ საითაც არ უნდა გაეხედა, თითქმის ყველგან ზანგებს ხედავდა. უცნობი ზანგების სახეები მოულოდნელად, სადაც არ ელოდა, იმ ადგილებშიც გამოჩნდებოდნენ, ზანგების და-ჟინებული ხმები არ ასვენებდა ტელეფონში და გულს უწყალებდა.

მაინც მოახერხა და ყველა აიცდინა, გარდა ჟიულ პიტერსონისა. პიტერსონი იმ თანამგრძნობი და მეგობარი ინდიელის მდგომარეობაში აღმოჩნდა, თეთრ კაცს შემწედ და მშველელად რომ მოევლინა და მის მხარეზე დადგა. მთელ ამ ამბავში დაზარალებული ზანგები ახლა იმდენად ეიბს არ დასდევდნენ, რამდენადაც პიტერსონს, რადგან მოღალატედ თვლიდნენ, პიტერსონი კი ეიბს არ სცილდებოდა, მისგან ელოდა მფარველობასა და შველას.

პიტერსონს სტოკჰოლმში ვაქსის პატარა ფაბრიკა ჰქონდა, მაგრამ გაკოტრდა და მთელ მის ქონებას ახლა ხის ყუთში ჩატეული ზუმბურზეთის რეცეპტი და პორტატიული მანუფაქტურა შეადგენდა, თუმცა მისი ახალგამოჩენილი მფარველი დღეს დილას შეჰპირდა, ვერსალში გიშოვიო ერთ საქმეს— იქ ცხოვრობდა ეიბის ყოფილი მძღოლი, ამჟამად მეწალე. ეიბმა უკვე ისიც მოასწრო, რომ მომავალი შემოსავლის ანგარიშში პიტერსონისთვის ორასი ფრანკი მიეცა.

როზმერი ისმენდა ამ მიეთმოეთს, რისი გროტესკულობის აღქმასაც უფრო საღი იუმორი სჭიროდა და ეს მას არ გააჩნდა. შავკანიანი პატარა კაცი თავისი პორტატიული მანუა ფაქტურით, აცა-ბაცა თვალებით, დროდადრო შიშით ისე რომ გადაუტრიალდებოდა ხოლმე, რომ მხოლოდ თეთრი გარსის წრეები უჩანდა, ეიბის ფიგურა და მშვენიერი თხელი ნაკვთები, ოღონდ, ახლა შეშუპებული — ეს ყველაფერი რალიც სნეულებასავით შორეული იყო მისთვის.

"მომეცით შანსი ცხოვრებაში, მე მეტს არაფერს გთხოვთ", ამბობდა პიტერსონი იმ არაბუნებრივი და შერეული ინტო-ნაციით, კოლონიურ ქვეყნებში რომ ლაპარაკობენ. "ჩემი მე-თოდი უბრალოა, ჩემი რეცეპტი — იმდენად კარგი, რომ გა-მაღატაკეს, სტოკჰოლმიდან გამომაძევეს, რაკი არ დავთანხმდი

და არ გავამხილე".

დიკი ყურადღებით შესცქეროდა. დაინტერესდა კიდევაც, მაგრამ მაშინვე გაუქრა ინტერესი, ეიბს მიუბრუნდა:

"სხვა ოტელში წადით, დაწექით და დაიძინეთ. როცა გამოიძინებთ, მისტერ პიტერსონი იქ მოვა და მოილაპარაკებთ".

"მაგრამ გესმით თუ არა, რა ხათაბალაში ჩავარდა პიტერ-

სონი?" ჩააცივდა ეიბი.

"მე ჰოლში ჩავალ და იქ დავიცდი", დელიკატურად თქვა პიტერსონმა. "იქნებ უხერხულიც კია ჩემი თანდასწრებით იმ საქმეზე ლაპარაკი, მე რომ მეხება".

ვითომდა ფრანგულ მანერაზე, რაც პაროდიას უფრო ჰგავ-და, თავი დაუკრა ყველას და ოთახიდან გავიდა. ეიბი ორთქლ-

მავალივით მძიმედ აიძრა ადგილიდან და ფეხზე დადგა.

"ეტყობა დღეს მაინცდამაინც ვერ ვიწვევ თანაგრძნობას".

"თანაგრძნობას კი, შექებას ვერა", მიუგო დიკმა. "მე წასგლას გირჩევთ ოტელიდან, თუნდაც ბარის გავლით, რა გზითაც გინდათ, მიდით "შამბორში" ან, თუ გინდათ უკეთ მოგემსახურონ — "მაჟესტიკში".

"დასალევი რომ გთხოვოთ რამე, გეწყინებათ?"

"აქ არაფერს ვინახავთ", იცრუა დიკმა.

ეიბი მორჩილად მივიდა როზმერისთან, სახე ცოტათი დაიმშვიდა, დიდხანს ართმევდა ხელს, ტუჩები უთრთოდა და უჭირდა რაიმეს თქმა, სიტყვებს ვერ უყრიდა თავს.

"თქვენ ყველაზე — ერთ-ერთი ყველაზე..." როზმერის შეეცოდა და ცოტა ზიზღიც კი იგრძნო ჭუჭჰ ყიანი ხელის შეხებისას, მაგრამ ისე გულღიად იღიმებოდათითქოს მისთვის აქ უჩვეულო არა იყო რა და ასეთ კაცს,
სიზმარეულს რომ ჰგავდა, ყოველდღე ხედავდა. ხშირად
მთვრალ კაცს საკვირველი პატივისცემით ვექცევით ხოლმე,
ისე, გიჟებს რომ ექცევიან ზოგიერთები, შიშით კი არა, უფრო რიდით. არის რაღაცა იმ კაცში, ვინც თავის თავს ვეღარ
ერევა და ყველაფერზე მიდის, რაღაც, რაც რიდსა და მოკრძალებულ შიშს გვინერგავს; მერე და მერე, რა თქმა უნდა, არ
შევარჩენთ და ვაზღვევინებთ ხოლმე ამ უპირატესობას.

ეიბი დიკს მიუბრუნდა, ერთხელაც სცადა თავი შეეცოდე-

ბინა, გული მოელბო.

"კარგი, თუ ოტელში წავალ, დავიბან, დავივარცხნი, გავიწმინდები და გამოვიძინებ, თავიდან მოვიშორებ ამ სენეგალელებს — შეიძლება აქ მოვიდე და საღამოთი ბუხარს მივუჯდე?"

დიკმა თავი დაუქნია, იმდენად თანხმობის წიშნად არა, რამდენადაც ქირდვით და მიუგო: "მე მგონია აჭარბებთ, ეიბ, ამდენი მართლა არ შეგიძლიათ".

"ნიკოლი რომ აქ იყოს, ვიცი უბრალოდ იტყოდა, მოდითო".

"ჰოდა, მოდით". დიკმა ლანგრით დიდი ყუთი მოიტანა და ოთახის შუაში, მაგიდაზე დადო; ყუთი სავსე იყო მუყაოს ასოებით. "შეგიძლიათ მოხვიდეთ და ანაგრამები ვითამაშოთ".

ეიბმა ყუთს აშკარა ზიზღით ჩახედა, გეგონება შიგთავსი შვრიის ფაფად, საჭმელად შესთავაზესო.

"რა ანაგრამებია? დღესდღეობით მეყოფა, რაც კი..."

"ეს უვნებელი თამაშია, ასოებიდან რა სიტყვასაც გინდათ, იმას შეადგენთ, "ალკოჰოლის" გარდა".

"ალკოჰოლის" შედგენაც კარგად შეიძლება, ალბათ". ეიბმა მუყაოს ასოებით სავსე ყუთისკენ წაიღო ხელი. "შეიძლება დავბრუნდე, და სიტყვა "ალკოჰოლი" შევადგინო?"

"მოდით, თუ ანაგრამების თამაში გინდათ".

ეიბმა მორჩილად დაიქნია თავი.

"რას იზამ, თუ ასე ფიქრობთ — ჯობია არ მოვიდე". ყვედრებით დაუქნია დიკს თითი. "ოღონდ, გახსოვდეთ, რა თქვა გეორგ მესამემ: "გრანტი თუ დათვრა, მე ვისურვებდი სხვა

გენერლები დაკბინოსო".

კიდევ ერთხელ გახედა ირიბად როზმერის თავისი მოოქროსფრო თვალებით და გავიდა. შვება იგრძნო, პიტერსონი რომ არსადა ჩანდა დერეფანში. მიუსაფარი, დაკარგული ეგონა თავი, ისევ "რიტცისკენ" გაემართა, რომ პოლისთვის კარგად ეკითხა, რა ერქვა იმ გემს.

## XXX

როგორც კი ტორტმანით მიმავალი ეიბის ნაბიჯი მინელდა, დიკი და როზმერი უმალ გადაეხვივნენ, პარიზის მტვერი ედოთ, მაგრამ ამ მტვერშიც გრძნობდნენ ერთმანეთს; დიკის კალამი, იმისი რეზინის სარქველის სუნი, როზმერის კისრისა და მხრების სითბოს სურნელება. ერთ წუთს მაინც არაფერზე ფიქრობდა დიკი, როზმერი პირველი დაუბრუნდა რეალიბას.

"ჩემი წასვლის დროა, ჭაბუკო", თქვა მან.

ერთმანეთს დაბნეულები შეჰყურებდნენ, როზმერის თვა-ლი არ მოუშორებია, ისე იხევდა უკან-უკან და ბოლოს კარ-ში გაუჩინარდა, ასე წასვლა ჯერ კიდევ თავისი კარიერის და-საწყისში ისწავლა და არც ერთ რეჟისორს არ უცდია მოე-შლევინებინა მისთვის ეს ჩვევა.

თავისი ოთახის კარი შეაღო თუ არა, მაშინვე მაგიდისკენ გაემართა. ახსოვდა, საათი დარჩა, იქვე იდო; აიღო, სამაჯურს ირგებდა ხელზე და თან დედისთვის გასაგზავნ დაუმთავრე-ბელ წერილს მოავლო თვალი, ფიქრში ბოლო ფრაზებს უყ-რიდა თავს, და ამ დროს ნელ-ნელა, თანდათან, ისე, რომ არც გაუხედავს, იგრძნო, ოთახში მარტო არ იყო.

ისეთი ნივთები, შეუმჩნევლად რომ ირეკლავენ, მრავლად არის საცხოვრისებში: პრიალა ხე, ასე თუ ისე გაკრიალებული თითბერი, ვერცხლი და სპილოს ძვალი და შუქჩრდილის ათასი სხვა წყარო, რასაც ძლივს ვამჩნევთ და არც ვფიქრობთ მათზე, სურათის ჩარჩოს წახნაგი, ფანქრის წვერი, საფერფლის კიდე, ბროლისა თუ ფაიფურის ორნამენტის ცალი მხარე, და ეს ყველაფერი მოქმედებს ხოლმე მხედველობის

მეტად სათუთ და მგრძნობიარე მონაკვეთზე, ქვეცნობიერების იმ ასოციაციურ ცენტრებზე, რაც აღქმას ასე არეგულირებს, ისევე, როგორც ვთქვათ, ჭოგრში ხრახნის მოტრიალება კვეხმარება დავინახოთ ის, რასაც კარგად ვერა ვხედავთ.
უთუოდ ამით შეიძლება აიხსნას, რომ როზმერიმ მანამდე
"შეიგრძნო" ოთახში ვიღაცის არსებობა, სანამ ეს შეგრძნება აზრად იქცეოდა. მაგრამ, გაიაზრა თუ არა, მაშინვე მკვეთრად, ლამის ბალერინასავით შეტრიალდა და დაინახა — მის
საწოლზე მკვდარი ზანგი ეგდო.

"ააუუ" ზარდაცემულმა შეჰყვირა; წამით მოეჩვენა, ეიბი იყო, რაც აზრს არ იყო მოკლებული. საათი სამაჯურითურთ მაგიდაზე დააგდო და შეშლილივით გავარდა ოთახიდან.

დიკი რაღაცებს ალაგებდა; იმდღევანდელი ხელთათ-მანები შეათვალიერა და ჩანთებთან, გროვად დაყრილ ხელ-თათმანებზე მიაგდო. პიჯაკი და ჟილეტი უკვე საკიდზე ეკიდა კარადაში, ცალკე საკიდზე პერანგი ჩამოჰკიდა თავის მეთოდით— "შეიძლება მთლად ახალთახალი არ იყოს, მაგრამ დაჭმუჭნილი პერანგი არ უნდა ჩაიცვა კაცმა". ნიკოლი უკვე შინ იყო და ნაგვის კალათში ეიბის საფერფლედან— ეიბი რაღას არ ხმარობდა ხოლმე საფერფლედ— ნამწვს ყრიდა და ამ დროს ოთახში როზმერი შემოვარდა.

"დიკ! დიკ! ჩქარა, აქეთ!"

დიკი დერეფანში გავარდა, ოთახში შეიჭრა, ჩაიჩოქა და ბიტერსონს გულზე მიადო ყური, მერე მაჯა გაუსინჯა — ჯერ არ გაციებულიყო, სიცოცხლეში მორჩილი და შეშინებული სახე გაბოროტებოდა და უხეში გახდომოდა, იღლიის ქვეშ ის თაგისი ყუთი ამოეჩარა და საწოლზე გადმოკიდებულ ფეხზე ლანჩგაცვეთილი ფეხსაცმელი გასაწმენდი უჩანდა. საფრანგეთის კანონების მიხედვით, დიკს უფლება არა ჰქონდა სხეულს შეხებოდა, მაგრამ მაინც ოდნავ გასწია პიტერსონის ხელი, რომ კარგად დაენახა — მწვანე გადასაფარებელზე მუძიდ აჩნდა ლაქა, სისხლს შეიძლება გაეჟონა და საბანზე გადასულიყო.

დიკმა კარი ჩაკეტა, ცოტა ხანს გაჩერდა, რომ რამე მოეფიქრა. დერეფანში ვიღაცის ფეხის ხმა გაიგონა, მერე ნიგოლის ხმა მოესმა, დიკს ეძახდა. ოდნავ გამოაღო ქარი და

ရိုက္မွလ်ဂ်ီက္မွာဇာဝတ က္မွတ္မွာလုံး

"გადასაფარებელი და ერთი საბანი მოიტანე ჩემი საწო-ლიდან — ოლონდ, ფრთხილად, არაგინ დაგინახოს", და ნი-კოლის სახეზე დაძაბულობა რომ შენიშნა, სწრაფად დაუმა-ტა: "შენ არ აღელდე, ისეთი არაფერი მომხდარა, აქ, უბრა-ლოდ ყარაჩები წაეჩხუბნენ ერთმახეთს".

"ჩქარა მოათავე ეგ საქმე".

დიკმა საწოლიდან ასწია მსუბუქი, უჭმელობისაგან უძლური სხეული. ისე ეჭირა, ჭრილობიდან სისხლი ტანსაცმელშიღა ჩავიდოდა. იატაკზე დააწვინა, საწოლს გადასაფარებელი
და ზევითა საბანი ააძრო, კართან მივიდა, სულ ოდნაგ გამოაღო და ყური მიუგდო — მოსახვევში, ჰოლთან ახლო ჭურჭლის წკარაწკური გაისმა და ვიღაცამ მფარველური კილოთი
ხმამაღლა თქვა — "გმადლობთ, მადამ", მაგრამ რფიციანტმა
სხვა მხარეს, სათადარიგო კიბისკენ გაუხვია,

დიკმა და ნიკოლმა კარიდან კარში სწრაფად გაცვალეს ფუთები; დიკმა როზმერის საწოლს სუფთა გადასაფარებელი გადააფარა და მთლად ოფლში გაღვრილი, ოთახის შუაგულ-ში გაჩერდა, რაღაცა მოიფიქრა და ყოყმანობდა, გვამის გასინჯვის მერე მისთვის ორი რამ გახდა ცხადი, პირველი ის, რომ, ეტყობა, ეიბის მიმართ მტრულად რომ იყო, იმ ინდიელ-მა კვალი აიღო ეიბის მეგობარი ინდიელისა და დერეფანში უხელთა, და როცა სასოწარკვეთილი პიტერსონი თავის საშველად როზმერის ოთახში შევარდა, თან შეჰყვა და მოკლა; მეორე: თუ მოვლენებს ბუნებრივი მსვლელობა მიეცემოდა, ქვეყანაზე ვერავითარი ძალა ვერ იხსნიდა როზმერის სკანდალისა და ლაქისაგან, მისი კონტრაქტი კი თავისთავად გულისხმობდა, რომ როზმერი ისევ ისეთ "მამიკოს გოგოდ" უნდა დარჩენილიყო, გულუბრყვილო და უცოდველი.

თავისდა უნებური, სახელოების აკაპიწების ძველებური ქესტით — თუმცა შიგნით უსახელოებო პერანგი ეცვა — დი- კი დაიხარა, გვამს მხრებში მიაწვა, ფეხით გააღო კარი, რაც შეეძლო სწრაფად გაათრია დერეფანში და ისეთნაირად დააწვინა, თითქოსდა მართლა იქ მოეკლათ. მერე კვლავ როზ- მერის ოთახში შებრუნდა და ცალ მხარეს ხაოაშლილი ნოხი

საგულდაგულოდ გაასწორა. მხოლოდ ამის მერე დაბრუნდა თავის ოთახში, ტელეფონი აიღო და ოტელის მეპატრონეს-თან დამაკავშირეთო, ითხოვა.

"მაკბეთი ხართ? — დოქტორი დაივერი გელაპარაკებით — მეტად საჭირო საქმეა. ხომ არ შეიძლება ვინმე გვის-მენდეს?"

კარგია რომ არ დაეზარა და მისტერ მაკბეთთან ახლო ურთიერთობა გააბა. ერთხელ მაინც გამოადგეს, რომ ასე უხვად იხარჯებოდა და ხიბლავდა ყველას...

"ჩვენი ოთახიდან გამოსვლისას მკვდარ ზანგს წავაწყდით... დერეფანში... არა, არა, სამოქალაქოა. ერთ წუთს მოითმი-ნეთ — გადავწყვიტე თქვენთვის დამერეკა, მე მესმის, არ გინდათ, რომ ამ სართულის სხვა ბინადრებიც წააწყდნენ გვაშს. ოლონდ, გთხოვთ, ჩემი სახელი არსადა თქვათ. ცხადია, არ მინდა, საფრანგეთის გაჭიანურებული პროცესის მსხვერპლი გავხდე მხოლოდ იმიტომ, რომ ეს კაცი ჯერ მე დავინახე".

რა ზრუნვაა ოტელის რეპუტაციაზე! ორი დღის წინათ მისტერ მაკბეთი თვითონვე დარწმუნდა დოქტორ დაივერის ამ თვისებაში და ამიტოძაც მიიღო შემოთავაზებული ვერსია

ულაპარაკოდ.

ერთი წუთის მერე მისტერ მაკბეთი უკვე ზევით იყო, ხოლო, კიდევ ერთი წუთის მერე ჟანდარმიც მოვიდა. ამასო-ბაში მაკბეთმა მოასწრო და დიკს წასჩურჩულა: "თქვენ მშვიდად იყავით, ჩვენი ოტელის ვერც ერთი სტუმრის სახელს ეგრე იოლად ვერ ახსენებენ. ვერ წარმოიდგენთ, რა მადლიერი ვარ თქვენი, რომ ასე შეწუხდით".

მისტერ მაკბეთმა დაუყოვნებლივ მიიღო რაღაც ძნელშისახვედრი ზომები, რამაც ჟანდარმზე ისე იმოქმედა, რომ აწრიალებული და გაცოფებული, მეტი რომ ვეღარა აწაშა რა, ხარბად მოჰყვა ულვაშების წიწკნას, ზერელედ რაღაც ჩაიწერა და ტელეფონით თავის უბანს დაუკავშირდა. ამასობაში, იმ სიმარჯვითა და მოხერხებულობით, როგორც ბიზნესმენი, თვითონ პიტერსონიც კი რომ დააფასებდა, ნეშტი მსოფლიოს ერთ-ერთი ფეშენებელური ოტელის სხვა, თავისუფალ აპარტამენტში გადაიტახეს.

დიკი თავის აპარტამენტში დაბრუხდა.

"რა ხდება?" წამოიძახა როზმერიშ, "როგორ ექცევიან ერთმანეთს ამერიკელები პარიზში, ერთთავად ისვრიან?"

"ეტყობა, ნადირობის სეზონია". მიუგო დიკმა. "ნიკოლი სად არის?"

"ალბათ სააბაზანოში".

როზმერი აღმერთებდა დიკს, ამან გადაარჩინა ——თითქოს დაინახა ის უბედურება, ეს ამბავი რომ დაატეხდა თავს;
ფიქრში თავს ევლებოდა, თაყვანს სცემდა, უსმენდა იმის
ძლიერ და მშვიდ ხმას, ყველაფერი რომ მოაგვარა, მოაწესრიგა. სულითაც და სხეულითაც მას მიელტვოდა, უნდოდა
გადახვეოდა, მაგრამ ამ დროს სხვა რაღაცამ მიიპყრო დიკის
ყურადღება; საწოლი ოთახის კარი შეაღო და სააბაზანოსკენ
წავიდა, და მაშინ როზმერიმაც გაიგონა — არეული, არაადამიანური ყვირილი აღწევდა კარის ხვრელიდან, კლიტის ჭუჭრუტანებიდან, ძლიერდებოდა, თანდათან უფრო საშინელი
ხდებოდა ის ხმა.

ჯერ თავში ის აზრი მოუვიდა, რომ ნიკოლი აბაზანაში დავარდა და რაღაც დაუშავდა; დიკს უკან მიჰყვა, მაგრამ სანამ დიკი მხრით უხეშად შეაჩერებდა და კარს მოუხურავდა, სულ სხვა რაღაცას შეასწრო თვალი.

აბაზანის კიდეს ჩაფრენილი, მუხლებზე ჩაჩოქილი ნიკოლი აქეთ-იქით ირწეოდა.

"შენ, შენა ხარ!" ყვიროდა იგი, "რისთვის მოხვედი აქ—
ეს ერთადერთი ადგილია მთელ ქვეყანაზე, სადაც მარტო
შემიძლია ვიყო — შენ კი შემოიჭერი და გასისხლიანებული
საბანი თან მოიტანე. თუ გინდა, შიგ გავეხვევი და თავს მოგაწონებ — მე არა მრცხვენია, ოღონდ, საცოდაობაა. სულელების დღეს, პირველ აპრილს მეჯლისი გავმართეთ ციურიხში, ტბაზე, და ყველა სულელი იქ მოვიდა, მე კი მინდოდა საბანში გავხვეულიყავი და ისე წავსულიყავი, ოღონდ, არ დამანებეს..."

"დაწყნარდი!"

"...მაშინ მე სააბაზანოში დავიმალე, მაგრამ მომნახეს, დომინო მომიტანეს, ჩაიცვითო, მითხრეს და მეც ჩავიცვი. სხვა რა მექნა?"

"დაწყნარდი, ნიკოლ!"

"მე არ ველოდი, რომ შენ შეგიყვარდებოდი — ვიცოდი, უკვე გვიან იყო, ოღონდ, რად მოდიხარ სააბაზანოში, ამ ერ-თადერთ ადგილას, სადაც შემიძლია მარტო ვიყო, და რად მოათრევ ჩემთან სისხლიან გადასაფარებლებს, რომ შევხე-დო".

"დაწყნარდი, ადექი, ნიკოლ..."

როზმერიმ სასტუმრო ოთახიდან გაიგონა როგორ გაჯახუნდა სააბაზანოს კარი. კანკალმა აიტანა. ახლა იცოდა, რაც
დაინახა ვაიოლიტ მაკისკომ ვილა "დაიანას" სააბაზანოში".
ტელეფონმა დარეკა, აიღო და სიხარულით კინაღამ შეჰყვირა,
როცა კოლის კლეის ხმა გაიგონა. როზმერისთან დაერეკა და
რაკი არ უპასუხეს, მიხვდა, რომ დაივერებთან იქნებოდა.
სთხოვა, ზევით ამოსულიყო და დაეცადა, სანამ შლაპას დაიხურავდა, თავის ოთახში მარტო შესვლისა ეშინოდა.



# ♥Ი860 <u>Მ</u>ᲔᲝᲠᲔ

I

1917 წლის გაზაფხულზე, დოქტორი რიჩარდ დაივერი პირველად რომ ჩავიდა ციურიხში, ოცდაექვსი წლისა იყო, შესანიშნავდა ასაკი მამაკაცისთვის, სწორედაც აკმე უცოლო კაცის
ცხოვრებისა, დიკისთვის კი, ომის დღეებშიც შესანიშნავი,
რადგან უკვე მეტად დიდ ღირებულებად და კაპიტალდაბანდებად მიაჩნდათ იგი იმისათვის, რომ გაემეტებინათ და თოფისთვის მიეშვირათ. წლების მერე ეჩვენებოდა, რომ მისი ეს სავანეც კი ვერ იფარავდა საიმედოდ, თუმცა, ბოლომდე მაინც
ვერ გაერკვია, მართლა ასე იყო თუ არა, — ათას ცხრაას ჩვიდმეტში კი ეცინებოდა ამაზე და თავის მართლებასავით იტყოდა წოლმე, ომი მე სულ არ შემეხოო. ციურიხში მიწერილობით გაემგზავრა, თავისი სწავლის დასრულებისა და სამეცნიერო ხარისხისათვის.

შვეიცარია კუნძული იყო, ერთი მხრით რომ გორიციიდან Scanned by CamScanner

ადმოსული მრისხანე ტალღები ერტყმოდა გარს, და მეორე ახტით კი სომეს და ენეს ჩანჩქეტები. იმხანად კანტონები უცხოელებით იყო სავსე, მაგრამ ბევრი მათგანი საეჭვო პიროვ**ნე**ბას უფრო ჰგავდა, ვიდრე სნეულს, ოღონდ, ამას ზუსტად მაინც ვერ მიხვდებოდი — ბერნისა და ჟენევის კაფეებში ჩურჩულით მოლაპარაკე ტიპები შეიძლება, უბრალოდ ბრილიანტების შემსყიდველები, ან კომივოიაჟერებიც იყვნენ. მაგრამ ასე თუ ისე ყველა ხედავდა და კარგადაც ხედავდა, ნევშატელისა და ბადენის ლაჟვარდ ტბებს შუა ბრმებითა და დაჭრილებით, ხეიბარი მომაკვდავებით გაჭედილ შემხვედრ გრძელ მატარებლებს, აქეთ-იქით რომ მიდიოდნენ. ლუდხანებსა და მაღაზიების ვიტრინებში გამოკრულ ფერად პლაკატებზე შვეიცარიელები თავიანთ საზღვრებს იცავდნენ 1914 წელს — ჭაბუკები და მოხუცები მთებიდან მძვინვარედ, მრისხანე თვალით დაჰყურებდნენ ფრანგებისა და გერმანელების უფერულ აჩრდილებს; პლაკატები იმ მიზნით გამოუშვეს, შვეიცარიელებს გულით დაეჯერათ, რომ არც მათ აუარა იმ დღეთა საბრძოლო დიდების ეპიდემიამ. ხოცვა-ჟლეტა გრძელდებოდა, წლიდან წლამდე პლაკატები გაცვდნენ და გაიცრიცნენ და როცა ომში უცებ ამერიკა ჩაერია, არც ერთ ქვეყანას ეს ისე არ გაჰკვირვებია, როგორც მის ევროპელ დას, ამ რესპუბლიკას.

იმ დროისათვის დოქტორ დაივერს ომისათვის უკვე შორიახლოდან შეეხედა: 1914 წელმა მას ოქსფორდში მოუსწრო, კონექტიკატის შტატიდან როუდზის სტიპენდიის მიღების მერე აქ სწავლობდა. სამშობლოში დაბრუნებული, ბოლო ერთი წელი ჯონ ჰოპკინზის უნივერსიტეტში იყო და ხარისხი მიიღო. 1916 წელს, ვაითუ დიდი ფროიდი საჰაერო
თავდასხმისას დაიღუპოსო, ვენაში იჩქარა წასვლა. უკვე მაშინ, ამ ხავსმოდებულ ქალაქში ძლივსღა ფეთქავდა სიცოცხლე, მაგრამ დიკმა როგორღაც მოახერხა საკმაო ნახშირისა
და ნავთის შოვნა, რომ დამენშტიფ შტრასეზე თავის პატარა
ოთახში ჩამჯდარიყო და ბროშურები ეწერა, რომლებიც მერე
მოსპო, მაგრამ რომლებიც, როცა აღიდგინა და გადაწერა,
1920 წელს ციურიხში გამოცემული მისი წიგნის ხერხემლად
იქცა.

თითქმის ყველას გვაქვს ისეთი ხანა ცხოვრებაში, როცა გმირი გვგონია თავი; ის ხანა სწორედ ასეთი იყო დიკ დაივერისთვის. მაშინ აზრადაც არ მოსვლია, რა ხიბლიც ჰქონდა, ფიქრობდა, რომ ჯანმრთელი ხალხი ყველა ასეა და აქ უჩვეულო არა იყო რა. ჯერ კიდევ ნიუ-ჰეივენში ყოფნისას ვიღაცაშ "იდბლიანი დიკი" შეარქვა — ეს სახელი თავში ჩარჩა.

"იღბლიანი დიკი, აი ვინა ხარ, ძველო", ხმადაბლა ეტყოდა ხოლშე თავის თავს მბჟუტავი ცეცხლითღა განათებულ ოთახში სიარულისას. "ზუსტად მიზანში შოახვედრე, შეგობარო, შენამდე ვერავინ შეამჩნია".

1917 წლის დასაწყისში, როცა ძალიან გაჭირდა ნახშირის შოვნა, დიკი თავის სახელმძღვანელოებს მიადგა. ერთი ასი მაინც დაუგროვდა და ცეცხლს მისცა. მაგრამ ყველა წიგნის ღუმელში შეგდებისას ლამის შმაგი სიხარული იპყრობდა ხოლმე, თითქოს იცოდა, რომ წიგნის არსი ისედაც სისხლსა და ხორცში ჰქონდა გამჯდარი და ხუთი წლის მერეც, თუკი ეს წიგნი ამად ღირდა, იმის შინაარსს მოკლედ იტყოდა. როცა მხრებზე შემოგდებული იატაკის ნოხიც ვეღარ იცავდა სიცი-ვისაგან, ღუმელის წინ ჩაჯდებოდა და წიგნებს მეცნიერის იმ მშვენიერი უშფოთველობით წვავდა, ყველაზე მეტად რომ წააგავს ზეციურ ნეტარებას, მაგრამ, ამ უშფოთველობას, რო-გორც მერე გამოჩნდება, მალე უნდა მოღებოდა ბოლო.

ჯერ კი ეს ბოლო არ დამდგარიყო და ამას ნიუ-ჰეივენის ბილიკებზე რბენითა და ზამთარს დუნაიში ბანაობით გაკაჟე-ბულ თავის სხეულს უმადლოდა. ბინაში საელჩოს მეორე მდი-ვანთან, ელკინსთან ერთად ცხოვრობდა. ამათ აპარტამენტში ხანდახან ორი სანდომიანი ქალიშვილი მოდიოდა — მოდიოდ-ნენ და მიდიოდნენ, სხვა არაფერი, არც საელჩოსთან კავშირი მიდიოდა უფრო შორს, ედ ელკინსთან ურთიერთობამ პირ-ველად კიდევაც დააეჭვა თავის აზრებში, ელკინსისას ადარებ-და და ხანდახან ფიქრობდა .დიდი სხვაობა არ არისო, იმ ელკინსისას, ბოლო ოცდაათი წლის ყველა ნიუ-ჰეივენელ თავდამსხ-მელს სათითაოდ რომ ჩამოგითვლიდათ.

"იღბლიანი დიკი კი ერთი საზრიანი ჭაბუკთაგანი ვერ იქონებოდა, ეს არა კმარა; ზედმეტად კარგი ვინმეა, მთლიანი, ცოოტა კიდევაც უნდა დაიშალოს, საჭიროა, რომ სწორედ ცხოვო

გებამ დააჩნიოს თავისი კვალი, ავადმყოფობა, ან ვთქვათ, სიყვარულში ხელის მოცარვა და გულის გატეხა, ანდა "კომპ-ლექსი" მაინც ის არ არის, რაც საჭიროა. თუმცალა, საინტე-რესო იქნებოდა შენობის დანგრეული მხარის აღდგენა და ხელახლა გამთლიანება. ოღონდ ისე, რომ ადრინდელზე უკე-თესი ყოფილიყო".

ამ თავის აზრებზე ეცინებოდა ხოლმე, ყბედობასა და "ამერიკელობას" ეძახდა — ტვინის დოლაბით დაუფქველ ყველა ფრაზას ასე დაარქმევდა ხოლმე. მაგრამ, იცოდა, რომ თავისი მთლიანობის ფასი სრულყოფის ნაკლულეგანება იყო.

"ყველაზე კარგი რამ შემიძლია გისურვო, ჩემო ბავშვო", ამბობს ჯადოსნურკვერთხა ფერია თეკერეის "ვარდსა და ბეჭედში", "ცოტაოდენი უბედურება".

ხანდახან თავისთვის, ბუზღუნით იმართლებდა თავს: "რა ჩემი ბრალია, რომ იმ საზეიმო დღეს პიტ ლივინგსტონი გასახ- დელში მიიმალა, რამდენიც არ ეძებეს, ვერსად ნახეს, და იე- ლის უნივერსიტეტში მე ამირჩიეს. ასე რომ არა, ვინ ამირჩევ- და. იმათგან მე თითქმის არავის ვიცნობდი და პიტი იყო ნაღდი კანდიდატი, და ის კი არა, მე უნდა დავმალულიყავი მაშინ გასახდელში. იქნებ ასეც მექნა, თუ მეგონებოდა, რომ რაღაცა შანსი მაინცა მქონდა. ისე კი, ბოლო კვირებში იმ მერსერმა ჩემთან სიარულს მოუხშირა. არა, შანსი მქონდა, ჰო, ვიცოდი ეს და ახი იქნებოდა, რაღაც კომპლექსს თუ მო- ვუგონებდი ჩემსავე თავს და ყველაფერს იქვე თუ ჩავშლი- დი".

ლექციების მერე ამ საკითხზე რამდენჯერმე ესაუბრა ერთ ახალგაზრდა რუმინელ ინტელიგენტს და იმან დაამშვიდა: "არაფერი არ ადასტურებს იმას, თითქოს "კომპლექსი", ამ სიტყვის თანადროული გაგებით, ოდესმე ჰქონდა გოეთეს, ან ვთქვათ ისეთ კაცს, როგორიც იუნგია. რომანტიკოსი ფილოსოფოსი არა ხართ, მეცნიერი ხართ, და ამიტომაც მეხსიერება, შეუპოვრობა, ნებელობა და საღი აზროენება მოგეთხოვებათ. ყველაზე მეტად კი, თქვენივე თავის შეუცნობლობა გავნებთ. ერთ კაცს ვიცნობდი, ორი წელი არმადილოს ტვინის შესწავლას მოანდომა იმ ვარაუდით, ბოლოს და ბოლოს არმადილოს ტვინზე ყველაზე მეტი მე მეცოდინებათ.

ვეკამათებოდი, ვუხსნიდი, რომ არსებითად იგი კაცობრიო. ბის ცოდნის საზღვრებს ვერ აფართოებდა, რომ ეს უბრალოდ მისი ახირება იყო. ასეც მოხდა — როცა თავისი თეზისები ერთ სამედიცინო ჟურნალს გაუგზავნა, უარი შემოუთვა. ლეს — თურმე უკვე ჰქონდათ მავანის თეზისები იმავე თე. მაზე".

როცა დიკი ციურიხში ჩამოვიდა, ცხრაფეხასათვის სამყოფზე ცოტა აქილევსის ქუსლები ჰქონდა, თუმცაღა მაინც ეყოფოდა. ეს იყო გამოულეველი ძალის, სიჯანსაღისა და
ადამიანში მარადიული სიკეთის ილუზიები — თაობიდან
თაობას გადმოყოლილი მთელი ერის ილუზიები, დიდედების ტყუილები, მგლის ყმუილში თავიანთ პატარებს ნანას
რომ უმღეროდნენ და ღიღინით ეუბნებოდნენ, მგელი არ არის,
ქოხთან იმისი ჭაჭანებაც არ არის, დაიძინეო.

ხარისხის მიღების მერე დიკი საფრანგეთში, ბარ-სიურობის ახალგახსნილ ნევროლოგიურ ჰოსპიტალში გაგზავნეს. საფრანგეთში მუშაობამ იმედი გაუცრუა, უფრო ადმინისტრატორობა უხდებოდა, ვიდრე ექიმობა, მაგრამ დრო კი საკმაო რჩებოდა საიმისოდ, რომ ციურიხში დაწყებული მცირე სახელმძღვანელო დაემთავრებინა და ახალი წიგნის მასალებისთვის მოეყარა თავი. 1919 წლის გაზაფხულზე კი, დემო-

ბილიზებული, ციურიხს დაბრუნდა.

ზემოთქმული უფრო ბიოგრაფიის მოყოლასა ჰგავს, ოღონდ, ისე, გადაკრულადაც რომ არ დაგაიმედებთ, თითქოს იმის გმირს რთული და თავგადასავლიანი ბედი ელის და უკ-3ე ესმის მისი ძახილი, როგორც გენერალ გრანტს ესმოდა გალენში, როცა დუქანში იჯდა. თანაც, როცა კაცს უკვე მოწიფულ ასაკში იცნობ და იმის ჭაბუკობისდროინდელ სურათს წააწყდები, უცნაური რამ გემართება — იქიდან სულ სხვა, უცნობი სახე შემოგყურებს, ქორისთვალება, მგზნებარე და შეუპოვარი. მაგრამ, ბევრი რომ აღარა ვთქვათ რა — დიკ დაი-3ერის დრო დადგა.

აპრილის ნესტიანი დღე იყო, გრძელი ღრუბლები ცერად იწელებოდნენ ალბისჰორნის თავზე და მეჩხერ ადგილებში წყალი რინდად იდგა. ციურიხი ბევრი რამით წააგავს ამერიკის ქალაქებს. საფრანგეთიდან ჩამოსვლის მერე იმ ორ დღეს დიკს თითქოს სულ რაღაცა აკლდა, ბოლოს მიხვდა, აქ ვერა გრძნობდა იმ სისავსეს, ფრანგული ქუჩები თუ შესახვევები რომ იწვევდა მასში, იმ შესახვევებს იქით თითქოს აღარაფე-რი იყო. ციურიხში კი სულ გახსოვს, რაც ციურიხს იქითაა — ახურავებს უყურებ და მთის საძოვრებზე და ნახირზე ფიქრობ, წკარუნი გესმის, მწვერვალებს ხედავ და ცხოვრებაც გაღლა, ცისკენ მიიწევს; ალპების ძირში, სათამაშოებისა და ფუნიკულიორების, კარუსელებისა და წყნარად მრეკავი ზარების მხარეში ისე მიწიერი არა გგონია თავი, როგორც საფ-რანგეთში, სადაც, ვენახში ვაზი ფეხებში გედება ლამის.

ზალცბურგში, სადაც ერთხელ რამდენიმე დღე გაატარა, დიკმა მუსიკის საუკუნის ძალა და ზემოქმედება იგრძნო; ციურიხში, უნივერსიტეტის ლაბორატორიებში, როცა ფრთხილად იკვლევდა ტვინის აგებულებას, თავისი თავი თვითონვე სათამაშოების მძერწავად უფრო წარმოედგინა, ვიდრე იმ დაუდეგარ ყმაწვილად, ქარიშხალივით რომ შეიჭრებოდა ხოლმე ჯონ ჰოპკინზის აგურის წითელ კორპუსებში და ვესტიბიულში გიგანტი ქრისტეს ირონიული ღიმილიც კი ვერ აჩერებდა.

მაინც გადაწყვიტა, ორ წელსაც დარჩენილიყო ციურიხში, სათამაშოების კეთება რომ ამად ღირდა, ამაში ეჭვიც არ შეჰ-პარვია, ეს ზედმიწევნით სიზუსტესა და დიდ მოთმინებასაც მოითხოვდა.

ახლა იგი ციურიხის ტბაზე, პროფესორ დომლერის კლინიკაში მიდიოდა ფრანც გრეგოროვიუსის სანახავად. ფრანცი იქ შტატში ითვლებოდა, წარმოშობით კანტონ ვოდან იყო, დიკზე რამდენიმე წლით უფროსი. ტრამვაის გაჩერებაზე დახვდა მას. საინტერესო გარეგნობა ჰქონდა, თვალები —
წმინდანისა, ოღონდ, კალიოსტროს მუქ სახეზე. გრეგოროგიუსების მესამე თაობა — პაპამისი კრეპელინის მასწავლებე-

ლი იყო იმხანად, როცა ფსიქიატრია, როგორც მეცნიერება, ფეხს იკიდებდა. თავმოყვარე, ფიცხ და ზოგჯერ ცხვარივით მშვიდ ფრანცს კარგ ჰიპნოტიზიორად მიაჩნდა თავი, იმათი გვარის წინა თაობაში ნიქიერება ცოტაოდნავ მაინც რომ ჩამ-ცხრალიყო, მისგან ალბათ შესანიშნავი კლინიცისტი დადგე-ბოდა.

კლინიკისკენ დაიძრნენ. მაშინვე დაიწყო ფრანცშა ლაპარაკი: "მიამბეთ რა გადაგხდათ ომში. თქვენც შეიცვალეთ, როგორც სხვები? სახე კი ისევ ისეთი გაქვთ, დაუდეგარი, ამერიკული, ხანი რომ არ ეტყობა".

"ომი შე არ მინახავს, ფრანც, —-ჩემი წერილებიდან მინ-

გდებოდით".

"რა მნიშნელობა აქვს — ჩვენთან კონტუზიით დაავადებულები არიან, შორიდან რომ გაიგონეს საჰაერო დაბომბვის გრუხუნი. ისეთებიცა გვყავს, მხოლოდ გაზეთებს რომ კითხულობდნენ".

"სიგიჟეა".

"შეიძლება, დიკ. მაგრამ ეს კლინიკა მდიდრებისთვისაა და ასეთ გამოთქმებს არა ვხმარობთ. ახლა ერთი გულწრფელად მითხარით, ჩემთან ჩამოხვედით თუ იმ ამერიკელი ქალიშვილის სანახავად?"

ერთმანეთს ცერად გახედეს. ფრანცს ეცინებოდა.

"ცხადია, ყველა წერილი ჯერ მე უნდა მენახა", პროფესიული, თავისი ბოხი ხმითა თქვა ფრანცმა, "მაგრამ, მომჯობინება რომ შეეტყო, დელიკატური არ იქნებოდა ისევ გამეხსნა წერილები. ეს უკვე მხოლოდ თქვენ გეხებოდათ…"

"ესე იგი, გამოკეთდა?" ჰკითხა დიკმა.

"სავსებით, რაც ჩვენთან მოვიდა, მე მებარა მაგისი საქმე, საერთოდ, ბრიტანელი და ამერიკელი პაციენტების უმრავლესობა მე მაბარია. დოქტორ გრეგორის მეძახის ყველა".

"მინდა გითხრათ ყველაფერი, რაც ამ ქალიშვილს შეეხება", თქვა დიკმა. "მე იგი მხოლოდ ერთხელ ვნახე. იმ დღეს,
საფრანგეთში წასვლის წინ გამოსამშვიდობებლად რომ ჩამოვედი თქვენთან, მაშინ პირველად ჩავიცვი უნიფორმა და
ასე მეგონა, სხვა ვიღაცა ვიყავი, ჯერ ვერ შევჩვეოდი და ყვე-

ლაფერი მერეოდა, სალუტს ზოგჯერ რიგით ჯარისკაცსაც კი გაძლევდი ხოლმე".

"დღეს რატომ არა ხართ უნიფორმაში?"

"უჰ, სამი კვირაა დემობილიზებული ვარ. იმას გეუბნებოდით — თქვენ გამოგემშვიდობეთ და ტბასთან რომ პავილიონია, იქით წავედი, ჩემი ველოსიპედი დავტოვე იქ და..."

"კედრებისკენ?" "...შესანიშნავი საღამო იყო, მთვარე აი იმ მთის წვერ-

ზე..."

"კრენცევის თავზე".

"...თვალი ვკიდე, ორნი მიდიოდნენ, ქალიშვილი და მომვლელი ქალი. არც მიფიქრია, კლინიკის პაციენტი თუ იყო. დავეწიე, რომ იმ ქალისთვის მეკითხა, რომელ საათამდე დადიოდა ტრამვაი და მერე ერთი გზით წავედით. ქალიშვილი არაჩვეულებრივად ლამაზი მეჩვენა".

"ახლაც ისეთია".

"ამერიკული უნიფორმა არასოდეს ენახა და ამაზე ჩამომიგდო ლაპარაკი. ჩვეულებრივად ვლაპარაკობდით, როგორც
ყველა, არაფერი შემიმჩნევია..." გაჩუმდა, ნაცნობმა პეიზაჟმა მიიქცია მისი ყურადღება, მერე დაამთავრა: "ოღონდ, ჯერ
მე თქვენსავით გამობრძმედილი არა ვარ, ფრანც; გული მეკუმშება ხოლმე, როცა მშვენიერ გარსს შევყურებ და ვიცი,
რაც იფარება შიგ. სხვა არაფერი, ეს იყო და ეს— მერე კი
წერილები მოდიოდა".

"ამან გადაარჩინა, ეს იყო ყველაზე კარგი რამ მისთვის", პათოსით წარმოთქვა ფრანცმა. "შემთხვევითი ტრანსფარან-ცია; ამიტომ მივანებე თავი საქმეებს და აქ წამოვედი. ჩემთან წავიდეთ, სანამ შევხვდებით, მანამდე მინდა მოგელაპარაკოთ. ისე კი, ახლა აქ არ არის, ციურიხში გავუშვი რაღაცების საყიდ-ლად", ცოტათი ღელავდა. "მომვლელი არ გამიყოლებია, სხვა პაციენტთან — იმის მდგომარეობა არ არის ისე სტაბილუ-რი — ერთად გავგზავნე. მე ვთვლი, რომ მორჩენილია, სავსებით. და ვამაყობ ამ წარმატებით, რასაც თქვენი უნებლიე დახმარებით მივაღწიე".

მანქანა ციურიხის ტბის მიხვეულ-მოხვეულ ნაპირს მიჰყვებოდა, ბოლოს ნაყოფიერ ხეობას დაუყვნენ, მწვანე საძოვრებს აქ ბორცვები სცვლიდა, გორაკებს შვეიცარიული სახალების — შალეების წამახული სახურავები ეკვროდა, ლურჯი ცის ოკეანეზე ცურავდა მზე და უცებ მთელი მშვენიერებით გადაიშალა შვეიცარიული ველი, გადასარკული სივრცითა და ჟივჟივა ხმებით, სიჯანსაღისა და სიმხნევის სურნელებით.

პროფესორ დომლერის კლინიკა, სამი ძველი და ორი ახალი შენობისაგან რომ შედგებოდა და ტბასა და ზეგანშუა მდებარეობდა, პირველ მოდერნიზებულ ფსიქიატრიულ კლინიკად ითვლებოდა, რომელსაც ათი წლის წინათ ჩაეყარა საფუძველი. უცხო კაცი ვერც მიხვდებოდა, რომ ეს თავშესაფარი იყო დაშლილ-დაწეწილი ნერვების ადამიანებისა, ამ ქვეყანას მტრულად და მუქარით რომ უყურებდნენ. ამ ხუთი შენობიდან ორი მათგანი ყრუ კედლით იყო შემოზღუდული, კედლებს ვაზი ევლებოდა და ისე პირქუში შესახედავი აღარა ჩანდა. მზის გულზე, პაპანაქებაში ვიღაცები ნამჯას ფოცხავდნენ; მანქანის ხმაურის გაგონებისთანავე მომვლელი ქალები პატარა თეთრ დროშას აიქნევდნენ ხოლმე — პაციენტებს დაჰყვებოდნენ ბაღის ბილიკზე.

ფრანცმა თავის კაბინეტში შეიყვანა დიკი და სთხოვა ცო-ტა ხანს მოეცადა. მარტო დარჩენილი დიკი კაბინეტში ბოლ-თასა სცემდა. ფრანცის ნივთების — მაგიდაზე უწესრიგოდ მიყორილი წიგნებისა და ფურცლების, მამამისისა და პაპამისის და-წერილი ან მათზე დაწერილი წიგნების, კედელზე დიდის ამ-ბით, შვეიცარიული წესითა და რიგით ჩამოკიდებული, მამის გადიდებული დაგეროტიპის მიხედვით ცდილობდა ფრანცზე თავისი აზრი შეექმნა. კაბინეტი თამბაქოს კვამლით იყო სავ-სე და დიკმა აივნის კარი გააღო, მზის სხივმა ცერად ჩამოჭრა გაკვამლული ჰაერი. ფიქრით იმ ამერიკელ ქალიშვილს გადასწ-ვდა.

დიკმა მისგან ერთი ორმოცდაათი წერილი მაინც მიიღო რვა თვის მანძილზე. პირველი — რაღაც ახსნასა და თავის მართლებას უფრო ჰგავდა, სწერდა, რომ ჯერ კიდევ ამერიკა-ში გაგონილი ჰქონდა, ქალიშვილები წერილებს რომ სწერდ-ნენ უცნობ ჯარისკაცებს. ასე, რომ დოქტორ გრეგორისგან შეიტყო მისი სახელი და მისამართი და იმედი აქვს იგი უარს

არ იტყვის, რომ ხანდახან მიიღოს მოკითხვის ბარათები და . შ. და ა. შ.

წერილის ტონის მიხვედრა ძნელი არ იყო — გადმოღებუ-ლი იყო "გრძელფეხა მამიკოსა" და "მოლი თვალთმაქცი-დან", გასართობი და სანტიმენტალური თხზულებებიდან, რომელთა კითხვა იმ ხანებში მოდაში იყო ამერიკაში. თუმ-ცა, ამ ტონთან თავდებოდა მთელი მსგავსებაც.

წერილები ორ ჯგუფად იყოფოდა, პირველი ჯგუფისა, დაახლოებით დაზავებამდე დაწერილი, აშკარა პათოლოგიური ხასიათისა იყო, დანარჩენები, თითქმის ბოლო წერილის ჩათვლით — მთლად ნორმალური ადამიანისა, რომელიც თანდათან ვითარდება და თავის მდიდარ ბუნებას ავლენს. ბოლო
თვეებში დიკი მიეჩვია და მოუთმენლადაც კი ელოდა ამ წერილებს, ბარ-სიურ-ობის მომქანცველ მოწყენილობას რომ
უქარვებდა — ის კი არა და, უფრო ადრინდელ წერილებშიც
იმაზე მეტი ამოიკითხა, ვიდრე ფრანცმა, რადგან ფრანცი
ყველაფერს ვერ მიხვდებოდა.

"ჩემო კაპიტანო!"

უნიფორმაში რომ დაგინახეთ, ძალიან ლამაზი მეჩვენეთ. მერე ვიფიქრე, მიმიფურთხებია-მეთქი, ფრანგულადაც და გერმანულადაც. თქვენც გაიფიქრეთ ჩემზე, ლამაზიაო, მაგრამ ამას მიჩვეული ვარ და კმარა. თუ კვლავ ჩამოხვალთ, და უხამსი და საძაგელი იქნებით, რაც სულაც არ შეეფერება ჯენტლმენს, იმ აზრით, რასაც ეს სიტყვა ნიშნავს და როგორც მე მასწავლეს, მაშინ, ღმერთი თუ გიშველით მხოლოდ, თუმცა, თქვენ თითქოს სხვებზე უფრო თავდაჭერილი ჩანხართ, და დიდი, ღუნღულა კატასავით ხართ. მე საერთოდ მომწონს ნებიერი ქალური ვაჟები. თქვენ ხართ ქალური? ასეთებს შევხვედრივარ, მაგრამ არ მახსოვს სად.

არ გაბრაზდეთ. უკვე მესამე წერილს გწერთ. გამოგიგზავნით, ან სულაც არ გამოგიგზავნით. მე ხშირად ვფიქრობ მთვარის შუქზე და ბევრი მოწმეც მეყოლებოდა, აქედან რომ შემეძლოს გასვლა.

ამბობენ, რომ თქვენც ექიმი ხართ, მაგრამ თქვენ ხომ კატა ხართ და ეს სულ სხვა რამეა. თავი ძალიან მტკივა, ასე რომ, არ გაბრაზდეთ, აქ რომ ასე შინაურულად ვსეირნობ თეთრ კატასთან ერთად, ვფიქრობ, ეს ყველაფერს აგიხსნით. მე სამ ენაზე ვლაპარაკობ, ინგლისურსაც თუ ჩავთვლით — ოთხზე და თარჯიმნად მუშაობას შევძლებდი, თქვენ რომ ჩემთვის გეშოვათ ადგილი საფრანგეთში, თავს გავართმევდი ალბათ, თასმებით თუ შემკრავდნენ და დამაბამდნენ, როგორც იმ ოთხშაბათს. დღეს კი შაბათია, თქვენ შორსა ხართ, იქნებ მოგკლეს კიდევაც.

ჩამოდით ერთ დღეს. მე ხომ სულ აქ ვიქნები, ამ მწვანე გორაკზე, სანამ ჩემს ძვირფას მამასთან წერილის მიწერის

უფლებას მომცემენ.

მაპატიეთ, დღეს ჩემს თავს არ ვეკუთვნი. მერე მოგწერთ, როცა უკეთ ვიქნები.

მოგიკითხავთ,

ნიკოლ უორენი.

მაპატიეთ, არ გაბრაზდეთ ჩემზე".

"კაპიტანო დაივერ: ვიცი, როცა ნერვები ისეთ დღეში აქვს ადამიანს, როგორც მე ახლა, ძნელია რამეს თავი მოაბა, მაგრამ მინდა, ჩემზე ყველაფერი იცოდეთ. როცა ეს დამემართა, შარშან, ჩიკაგოში, ანდა, შესაძლოა სულაც შარშან არა, არ მახსოვს, მაშინ ქუჩაში აღარ გამოვდიოდი, აღარც მსახურს ველაპარაკებოდი და ძალიან მინდოდა, მჭირდებოდა, რომ ვიღაცას გაეგებინებინა, რა ამბავი იყო ჩემ თავს. ვისაც ესმოდა, ის მოვალე იყო აეხსნა ყველაფერი. ბრმას ხელს ჩასჭიდებენ და ისე მიჰყავთ, რაკი თვითონ არ შეუძლია სიარული. მეტყოდნენ ხოლმე, მაგრამ არკი დაამთავრებდნენ, მე კი ისე ვიყავი არეული, ორჯერ ორი რამდენი იყო ვერა ვხვდებოდი. ერთი კარგი კაცი გამოჩნდა — ფრანგი ოფიცერი, და იმას ესმოდა. ყვავილი მომცა და მითხრა, ეს უფრო პატარა, უფრო გამოუცდელიაო. ჩვენ დავმეგობრდით. მერე წამართვა. მე თანდათან უარესად ვხდებოდი და ვერაფერს მიხსნიდნენ. სიმღერაა — ჟანა დ'არკზე — იმას მიმღეროდნენ ხოლმე, მე კი მწყინდა და ვტიროდი იმიტომ, რომ მაშინ არეული არ მქონდა თავი. მირჩევდნენ, სპორტს მივყოლოდი, მაგრამ არ მინდოდა. მერე ერთ დღეს სახლიდან გავედი, მიჩიგანის ბულგარზე, შორს წავედი, რამდენიმე მილი გავიარე. ავტომობილით დამდევდნენ, მაგრამ მე არ მინდოდა შიგ ჩაჯდომა. ბოლოს და ბოლოს ძალით შემათრიეს და ამის მერე შომვლელი
მომიჩინეს. მერე და მერე ვხვდებოდი რაც იყო, იმიტომ რომ
უკვე ვგრძნობდი, შემეძლო დამენახა, რაც ემართებოდათ
სხვებს. ახლა თქვენ ყველაფერი იცით. აქ მე არასოდეს მოვრჩები, ექიმები არ მასვენებენ, ერთთავად მეკითხებიან, მე კი
მინდა დამავიწყდეს. ასე რომ, დღეს მამას მივწერე, ჩამოვიდეს და აქედან წამიყვანოს. ძალიან კარგია, ასე რომ გიზიდავთ თქვენი საქმე, საინტერესო უნდა იყოს ხალხის გასინჯვა და მერე ყველაზე რაღაცის თქმა".

და კიდევ, ახლა სხვა წერილიდან:

"შეიძლებოდა ერთი გასინჯვა გამოგეტოვებინათ და ჩემთვის წერილი მოგეწერათ. ამას წინათ გრამოფონის ფირფიტები გამომიგზავნეს იმ შემთხვევისთვის, თუ ჩემი გაკვეთილი დამავიწყდებოდა, მე კი ყველა მივამსხვრიე, რის გამოც
მომვლელი ქალი აღარ მელაპარაკება. ფირფიტები ინგლისურ
ენაზე იყო, იმას მაინც არაფერი ესმოდა. ჩიკაგოში ერთმა
ექიმმა მითხრა, სიმულანტი ხარო, სინამდვილეში იმის თქმა
უნდოდა, რომ მე მეექვსე ტყუპი ვიყავი და ასეთი ჯერ არ
შეხვედროდა თავის ცხოვრებაში. მაშინ ძალიან არეული ვიყავი და სულ ერთი იყო, რას მეტყოდნენ, მეექვსე ტყუპი
გოგო კი არა, თუნდაც მემილიონე ეთქვათ.

იმ საღამოს ხომ თქვით, თამაშს გასწავლით და არ მოგეწყინებათო. იცით, ზოგჯერ მგონია, რომ მთავარია სიყვარული, იგია ყოვლისშემძლე, ან, თუ არ არის, უნდა იყოს. ასეა თუ ისე, მე მიხარია, რომ გამოცდები ბევრ დროს გართმევთ და უქმად არა ხართ.

# Toute à vous1

ნიკოლ უორენი".

იყო სხვა წერილებიც, რომელთა აბნეულ რიტმშიც უფრო შემაშფოთებელი უმწეობა ჩანდა.

"ძვირფასო კაპიტანო დაივერ:

გწერთ იმიტომ, რომ სხვას ვერავის მივმართავ და თუ მეც

<sup>1</sup> თქვენი (ფრანგ.).

კი, ასეთი ავადმყოფი, გხედავ ჩემს გამოუვალ და უაზრო მდგომარეობას, თქვენთვის ხომ მით უფრო ცხადია იგი. ფსიქიკურმა აშლილობამ გაიარა, მაგრამ მთლად განადგურე-ბული ვარ და დამცირებული, არ გიცი, ამას თუ მიაღწიეს აქ. ჩემი ნათესავები გულმშრალად იქცევიან, იმათგან არც შველას ველი და არც თანაგრძნობას. მეტი აღარ შემიძლია, მეყო. აქ თუ დავრჩი, ტყუილუბრალოდ დავკარგავ დროს, საბოლოდ გავინადგურებ ჯანმრთელობას და თავს მოვიტყუებ, თითქოს, რაც ჩემ თავს არის, იმის შველა შეიძლებოდეს. სულ ერთია, ვერ მოვრჩები.

გამომკეტეს ამ შენობაში, რომელიც ალბათ საგიჟეთი უფროა და მხოლოდ იმიტომ, რომ კაცი არ აღმოჩნდა, სი-მართლე ეთქვა ჩემთვის. ყველაფერი რომ მცოდნოდა, ისე, როგორც ახლა ვიცი, თვითონვე მოვერეოდი თავს, საამისოდ ძალა მეყოფოდა, მაგრამ იმათ, ვისაც ჩემი თვალის ახელა შეეძლოთ, არ მოინდომეს, ახლა კი, როცა ვიცი და ასე ძვირად დამიჯდა ყველაფრის გაგება, ძაღლებივით კუდი ამოიძუ-ეს, უნდათ, რომ ისევ უწინდებურად მეგონოს. მეტადრე ერთა მოწადინებული, ძალიან ცდილობს, მაგრამ, ახლა მე უკ-ვიცი.

ძალიან მომეწყინა, მარტო ვარ, მოწყვეტილი მეგობრებსა და ნათესავებს, რომლებიც ოკეანის გადაღმა არიან, მთელი დღეები დაკარგულივით დავბორიალობ. ჰქენით სიკეთე, მიშოვეთ თარჯიმნის ადგილი (ფრანგული და გერმანული მშობლიურ ენასავით ვიცი, იტალიური — საკმაოდ კარგად და ცოტა ესპანურიც). წითელი ჯვრის საველე ჰოსპიტალში ვიმუშავებდი, ან მედიცინის დად სადმე — ხომ შეიძლება, რალაც კურსს გავივლიდი და ვისწავლიდი".

და კიდევ:

"ჩემს ამბავს გიყვებით და როგორც შემიძლია ისე გიხსნით ყველაფერს, თუ არ მეთანხმებით, ის მაინც ხომ შეგიძლიათ, რომ თქვენი აზრი მითხრათ. ჩემთვის ამას მნიშვნელობა აქვს, იმიტომ, რომ თქვენ კეთილი კატის სახე გაქვთ, აქაურებივით სულელური კი არა, აქ ალბათ ასეა მიღებული. დოქტორმა გრეგორიმ თქვენი ფოტო მომცა. სურათზე ისეთი ლამაზი არა ხართ, როგორც უნიფორმაში. თუმცა უფრო ახალგაზრდა ჩანხართ". "Mon capitaine:

ძალიან მესიამოვნა თქვენი ღია ბარათის მიღება. მიხარია, რომ ასე მოგწონთ მედიცინის დების ჩაჭრა გამოცდებზე — ო, არა, ყველაფერს, რასაც მწერთ, ძალიან კარგად ვიგებ. ოღონდ, იმ დღიდან, როცა პირველად დაგინახეთ, ვიფიქრე, რომ თქვენ სხვებს არა ჰგავდით".

"შვირფასო კაპიტანო დაივერ:

დღეს ერთსა ვფიქრობ, ხვალ კი სხვას. მთელი ჩემი უბედურება ესაა, და კიდევ ის, რომ მინდა ყველას ჯიბრით მოვექცე და ზომა აღარ ვიცი ხოლმე. დიდი სიამოვნებით მივმართავდი ვინმე ფსიქიატრს, ისეთს, რომელსაც თქვენ მირჩევდით. აქ ყველანი აბაზანაში წვანან და მღერიან: "ითამაშე შენს ეზოში, ითამაშე". მაგრამ მე არა მაქვს ჩემი ეზო,
სადაც თამაში შემეძლებოდა და საითაც არ უნდა გავიხედო,
საიმედოს ვერაფერს ვხედავ. გუშინ ისევ თავისას მოჰყვნენ,
ისევ საშაქარლამოში, და გამყიდველს კინაღამ საწონი დავარტყი, მაგრამ დამიჭირეს.

მეტს აღარ მოგწერთ. ყველაფერი მერევა თავში".

მერე მთელ თვეს აღარ მოსულა წერილი და უცებ ასეთი ცვლილება:

"...თანდათან ვუბრუნდები ცხოვრებას..."

"...შევყურებ ყვავილებს, ღრუბლებს..."

"...ომი გათავდა, მე კი, მგონია, არც ვიცოდი, რომ ომი იყო..."

"...თქვენ ძალიან კეთილი ხართ! და ალბათ ძალიან ჭკვიანიც, თუმცა თეთრ კატას ჰგავხართ, ისე კი, არ გეტყობათ იმ სურათზე, დოქტორმა გრეგორიმ რომ მომცა..."

"...დღეს ციურიხში ვიყავი, რა უცნაურია ისევ ქალაქში სიარული..."

"...დღეს ბერნში წავედით, ძალიან მომეწონა, რომ ყველგან საათებია..."

"...დღეს კარგა მაღლა ავედით მთაზე და ასფოდელები და ედელვაისებიც კი დავკრიფეთ..."

მერე და მერე იშვიათად მოდიოდა წერილები, მაგრამ დიკი, როგორც წესი, ყველა წერილზე უგზავნიდა პასუხს. ერთ წერილში ნიკოლი სწერდა:

"ნეტავი ვინმეს შევუყვარდე, ისე, დიდი ხნის წინათ რომ შევუყვარდებოდი ხოლმე ბიჭებს, სანამ ავად გავხდებოდი, მაგრამ, ასეთ რამეზე, ალბათ წლები გავა და ვერც ვიოცნებებ".

მაგრამ დიკი თუ რაიმე მიზეზით პასუხს დააყოვნებდა, მაშინვე, შეყვარებულის ციებ-ცხელებასავით, ნიაღვარივით მოასკდებოდა მღელვარება: "იქნებ თავი მოგაბეზრეთ... ალბათ არ შეიძლება ასე ჩაციება... მთელი ღამე იმაზე ვფიქრობდი, ვაითუ ავად გახდა-მეთქი".

დიკს მართლაც გრიპი შეყროდა, რის მერეც კარგა ხანს იყო მოთენთილი და გულგრილი თითქმის ყველაფრისადმი. მერე კი ნიკოლის შორეულ სახეს შტაბის ტელეფონისტი ქალიშვილი გადაეფარა, უისკონსინიდან რომ ჩამოვიდა ბარსიურ-ობში და სარეკლამო პლაკატის ქალიშვილებივით წითელი ტუჩები ჰქონდა, ოფიცრების სასაუზმეში მას ორაზროვანი სახელი, "კომუტატორი" შეარქვეს.

ფრანცი თავის კაბინეტში დაბრუნდა, ეტყობოდა კმაყოფილი იყო. დიკმა კვლავ გაიფიქრა, შესანიშნავი კლინიცისტი დადგებოდაო. ხან რიხით, ხანაც წყნარად, ფერებით რომ დაარიგებდა ხოლმე პაციენტებსა თუ მომვლელებს, ფრანცს ეს ზრუნვითა და გულით კი არა, უფრო უზომო, თუმცა უწყინარი პატივმოყვარეობით მოსდიოდა. თავის ჭეშმარიტ ემოციებს ლაგამსა სდებდა და ეგრე იოლად არ ავლენდა.

"იმ ამერიკელ ქალიშვილზე ვილაპარაკოთ, დიკ", თქვა მან. "თქვენზეც და ჩემზეც, რა თქმა უნდა, მაგრამ ეს მერე იყოს, ახლა ქალიშვილს მივუბრუნდეთ. კარგა ხანია შემთხ-ვევას ველი და ვილაპარაკოთ".

ერთ ქაღალდებით სავსე ყუთში რაღაცა მოიძია, დასტად ამოიღო ქაღალდები, გადახედა, მერე მაგიდაზე დააწყო და ისე, რომ აღარსად ჩაუხედავს, მოყოლა დაიწყო.

## III

დაახლოებით წლინახევრის წინათ დოქტორმა დომლერმა საკმაოდ ბუნდოვანი წერილი მიიღო ლოზანაში მცხოვრები ერთი ამერიკელი ჯენტლმენისაგან, ვინმე მისტერ დევრე უო-

რენისაგან — ჩიკაგოელი უორენებიდან. მიწერ-მოწერის მერე დათქმულ დღეს მისტერ უორენი თავის თექვსმეტი წლის ქალიშვილთან ერთად მოვიდა კლინიკაში. ქალიშვილს ნიკოლი ერქვა, აშკარად ემჩნეოდა, კარგად არ იყო და სანამ მისტერ უორენი და დოქტორი ლაპარაკობდნენ, თანმხლებმა მოწყალების დამ ხეივანში გაიყვანა.

მისტერ უორენი, მეტად ლამაზი მამაკაცი, ორმოცი წლისაც არ იქნებოდა. შესანიშნავი აღნაგობის, ზუსტად ამერიკელის ტიპი, მაღალი, მხარბეჭიანი, წარმოსადეგი, მეტად ეფექტური მამაკაცი, როგორც მერე უთხრა დოქტორმა დომლერმა ფრანცს. ჟენევის ტბაზე მზიან დღეებში ნიჩბოსნობისგან დიდი ნაცრისფერი თვალები დაძარღვოდა. ყველაფერზე ეტყობოდა, ამქვეყნიურ სიამეთაგან არაფერს იკლებდა. საუბარი გერმანულად წარიმართა, როგორც გამოირკვა, სწავლა გეტინგენში მიეღო. აშკარად დელავდა და უჭირდა იმაზე ლაპარაკი, რაც აწუხებდა.

"დოქტორო დომლერ, ჩემი ქალიშვილი არ არის კარგად, გონება არეული აქვს, ბევრ სპეციალისტს გავასინჯე, მოწყალების დაც ავუყვანე, გვირჩიეს სიმშვიდე და დასვენება და ამ გზითაც უმკურნალეს, მაგრამ არაფერმა უშველა. დაჟინე-ბით მირჩიეს თქვენთვის მომემართა".

"ძალიან კარგი", თქვა დოქტორმა. "ახლა კი, გთხოვთ ყველაფერი მიამბოთ, თავიდან ბოლომდე".

"არ ვიცი რით დაიწყო, რამდენადაც ვიცი, არც ჩემსა და არც ჩემი ცოლის გვარში სულით ავადმყოფი არავინ ყოფილა. თორმეტი წლის ნიკოლი უდედოდ დარჩა, გუვერნანტების ამარა, და შეიძლება ითქვას, რომ მე ვიყავი მისთვის ორივე, მამაც და დედაც, ორთავე".

ამის თქმაზე ძალიან აღელდა, თვალებზე ცრემლები მოადგა და დოქტორმა დომლერმა ახლაღა შეამჩნია, ვისკი დაელია.

"შესანიშნავი ბავშვი იყო— ყველა გიჟდებოდა მასზე; ჭკვიანი, ლაღი და მხიარული, უყვარდა კითხვა, ხატვა, ცეკ-ვა, როიალზე დაკვრა; მახსოვს, ცოლი მეუბნებოდა ხოლმე, ჩვენი შვილებიდან მხოლოდ ნიკოლი არ ტირისო ღამით. მე უფროსი ქალიშვილიც მყავს, ვაჟიშვილიც მყავდა, პატარა

მოგვიკვდა, მაგრამ ნიკოლი — ნიკოლი ყოველთვის — ყოველთვის..."

სიტყვა გაუწყდა და დოქტორი დომლერი მიეშველა: "ყოველთვის სავსებით ნორმალური, ჯანმრთელი და ხალისიანი ბავშვი იყო".

"დიან, დიახ, სავსებით".

დოქტორი დომლერი იცდიდა. მისტერ უორენმა თავი გადააქნია, ღრმად ამოიოხრა, დოქტორ დომლერს ცერად გახედა და ისევ იატაკს ჩააშტერდა.

"რვა თვის წინათ, ან შეიძლება ექვსი თვის, თუ ათი თვის წინათ — არ მახსენდება სად ვიყავით, მაშინ სადა ვცხოვრობ-დით, როცა ეს დაემართა — რაღაც უაზროდ, ახირებულად იქ-ცეოდა — ჩემმა უფროსმა ქალიშვილმა შეამჩნია და მითხრა, მე ვერაფერს ვატყობდი, ჩემთვის ისევ ის ნიკოლი იყო", საჩ-ქაროდ დაუმატა, თითქოს ვიღაცამ ამას რაღაცა დააბრალა. "ისეთივე საყვარელი, პატარა გოგო. პირველად იმ ლაქიას ამბით დაიწყო".

"აჰა, დიახ". თქვა დოქტორმა დომლერმა და შეჭაღარავებული თავი დარბაისლურად, ისე დაუქნია, თითქოს უკვე იცოდა, შერლოკ ჰოლმზივით, რომ ადრე თუ გვიან ლაქია უნდა ეხსენებინათ, ზუსტად ლაქია და არა სხვა ვინმე.

"ერთი ლაქია მყავდა, წლების მანძილზე იყო ჩვენთან, შვეიცარიელი, სხვათა შორის". თავი ასწია და შეხედა დოქტორ დომლერს, გეგონება პატრიოტული აღტაცების გამოვლენას ელისო მისგან. "და ნიკოლს მოეჩვენა, რომ ის ლაქია დასდევდა. ახლა ეჭვიც არ მეპარება, რომ ეს ნონსენსია, მაგრამ მაშინ დავიჯერე და დავითხოვე".

"კერძოდ, რას აბრალებდა მას თქვენი ქალიშვილი?"

"საქმეც ის არის რომ ექიმებმა ვერაფერი ათქმევინეს. ისე შეაცქერდებოდა ხოლმე, თითქოს ისედაც უნდა მიხვედ-რილიყვნენ. ხმას არ იღებდა. მაგრამ ცხადი იყო, საქმე ეხე-ბოდა რაღაც უხამს ცდას ნიკოლის მიმართ. ეს აშკარა იყო".

"გასაგებია".

"მე წამიკითხავს მარტოხელა ქალების ხანდახან აკვიატებულ აზრებზე, თითქოს საწოლის ქვეშ, ან კარს უკან კაცი იმალება და ბევრი ამისთანა. მაგრამ, ნიკოლს რად უნდა დამართოდა ეს? თაყვანისმცემელი ბევრი ჰყავდა, ოღონდაც თვითონ სდომებოდა და ვინ არ შეიყვარებდა. მაშინ ვილაში ვცხოვრობდით, ლეიკ ფორისტში — საზაფხულო აგარაკია ჩიკაგოსთან, მთელი დღეები ბიჭებთან გოლფსა თუ ჩოგ-ბურთს თამაშობდა. ბევრი მათგანი ლამის ჭკუას კარგავდა ნიკოლისთვის".

უორენი ლაპარაკობდა, ხმელ-ხმელი, ხანდაზმული დოქტორი დომლერი კი ფიქრში ხანდახან ჩიკაგოს იხსენებდა. ერთ დროს, ახალგაზრდობაში იქ გადასვლა შესთავაზეს, შეეძლო წასულიყო, ჩიკაგოს უნივერსიტეტის სამეცნიერო საზოგადოების წევრი და დოცენტი იქნებოდა და თუ დათანხმდებოდა, იქნება მდიდარი კაციც გამხდარიყო, თავისი კლინიკის პატრონი. აქ კი წილშია სხვებთან, აქციების რაღაცა პაკეტი თუ აქვს. ვერ გაბედა, იქაური ველები რომ წარმოიდგინა, გადაშლილი პურის ყანები და ის უკიდეგანო პრერიები, გაიფიქრა, რომ თავისი ცოდნა არ ეყოფოდა, ვერ გასწვდებოდა იმხელა სივრცეს და უარი თქვა. მაგრამ მაშინ ბევრი რამ წაიკითხა ჩიკაგოზე, არმორების, პალმერების, ფილდების, კრეინების, უორენების, სუიფტების, მაკკორმიკების და ბევრ სხვათა ძლიერ და გავლენიან გვარებზე. იმის მერე ჩიკაგოდან და ნიუ-იორკიდან ბევრი პაციენტი ჰყოლია იმათ ფენიდან.

"თანდათან უარესად ხდებოდა". განაგრძობდა უორენი. "შეტევები დაეწყო და რაღას არ იძახდა — მხოლოდ შეშლი-ლი, შეშლილი თუ იტყოდა იმას... უფროსმა დამ სცადა ზოგი რამ ჩაეწერა. ნახეთ" — დომლერს რამდენჯერმე გადაკეცი-ლი ფურცელი გაუწოდა. "ბევრი რამ კაცებზეა, თითქოს დას-დევდნენ, არ ასვენებდნენ, ზოგი უცნობი, ზოგი ისეთი, ვი-საც კარგად იცნობდა, ქუჩაში გამვლელები — ყველა..."

კიდევ დიდხანს ლაპარაკობდა თავიანთ დარდსა და მწუხარებაზე, ყველაფერზე, რაც გადახდათ, იმაზე, თუ რა საშინელებაა ასეთი უბედურების დატრიალება ოჯახში, იმაზე რომ მკურნალობამ ამერიკაში უნაყოფოდ ჩაიარა და ბოლოს იმაზე, რომ იმ იმედით, მდგომარეობა შეიცვლებაო, არ შეუშინდა წყალქვეშა ბლოკადას და ქალიშვილი შვეიცარიაში ჩამოიყვანა.

"— შტატების კრეისერით", ცოტა ქედმაღლურად დაა-Scanned by CamScanner ზუსტა. "ბედნიერი შემთხვევის წყალობით შევძელი ამის მო ხერხება. შეიძლება ისიც დავუმატო, რომ", თითქოს თავ იმართლებსო, ისე გაიღიმა, "როგორც იტყვიან, რა სათქმე ლია, ფული არის და…"

"ცხადია". მშრალად შენიშნა დოქტორმა დომლერმა, კარ გად ვერ გაეგო, რად ან რას ატყუებდა ეს კაცი. ან, თუ არ ტყუოდა, მაშინ რა ხდებოდა, მთელი ოთახი რად ივსებოდა სიყალბით მისი საუბრისა, იმის ფიგურით — ტვიდის კოს ტიუმით სპორტსმენივით დაუდევრად რომ მიწოლილიყო სა ვარძელში? გარეთ, თებერვლის დღის ბურუსში ტრაგედიტრიალებს, პაწაწინა ჩიტს ფრთები მოსტეხია, აქ კი რაღაც ისე არ არის, სხვა ამბავია.

"ახლა თქვენს ქალიშვილს მინდა ველაპარაკო — ცოტ ხნით, სულ რამდენიმე წუთს", თქვა დოქტორმა დომლერმა დ ინგლისურ ენაზე განაგრძო საუბარი, თითქოს ეს უფრო მია ახლოებდა უორენთან.

მერე, როცა უორენმა ქალიშვილი კლინიკაში დატოვა და თვითონ ისევ ლოზანას დაბრუნდა, დოქტორმა დომლერმა და ფრანცმა ნიკოლის ავადმყოფობის ისტორიაში ჩაწერეს: "დიაგანოზი: შიზოფრენია. მწვავე სტადია, მდგომარეობა თანდათან უარესდება. დაავადების სიმპტომია მამაკაცების შიში, რაც ორგანული არ არის... პროგნოზი ჯერ გაურკვეველია".

და შეუნელებელი ინტერესით ელოდნენ დაპირებისამებტ როდის ჩამოვიდოდა მისტერ უორენი კლინიკაში.

მისტერ უორენი აგვიანებდა, კიდევ ორი კვირის მერე დოქტორმა დომლერმა წერილი მისწერა და რაკი პასუხი არ მიიღო, დაუშვა ისეთი რამ, რაც იმ დროისთვის სიგიჟედ ჩაითვლებოდა — ვევეს "გრანდ ოტელთან" ტელეფონით ლაპარაკი შეუკვეთა. მისტერ უორენის კამერდინერმა უპასუხა, მისტერ უორენი დღეს მიემგზავრება ამერიკაში და ემზადებათ. მაგრამ იმის გაფიქრებაზე, კლინიკის ხარჯების სპეციალურ დავთარში ამ ლაპარაკისთვის ორმოცი შვეიცარიული ფრანკი ჩაიწერებაო, დოქტორ დომლერს ტიულრელი გვარდიელის სისხლმა უყივლა და მისტერ უორენი აიძულა ტელეთ ფონთან მოსულიყო.

"საჭიროა თქვენი ჩამოსვლა — უდავოდ. თქვენი ქალი-

შვილის ჯანმრთელობა ამაზე ჰკიდია. ვერავითარ პასუხისმგებლობას მე ვერ ვიკისრებ".

"მაგრამ დოქტორო, თქვენთან რისთვისღა მოვიყვანე, მე სასწრაფოდ გამომიძახეს შტატებში!"

დოქტორი დომლერი მიჩვეული არ იყო ასეთ შორ მანმილზე ლაპარაკს, მაგრამ მაინც შეძლო ისე ურყევად წაეყენებინა თავისი ულტიმატუმი ტელეფონში, რომ შეშინებულმა ამერიკელმა ხაზს იქით ვერ გაუძლო და დათმო. ციურიხის კლინიკაში მეორედ ჩამოსული უორენი ოცდაათი წუთის მერე დანებდა. მოხდენილ პიჯაკქვეშ ძლიერი მხრები
უთრთოდა ყრუ ქვითინისგან, თვალები ჟენევის ტბაზე ჩამაგალ მზეზე მეტად შეუწითლდა და ფრანცმა და დომლერმა
შემზარავი ამბავი მოისმინეს.

"თვითონაც არ ვიცი, რანაირად მოხდა", ჩახლეჩილი ხმით ლაპარაკობდა. "თვითონაც არ ვიცი, არ ვიცი — ჯერ კიდევ ბავშვი იყო, დედა რომ მოუკვდა და დილაობით ჩემთან იწვა ხოლმე, ზოგჯერ ჩაეძინებოდა კიდევაც, ძალიან მენანებოდა საბრალო პატარა. მერე ერთად ვმოგზაურობდით, ავტომო-ბილითა და მატარებლით, დავდიოდით ხელიხელჩაკიდებული და რაღაცას მიმღეროდა ხოლმე. ზოგჯერ ერთმანეთს ვეტყოდით: "მოდი დღეს არავის შევხედოთ, ეს დილა მხოლოდ ჩვენი იყოს — შენ და მე, სხვა მეტი არავინ გვინდა". მწარე სიცილი გაერია ხმაში, "ხალხი, ჩვენი შემხედვარე, ტიროდა თითქმის, ნახეთ, რა შესანიშნავი მამა-შვილიაო. შეყვარებულებსა ვგავდით და — ერთხელაც მართლა გავხდით შეყვარებულები — ათი წუთის მერე მზად ვიყავი ტყვია დამეხალა, მაგრამ, ეტყობა, ჩემნაირ წყეულსა და გადაგვარებულს არ შესწევს ამის ძალა".

"მერე?" იკითხა დოქტორმა დომლერმა და ისევ ჩიკაგოს დაუბრუნდა ფიქრით, ის წყნარი, ფერწასული ჯენტლმენი გა-ახსენდა, პენსნეთი, ისე ყურადღებით რომ აცქერდებოდა მას ამ ოცდაათი წლის წინათ, ციურიხში. "გაგრძელდა ეგ ამბა-ვი?"

"ო, არა, არა! მაშინვე თითქოს ყინულად იქცა, მხოლოდ ამას ამბობდა, "არაფერია, მამიკო, არაფერია, ნუ ჯავრობ, არაფერია".

"შედეგმა ხომ არ იჩინა თავი?"

"არა". ერთხელაც აქვითინდა, რამდენჯერმე მოიხოცა

ცხვირი. "თუ იმას არ ჩავთვლით, რომ აქ არის ახლა".

დოქტორმა დომლერმა ბოლომდე მოისმინა, ბურჟუაზიუ. ლი ინტერიერის ტრადიციულ ღრმა სავარძლის ზურგს მიე. ყრდნო და თავისთვის ლამის იღრიალა: "ხეპრე!" ამ ოცი წლის მანძილზე იშვიათად რომ ასეთი არამეცნიერული დასკვნის გამოტანის უფლება მიეცა თავისი თავისთვის. მერე ეს უთხრა:

"მინდა ციურიხში, ოტელში გაათიოთ ღამე, დილით კი აქ

მოხვიდეთ და მნახოთ".

"მერე?"

დოქტორმა დომლერმა ისე გაშალა ხელები, გოჭი ჩაეტეო-და შიგ.

"ჩიკაგო", ვარაუდით თქვა.

#### IV

"ამის მერე უკვე გასაგები იყო რა შემთხვევასთანაც გვქონდა საქმე", თქვა ფრანცმა. "დომლერმა უორენს უთხრა, რომ დიდი ხნით უნდა დაშორებოდა ქალიშვილს, სულ ცოტა ხუთი წლით მაინც, და მხოლოდ ამ პირობით ავიყვანდით. პირველი მარცხისა და დათმობის მერე, უორენს, ეტყობოდა ყველაზე მეტად ის აწუხებდა, რომ ამერიკამდე არ ჩაეღწია ამ ამბავს. მკურნალობა დავადგინეთ და დაველოდეთ. პროგნოზი ცუდი იყო — თავადაც იცით, მორჩენის პროცენტი ამ ასაკში ძალიან დაბალია".

"პირველი წერილები უიმედო იყო", დაეთანხმა დიკი.

"თანაც მეტად ნიშანდობლივი, ვყოყმანობდი კიდევაც პირველი წერილის გამოგზავნაზე, მაგრამ მერე ვიფიქრე, იცოდეს-მეთქი დიკმა, რომ აქ საქმეს ვაკეთებთ. ამ წერილებ-ზე გამოხმაურება დიდსულოვნება იყო მართლა".

დიკმა ამოიოხრა.

"ისეთი კარგი სახე აქვს — რამდენიმე სნეპშოტი¹ გამომიგზავნა, ისედაც, ერთ თვეს მაინც უსაქმოდ ვიყავი ბარ-

<sup>1</sup> მომენტური, სახელდახელოდ გადაღებული ფოტოსურათი (ინგლ.). Scanned by CamScanner

სიურ-ობში. თანაც ბევრს არაფერს ვწერდი, მხოლოდ ამას თუ: "ჭკვიანად იყავით და ექიმებს გაუგონეთ".

"ესეც კმაროდა — ვიღაცა ჰყავდა კლინიკის გარეთ, ვიღაც, ვისზეც ფიქრი შეეძლო. მანამდე — არავინ, მხოლოდ უფროსი და, ვისთანაც, ეტყობა, მაინცდამაინც დურად ვერ არის. გარდა ამისა, მისი წერილების კითხვა გვეხმარებოდა იმათში მთელი პროცესი და მდგომარეობა ვლინდებოდა".

"კარგია".

"ხედავთ რა მოხდა? თავი თანამზრახველად მიიჩნია, მაგრამ ეს არც აქეთ და არც იქით, ისე არსებითი არ არის, მხოლოდ ფსიქიკის თანდაყოლილი სიმყარისა და ხასიათის ძალის
გასარკვევად თუ გამოგვადგება. ჯერ — ეს შოკი. მერე პანსიონში მიაბარეს და იქ, ტოლსწორების საუბრების გავლენით
თანამოზიარის აზრი მოიშორა, ეს — აშკარა თავდაცვის გამო.
აქედან კი ძნელი არ იყო ჩასრიალება ილუზიების სამყაროში,
სადაც ყველა მამაკაცი ბოროტია და რაც უფრო მეტად გიყვარს და რაც უფრო მეტად მიენდობი, მით უფრო ვერაგები
არიან..."

"როდისმე თუ ულაპარაკია იმ საშინელებაზე, რაც დაემართა?"

"არა, ისე კი, კაცმა რომ თქვას, დაახლოებით ოქტომბერში, თითქოს ნორმალურობას რომ დაუბრუნდა, — გაგვიჭირდა. ოცდაათი წლის რომ ყოფილიყო, შეიძლებოდა დავლოდებოდით, რომ თვითონვე შეძლებდა საბოლოოდ მომჯობინებას, მაგრამ, რაკი ასეთი ნორჩი იყო, გვეშინოდა, 
გულმრუდე არ დარჩენილიყო. ასე რომ, დოქტორმა დომლერმა გულახდილად უთხრა: "ახლა ყველაფერი თქვენზეა, 
არავითარ შემთხვევაში არ უნდა დაუშვათ, რომ ცხოვრება 
თქვენთვის დამთავრდა — პირიქით, მხოლოდ ახლა იწყება". 
და ასე შემდეგ და ამგვარად. გონება უჭრის და დოქტორმა 
ფროიდიც კი მისცა წასაკითხად — რაღაცა, მაინცდამაინც 
ბევრი არა, და დაინტერესდა. ერთი სიტყვით, აქ ყველას ნებიერია და ყველა ეფერება. მაგრამ ბუნებით გულჩახვეულია". დაუმატა ფრანცმა და ცოტა შეყოყმანდა: "კარგი იქნებოდა გვცოდნოდა, ბოლოდროინდელ წერილებში, თვითონ

რომ აგზავნიდა ციურიხიდან — არის თუ არა რამე ისეთი, რაც მის გუნებასა და მომავალზე მიანიშნებს".

დიკი ჩაფიქრდა.

"არის და არც არის. შემიძლია გაგანდოთ ეს წერილები, თუ გნებავთ. მათში იმედიც სჭვივის და სიცოცხლის წყურფილიც. საკმაოდ რომანტიკულიც კი. ხანდახან "წარსულზეა ლაპარაკობს, მაგრამ ამ სიტყვას იმ ხალხივით ხმარობს, ციახეში რომ მჯდარა, როცა ვერ გაიგებ რაზეა ლაპარაკი, ჩადენილ დანაშაულზე, ციხეზე თუ მართლა წარსულზე. მაგრამ ბოლოს და ბოლოს, ვინა ვარ მე მისთვის? მანეკენი, ჩალის ფიტული".

"ცხადია, მე მესმის თქვენი მდგომარეობა და ერთხელაც მინდა მადლობა გითხრათ. ამიტომაც მინდოდა მენახეთ მანამ, სანამდე შეხვდებოდით".

დიკმა გაიცინა.

"გგონიათ, დამინახავს თუ არა, მაშინვე მომაფრინდება?" "არა, ეგ არა. მე ძალიან გთხოვთ ფრთხილად იყოთ, თქვენ

ქალებს მოსწონხართ, დიკ".

"მაშინ, ღმერთმა დამიფაროს, მით უარესი! მხოლოდ ფრთხილად ვიყო კი არა, შევეცდები თავი კიდევაც შევაზიზ-ლო. შეხვედრამდე ნიორს გავღეჭავ, გაუპარსავი მივალ და ნახავთ, ჩემი დანახვისას გაქცევა და დამალვა თუ არ მოუნ-დეს".

"არა, ნიორი არ გინდათ!" სერიოზულად შეშფოთდა ფრანცი. ამით შეიძლება თქვენს კარიერას ავნოთ. თქვენ ალბათ ხუმრობთ".

"— ერთი ფეხით კოჭლობაც შემიძლია, თანაც, ამ გახსენებაზე, იქ, სადაც ახლა ვცხოვრობ, სააბაზანო არ არის".

"რაღა თქმა უნდა, ხუმრობთ". ფრანცმა შვება იგრძნო, ყოველ შემთხვევაში, ასეთი იერი მიიღო. "ახლა კი თქვენზე მიამბეთ, რას აპირებთ, რა გინდათ?"

"მხოლოდ ერთი რამ, ფრანც, ის, რომ კარგი ფსიქიატრი გავხდე, და მხოლოდ კარგი კი არა, შეიძლება ყველაზე დიდი ფსიქიატრიც იმათ შორის, ვინც კი ყოფილა".

ფრანცმა გულიანად გაიცინა, მაგრამ ხედავდა, ამჯერად

დიკი არ ხუმრობდა.

"დიდებულია — და მეტისმეტად ამერიკული", თქვა მან.
"ჩვენთან ეგ ეგრე იოლი არ არის". წამოდგა და ბაღში გამავალ კართან მივიდა. "როცა აქ ვდგები, ციურიხს ვხედავ.
აგერ, იქ, გროს-მიუნსტერის სამრეკლოა, პაპაჩემი მარხია იქ.
ოდნავ მოშორებით, ხიდს იქით ჩემი წინაპრის, ლაფატერის
საფლავია, არ უნდოდა, რომ ეკლესიაში დამარხულიყო. იქვე ახლო კიდევ ერთი წინაპრის, ჰაინრიხ პესტალოცის ქანდაცება და დოქტორ ალფრედ ეშერის ძეგლია. და ამას ყველაფერს მაღლიდან დაჰყურებს ცვინგლი. მთელი პანთეონი გმირებისა — ყოველთვის თვალწინ მიდგას".

"გასაგებია, ფრანც". დიკი წამოდგა. "წავიტრაბახე. ისე კი, ყველაფერი წინ არის; საფრანგეთში მყოფი ამერიკელე-ბის უმრავლესობას, ერთი სული აქვს, შინ როდის წავა, ჩემი კი — სხვა საქმეა, თუ უნივერსიტეტში ლექციებს დავესწრე-ბი, ოფიცრის ხელფასი მთელი წლით მენახება. როგორია ასეთი ჟესტი სახელმწიფოს მხრიდან — ჩანს იცის იმათი დაფასება, ვინც ქვეყანას სახელს შემატებს და გამოადგება. წლის ბოლოს ერთი თვით ჩავალ შტატებში მამაჩემის სანახავად. მერე კი ისევ აქ დავბრუნდები — ადგილი შემომთავაზეს".

"სად?"

"თქვენს კონკურენტებთან — გისლერის კლინიკაში, ინტერლაკენში".

"არ გირჩევთ", უთხრა ფრანცმა. "ერთ წელიწადში მაგათ ათი ახალგაზრდა ექიმი მაინც გამოიცვალეს, თუ მეტი არა. გისლერი თვითონ არის დაავადებული მანიაკურ-დეპრესიული ფსიქოზით და კლინიკას მისი ცოლი განაგებს საყვარელთან ერთად — ეს ჩვენ შორის დარჩეს, რა თქმა უნდა".

"ამერიკულ გეგმებზე აღარაფერს ფიქრობთ?" სხვათა შორის ჰკითხა დიკმა. "გახსოვთ, ნიუ-იორკში წასვლას ვაპირებდით, რათა მე და თქვენ მილიარდერებისათვის ახალი ტექნიკით აღჭურვილი მოდერნიზებული კლინიკა დაგვეარსებინა?"

"ეგ სტუდენტური ბოდვა იყო".

დიკმა ფრანცთან, ბაღის განაპირას ჩადგმულ კოტეჯში ისადილა, იმის ახალმოყვანილ ცოლსა და იმის პატარა ძაღლთან ერთად. ძაღლს რატომღაც დამწვარი რეზინის სუნი ასდიოდა.

გაუცნობიერებელი სევდა მოაწვა, არა, ეს არ იყო ხელმოკლეობისა და ყაირათიანობის ატმოსფეროს გამო, არც ფრაუ გრეგოროვიუსის, რომელიც სწორედ ასეთი უნდა ყოფი<sub>ლი</sub>: ყო, არამედ ფრანცის ჰორიზონტის მოულოდნელი შეზღუდვის გამო, რაც, ეტყობა, თვითონ მას სულაც არ აწუხებდა. დიკისთვის ასკეტიზმი სხვა რამე იყო — როგორც მიზნის მისაღწევი საშუალება, და სინათლის წყარო, წინსვლაში რომ შეეწევა კაცს; მემკვიდრეობით მიღებულ სამოსში ქვაწვიასავით ცხოვრების ჩატევა კი უაზრობად ეჩვენებოდა. შეზღუდული სივრცე, რომელშიც ფრანცი და მისი ცოლი ცხოვრობდნენ, ერთფეროვანს ხდიდა იმათ ყოფიერებას და მიმზიდველობას უკარგავდა, საინტერესოს არაფერს ჰპირდებოდა. ომის შემდგომმა თვეებმა საფრანგეთში, ამერიკულმა ხელგაშლილობამ და განცხრომამ გავლენა მოახდინა დიკზე, ოღონდ, ყველასგან განებივრებული — კაცებისა თუ ქალებისაგან, შესაძლოა ინტუიციით ხვდებოდა, რომ ასეთი რამ სერიოზულ კაცს მაინცდამაინც არ გამოადგებოდა, და ამან ჩამოიყვანა კვლავ დიდი შვეიცარიული საათის ზუსტად შუაგულში.

კეტე გრეგოროვიუსი მოხიბლა თავაზიანობითა და ქათინაურებით, მაგრამ ძლივს იკავებდა თავს, რომ არ შეემჩნია გაღიზიანება, რასაც ყვავილოვანი კომბოსტოს სუნით გაჟღენთილი ეს სახლი იწვევდა მასში, და ვერ იტანდა თავის თავს ამ უეცარი და აუხსნელი აწრიალების გამო.

"ღმერთო ჩემო, ბოლოს და ბოლოს მეც ისეთი ვარ, როგორიც სხვები?" ფიქრობდა მერე, შუაღამისას, გაღვიძებულ-

ზე, "ნუთუ მეც ისეთი გარ, როგორიც სხვები?"

მეტად შეუფერებელი გრძნობები სოციალისტისთვის, მაგრამ სავსებით შესაფერისი იმათთვის, ვინც ერთ-ერთი ყველაზე საოცარი და უიშვიათესი პროფესია აირჩია ქვეყანაზე. ჭეშმარიტება კი ის გახლდათ, რომ რამდენიმე თვე იყო უკვე, დიკის ჭაბუკური მთლიანი ბუნება დაშლა-დაყოფას განიცდიდა, რის დროსაც წყდება ის საკითხი, ღირს თუ არა მოკვდე იმისთვის, რაც უკვე მეტად აღარა გჯერა. ციურიხის უძილო ლამეების სიწყნარეში ქუჩის ფარნის შუქით განათებულ ვილაცის სამზარეულოს გაჰყურებდა და უნდოდა კეთილი, გულისხმიერი, გამბედავი და ქკვიანი ყოფილიყო, რაც არც ისე იოლია. და ისიც უნდოდა, რომ ჰყვარებოდა ვინმეს, თუკი ეს ხელს არ შეუშლიდა.

٧.

მთავარი კორპუსის ვერანდაზე დია კარებიდან კაშკაშა სინათლე იღვრებოდა, მაგრამ იაქთაღებქვეშ მაინც ბნელოდა.
წნული სავარძლების უცნაური ჩრდილები ქვემოთ, გლადიოლუსების კვლებისკენ იწელებოდნენ. მისს უორენის ფიგურა ჯერ ოთახიდან ოთახში გამავალ სხვების ფიგურებშუა
გაკრთა და მერე, დიკი რომ შეამჩნია, მკაფიოდ აისვეტა კარებში, ოთახიდან გამოსულს სახეზე სინათლე შერჩა და თან
გამოიყოლა. ისე მოდიოდა, თითქოს ცეკვავდა, მთელ კვირას
სიმღერის ხმა ჩაესმოდა, გადასარკული ცისა და შმაგად იდუმალი ზაფხულის ბინდის მღერა და როცა დიკი გამოჩნდა, ისე
ხმამაღლა გაისმა იგი, ეს მღერა, რომ მოუნდა აჰყოლოდა, შეეძლო შერწყმოდა.

"გამარჯობათ, კაპიტანო", თქვა და თვალი ძლივს მოაშორა, თითქოს დიკის მზერაში ჰქონდა ახლართული თავისი მზერა. "გნებავთ, აქ დავსხდეთ?" ჯერ ისევ იდგა, კიდევ უყურებდა. "დღეს ზაფხულივით თბილა".

ვიღაც შალშემოხვეული ქალი გამოჰყვა, ნიკოლმა წარუდგინა დიკს:

"სენიორა..."

ფრანცმა ბოდიში მოიხადა, საქმე მაქვსო და დიკმა სამი სკამი ახლო-ახლო დადგა.

"კარგი საღამოა", თქვა სენიორამ.

"შესანიშნავი", დაეთანხმა ნიკოლი და დიკს მიუბრუნდა. "დიდი ხნით ჩამოხვედით?"

"ციურიხს თუ გულისხმობთ — კარგა ხნით".

"ნამდვილი გაზაფხულის პირველი საღამოა", შენიშნა სენიორამ.

"სანამდე გასტანს?"

"ივლისამდე მაინც ასე იქნება".

"მე კი ივნისში წავალ".

"ივნისი შესანიშნავი თვეა ამ მხარეში", უთხრა სენიორამ, "კარგს იზამთ, ივნისს თუ აქ გაატარებთ და ივლისში წახვალთ, როცა ძალიან დაცხება".

"სად წახვალთ?" დიკი შეეკითხა ნიკოლს.

"სადაც ბები, ჩემი და წამიყვანს, საცა მხიარულება იქნება, იქ მინდა. მე ხომ ძალიან ბევრი დრო დავკარგე. მაგრამ ალბათ ფიქრობენ, რომ ჯერ უფრო წყნარ ადგილას ჯობია ჩემთვის წასვლა, ვთქვათ კომოში, რატომ არ შეიძლება თქვენც ამოხვიდეთ კომოში?"

"აჰ, კომო — " დაიწყო სენიორამ.

შენობის შიგნით ზუპეს "მსუბუქი კავალერიის" შესავა-ლი დაუკრეს. ტრიო უკრავდა, მოისმა თუ არა ხმა, ნიკოლი წამოდგა; დიკმა შეხედა, ძალიან ახალგაზრდა იყო და ისეთი ლამაზი, რომ მღელვარებამოწოლილს ლამის სული შეუგუბ-და. ნიკოლმა გაიღიმა, ამაღელვებლად, ბავშვურად, — სამყა-. როს გზაარეული ახალგაზრდობა ჩანდა თითქოს იმის ღიმილ-ში.

"ასეთი ხმაურიანი მუსიკის ხმებში ძნელია საუბარი, იქნებ— მოდით, გავიაროთ. ღამე მშვიდობისა, სენიორა".

"ღამე მშვიდობის, ღამე მშვიდობის".

ბილიკზე გადავიდნენ, ცოტა იქით ბილიკი უკვე ჩრდილში მოექცა. ნიკოლმა მკლავში მოჰკიდა ხელი.

"მე კარგი ფირფიტები მაქვს, ჩემმა დამ გამომიგზავნა ამერიკიდან". თქვა მან. "როცა ისევ ჩამოხვალთ აქ, მოგასმენინებთ. ერთი კარგი ადგილი ვიცი, სადაც პატეფონის დადგმა შეიძლება და ვერავინ გაიგონებს".

"სიამოვნებით".

"ჰინდოსტანი" იცით?" ხარბად ჩაეკითხა. "მე მომწონს, ადრე არასოდეს მომისმენია. სხვებიცა მაქვს — "რაღა დროს ჩვენი ბავშვობაა" და "მიხარია, ჩემთვის ტირი". ალბათ ბევ-რჯერ გიცეკვიათ ამ სიმღერების ჰანგზე პარიზში".

"პარიზში არ ვყოფილვარ".

დიკს სულ მისი კრემისფერი კაბისთვის უნდოდა ეცქირა, ხან ცისფერი, ხანაც ნაცრისფერი რომ დაჰკრავდა ბილიკზე სიარულისას, მისი საოცრად ლია ოქროსფერი თმისთვის; როცა კი უნდა შეეხედა, ოდნავ იღიმებოდა, სახეზე ფარნის შუქი დაეცემოდა და ანგელოზივით უნათდებოდა, ყველაფ-რისთვის თითქოს მადლიერი იყო დიკისა, თითქოს სადმე წაეყვანოს წვეულებაზე, და დიკს ახლა უფრო უძნელდებო-და გაერკვია, რანაირად მოქცეოდა მას, ის კი თანდათან ლაღ-დებოდა — რაც ქვეყანაზე სიხარულია, გეგონება იმისიაო, იმ სიხარულით ივსებოდა.

"ახლა თავისუფალი ვარ, აღარაფერი მბოჭავს, რასაც მინდა, იმას გავაკეთებ". თქვა მან. "კიდევ ორი ფირფიტაცა მაქვს, აუცილებლად მოგასმენინებთ, ესენია: "როცა ნახირი ჩამოვა მთიდან" და "მშვიდობით ალექსანდრ!"

მეორედ ჩამოსვლისას, ზუსტად ერთი კვირის მერე, ცოტა შეაგვიანდა; ნიკოლი უკვე ელოდებოდა ფრანცის სახლსა და მთავარი კორპუსის შუა გზაზე. შუბლზე გადაწეული თმა მხრებზე ეყარა და — თითქოს იმწუთას გამოუჩნდაო სახე, ან თითქოს ეს-ეს არის, მთვარიან ღამეს ტევრიდან მინდვრად გამოვიდაო. გამოუცნობი და იდუმალი რამ მოსცილდა; დიკს მოუნდა, რომ წარსული არა ჰქონოდა, რომ უეცრად გამოჩენილი ქალიშვილი ყოფილიყო და არა იმ სიბნელიდან მოსული; პატეფონი სადღაც ფარდულში ჩაედგა და იქით წაიყვანა. ერთ სხვა ფარდულს შემოუარეს, კლდის ძირში, დიდ ქვაზე ავიდნენ და იქ დასხდნენ. გარშემო, რამდენიმე მილის მოშორებით, ჩამუქებული ბორცვები ჩანდა.

ახლა ამერიკაში იყვნენ, ფრანციც კი, რომელიც დიკს მოუგერიებელ ლოტარიოდ თვლიდა, ვერ მიხვდებოდა, რომ ასე
შორს წასულიყვნენ. წუხდნენ, ეძებდნენ, ერთმანეთის შესახვედრად მიიჩქაროდნენ პაემანზე ავტომობილით. ძვირფასო
და თაფლზე უტკბესო: ღიმილს სტაცებდნენ ერთმანეთს და
სადღაც ჰინდოსტანზე შეხვედრებს იხსენებდნენ; მერე ეტყობა წაიჩხუბნენ, იმიტომ, რომ აღარაფერი აღარ ესმოდათ, სულ
ერთი გახდა, რაკი გათავდა სიყვარული, და ერთი მათგანი წაგიდა ბოლოს, დაუტოვა წუხილი და დარდი მეორეს, სევდა
იმაზე, რაც იყო მხოლოდ, აღარ იქნება.

მიმწყდარი ჰანგი, იმასთან ერთად, რაც ძველად იყო, წავიდა, გაქრა, ოღონდ, მაინც იმედიანი, საღამოს სიბნელეს შეერთო. სიმღერა თავდებოდა და სანამ ახალი დაიწყებოდა, ჭრიჭინობელას ხმა ისმოდა. მერე ნიკოლმა პატეფონი გააჩერა და თვითონ დაიწყო. დიკს უმღერა.

> მონეტა კიდით დადე ძირს და წავა ტრიალით, უყურე როგორ დაქანდება ვერცხლის ციალით...

თითქოს არც სუნთქავდა, მხოლოდ ტუჩებს ამოძრავებდა სიმღერის სიტყვების სათქმელად.

დიკი უცებ წამოდგა. "რა მოხდა? არ მოგეწონათ?" "როგორ არა, მომწონს".

"ეს კიდევ ჩვენმა მზარეულმა მასწავლა შინ";

ახლა მიხვდა რა დაკარგა, ჭკუა სად ჰქონდა, რაღა დროსია...

"მოგწონთ?"

გაუღიმა, ღიმილში ატევდა იმას, რასაც დიკის მიმართ გრძნობდა, უანგაროდ გაიღებდა მისთვის ყველაფერს ამ წუ-თიერი გამოძახილის, მცირე ხარკისთვის, ოღონდ თავისი გუ-ლის ცემასთან იმისი გულის ცემაც ეგრძნო. ბინდღებოდა და ბინდიდან და ტირიფებიდან ნელ-ნელა ედებოდა და სხეულ-ში ეღვრებოდა ნეტარება.

თვითონაც წამოდგა, წაიბორძიკა, პატეფონს წამოჰკრა ფეხი და წამიერად დიკს მიეხალა, მის გაშლილ მხრებში ჩარგო თავი და უმალვე ისევ განზე გადგა.

"ერთი ფირფიტაცა მაქვს". თქვა, "ლეტი, ნახვამდის?" ალბათ იცით".

"დამიჯერეთ, გაიგეთ, ასეთი არაფერი ვიცი".

და არც იცოდა, შეეძლო ისიც ეთქვა, რომ არც გაუგონია, გემოთიც არ გაუსინჯავს, სუნიც არ მოსვლია. ასეთი რამ მის ცხოვრებაში არ ყოფილა; მხოლოდ სახეალეწილი გოგოების ცხელი სუნთქვა მოფარებულ და შეხუთულ შესახვევებში. ნიუჰეივენელი ქალიშვილები 1914 წელს აკოცებდნენ კაცებს და ეტყოდნენ: "აბა, აბა!"მკერდზე მუშტს მიადებდნენ, რომ კოცნის მერე უმალ ხელი ეკრათ მათთვის, და ახლა, ეს კა-

ტასტროფას ძლივს გადარჩენილი მიუსაფარი მთელ უცნობ სამყაროს უშლიდა წინ...

#### VI

უკვე მაისი იდგა, როცა ისევ შეხვდნენ ერთმანეთს. საუზგე ციურიხში სიფრთხილის სკოლა იყო; დიკის ცხოვრების ლოგიკით ნიკოლისთვის აშკარად არ რჩებოდა ადგილი და დრო, მაგრამ როცა იქვე, ახლო მაგიდასთან მჯდომი ვიღაც გამაკაცი ნიკოლს დაჟინებით მიაცქერდა არეული თვალებით, ნაპირზე უცებ ანთებული, ლოციაში აღუნუსხველი ცეცხ-ლივით დიკმა ზრდილობიანად, მაგრამ ისეთი მუქარით შეხე-და, რომ კაცმა მაშინვე განზე გაიხედა.

"ვიღაც მოცლილია", სხვათა შორის აუხსნა ნიკოლს. "თქვენს კაბას აცქერდებოდა დიდი ცნობისმოყვარეობით.

ამდენი კაბა რადა გაქვთ?"

"ჩემი და ამბობს, რომ ძალიან მდიდრები ვართ", დამნაშავესავით უთხრა ნიკოლმა. "ბებიამ დაგვიტოვა ბევრი ფული".

"შემინდვია".

საკმაოდ უფროსი იყო ნიკოლზე იმისათვის, რომ მისი უცოდველი ახალგაზრდული პატივმოყვარეობითა და თავდაჯერებით გართულიყო, ნიკოლისა, აღტაცებით რომ იყურებოდა რესტორანის ვესტიბიულის სარკეში და არ ეშინოდა
იმისა, რაც მოუსყიდველ ამალგამას შეეძლო ეთქვა. დიკს მოსწონდა, რომ ახალ ოქტავებს აწვდენდა ხელს ნიკოლი და თანდათან ეჩვეოდა იმასაც, რომ ლამაზი და მდიდარი იყო. გულწრფელად ცდილობდა მოეშორებინა იმისთვის ფიქრი, რომ
ეს მან, დიკმა შეკრა და ხელახლა გაამთელა დამსხვრეული
არსება — უნდოდა, ნიკოლს თავისით, უიმისოდ ერწმუნა საბოლოოდ ბედნიერებაცა და სიხარულიც; მაგრამ ეს ძნელი
იყო, რადგან ადრე თუ გვიან, ბოლოს მაინც, ამბროზიის
ძღვენივითა და საკმევი გუნდრუკივით, დიკს უფენდა ფეხქვეშ
ყველაფერს.

ზაფხულის პირველივე კვირებში დიკი უკვე მყარად დამკვიდრდა ციურიხში. თავის ადრეულ თეზისებს თავი მოუყარა, სამხედრო სამსახურში ყოფნისას დაგროვილი მასალებიც მიუმატა და ამათ მიხედვით ამთავრებდა ახლა თავის "ფსიყოლოგიას ფსიქიატრთათვის". გამომცემელიც თითქოს უკვე
ჰყავდა, თანაც ერთ ღარიბ სტუდენტს მოელაპარაკა, რომ წაეკითხა და გერმანულ ენაში დაშვებული შეცდომებისთვის
მიეხედა. ფრანცი ამ საქმეს სარისკოდ თვლიდა, ადრეაო,
მაგრამ დიკმა შენიშნა, არჩეული თემა უპრეტენზიო, უბრა-

"არასოდეს მეცოდინება ეს მასალა ისე კარგად, როგორც ახლა ვიცი", დაჟინებით ამბობდა დიკი. "თუ აქამდე არსები-თი და მირითადი არ არის იგი, მჯერა, მხოლოდ იმის გამო, რომ თეორიულად არ გაშუქებულა. ჩვენი პროფესია, რატომ-ღაც ერთგვარად გატეხილ და სულით გაბზარულ ხალხს იზი-დავს. ჰოდა, ისინიც, კლინიკასა და "პრაქტიკაზე" დაყრდნო-ბით, "მთლიანდებიან" და ამგვარად, უბრძოლველად აღწე-ვენ გამარჯვებას.

თქვენ სხვა ხართ, ფრანც, თქვენი პროფესიისთვის განგებამ ჯერ კიდევ მანამდე გამოგარჩიათ, სანამ ამ ქვეყანაზე
გაჩნდებოდით და ამას ღმერთს უნდა უმადლოდეთ. მე კი ფსიქიატრი მხოლოდ იმიტომ გავხდი, რომ ერთი ვინმე ქალიშვილი ოქსფორდში, წმ. ჰილდას კოლეჯში, ფსიქიატრიის ლექციებზე დადიოდა. ახლა კი — შესაძლოა ბანალურიც გეჩვენოთ
ამის თქმა, მაგრამ არ მინდა, რომ ჩემი ახლანდელი იდეები
რაღაც ათ კათხა ლუდს გავაყოლო".

"თქვენ იცით", მიუგო ფრანცმა. "თქვენ ამერიკელი ხართ. შეგიძლიათ ეს ისე გააკეთოთ, რომ ზიანი არ მიაყენოთ თქვენ-სავე თავს, როგორც ექიმს. მე პირადად ასეთი რამე მაინც-დამაინც თითქოს გულზე არ მახატია. მერე პატარ-პატარა წიგნებსაც გამოუშვებთ სათაურით "აზრები არასპეციალის-ტებისათვის", სადაც ყველაფერი ისე იქნება გამარტივებული, რომ ფიქრი აღარავის მოუნდება. მამაჩემი რომ ცოცხალი იყოს, არ შეგაქებდათ დიკ, თითქოს ვხედავ, შემოგხედავდათ, ხელსახოცს აიღებდა, დაკეცავდა ასე, დიდხანს ატრიალებდა ხელში ამ რგოლს, სწორედ ამას" — ფრანცმა დროისა და ხმარებისაგან ჩამუქებულ, მოყავისფრო, ზედ ტახისთავამოტ-ვიფრულ რგოლზე მიუთითა — "და გაჯავრებით დაიწყებდა,

"მე ისეთი შთაბეჭდილება მრჩება…" მაგრამ შემოგხედავდათ, და უცებ თავისთვის, ფიქრშიღა იტყოდა: "კაცმა რომ თქვას, რა აზრი აქვს, რისთვის —" არ დაამთავრებდა სათქმელს, და ისეგ ბუზღუნს მოჰყვებოდა და ასე გაგრძელდებოდა, სადი-ლობის გათავებამდე".

"დღეს მე ერთი ვარ", გაცხარდა დიკი, "მაგრამ ხვალ, უეიძლება მარტო არ ვიყო, სხვებიც გამოჩნდნენ. მერე მე დავკეცავ ხელსახოცს მამათქვენივით და მოვყვები ბუზღუნს".

ფრანცი გაჩერდა, ცოტა ხნის მერე ჰკითხა:

"პაციენტი როგორ არის?"

"არ ვიცი".

"ვინ უნდა იცოდეს ახლა, თქვენ თუ არა?"

"მე მომწონს იგი, ლამაზია. მერე, როგორ გგონიათ, რა უნდა ვქნა — მთებში წავიყვანო, ედელვაისებში?"

"არა, მაგრამ ციფიქრე, რაკი მეცნიერულ ტრაქტატებზე მუშაობთ, იქნებ რაიმე იდეა წამოჭრილიყო".

"— მთელი სიცოცხლე მას შევწირო?"

ფრანცმა ცოლს გასძახა სამზარეულოში: "აჰ, ღმერთო ჩემო! თუ შეიძლება მოუტანე დიკს ლუდი, კიდევ ერთი ჭიქა".

"რაკი დომლერთან უნდა ვილაპარაკო, მეტს აღარ დავ-ლეგ".

"ჩვენ ვფიქრობთ, რომ პირველ რიგში პროგრამა უნდა გვქონდეს. ერთ თვეზე მეტი გავიდა. ქალიშვილი აშკარად შეყვარებულია თქვენზე. სხვა გარემოში ეს ჩვენი საქმე არ იქნებოდა, მაგრამ აქ, კლინიკაში, ეს ჩვენც გვეხება".

"ისე მოვიქცევი, როგორც დოქტორი დომლერი იტყვის", დაეთანხმა დიკი.

მაგრამ მაინცდამაინც არ სჯეროდა, რომ დომლერი შეშლებდა გარკვეულიყო შექმნილ ვითარებაში, სადაც თვითონ
დიკს ეთმობოდა დიდი ადგილი. თავისთავად მოხდა ასე და
ახლა თითქოს ამის ხელთ იყო ისიც, რაც მერე მოხდებოდა.
ამ ამბავმა ერთი ეპიზოდი გაახსენა ბავშვობიდან, ვერცხლეულის განჯინის გასაღები რომ დამალა შიფონერში, აილო და
დედის ცხვირსახოცების ქვეშ ამოდო; ყველა იმ გასაღებს
ეძებდა, არაქათი გამოეცალათ, ეს კიდევ მთელ ამ ამბავს,
ფილოსოფოსივით, გაუცხოებით უყურებდა. რალაც ამდა-

გვარს გრძნობდა ახლა, როცა ფრანცთან ერთად პროფესორ

დომლერის კაბინეტში შედიოდა.

პროფესორს ძველებური მყუდრო სახლის ვაზშემოხვეულ აივანსავით მშვენიერი ქილვაშებიანი სახე ჰქონდა და დიკმა შეხედვისთანავე დაყარა ფარ-ხმალი. დომლერზე უფრო ნი-ჭიერი ხალხიც შეხვედრია ცხოვრებაში, მაგრამ დომლერი-ვით შთაგონებული სახე არავის ჰქონია და მასზე უფრო ძლიერი გავლენაც არავის მოუხდენია დიკზე. ...ექვსი თვის მერეც, როცა დომლერი მიცვალებული ნახა, იგივე გაიფიქ-რა. აივანი დაცარიელებულიყო, ვაზივით ქილვაშები მაგარ, გახამებულ თეთრ საყელოზე ელაგა, თხელ, ფურცელივით ქუთუთოებქვეშ სამუდამოდ ჩაქრობოდა შეუპოვრობა და მრავალი ბრძოლის ანარეკლი.

"...დილა მშვიდობისა", სამხედროსავით გაიმართა დიკი.

პროფესორმა დომლერმა მშვიდი ხელები ერთმანეთს გაღააჭდო. ფრანცმა საქმიანად, თითქოსდა ადიუტანტივით, თითქოს მდივანივით წამოიწყო ლაპარაკი, მაგრამ უფროსმა აიტყვა შეაწყვეტინა.

"ჩვენ ერთგვარ შედეგს მივაღწიეთ", მშვიდად წარმოთქვა. "მაგრამ, დოქტორო დაივერ, თქვენზე ძალიან ახლა უკვე სხვა

კერავინ დაგვეხმარება".

დიკს გზა მოუჭრეს და აღიარა:

"ჯერ მე თვითონაც კარგად არ მესმის ყველაფერი".

"მე არ მეხება თქვენი პირადი დასკვნები", თქვა დომლერსა. მაგრამ მე სწორედაც მეხება სხვა რამ — ამ "გადართვას". არონიული მზერა ესროლა ფრანცს და ამანაც ისევე შეხედა დოქტორს, "ბოლო უნდა მოეღოს. მისს ნიკოლის მდგომარეობა ახლა უკეთესია, მაგრამ მაინც ვერ არის ისე კარგად, რომ მოერიოს, რასაც ტრაგედიად აღიქვამს თვითონ".

ფრანცს რაღაც უნდოდა ეთქვა, დაიწყო კიდევაც, მაგრამ

დოქტორმა დომლერმა ანიშნა, ჩუმად ყოფილიყო.

"მე მესმის, ძნელ დღეში ხართ".

"დიახ, ასეა".

პროფესორი უცებ უკან გადაიხარა და გადაიხარხარა. სიცილს ძლივს მორჩა, ნაცრისფერი, ბასრი პატარა თვალები უციმციმებდა: "თქვენ თვითონაც ხომ არ გაებით, იქნებ თქვენც მოგწონთ?"

სხვა რა გზა ჰქონდა, უნდა ეპასუხა და თვითონაც გაიცინა

დიკმა.

"ძალიან ლამაზი ქალიშვილია — ეს ცხადზე ცხადია, და ძნელია არ აღიარო, მაგრამ მე არ ვაპირებ…"

ფრანცმა ისევ სცადა ლაპარაკში ჩაბმა — დომლერმა ისევ

შეაჩერა და პირდაპირ ჰკითხა დიკს.

"ხომ არ ფიქრობთ, რომ აქედან წასვლა ჯობია თქვენთვის?"

"წასვლა არ შემიძლია".

დოქტორი დომლერი ფრანცს მიუბრუნდა: "მაშინ ისე უნდა მოვახერხოთ, რომ მისს უორენი წავიდეს".

"როგორც საჭიროდ მიიჩნევთ, პროფესორო დომლერ"

დაეთანხმა დიკი. "ვითარება მართლაც რთულია".

პროფესორი დომლერი წამოდგა — მძიმედ, ხეიბარივით.

"მაგრამ — ვითარება, რაც ექიმმა უნდა გაარკვიოს". ხმამაღლა, მაგრამ მშვიდად წამოიძახა მან.

ისევ ხვნეშით ჩაეშვა სავარძელში და დაელოდა, როდის გადაივლიდა ჭექა-ქუხილი, მთელი ოთახი რომ აავსო. დიკი ხედავდა, დომლერი უკიდურესად იყო დაძაბული, თავის თავისაც არ სჯეროდა, ბოლომდე თუ შეძლებდა ასე მშვიდად ყოფნას. ქუხილი მიწყდა და ფრანცმა როგორც იქნა, თქვა, რაც უნდოდა:

"დოქტორი დაივერი შესანიშნავი კაცია, მხოლოდ, საჭიროა სწორად შეაფასოს შექმნილი ვითარება და გამოსავალსაც იპოვის, ჩემი ღრმა რწმენით, დიკს შეუძლია ჩვენთან ითანამშრომლოს და მაშინ აქედან არავის წასვლა აღარ იქნება უკვე საჭირო".

"თქვენ რას ფიქრობთ ამაზე?" დიკს შეეკითხა პროფესორი დომლერი. ვითარება უფრო და უფრო საჩოთირო ხდებოდა ახლა. წეღან, დომლერის სიტყვის მერე, სიჩუმე რომ ჩამოვარდა, დიკისთვის ცხადი გახდა, რომ გაურკვევლობა დიდხანს ვეღარ გაგრძელდებოდა, ადრე თუ გვიან, ბოლო უნდა მოღებოდა და უცებ, თითქოსდა დაახეთქა:

"მე მგონია, ლამის შეყვარებული ვარ, ისიც კი გავიფიქ" რე, იქნება ცოლად შევირთო-მეთქი".

"რა? რა?" აღმოხდა ფრანცს.

"მოიცათ". შეაჩერა დომლერმა, მაგრამ ფრანცს მოცდა

არ უნდოდა:

"როგორ, შეირთოს! და თითქმის მთელი სიცოცხლე შეს" წიროს იმას, რომ იყოს მისი ექიმიც, მომვლელიც, და რა ვიცი, კიდევ რა — არასოდეს, მე ძალიან კარგად ვიცი ეს ავადმყოფები. ოცი შემთხვევიდან ერთი თუ იკურნება საბოლოოდ. ჯობია სულაც აღარ ნახოთ, სულ არ შეხვდეთ და ეგ იქნება!"

"რას იტყვით?" დიკს ჰკითხა დომლერმა. "იმას, რომ ფრანცი, ცხადია, მართალია".

### VII

შუადღე უკვე გადასული იყო, კამათს რომ მორჩნენ და ბოლოს და ბოლოს შეთანხმდნენ, რომ დიკი ისევ ისეთი გულისხმიერი იქნებოდა და ამასობაში თანდათანობით დაშორდებოდა. როცა სამივე დოქტორი წამოდგა, დიკმა უნებურად სარკმელს შეხედა, წვიმა ცრიდა, იმ წვიმაში ნიკოლი იდგა სადღაც, იდგა და მას უცდიდა. გარეთ გავიდა, გზადაგზა ლაბადის ყველა ღილი შეიკრა, შლაპა ჩამოიწია, ლამის შუბლზე ჩამოიფხატა და — სადარბაზოსთან ნიკოლს შეეჯახა.

"ერთი ახალი ადგილი ვიცი, დღეს იქ შეგვიძლია წავიდეთ", თქვა მან. "იცით, ვიდრე ავად ვიყავი, შემეძლო მთელი საღამო სხვებთან ერთად ვმჯდარიყავი შინ და მაინც არაფერი მესმოდა, რაზე ან რას ლაპარაკობდნენ. ახლა კი, სულ მახსოვს, რომ გარშემო ავადმყოფები არიან და ეს... ეს..."

"მალე წახვალთ აქედან".

"ჰო, მალე. ჩემი და ბეტი — თუმცა შინ ყველა ბების ეძახის — ჩამოვა ორი კვირის მერე და წამიყვანს სადმე. ერთხანს ერთად ვიქნებით, მერე კი ისევ აქ დავბრუნდები და ბოლო ერთ თვეს აქ გავატარებ".

"თქვენი და თქვენზე უფროსია?"

"კი, ბევრად. ოცდაოთხი წლისაა, სულ ინგლისელსა ჰგავს;

ლონდონში ცხოვრობს, მამიდასთან. ინგლისელი საქმრო ჰყა-

ვდა, მაგრამ ომში მოუკლეს, მე ერთხელაც არ მინახავს".

ნაწვიმარზე მზის ჩასვლას მღვრიე ფერი ედო და იმ ფონზე ნიკოლის სახე, სპილოსძვლისფერს ოქროსფერი რომ შერეოდა, დიკს როგორღაც სხვაგვარად ეჩვენა, ადრე თითქოს არასოდეს ენახა ასეთი მაღალი ყვრიმალები, გამჭვირვალე კანი — ოღონდ ციებ-ცხელებით შეპყრობილისა კი არა — უფრო სიგრილესა და სიჯანსაღეს რომ გაგრძნობინებდათ, და იოლად მიგახვედრებდათ, მერეც როგორი იქნებოდა, იმ ჯიშიანი
კვიცივით, უკვე სინიბად რომ წარმოიდგენ და იცი, — ცხოვრების უღიმღამო ეკრანზე იგი მხოლოდ და მხოლოდ ახალმოზარდის პროექცია კი არ იქნება, არამედ ცხენი გამძლე და
ფეხმაგარი, ეს სახე ლამაზი იქნებოდა მერეც, შუახნისას და სიბერეშიც; ამას მისი წყობა და ნაკვთების მოხაზულობის მკაცრი სინატიფე მეტყველებდა.

"ასე რად მიყურებთ?"

"ახლა იმაზე ვფიქრობდი, რომ ალბათ ძალიან ბედნიერი იქნებით".

ნიკოლი შეშფოთდა:

"რომ არა? თუმცა, იმაზე უარესი რაღა მოხდება, რაც უკ-

ვე იყო".

შეშის ფარდულში შეიყვანა დიკი და იქ დაჯდა. ფეხი ფეხზე გადაედო, გოლფის ფეხსაცმელები ეცვა და ლაბადაში გახვეულიყო, ცივი, ნოტიო ჰაერისაგან ღაწვები ოდნავ შეჰფაკლოდა. თვითონაც შეხედა დიკს, დაბნეულად შეხედა, დიკი
ბოძს მიყრდნობოდა და ახლაც, ასე მდგომს, ხეს მიყრდნობილს,
ამაყი იერი ჰქონდა. სახეში შეხედა ნიკოლმა. სანდომიან
სახეში, რომელსაც მქირდავი ღიმილი დიდხანს არ შერჩებოდა ხოლმე და ხუმრობის მერეც, მაშინვე ისევ სერიოზული,
გულისხმიერი უხდებოდა. რაღაცა ჰქონდა ისეთი, რაც ეგრერიგად ეხამებოდა მისი კანის მოწითალო ირლანდიურ ელფერს, მაგრამ ამ მხრივ, ვაჟი-კაცისას მხრივ ნიკოლი ცოტათიც არ იცნობდა მას; და კიდევაც ეშინოდა რამეს ცოდნისა,
თუმცა, ძირისძირობამდეც კი სურდა ჩასწვდენოდა; სხვა დიკი,
თავდაჭერილი და თავაზიანი, გულისხმიერი გამოხედვით,
გოლად მისაწვდომი იყო მისთვის და ქალების უმრავლესო-

ბასავით, უკვე თავისად იგულა ასეთი დიკი, უფიქრე-

ლად.

"ეს კია, აქ ძალიან გავიწაფე ენებში", თქვა ნიკოლმა. "ორ ექიმთან ფრანგულად ვლაპარაკობდი, მედიცინის დებთან გერმანულად, ერთ ავადმყოფთან და კიდევ ერთ-ორ მნე ქალ. თან — იტალიურად, ერთ პაციენტთან საუბრებით კი ჩემი ეს. პანური გავამდიდრე".

"შესანიშნავია".

ნ ცდილობდა მშვიდად, გააზრებულად ელაპარაკა, მაგრამარაფერი გამოდიოდა.

"...მუსიკაც. მე მხოლოდ რეგტაიმი როდი მაინტერესებს, იმედი მაქვს ასე არ ფიქრობთ ჩემზე. ყოველდღე ვმეცადი-ნეობ, ბოლო თვეებში კი მუსიკის ისტორიის კურსიც მოვის-მინე ციურიხში. ეს მაძლებინებდა — მუსიკა და ხატვა, ამით გამყავდა დრო". დაიხარა, ლანჩას ხეჭი მოაშორა. დიკს ახედა. "რა კარგი იქნებოდა, ახლა დამეხატეთ, ასეთი, ბოძთან მდგარი".

დიკს ნაღველი მოჰგვარა ამ ლაპარაკმა. ალბათ ფიქრობდა, რომ ასე უფრო თავს აწონებდა დიკს.

"მშურს თქვენი. მგონია, ჩემი საქმის გარდა, აღარაფერი მაინტერესებს".

"მერე რა, მამაკაცისთვის ეს კარგიც არის", სწრაფად თქვა ნიკოლმა. "ქალი სხვა საქმეა, ქალს სჭირდება, რომ თა-ვისი აღზრდა გააღრმავოს, მერე იგი შვილებისთვის გამოად-გება".

"ალბათ ასეა". მოჩვენებითი დაუდევრობით მიუგო დიკმა.

ნიკოლი გაჩუმდა. დიკს ერჩივნა კი, ელაპარაკა, უფრო იოლად შეძლებდა ასე იმ ნესტიანი საბურვლის "თამაშს", რასაც სუყველა ერიდება, მაგრამ ნიკოლი ჩუმად იჯდა.

"თქვენ უკვე სავსებით ჯანმრთელი ხართ, თქვა მან. "დაივიწყეთ წარსული, დაძაბულობას ერიდეთ ერთ წელიწადს მაინც. დაბრუნდით ამერიკაში, შეიყვარეთ ვინმე და — იყავით ბედნიერი".

"შეყვარება მე არ შემეძლება", ხეჭმოცილებული ფეხსაცმლის წვერით იმ ჯირკს, ზედ რომ იჯდა, ხავსი მოაცალა. "ძალიან კარგადაც შეგეძლებათ", შეეპასუხა დიკი. "ახლა არა, ასე, ერთი ან ორი წლის მერე". და შეუბრალებლად დაუ- მატა: "გათხოვდით, გექნებათ მშვენიერი ოჯახი და გეყოლე- ბათ მშვენიერი ბავშვები. ის ფაქტი. რომ ამ ასაკში შეგეძ-ლოთ აღგედგინათ თქვენი ფსიქიკა, თავისთავად ბევრს მეტ- ყველებს. დამიჯერეთ, ქალიშვილო, თქვენ მაგრად იდგებით ფეხზე მაშინაც, როცა თქვენი ტოლ-მეგობრები დაღლილო-ბისგან უკვე წაქცევას იქნებიან".

უხმოდ გაუძლო, აიტანა ტკივილი, ბოლომდე მოისმინა მკაცრი შეგონება, ოღონდ თვალებში გამოუკრთა რაღაც საწ-

ყალობელი.

"მე ვიცი, რომ კარგა ხანს არ შეიძლება ჩემი გათხოვება",

წყნარად წარმოთქვა.

დიკს გული ჩასწყდა, აღარაფერი უთქვამს, მზერა მწვავე ჯეჯილისკენ გადაიტანა და თავს ძალა დაატანა, რომ ჩვეული სიმტკიცე დაებრუნებინა.

"ძალიან კარგად იქნებით, აქ ყველას სჯერა თქვენი. იცით,

დოქტორი გრეგორი ისე ამაყობს თქვენით, რომ..."

"ვერ ვიტან დოქტორ გრეგორის".

"sho, oby oh gohgo".

ნიკოლის შექმნილი სამყარო დაინგრა, მაგრამ ეს მყიფე და გაუძლებადი სამყარო იყო, დიდი ხნით ვერ იარსებებდა, ოღონდ, ნებსით თუ უნებლიეთ, რაც აღელვებდა, სუყველაფერი ისევ ფეთქავდა იმ სამყაროში. ნუთუ მხოლოდ ერთი საათის წინ ელოდა სადარბაზოსთან და იმედი ქამარზე მიმაგ-რებული ყვავილივითა რთავდა მხოლოდ?"

...აბრეშუმის შარიშური — მისთვის, კაბავ, ღილო, ჩადექ ღილ-კილოში, ნარგიზებო, იშრიალეთ, შენ, ჰაერო, გამჭვირ-

ვალევ, საამურო, უძრავ იდექ.

"ჰო, კარგი იქნება ისევ გართობა და ისე ცხოვრება",

ლუღლუღით ამბობდა.

წამით სასოწარკვეთილმა აზრმა გაუელვა, ეთქვა დიკის-თვის, რა მდიდარი იყო და რა სახლებში ცხოვრობდა, აეხსნა, რომ იგი კაპიტალია და არცთუ მცირე კაპიტალი, წამით თითქოს თავისი პაპის, ცხენებით მოვაჭრე სიდ უორენის სუ-ლი ჩაუდგა. მაგრამ ამდენი ფასეულობის ერთად თავმოყრის

ცთუნებას სძლია და ყველაფერი ისევ იმ თავიანთ ვიქტორია. ნულ განჯინებში შეალაგა. თუმცა ახლა აღარაფერი დარჩე. ნოდა ტკივილისა და სიცარიელის გარდა.

"წვიმამ თითქმის უკვე გადაიღო. დროა დავბრუნდე კლი

ნიკაში".

დიკი გვერდით მიჰყვებოდა, გრძნობდა ნიკოლის ნაღველსა და უბედურებას და მის ღაწვებზე დადენილი წვიმის დალევაცა სურდა.

"ახალი ფირფიტები მივიღე", თქვა ნიკოლმა, "ერთი სუ-

ლი მაქვს, როდის დავუკრავ, თქვენ გაგიგიათ..."

იმ საღამოს, ვახშმობის მერე ისეთ გუნებაზე იყო, ყველაფერს ბოლოს მოვუღებო გაიფიქრა; ფრანცის მიბეგვაც კი უნდოდა დიკს, რომ ამისთანა დღეში ჩააგდო. კარგა ხანს იცდიდა ჰოლში. ვიღაც ბერეტიანს მოჰკრა თვალი, მაგრამ ნიკოლის ნაწვიმებ ბერეტს არ ჰგავდა, იმ თავის ქალას ედო, ამას წინათ ოპერაცია რომ გაუკეთეს. ქვეშიდან ფიცხლად შემოლხედა დიკს, თვალები ჩააშტერა და ახლოს მივიდა:

"გამარჯობათ, ექიმო".

"გამარჯობათ, მესიე".

"კარგი ამინდია".

"დიახ, მშვენიერი".

"თქვენ ახლა აქ მუშაობთ?"

"არა, მხოლოდ ერთი დღით ჩამოვედი".

"აი თურმე რა. მაშ, ნახვამდის მესიე".

გახარებული, რომ ლაპარაკს კარგად გაართვა თავი, საბრალო ბერეტიანი მოსცილდა და თავის გზას გაუყვა. დიკი ისევ იცდიდა. უცებ კიბეზე ჩამომავალი მომვლელი ქალი დაინახა, ამბავი მოქონდა მასთან.

"მისს უორენი ბოდიშს გიხდით, დოქტორო. ამ საღამოს

თავის ოთახში, ზევით ივახშმებს, ადრე სურს დაწვეს".

ისე შეჰყურებდა დიკს, თითქოს ელოდა, მისს უორენის ასეთ საქციელს შემაშფოთებელ სიმპტომად, პათოლოგიურად ჩათვლისო.

"აჰ, გასაგებია. დიახ — "გეგონება გულზე დაადგაო,

ძლივს მოითქვა სული. "იმედი მაქვს კარგად არის. გმად-

ლობთ".

ფრანცს ბარათი დაუტოვა, ატყობინებდა, რომ ვახშმად გერ დარჩებოდა და ქალაქგარე ტრამვაის ვაგზლის გზას ფე-ხით გაუყვა. წინ ლიანდაგები ბზინავდა, საბილეთო ავტომა-ტების მინებში ბინდის მზე ცრიატდებოდა და უცებ, თით-ქოს ეს ვაგზალიცა და კლინიკაც, ხან ცენტრისკენული და ხანაც ცენტრიდანული ძალებით დაირწა. შიშმა შეიპყრო და როცა ფეხქვეშ ციურიხის მყარი ქვაფენილი იგრძნო, გაუ-ხარდა.

მეორე დღეს ელოდა, რომ რაღაცას გაიგებდა ნიკოლისგან, მაგრამ არავინ შეხმაურებია. ცოტა არ იყოს შეშფოთდა, ფრანცს დაურეკა კლინიკაში და ჰკითხა, როგორ არისო.

"საუზმეზე ჩამოვიდა ქვევით, გუშინაც და დღესაც", უპასუხა ფრანცმა, "ცოტა დაბნეული კი ჩანდა, ღრუბლებში იყო. როგორ ჩაიარა თქვენმა შეხვედრამ?"

დიკმა იმ გუშინდელი ალპური ნაპრალის შემოვლა სცადა.

"არაფერი, გრილო-გრილოდ. ყოველ შემთხვევაში, მე ასე გფიქრობ. საკმაოდ ცივად მეჭირა თავი, მაგრამ მაინც ვერ ვიტყვი, თითქოს ჩემდამი შეცვლოდა რამე, თუ მართლა ისე ღრმაა ეს გრძნობა, როგორცა ფიქრობთ."

შესაძლოა პატივმოყვარეობა შეელახა იმის გამო, რომ

coup de grâce on goboo bojonn.

"მომვლელთან მისი ლაპარაკის მიხედვით, მე ვფიქრობ, ყველაფერს მიხვდა".

"მით უკეთესი".

"ალბათ ეს ყველაზე კარგი გამოსავალია, უარესი შეიძლებოდა მომხდარიყო".

"ჰოდა, მით უკეთესი".

"დიკ, ჩამოდით, მალე მნახეთ".

# VIII

მთელ კვირას დიკს უკმაყოფილების გრძნობა სტანჯავდა. ამ ამბის იმთავითვე პათოლოგიურობამ და იძულებითმა ბო-ლომ ლითონის მყირტე გემო დაუტოვა. ნიკოლს საძაგლად მოექცნენ, ცუდად გამოიყენეს მისი გრძნობები — არადა, იქ-

ნებ თვითონაც შეიპყრო იმავე გრძნობამ? ესიზმრებოდა, კლინიკის ხეივანს მიჰყვებოდა, ბილიკზე მიდიოდა, ფარფლებიანი ჩალის შლაპით... უნდა დაეხსნას, ცოტა ხნით მაინც თავი უნდა დააღწიოს ამ სიზმრების ნეტარ ტყვეობას...

ერთხელაც ცხადად დაინახა: სწორედ იმ დროს, "პალასოტელის" სადარბაზოს რომ ჩაუარა, საუცხოო "როლს-როისი" მოგრიალდა. სულ ერთი ბეწო მოჩანდა ამოდენა, ასზე მეტი ცხენისძალიანი გიგანტური ავტომობილის შიგნით, გვერდით კიდევ ერთი ახალგაზრდა ქალი ეჯდა, თავისი და იქნებაო, გაიფიქრა დიკმა. ნიკოლმა თვალი მოჰკრა და თითქოს შიშით აუთრთოლდა და გაეხსნა ბაგე. დიკმა შუბლზე ჩამოიწია შლაპა და არ შეჩერებულა, ისე გაიარა. მაგრამ იმ წამით იმის გარშემო გროს-მიუნსტერის ყველა ჭინკამ ერთი წივილითა და კივილით ფერხული დაუარა. შინ მისულმა გონს მოსვლა სცადა, თავიდან ბოლომდე გაიაზრა და ღრმად გააანალიზა ნიკოლის ავადმყოფობა, მთელი მისი მსვლელობა და ის დასკვნა გამოიტანა, რომ რეციდივი უთუოდ თავს იჩენდა, რადგან ცხოვრებასთან შეჯახება და სტრესები თავისას იზამდა და იმოქმედებდა. ერთი სიტყვით, მეტად დამაჯერებელი ჩანაწერი გამოვიდა, დამაჯერებელი ყველასთვის, გარდა ჩამწერისა.

ამ ჭიდილმა კი მხოლოდ ის გამოიღო, რომ ერთხელაც დარწმუნდა, თვითონაც რა ღრმად ჩაეთრია თავისსავე ემოციებს, და რაკიღა ამაში დარწმუნდა, შხამსაწინააღმდეგო საშუალებების ძებნასაც შეუდგა და თავგამოდებითაც შეეცადა. ერთი ასეთი შხამსაწინააღმდეგო საშუალება ბარ-სიურობელი ტელეფონისტი ქალიშვილი აღმოჩნდა, იმხანად ევროპას რომ უვლიდა, ნიცადან კობლენცამდე მიმოდიოდა და გამწარებით ცდილობდა დაებრუნებინა თაყვანისმცემლები, იმ თავისი ხალისიანი ცხოვრების ხანაში რომ ჰყოლოდა; მეორე ის იყო, რომ ბევრი ირბინა, რათა მოეხერხებინა ბილეთის შოვნა აგვისტოში სპეციალური რეისით შეერთებულ შტატებში მიმავალ გემზე; მესამე კიდევ ის, რომ დაძაბულად მუშაობდა წიგნის კორექტურაზე, წიგნისა, რომელიც გერმანულ ენაზე უნდა გამოსულიყო შემოდგომაზე და მთელ ფსიქიატრიულ სამყაროს ეხილა, ყველა ფსიქიატრს, ვინც კი გერმანულ ენაზე კითხულობდა.

მაგრამ დიკისთვის ეს წიგნი წარსულს ჩაბარდა; უკვე უნდოდა თავდავიწყებით ემუშავა ახალ რამეზე და ოცნებობდა ისეთ ადგილზე, სადაც საკმაო მასალის დაგროვება შეეძლებოდა.

მანამდე კი კიდევ ერთი წიგნის დაწერა იზრახა: "ნევროზებისა და ფსიქოზების თანმიმდევრული სისტემური კლასიფიკაციის ცდა, დამყარებული ათას ხუთასი შემთხვევის შესწავლის საფუძველზე ფსიქიატრიის პრაქტიკიდან, როგორც კრეპელინამდე, ისე კრეპელინის მერეც, სხვადასხვა თანამედროვე სკოლათა ტერმინოლოგიით დიაგნოზდასმული". არც ქვესათაური ჩამოუვარდებოდა — "წამოჭრილ საკითხზე აზრთა სხვადასხვაობის ქრონოლოგიური მიმოხილვითურთ".

მონუმენტური სათაური კი გამოვიდოდა გერმანულად.

მონტრეს გზას ნელა მიჰყვებოდა ველოსიპედით და შიგდაშიგ თვალგაშტერებით აცქერდებოდა იუგენჰორნის ყურეს.
სანაპიროზე ოტელების ხეივნებში ანარეკლი ატანდა ტბიდან
და ელვარება თვალსა სჭრიდა. დროდადრო ჯგუფებად ინგლისელები შემოხვდებოდნენ, დეტექტივის პერსონაჟებივით დადიოდნენ, აქ რაღაც ოთხი წლის წინათ იყვნენ და ისეთი შიშით
იყურებოდნენ ახლა გარშემო, გეგონება ამ საეჭვო ქვეყანაში
გერმანულ ყაიდაზე გაწვრთნილი ყაჩაღების თავდასხმას მოელიანო. მთელ გზაზე, მთიდან ჩამოწოლილი ზვავებით რომ ჩახერგილიყო, გაცხოველებით მუშაობდნენ, მიწასა და ქვაღორღს იღებდნენ და ყრიდნენ იქიდან. ბერნსა და ლოზანაში,
გზის სამხრეთულ დაყოლებაზე, დიკს დროდადრო ხალისიანად ეკითხებოდნენ, ამ წელს ამერიკელები ხომ არ ჩამოვლენო. "იქნებ აგვისტოში მაინც, ივნისში თუ არა?"

ტყავის შორტები ეცვა, სამხედრო ხალათი და მთაში სასიარულო ყელიანი ფეხსაცმელები. ზურგჩანთაში კოტონის კოსტიუმი და ერთი-ორი წყვილი საცვალი ედო. გლიონის ფუნიკულიორზე ველოსიპედი ჩააბარა და იქვე, ბუფეტში ლუდის დასალევად შევიდა. ბუფეტის ტერასიდან მოჩანდა, როგორ მიცოცავდა მუქი პატარა ხოჭო დაბლა, ოთხმოცგრადუსიან დაქანებაზე. ერთი ყური დიკს შემხმარი სისხლით ამოვსებოდა, ლა-ტურ-დე პელცის სამახსოვრო, სადაც, რაც ძალი და ღონე ჰქონდა, ისე გაქანდა, აქაოდა, — გამიშვით კარგი ათლეტი ვარ, მერე რა რომ არა მცნობენო. ბუფეტში ლუდი მოითხოვა და ვიდრე ფუნიკულიორის პატარა ვაგონი თაღებ- ქვეშ მიცოცავდა, გარედან გაიწმინდა ყური. დაინახა, მისი ველოსიპედი რომ შეიტანეს ვაგონში, თავისი ზურგჩანთა იმ ვაგონის ცალ მხარეს მიაგდო და მერე თვითონაც შიგ შევიდა.

მთის გზებზე დახრილი ფორმის ვაგონებია, დახრილობის კუთხე იმ კაცის შლაპის ფარფლებივითაა, განგებ რომ ჩამოუ-წევია, არავინ მიცნოსო. დიკს ქვევითა ვაგონის კამერიდან მოთქრიალე წყლის ხმაური ესმოდა და რა გონებამახვილურად, მოხერხებულად არისო, ფიქრობდა — ქვევითა იცლებოდა და ახლა ზევითა ვაგონის კამერა ივსებოდა წყლით, ეს ვაგონი სიმძიმის შალით ძირს ეშვებოდა და ქვევითას ზევით ეწეოდა. ჭეშმარიტად, კარგი გამოგონეებააო, დიკის მოპირდაპირედ ორი ინგლისელი იჯდა და ბაგირის ხარისხზე ბჭობდნენ.

"ინგლისში გაკეთებული ბაგირები ხუთ-ექვს წელს ძლებს. შარშანწინ შეკვეთა გერმანელებმა წაგვართვეს და როგორ

ფიქრობთ, რამდენ ხანს გაძლო იმათმა ბაგირმა?"

"რამდენ ხანს?"

"ერთ წელიწადსა და ათ თვეს. მერე შვეიცარიელებმა იტალიელებს მიჰყიდეს. საქმე ის არის, რომ ბაგირის სიმაგრეს მიღებისას სათანადოდ ვერ ამოწმებენ".

"ჰო, ბაგირს რომ არ გაეძლო, შვეიცარიას საქმე ცუდად წაუვიდოდა".

კონდუქტორმა კარი დაკეტა, ტელეფონით დაუკავშირდა თავის კოლეგას და ვაგონი ადგილიდან დაიძრა, ზევ-ზევით წავიდა, პაწაწინა წერტილისაკენ, ზურმუხტისფერი გორაკის თავზე რომ მოჩანდა. მალე თვალს მიეფარა მონტრეს სახუ-რავები და მგზავრების წინ გადაიშალა ვოს, ვალეს, შვეიცა-რიის სავოისა და ჟენევის ციკლორამა — აქ, ტბის ცენტრში, ტბისა, რომელსაც რონის ცივი დინება აგრილებდა, დასავლეთ სამყაროს შუაგული იდო. სუსხიანი სილამაზის უნაყოფობაში ჩაკარგული ნავები გედებს, ხოლო გედები ნავებსა ჰგვანდ-ნენ, მზიანი, კაშკაშა დღე იყო, ნაპირზე ბალახი ხასხასებდა,

Scanned by CamScanner

კურზალის ჩოგბურთის თეთრი კორტებიც უფრო ქათქათა თეთრი ჩანდა. უჩრდილოებო იყვნენ კორტებზე ფიგურები.

შილიონი და ზედ წამომართული სალანიონის სასახლე გამოჩნდა და დიკმა ქვევით დაიწყო ყურება. ვაგონი ახლა ფერდობზე, სახლების სახურავებზემოთ მიცოცავდა. ორთავე მხარეს შიგ ჩამალული ყვავილების მდელოებით ჩირგვნარი ჩანდა, და ალაგ-ალაგ ჩირგვები განზეც იწეოდნენ, რომ ყვა-ვილები ამოეჩინათ. ეს ბაღი ფუნიკულიორის მიდამოსი იყო და ვაგონში წარწერაც გაეკეთებინათ: "ყვავილების მოწყვეტა აკრძალულია".

ყვავილების მოწყვეტა აკრძალული კი იყო, მაგრამ ჩავლისას თვითონ გეძალებოდნენ, ვაგონის ყველა კუპეს რიგრიგობით, თავისთავად ეწვეოდნენ დოროთი პარკინსის გრძელღეროიანი ვარდები; გინდა არ გინდა, გაუშვებდი ბოლოს და ბოლოს, და ისევ თავიანთ ადგილას მიირწეოდნენ და ახლა იქ ირხეოდნენ ფერად-ფერადნი. იმათ კი მერე სხვები ცვლიდნენ.

ზევითა მხარეს ინგლისელებს მოეყარათ თავი, იდგნენ და პეიზაჟით თავიანთ აღტაცებას ვერა ფარავდნენ. უცებ იქ რალაც ალიაქოთი ატყდა — ახალგაზრდა ქალ-ვაჟი გაატარეს, — ბოდიშს იხდიდნენ და თან ქვევითა კუპესკენ მიიწევდნენ, იქით, სადაც დიკი იჯდა. ვაჟი იტალიელი იყო, თვალები ირმის ფიტულისას მიუგავდა, ქალიშვილი — ნიკოლი.

ჯერ კიდევ ვერ მოეთქვათ სული იმის გამო, რომ ძლივს გამოაღწიეს ამ ადგილამდე, იცინოდნენ, იქ მყოფი ინგლისე-ლები კუთხეში მიყუჟეს, დასხდნენ და ნიკოლმა თქვა: "ჰელო!" დიკმა მაშინვე შეამჩნია რაღაც ცვლილება, თითქოს კიდევ უფრო ლამაზი ჩანდა; უცებ ვერ გაიაზრა, მაგრამ მალევე მიხვდა, რომ თმის გამო მოეჩვენა ასეთი. მშვენიერი თმა მოკლედ შეეჭრა, მოდა — აირენ კასლ— და დაეხვია. მქრქალი ცისფერი სვიტერი და ტენისის თეთრი ქვედა კაბა ეცვა. — მაისის პირველ დილასავით იყო, კლინიკის ნიშანწყალიც კი არეტყობოდა.

"უუჰ!" შვებით ამოისუნთქა ნიკოლმა, "ესეც კონდუქტორია, რა, გაჩერდება თუ არა, მგონია, დაგვიჭერენ. დოქტორი დაივერი — გრაფი დე მარმორა". "ძლივს არ გამოვაღწიეთ!" ხელი ასწია და თმაზე გადაისვა. "იცით რა, ჩემმა დამ პირველი კლასის ბილეთები აიღო —
სხვაგვარად არ მოიქცეოდა". მარმორამ და ნიკოლმა ერთმანეთს შეხედეს და ნიკოლმა წამოიძახა: "მერე კი აღმოჩნდა,
რომ პირველი კლასი ლამის მძღოლის კაბინას ეკვრის, აქეთიქით ფარდები აქვს, ეს იმ შემთხვევისთვის, თუ გაწვიმდა,
ისე რომ იქიდან არაფერი ჩანს. მაგრამ ჩემი დისთვის პრესტიჟი ხომ ყველაფერია —" ნიკოლმა და მარმორამ ისევ ერთმანეთს გადახედეს და ახლო მეგობრებივით, ერთმანეთისა
უსიტყვოდაც რომ ესმით, გაიცინეს.

"საით გაგიწევიათ?" ჰკითხა დიკმა.

"კო. თქვენც?" ნიკოლმა მისი კოსტიუმი შეათვალიერა. "წინ რომ ველოსიპედია, თქვენია?"

"დიახ. მინდა ორშაბათს დავეშვა ქვევით".

"მეც თქვენი ველოსიპედით წამოვალ. წამიყვა**ნთ? არა,** მართლა ვგიჟდები, ისე ძალიან მინდა წამოსვლა".

"რად გინდათ, უფრო კარგია, ხელში აგიყვანთ და ისე ჩაგიყვანთ ქვევით", თავი გამოიდო მარმორამ. "ან, ერთად ჩავალთ გორგოლაჭებით, ან კიდევ გიბიძგებთ და ბუმბულივით ჩაფარფატდებით".

სახეზე შეეტყო ნიკოლს, როგორ მოეწონა ისევ ბუმბულივით და არა ტყვიასავით ყოფნა, რომ ეფარფატა და მძიმედ
არ ევლო; გეგონება კარნავალზეაო, ხან მიმიკას იშველიებდა,
ანცობდა და ხანაც მორცხვობდა, ჩუმდებოდა. ზოგჯერ კი
ჩრდილი გადაუვლიდა, ამაყ იერში შერეული ძველი წუხილი
და სატანჯველი აჩნდებოდა, ჯობდა სულაც არ დაენახა ნიკოლს, ჩემი აქ ყოფნით იმ სამყაროს ვახსენებ, რომელსაც
კარგად დააღწიაო თავი, და დიკმა მაშინვე გადაწყვიტა, მე
სხვა ოტელში ვიცხოვრებო.

ფუნიკულიორი გაჩერდა და ამ გზით პირველად ამოსულ მგზავრებს მოეჩვენათ, რომ ორ ზეცას შუა ლურჯ სივრცეში ჩამოეკიდნენ. გამოირკვა, რომ ზევითა ვაგონის კონდუქტორს და ქვევითასასაც, თურმე რაღაცა უნდა ეთქვათ ერთმანეთის-თვის და ეს გაჩერებაც იმისთვის იყო. ეს ერთი წუთით, მერეთითქმის მაშინვე წავიდა ვაგონი ზევით, მაღლა-მაღლა, ტყის ბილიკის, ვიწრო ხეობის თავზე და იმას იქით კიდევ ედელ-

ვაისებით მოფენილ ფერდობზემოთ. თეთრ ფონზე მონტრეს კორტებზე ჩოგბურთელები ახლა წერტილებადღა მოჩანდნენ. რაღაც ახალი შეერია ჰაერს — მუსიკა. ამას მაშინვე მიხვდ-ნენ, როგორც კი ვაგონი გლიონში მისრიალდა — იქვე, ოტე-ლის ბაღში ორკესტრი უკრავდა.

კოში მიმავალ მატარებელზე რომ გადადიოდნენ, მუსიკის ცმა ჰიდრავლიკური კამერიდან მოთქრიალე წყლის ხმამ დაფარა, კო თითქოს ამათ ზემოთ იყო; დიდი, ათასსარკმლიანი ოტელი ჩანდა, ჩამავალ მზეზე ოტელის სარკმლებს ალისფერი

ედო და ბრიალებდა.

ახლა უკვე სუყველაფერი სხვაგვარი იყო — მქშინავ პატარა ორთქლმავალს ხვეული გზით მიჰყავდა ზევით მგზავრები,
მაღლა, სულ მაღლა მიიწევდა; დაბლა ღრუბლებში ყვინთავდა ქშენით, მიიზლაზნებოდა, ცეცხლსა ყრიდა და დიკს ნიკოლის სახე ეკარგებოდა ხანდახან. მოხვევისას ოტელი იზრდებოდა, მკაფიოდ ჩნდებოდა და უცებ, საკვირველება — ზედ
კაშკაშა მზეზე აღმოჩნდნენ.

ჩავიდნენ თუ არა, დიკმა ზურგჩანთა მოიგდო მხრებზე და ბაქანზე გავიდა, თავისი ველოსიპედის ასაღებად გაემართა, ნიკოლი უკან მიჰყვა, ვაგზლის ალიაქოთში მაინც მოახერხა და არ შორდებოდა.

"თქვენ ჩვენს ოტელში არა ხართ?" ჰკითხა მან.

"მომჭირნედ მინდა ვიცხოვრო".

"იქნებ სადილზე გვეწვიოთ?" ბარგის გაცემა-მიღების ალიაქოთი მიწყდა და გააცნო: "ეს ჩემი დაა — ეს კი დოქტო-რი დაივერი ციურიხიდან".

დიკმა თავი დაუკრა მაღალსა და ახალგაზრდა ქალს, ასე, ოცდახუთი წლის იქნებოდა, თავდაჯერებული გამოხედვითა და მიხრა-მოხრით. იმ ქალებსა ჰგავს, პირი ყვავილს რომ მიუ-გავთ, მაგრამ ლაგამის გაწყვეტა იციანო, გაიფიქრა.

"სადილის მერე შემოვივლი". შეპირდა დიკი. "ჯერ ცოტა

აკლიმატიზაცია მჭირდება".

თავისი ველოსიპედით მიდიოდა, გრძნობდა, როგორ მიაცილებდა თვალებით ნიკოლი, იმისი პირველი სიყვარულის მთელ უმწეობასა გრძნობდა და იმასაც გრძნობდა, თვითონაც როგორ ემღვრეოდა გულ-მუცელი. სამასიოდე იარდი გაიარა ფერდობზე, ვიდრე იმ სხვა ოტელამდე მივიდოდა. ოთახი აიღო, ათი წუთიც და — უკვე სააბაზანოში იყო და იბანდა. ამ ათი წუთიდან მეხსიერებას მხოლოდ გაურკვეველი ხმაური შემორჩა, მთვრალსავით, ვიღაცების მიკარგული ხმები რომ ესმის — იმ ვიღაცებმა რა იციან როგორ უყვართ ის.

### IX

ელოდნენ, უიმისოდ საღამოს თითქოს რაღაცა აკლდა. აქაც ვერ ძლებდნენ უიმისოდ; მისს უორენი და ჭაბუკი იტალიელი, ნიკოლივით მოუთმენლად ელოდებოდნენ. ოტელის სალონი, ზღაპრული აკუსტიკის დიდი დარბაზი, ცეკვებისთვის დაეცალათ, კედლებთან კი მთელი ამფითეატრი იყო გარკვეული ასაკის თმაშეღებილი ინგლისელი მანდილოსნების, მოვარდისფრო-მორუხო პუდრწასმული სახეებითა და შარფებით, და ამავე ასაკის ამერიკელი ქალებისაც — შავი კაბებით, თოვლივით ქათქათა შინიონებითა და ალუბლისფერი ბაგეებით. მისს უორენი და მარმორა კუთხეში მდგარ მაგიდასთან ისხდნენ, ნიკოლი — გეზად, ორმოცი იარდის მოშორებით იჯდა. შევიდა თუ არა, დიკმა მაშინვე მისი ხმა გაიგონა:

"გესმით ჩემი ხმა? მე ჩვეულებრივად ვლაპარაკობ, ხმა-მაღლა არა".

"მშვენივრად".

"ჰელო, დოქტორ დაივერ".

"რა ხდება?"

"თქვენ ხომ გესმით ჩემი ხმა, იმათ კი, ოთახის შუაგულში — არ ესმით".

"რესტორანშივე გვითხრა ოფიციანტმა", თქვა მისს უორენმა. "კუთხიდან კუთხეში აქ რადიოსავით შეიძლება ლაპარაკი".

მთაში ცხოვრება ზღვაში გემზე ცხოვრებასავით წარმტაცია. ცოტა ხნის მერე მათ მარმორას მშობლებიც შემოემატნენ, დებს პატივისცემით ექცეოდნენ — საუბრიდან დიკმა ის დასკვნა გამოიტანა, რომ მათი საქმეები როგორღაც მილანის ერთ ბანკს უკავშირდება, ის ბანკი კი როგორღაც უორენების ფინანსურ საქმეებს. მაგრამ ბები უორენს დიკთან საუბარი უნდოდა. უნებურად, აქაც რს ძალა უბიძგებდა, ყველა ახალგაცნობილი მამაკაცის მიმართ რომ ჰქონდა, თითქოს ჭიმავდა უხილავ საბელს, რის გაწყვეტასაც დიდი ხანია ლამობდა. ფეხი ფეხზე გადაედო, და მაღალი, მოუსვენარი და ასაკგადაცილებული ქალწულებივით, ისევ მალიმალ ჩამოიღებდა ხოლმე.

"— ნიკოლმა მიამბო, რომ თქვენც ზრუნავთ მასზე, რომ ბევრი რამე გააკეთეთ მისი მორჩენისათვის. ოღონდ, მე ერთი რამ არ მესმის კარგად, — ახლა რა უნდა გავაკეთოთ. სანატორიუმში მაინცდამაინც ვერ გამაგებინეს, მხოლოდ გვირ-ჩიეს, რაც შეიძლება გაართეთ და არ შეზღუდოთო. ვიცოდი, მარმორები აქ იყვნენ, კოში და ტინოს ვთხოვე, დაგვხვედროდა, და მერედა რა, დაძვრაც ვერ მოვასწარით, რომ ნიკოლ-მა აიძულა და ვაგონის ტიხარზე გადაძვრნენ ორთავე, გიჟე-ბივით..."

"პირიქით, ეს სავსებით ნორმალურია". დიკმა გაიცინა. "უფრო მეტიც; ეს კარგი ნიშანია. მოუნდათ და ერთმანეთს თავი მოაჩვენეს".

"მაგრამ, რა ვიცი? ციურიხში, ადგა და სანამ რამეს მივხვდებოდი, თითქმის ჩემ თვალწინ, თმა შეიჭრა, რაღაც უნახავს "ამაოების ბაზარში" და იმის მიხედვით".

"ესეც ძალიან კარგი. შიზოიდური ტიპია და ასეთები მუდამ ექსცენტრიკულები არიან. ამას ვერაფრით შეცგლი, სულ ასეთი იქნება".

"როგორ — ასეთი?"

"აკი გითხარით — ექსცენტრიკული".

"ჰო, მაგრამ, როგორ უნდა გაარჩიო, სად არის ექსცენტრიკული და სად სიგიჟე?"

"მაგაზე არც იფიქროთ, მორჩა. საბოლოოდ გაუარა და ახლა ლაღი და ბედნიერია ნიკოლი".

ბებიმ ისევ ფეხი ფეხზე გადაიდო. ყველა იმ უკმაყოფილო ქალივით იყო, ბაირონი რომ უყვარდათ ასი წლის წინათ და, მაინც, გვარდიის ოფიცერთან ტრაგიკული რომანის მიუხედა-ვად, რაღაცა არაქალური და ხეშეში ჰქონდა.

"პასუხისმგებლობას არა ვჩივი", თქვა მან. "მაგრამ ჰაერ– ში გამოკიდებულივითა ვარ, არ ვიცი რა ვქნა. ჩვენს ოჯახში მსგავსი რამეც არა ყოფილა. ნიკოლმა, ეტყობა, მძიმე რაღაც გადაიტანა. მე ვფიქრობ, ვაჟი უნდა იყოს მიზეზი. მაგრამ ეს მხოლოდ ვარაუდია, მამა ამბობს, გამაგებინა ვინ არის და ტყვიას დავახლიო".

ორკესტრი "საწყალ პეპელას" უკრავდა; ახალგაზრდა მარმორა დედასთან ერთად ცეკვავდა. ფოქსტროტის ახალი მელოდია იყო, ჯერ არავის მობეზრებოდა. დიკი უსმენდა და თვალს არ აშორებდა უფროს მარმორასთან ლაპარაკში გართულ ნიკოლს; ამ ელეგანტურ კაცს თმაში ჭაღარა ერია და თეთრ-შავ ზოლებად, როიალის თეთრ-შავ კლავიშებივით დაუყვებოდა. ნიკოლის მხრებს უყურებდა და ვიოლინო გაახსენდა. ისევ იმის საიდუმლოზე, იმის სირცხვილზე გაიფიქრა. ეჰ, საწყალი პეპელა, — წამები მიქრის, ერთმანეთს მიჰყვება, საათებად...

"მე გეგმა მაქვს", თითქოს ბოდიშით, მაგრამ გადაჭრით თქვა ბებიმ, "შეიძლება საჭიროდაც არ მიიჩნიოთ, მაგრამ როგორც მითხრეს, წლების მანძილზე ისევ თვალყური სჭირდება ნიკოლს. არ ვიცი ჩიკაგოში გიცხოვრიათ თუ არა…"

"არა, არ ვყოფილვარ".

"იქაური ჩრდილო და სამხრეთ მხარეები სულ სხვადასხვაა. ჩრდილოეთ მხარე ფეშენებელურია, ჩვენ იქ ვცხოვრობდით, თითქმის ყოველთვის. მაგრამ ბევრი ძველი ჩიკაგოელი, კარგი ოჯახები — გასაგებია ალბათ, რასაც ვამბობ, ჯერ ისევ სამხრეთში ცხოვრობენ. იქ უნივერსიტეტია, იმის თქმა მინდა, რომ ბევრი ხალხი ტრიალებს, მაგრამ, მაინც, ასე თუ ისე, სულ სხვაა, ვიდრე ჩრდილოეთი. არ ვიცი, გასაგებად გამბობ თუ არა".

დიკმა თავი დაუქნია. თავისი თავი აიძულა და გულისყურით უსმენდა ბების.

"ცხადია, სამხრეთთან ბევრი რამ გვაკავშირებს, უნივერსიტეტის ზოგიერთ კათედრას მამა აფინანსებს, სტიპენდიები გაიღო და ასე შემდეგ, ჰოდა, გავიფიქრე, შინ რომ დავბრუნდებით, ნიკოლი იმ ხალხში გაერიოს-მეთქი. მუსიკა ხომ კარგად იცის, რამდენიმე ენაზეც ლაპარაკობს — იმაზე უკეთესი რა იქნება მაგისთვის, რომ ვინმე კარგი ექიმი შეუყვარდეს..."

დიკმა კინაღამ გადაიხარხარა. მაშ ასე, ნიკოლისთვის ექი-

მის ყიდვას აპირებენ უორენები... ხომ არავინ იცით, დოქტორო დაივერ ისეთი, ჩვენ რომ გამოგვადგეს? რატომაც არა, ნიკოლზე საზრუნავი აღარ ექნებათ, შეუძლიათ და უყიდიან ახალგაზრდა, ახალგამომცხვარ და მოხდენილ ექიმს.

"მაგრამ, თუ არ გამოჩნდა ასეთი ექიმი?" უნებლიეთ

იკითხა დიკმა.

"არა, რას ამბობთ, გამოჩნდება, რამდენიც გინდათ, ამის შანსს ბევრი არ დაკარგავს".

მოცეკვავეები დაბრუნდნენ, მაგრამ ბებიმ ჩურჩულით მოასწრო ეთქვა:

"მე ვფიქრობ, შესანიშნავი აზრია. მაგრამ, ნიკოლი სადლაა, არ ჩანს, თავის ოთახში ხომ არ ავიდა? აღარ ვიცი, რა ვქნა, ვერა ვხვდები, უწყინარი რამაა თუ... რა ვიფიქრო, გავიქცე და მოვძებნო?"

"იქნებ თავისთვის ყოფნა მოუნდა — დიდი ხნის მარტოობის მერე უჭირთ ხოლმე ხალხში გარევა". შეამჩნია, მისს

უორენი არ უსმენდა და გაჩერდა. "წავალ მოვძებნი".

ოტელს გარშემო ნისლი ებურა. გაზაფხულზე სარკმლებზე ფარდებს რომ ჩამოუშვებ, ისეთი იყო იქაურობა. თითქოს
მხოლოდ აქ, ოტელთან იყო მოკრებილი მთელი სიცოცხლე.
დიკმა სარდაფს ჩაუარა, სარკმლიდან დაინახა, შოფრები ისხდნენ და ბანქოს თამაშობდნენ, წინ ერთი ბოთლი ესპანური
ღვინო ედგათ. ხეივანს რომ მიუახლოვდა, მაღალი ალპების
თხემზე უკვე ვარსკვლავები კიაფობდნენ. ტბის ზემოთ, ნალივით მოხრილ ხეივანში ორ ფარანშუა ვიღაცის უმოძრაო
ფიგურა დალანდა. ნიკოლი იყო. დიკი ბალახზე მიდიოდა და
ჩუმად მიუახლოვდა. ნიკოლმა მოიხედა. "თქვენა ხართ!" წამით ინანა დიკმა მოსვლა.

"თქვენი და ღელავდა".

"აა!" მისთვის ახალი არ იყო, რომ უთვალთვალებდნენ. თავს ძალა დაატანა, რომ აეხსნა: "ზოგჯერ მიჭირს ხოლმე, ბოლო ხანს ისე წყნარად ვცხოვრობდი, მივეჩვიე. ამ საღამოს მუსიკას ვეღარ გავუძელი. უცებ ტირილიც კი მომინდა…"

"გასაგებია".

"დღეს გადარეული დღე იყო".

"ვიცი".

"არ მინდა ვინმეს ცუდად მოვექცე და ვაწყენინო, ისედაც ყველა შევაწუხე. მაგრამ დღეს საღამოს ვიგრძენი, რომ აღარ

შემეძლო".

უცებ დიკს თავში გაუელვა, ასე მომაკვდავს თუ დაემართება, გაუელვებს, რომ დაავიწყდა ეთქვა, სადა დევს ანდერძი — დომლერმა და მთელმა წინა თაობებმა ხომ "ხელახლა შექმნეს" ნიკოლი; ნიკოლს ბევრი რამ უნდა ესწავლა ხელახლა. ეს სიბრძნე თავისთვის შეინახა დიკმა და ხმამაღლა კი ისა თქვა, რაც უნდა ეთქვა:

"ძალიან კარგი ქალიშვილი ხართ, სულაც არ უნდა წუხდეთ

იმაზე, თუ რას ფიქრობენ თქვენზე სხვები".

"თქვენ მოგწონვართ?"

"რა თქმა უნდა".

"და თქვენ —" ახლა ნალისებური ხეივნის იქითა მხარეს მიუყვებოდნენ, ხეივნის ბოლომდე ორასიოდე იარდი იყო დარჩენილი. "ავად რომ არ ვიყო, თქვენ შეგეძლებოდათ, ესე იგი, მე იმის თქმა მინდა, რომ ჩემნაირ ქალიშვილს შეეძლო — ღმერთო ჩემო, რა სანტიმენტალური ყბედობაა, მაგრამ თქვენ იცით, რისი თქმაც მინდა".

დიკმა იგრძნო, ერთიანად მოიცვა და დათრგუნა უგუნურებამ. ესმოდა ნიკოლის სიახლოვით გახშირებული თავისი სუნთქვა. მაგრამ ახლაც უშველა თავდაჭერამ, ბიჭივით გაი-

ცინა და, ბანალური ჩაურთო:

"ახირებაა, ჩემო კარგო, გიამბობთ, როგორ შეუყვარდა ერთ პაციენტს თავისი მომვლელი…" წამოვიდა ანეკდოტი და ერთიმეორეს მიჰყვა სიტყვები. ნიკოლმა მკვეთრად, ნაღდი ჩიკაგოელივით უცებ მოუჭრა:

"მიქარვაა!"

"ძალიან ვულგარული გამოთქმაა",

"იყოს, მერე რა?" წამოენთო ნიკოლი. "თქვენ გგონიათ მთლად სულელი ვარ — ავად გახდომამდე გიყავი სულელი, მაგრამ ახლა არა. თქვენი დანახვით რომ არ მეგრძნო, რომ ყველაზე მომხიბლავი და კარგიცა ხართ იმათ შორის, ვინც მე მინახავს, მაშინ მართლა უნდა გეფიქრათ, რომ კიდევ არა ვარ ჭკუაზე. ეს ჩემი მძიმე ხვედრია, გასაგებია, მაგრამ არ არის საჭირო თავის დაჭერა ისე, თითქოს არ გესმოდეთ,

ტომ მე ვიცი, რომ ყველაფერი ვიცი თქვენზეც და

ჩემზეც".

დიკს მიწა ფეხქვეშ ეცლებოდა, მაგრამ გაახსენდა უფროსი მისს უორენის ლაპარაკი იმ ახალგაზრდა ექიმებზე, სამხრეთ ჩიკაგოს ინტელექტუალურ ბაკში რომ შეეძლოთ ეყიდათ და იმ წამით ძალა მოემატა.

"თქვენ მშვენიერი არსება ხართ, მაგრამ მე შეყვარება არ

შემიძლია".

"თქვენ არ გინდათ, მითანაგრძნოთ".

"hoo!"

ასეთმა თავდაჯერებამ და მოურიდებლობამაც, გააცვიფრა დიკი, ნიკოლ უორენის თანაგრძნობა ის იყო, რომ თავის თავ-ზე უარი ეთქვა და დაკარგულიყო. ეს მეტისმეტი იქნებოდა.

"რატომ არ გინდათ, მითანაგრძნოთ?"

ხმა სულ ჩაუწყდა, შიგნით, ბიუსტჰალტერით შემოჭერილ მკერდში ჩაეკარგა, დიკთან მივიდა, ნიკოლი ისე ახლო იყო, ისე უნდოდა მინდობოდა — დიკმა იგრძნო იმისი ბაგე, სისათუთე, და რაღაცა ძალა მოემატა, ახლა რაიმე მოსაზრება სულ ერთი იყო, თითქოს უხსნადი ხსნარი მოამზადა დიკმა და ამ ხსნარში შეერთდნენ ატომები. ხსნარის გადაღვრა კი შეიძლებოდა, მაგრამ იმათი დაშლა, გაყოფა — უკვე შეუძლებელი. დიკს ხელი ეხვია და გრძნობდა ნიკოლს, ის კი სულ უფ-რო იხრებოდა თავისი ბაგით, ნუგეშცემული და მოზეიმე. ეჩვენებოდა, თითქოს აღარც კი არსებობდა, ანარეკლიღა იყო მხოლოდ ნიკოლის წყლიან თვალებში და ამისთვისაც მადლობელი იყო დიკი.

"ღმერთო ჩემო", ძლივს ამოისუნთქა დიკმა, "კარგია

თქვენი კოცნა".

ეს იყო ახლა მისი სიტყვები, უნდოდა ელაპარაკა, მაგრამ ნიკოლმა უკვე იგრძნო თავისი ძალა, ლაღად შეტრიალდა და დიკი იმ შუადღეს შუა გზაზე გაჩერებული ფუნიკულიორივით თითქოს ჰაერში გამოეკიდა. იყოს ასე, მოუხდება: ფიქრი ერეოდა ნიკოლს, იმიტომ რომ მაწამებდა, როგორ შეეძლო! ო, რა კარგია, უკვე ჩემია. ახლა კი უნდა გაქცეულიყო, მაგრამ მისთვის ეს ისე ახალი იყო, მშვენიერი, რომ აყოვნებდა, სურდა ეგემნა, ბოლომდე ეგრძნო.

უცებ გააჟრჟოლა. ორი ათასი ფუტის ქვემოთ შუქი ბრწყინავდა, ყელსაბამად და სამაჯურად ბრწყინავდა შუქი, — მონტრედან და ვევედან იყო. იმას იქით კი მქრქალ სამკაულად მოჩანდა ლოზანა. საიდანღაც საცეკვაო მუსიკის მელოდია მოჰქონდა ქარს. ნიკოლი როგორღაც გაყუჩდა, გრილომ დაუარა, აზრი გაუნათდა და ბრძოლის მერე თრობამოწყურებული ჯარისკაცივით ახლა თავისი ბავშვობის სანტიმენტების შეჯერება მოსურვებოდა. დიკი კი იქვე, ახლოს ედგა, ნალისებურ ხეივანს შემოვლებულ რკინის ზღუდეს მშვიდად, დიკისებურად დაყრდნობილი; ჯერ მაინც ვერ დაეძლია იმისი შიშიც და მორიდებაც, ისე უთხრა დიკს, წყნარად: "მახსოვს, როგორ გელოდით მაშინ ხეივანში, მთელი ჩემი არსება ყვავილების კალათივით მეჭირა ხელში და მინდოდა თქვენთვის მომერთმია, როგორღაც ასე ვგრძნობდი მაშინ".

დიკი მისი მხრისკენ დაიხარა, ძალით მოატრიალა თავისკენ. ნიკოლმა აკოცა, რამდენჯერმე, ხელები მხრებზე ჩამოაწყო დიკს და კოცნიდა და ასე ეგონა, თავისი სახე ძალიან დიდი, უზარმაზარი უხდებოდა.

"მაგრად გაწვიმდა!"

ტბის იქითა მხარის ვენახებში უცებ ქვემეხის გრუხუნი გაისმა, სროლით ცდილობდნენ ღრუბლების გაფანტვას, რომ სეტყვა არ წამოსულიყო. ხეივანში ფარნები ჩაქრა, მერე ისევ ისე აინთო და თითქმის მაშინვე დაუშვა, ჯერ ოდნავ, მერე მოუმატა და მოუმატა. ღვარად წამოვიდა, მიხვეულ-მოხვეულ ფერდობზე ჩუხჩუხით მოდიოდა, გზებსა და ქვის სადინარებზე მითქრიალებდა; შეშავებული, შესაზარი ზეცა ჩამოწვა. ელვა ათასად იკლაკნებოდა და ისევ ქრებოდა, ჭექა-ქუხილმა ქვეყანა შეძრა, ოტელის თავზე ღრუბელ-ნისლი დაიწეწა, აღარც მთები ჩანდა, აღარც ტბა, იმ სიბნელეში, ქაოსსა და გრუხუნში ოტელი მარტო იდგა და იკაკვებოდა.

მაგრამ დიკმა და ნიკოლმა უკვე შეასწრეს ვესტიბიულში, სადაც ბები უორენი და სამივე მარმორა შეშფოთებულები ელოდნენ. კარგი იყო უცებ სველი წყვდიადიდან ამოყურყუ-შელავება, კარის მთელი ძალით გაჯახუნება, ხმამაღლა სიცილი დაუოკებელი მღელვარების გამო, ყურებში ქარი რომ გიწივის ისევ და გრძნობ, როგორ გეკვრის სველი სამოსი. ორკესტრი

უტრაუსის ვალსს უკრავდა. თითქოს მუსიკაც სულ სხვა ისმოდა სამეჯლისოდან. გონების წამღები იყო და მაღლა აჰყავდი.

...დოქტორმა დაივერმა ფსიქიატრიული კლინიკის პაციენტი შეირთოს? ეს რანაირად მოხდა? რით, საიდან დაიწყო

ეს ამბავი?

"მოხვალთ ისევ, ტანსაცმელს როცა გამოიცვლით?" ჰკითხა ბები უორენმა და გამომცდელი მზერა შეავლო დიკს.

"გამოსაცვლელი არაფერი მაქვს, შორტებს თუ ჩავიცმევ."

საწვიმარი, ვიღაცამ რომ ათხოვა, მოისხა და ფეხით აუყვა გზას თავისი ოტელისაკენ, ძლივს მიდიოდა; თავისთვის, ირო-

ნიულად ეცინებოდა.

"დიდი შანსია — ო, ღმერთმანი! — მაშ ექიმის შეძენა უნდათ? -წავიდნენ და მონახონ ვინმე ჩიკაგოში". მაგრამ ნიკოლი
გაახსენდა და შერცხვა თავისი უკმეხობის, ფიქრში თავს
იმართლებდა ნიკოლთან, იმისი ბაგის სინედლე გაახსენდა და
ისიც, როგორ ეცემოდა წვიმის წვეთები და მქრქალად ნათდებოდა ნიკოლის ფაიფურისფერ კანზე, დიკისთვის დაღვრილი ცრემლებივით... ჭექა-ქუხილის შეწყდომის მურე ჩამომდგარმა სიწყნარემ გააღვიძა დილის ასე, სამ საათზე და გაღებულ სარკმელთან მივიდა დიკი. ნიკოლის სილამაზე ტრიალებდა გარეთ, მთებსა და ფერდობებზე, შიგ შემოდიოდა,
ფარდებში მალულად შრიალებდა...

...მეორე დილას ორი ათასი მეტრი აიარა როშე-დე-ნეისკენ; ძალიან გაართო ფუნიკულიორის გუშინდელ კონდუქტორთან შეხვედრამ, დასვენების დღე ჰქონდა თურმე და იმა-

საც ამ აღმართის ავლა გადაეწყვიტა.

როშე-დე-ნეიდან დიკი მონტრემდე დაეშვა, ტბაში იბანავა და სადილისთვის ოტელში დაბრუნება მოასწრო. შინ ორი ბარათი ელოდა.

"გუშინდელი დღის გამო სულაც არა მრცხვენია, ეს დღე ყველაზე კარგი დღე იყო. თუნდ აღარასოდეს გნახოთ, სულ ერთია, მაინც კარგია, ასე რომ მოხდა".

ფარ-ხმალამყრელი ბარათი — მაგრამ მეორე ბარათი გახს-

ნა დიკმა და დომლერის პირქუშმა აჩრდილმა დაიხია:

"ძვირფასო დოქტორო დაივერ, დაგირეკეთ, მაგრამ არა-

ვინ მიპასუხა. ძალიან დამავალებთ, თუ ერთ დიდ თხოვნას შემისრულებთ. გაუთვალისწინებელი საქმეების გამო სასწრაფოდ მიხდება პარიზში წასვლა, დროში მოვიგებ, ლოზანათი თუ გავემგზავრები. ორშაბათს აპირებდით ციურიხში დაბრუნებას, იქნებ ნიკოლიც თქვენთან ერთად წამოვიდეს, იქნებ სანატორიუმამდე მიგეყვანათ? ძალიან ხომ არ შეწუხდებით? პატივისცემით — ბეტ ევენ უორენი".

დიკი გაცოფდა — მისს უორენმა ძალიან კარგად იცოდა, რომ ველოსიპედით იყო, მაგრამ ბარათი ისეთი ფრაზებით დაეწერა, უარს ვერ იტყოდა. უნდა, რომ ერთად ვიყოთ! ახ-

ლობლის ზრუნვა, და უორენების ფული!

ცდებოდა, ბები უორენს ასეთი ზრახვა არა ჰქონდა. დიკისთვის უკვე მუშტრის თვალით შეეხედა, აწონ-დაწონა ყველაფერი, ყველა მხრიდან გაზომა თავისი მოღუნული ანგლოფილის სახაზავით და, არ გამოდგებაო, დაასკვნა; ისე კი, ძალიან მოეწონა. მაგრამ მისთვის მეტისმეტად "ინტელიგენტი"
იყო დიკი და ისიც იმ უპოვარ სნობებთან ერთად გაუყენა
გზას, ლონდონში ერთ დროს რომ იცნობდა. ძალიან თვალში
საცემია და არ გამოდგება, და კიდევაც რომ მოინდომოს,
არისტოკრატი — როგორც ეს მისს უორენს ესმოდა — ვერ
გახდებაო.

თანაც კერპი იყო — საუბრისას რამდენჯერმე შეამჩნია, მაინცდამაინც ყურს არ უგდებდა და უაზროდ იხედებოდა, იმ ხალხივით, ვითომ რომ გელაპარაკებიან და სხვაგან კი ქრის მათი გონება. ნიკოლი ბავშვობიდანვე აღიზიანებდა თავისი მანერებით — მეტისმეტად თავნება იყო, ბოლო ხანებში კი, ცხადია, რაკი ავადმყოფობდა, მიეჩვია ეფიქრა, რომ უკვე "ხელიდან წასულია" იმისი საქმე. ასე თუ ისე, დოქტორი დაივერი იმ ტიპის ექიმებს არ ეკუთვნის, მას რომ უნდოდა, და ოჯახის წევრად რომ მიეღოთ. არც მეტი, არც ნაკლები, ახლა უბრალოდ ხელსაყრელ შემთხვევასავით უნდოდა მისი გამო-ყენება.

მაგრამ ბარათის მიხედვით, თითქოს დიკის ვარაუდი იყო

მართალი.

მატარებლით მგზავრობა შეიძლება სატანჯველად გექცეს და გული დაგიმძიმდეს, ან შეიძლება სულაც გაერთო; ზოგგერ ეს გამოსაცდელი ფრენაა; შესაძლოა ესკიზიც იყოს სხვა, მომავალი მოგზაურობისა და მეგობართან გატარებული მთელი დღესავით, ხანგრძლივად მოგეჩვენოს. დილაობით ჩქა-ბობ, სანამ ორივე მიხვდებით, რომ გშიათ და ერთად ისაუზმებთ. შუადღის მერე დრო იწელება, ზლაზვნით მიდის, მაგ-ბამ დღის ბოლოს ისევ სწრაფობაა. ნაღველი ერეოდა ნიკოლის უმწეო სიხარულის გამო. ნიკოლისთვის კი ეს შვება იყო, შინ დაბრუნებას უდრიდა, ეს იყო ახლა იმისი სახლი. იმ დღეს არ უსიყვარულიათ, მაგრამ როცა დიკი ციურიხის ტბის პირზე სევდიან კართან გამოეთხოვა და ნიკოლმა, სანამ შევიდოდა, კიდევ ერთხელ მოხედა, მიხვდა, იმისი ბედი ახლა ორივის ბედი იყო უკვე და ამიერიდან ყოველთვის ასე იქნებოლა.

X

სექტემბრის თვეში დოქტორი დაივერი და ბები უორენი ციურიხის ოტელში ტერასაზე ისხდნენ მაგიდასთან და ჩაის მიირთმევდნენ.

"არა მგონია", თქვა მისს უორენმა, "ჩემთვის მთლად გა-

საგები არ არის თქვენი მოსაზრება".

"ასე საუბარი არ ივარგებს".

"ბოლოს და ბოლოს ნიკოლი ჩემი დაა".

"ეგ არ გაძლევთ იმის უფლებას, რომ ასე მელაპარაკოთ". დიკს სიბრაზე ერეოდა, ბევრი რამ იცოდა, მაგრამ ვერაფერს ეტყოდა, "ნიკოლი მდიდარია, მაგრამ ეს იმას არ ნიშნავს, რომ მე ავანტიურისტი ვარ".

"საქმეც ეგ არის", ჯიუტად არ თმობდა ბები, "რომ ნიკო-

ლი მდიდარია".

"მაინც რამდენი აქვს ფული?" ჰკითხა დიკმა.

ბები ლამის შეხტა; დიკს ჩუმად ეცინებოდა, ისე განაგრძო.

"ხომ ხედავთ, რა უაზრობამდეც მივყავართ ამას. კარგი იქნებოდა თქვენი ოჯახის სხვა წევრთან, მამაკაცთან მელაპარაკა..."

"რაც ნიკოლს ეხება, — იმაზე მე ვაგებ პასუხს". გადაქრით გამოაცხადა ბებიმ. "სულაც არ ვფიქრობთ, რომ ავან-

Scanned by CamScanner

ტიურისტი ბრძანდებით. უბრალოდ, არ გიცით, ვინა ხართ",

"მე მედიცინის დოქტორი ვარ", თქვა დიკმა. "მამაჩემი მღვდელია, ახლა აღარ მსახურობს. ვცხოვრობდით ბაფალოში. ჩემი წარსული საიდუმლოებით არ იფარება. ვსწავლობდი ნიუ-ჰეივენში; ამის მერე როუდზის სტიპენდია დამენიშნა. ჩემი პაპის პაპა ჩრდილოეთ კეროლაინის გუბერნატორი იყო და მე პირდაპირი შთამომავალი ვარ შეშლილი ენტონი უეინისა".

"ვინ იყო შეშლილი ენტონი უეინი?" დაეჭვებით ჰკითხა ბებიმ.

"შეშლილი ენტონი უეინი?"

"მთელ ამ ამბავში, ჩემი ფიქრით, შეშლილობა ისე**დაც** კმარა".

დიკმა უიმედოდ გადააქნია თავი და ამ დროს ნიკოლი დაინახა — ტერასაზე გამოსულიყო და აქეთ-იქით იხედებოდა, ამათ ეძებდა.

"შეშლილი რომ არ ყოფილიყო, ალბათ მარშალ ფილდზე ნაკლებ მემკვიდრეობას არ დატოვებდა".

"ეს ყველაფერი ძალიან კარგია, მაგრამ..."

ბები მართალი იყო, და იცოდა, რომ მართალი იყო. მღვდელი მღვდელია. უორენები ჰერცოგები იყვნენ, ოღონდ, ამერიკელი ჰერცოგები, უტიტულო, და ოტელის სარეგისტ-რაციო წიგნში ჩაწერილი ეს გვარი, სარეკომენდაციო ბარათივით, ფსიქოლოგიურ მეტამორფოზებს იწვევდა ხალხში, რაც კიდეგ უფრო უმძაფრებდა უპირატესობის შეგრძნებას ბები უორენს. ფაქტები ინგლისელებისაგან იცოდა, ამ მხრივ მათ ორასზე მეტი წლის გამოცდილება ჰქონდათ. მაგრამ მან არ იცოდა, რომ სანამ აქ ისხდნენ, დიკმა ერთ-ორჯერ კინათმ უარი სტკიცა ქორწინებაზე. ნიკოლის გამოჩენამ უშველა საქმეს, ბოლოს და ბოლოს შეამჩნია და მაშინვე მათი მაგილისკენ გამოემართა, ცინცხალი, თეთრი შროშანივით, და ნორჩიც სათუთი, სექტემბრის ლბილი მიმწუხრისას.

გამარჯობათ, ადვოკატო. ხვალ ჩვენ ერთი კვირით მივემგზავრებით კომოში, იქიდან ისევ ციურიხში დავბრუნდებით. ამიტომაც გთხოვეთ, ჩემს დასთან ერთად რაც შეიძლება ჩქარა მოგეგვარებინათ ყველაფერი. რამდენს მივიღებ, ეს სულ
ერთია. ორ წელიწადს მშვიდად ვაპირებთ ცხოვრებას ციურიხში და დიკს საამისოდ ფული ეყოფა. არა, ბები, სულაც
არა ვარ ისეთი არაპრაქტიკული, შენ რომ გგონია — უბრალოდ, მაღაზიებში თუ დამჭირდება და მკერავებთან, სხვაგან
აბა სად... როგორ, შეიძლება ამდენი მივიღო? რად მინდა,
მთელ სიცოცხლეში ვერ მოვახერხებ მაგის დახარჯვას. შენც
მაგდენს იღებ? უფრო მეტს რად — იმიტომ რომ ჰგონიათ,
მე არა მაქვს იმისი თავი, კარგად გავერკვე როგორ უნდა ფულის ხარჯვა? კარგი, იდოს ჩემი წილი ისე, დაგროვდეს... არა,
დიკს არ უნდა ამ საქმეში ჩაერიოს. მე უნდა დამაწვეს ეს ამბავი, ორივეს საქმე...

შენ არაფერი იცი დიკზე, ბები, ვერც წარმოიდგენ რა კა-

ცია — სად უნდა მოვაწერო ხელი? ო, უკაცრავად.

...სასაცილოა რომ ახლა სულ ერთად ვიქნებით, მარტო ჩვენ, არა დიკ? სასაცილო და უცნაურიც. ხომ არსად წახვალ, უფრო ახლო იქნები, არა? ერთმანეთი გვეყვარება, სხვა მეტი არა გვინდა რა. ოღონდ, მე უფრო ძალიან მიყვარხარ და მაშინვე ვგრძნობ ხოლმე, როცა მშორდები, თუნდაც სულოდნავ. ძალიან მომწონს სხვებივით რომ ვართ, გაიწვდი ხელს

საწოლში და გრძნობ რა თბილი ხარ, აქვე, გვერდით.

...თუ შეიძლება, დაურეკეთ ჩემს ქმარს ჰოსპიტალში, დიახ, ეს წიგნი ძალიან კარგად იყიდება ყველგან — ახლა უკვე ექვს ენაზე ითარგმნება და გამოიცემა. მე თვითონ მინდოდა ფრანგულად მეთარგმნა, მაგრამ, ეს დღეები ძალიან მალე ვიღლები, სულ მეშინია, რომ დავეცემი, დავმძიმდი და გავვუხეშდი, ადგაბიჭასავითა ვარ. ოღონდ გაბერილი და გატეხილი ადგაბიჭასავით. ცივი სტეტოსკოპი იმ ადგილას, სადაც გულია და ისეთი შეგრძნება მაქვს, მიმიფურთხებია ყველაფრისთვის... ოჰ, ის საბრალო ქალი ჰოსპიტალში, გალურჯებული ბავშვი რომ დაებადა, არა ჯობდა სულაც ცოცხალი არ ყოფილიყო? რა კარგია, რომ ახლა სამნი ვართ, არა?

...რა სიგიჟეა, დიკ, ჩვენ მართლა გვჭირდება უფრო დიდი ბინა, საამისო საბაბი გვაქვს კიდევაც. რად. უნდა ვისჯიდეთ თავს მხოლოდ იმისათვის, რომ უორენების ფული დაივერები-

საზე მეტია? აჰ, გმადლობთ, მაგრამ ჩვენ გადავიფიქრეთ. ეს ინგლისელი მღვდელი ამბობს, რომ ორვიეტოში შესანიშნავი ღვინო გქონიათ; გადატანას ვერ იტანს? ამიტომაც არის, რომ არასოდეს გაგვიგია, თორემ, ჩვენ ღვინო გვიყვარს.

მოყავისფრო თიხაში ჩაქცეული ტბების ნაპირები ჩამოშვებული ფაშვის ნაკეცებსა ჰგავს. ფოტოგრაფმა, კაპრისკენ
რომ მოვდიოდით, მაშინ, ნავზე გადამიღო სურათი და მოგვცა. თმა გაშლილი მაქვს, ნავის კიდეზე გადმოშვებული. "ცისფერო მღვიმევ, მშვიდობით", მღეროდა მენავე, "ჩვენ ისევ
მოვაა-ალთ". ხოლო, როცა იტალიური ჩექმის ყელი გადავიარეთ, საშინელი და გავარვარებული მთელ სიგრძეზე, ძველებური ციხესიმაგრეების გარშემო შამბნარში ავბედითად
შრიალებდა ქარი და მეჩვენებოდა, რომ ბორცვებზე მკვდრები
იყვნენ და ქვევით იცქირებოდნენ.

...მომწონს ეს ხომალდი. მეტადრე მაშინ, როცა ქუსლებით ვაბაკუნებთ გემბანზე ერთად. მობრუნებისას ქარმა ლამის წაგვაქციოს და ამ ადგილამდე რომ მოვდივართ, ყოველთვის ვცდილობ მხრით ვიყო ქარისკენ, კარგა მაგრად ვეხვევი ლაბადაში, მაგრამ დიკს ნაბიჯითაც არა ვშორდები და რაღაც უაზრობას ვმღერით:

> ო-ო-ო-ომე რათა, სხვა ფლამინგოა, ო-ო-ო-ომე რათა, სხვა ფლამინგოა...

დიკთან კარგია, არ მოიწყენ — შეზლონგებზე მიწოლილი მგზავრები ჩვენკენ იხედებიან, ვიღაც ქალი ცდილობს გაერკვეს, რა სიმღერაა. მაგრამ დიკს მობეზრდა სიმღერა, არა
უშავს, დიკ, მიდი, იარე შენებურად, გამორჩეულად, მხოლოდ შენ თუ შეგიძლია ასე იარო. ძვირფასო, ჰაერი შეიკვრება და ძალით მოგიხდება გაკვალვა გზისა საკვამურების ნოტიო კვამლსა და შეზლონგების ჩრდილობებშუა, იგრძნობ,
როგორ აირეკლება შენი სახება იმათ თვალებში, ვინც შენ
გიყურებს. ბოლო მოეღება შენს მარტო ყოფნას, მაგრამ ჩემი აზრით ეს კარგიც არის. თუ არ მიხვედი ცხოვრებასთან,
მერე ვერც განზე გაუდგები. მე კი მაშველი ნავის ბრჯენ-

ზე ვზივარ და ზღვას გავყურებ, გაშლილ თმას არც ვისწორებ, იყოს ასე და სულ ბზინავდეს. ვზივარ, არც ვინძრევი, ეგრე, ცის ფონზე, ხომალდი კი მიდის და მივყავარ წინ, მომავლის ცისფერ წყვდიადში, ხომალდი ამისთვის არსებობს. მე ვარ ათენა პალადა, კრძალვით ამოკვეთილი გალერაზე. წყალი ჩხრიალებს კიჩოს უკან, აქატისფერ-მწვანე ტოტები კი თით-ქოს წვანან, და ფოთლები ჩურჩულებენ, რაღაცას ჩივიან და ფერი მისდით.

...იმ წელს ბევრი ვიმოგზაურეთ — ულუმულუს უბედან ბისკრამდე. ზედ საჰარასთან ურიცხვი კალია შემოგვესია. ჩვენი შოფერი თავაზიანად გვიხსნიდა, ესა, კელებიაო, სურდა, დაგვეჯერა, რომ კელა იყო. ღამით ცა ისე დაბლა იყო, იდუმალი და ყოვლისმხედველი ღმერთის არსებობა იგრძნობოდა. მახსოვს შიშველი, მწირი, პატარა ულედ ნაილი, ტიალი ღამე, ხმებით სავსე, ფლეიტისა და სენეგალური დაფდაფების ხმა. აქლემების ფრუტუნი, და აქაურ მკვიდრთა — ძველი ავტომობილების საბურავებისაგან შეკერილი სანდლები ეცვათ — ფეხების ფრატუნი.

მაგრამ იმხანად ისევ არ ვიყავი კარგად — მატარებლები, ქვიშიანი პლაჟები—ყველაფერი ერთმანეთში აირია, იმიტომაც წამიყვანა დიკმა სამოგზაუროდ, მაგრამ მეორე ბავშვის, ჩემი პატარა გოგოს, ტოპსის დაბადების მერე ისევ სიბნელემ მოი-

ცვა ყველაფერი.

...სად არის ჩემი ქმარი, როგორ შეეძლო ჩემი აქ დატოვება, ამ უმეცრებისა და გაუთლელების ხელში. თქვენ მეუბნებით, შავი ბავშვი გაგიჩნდათო — რა უხამსობაა, აფრიკაში იმიტომ წავედით, რომ ტიმგადი გვენახა, ყველაზე მეტად, ამ ქვეყანაზე, არქეოლოგია მაინტერესებს. დავიქანცე იმით, რომ არაფერი ვიცი და წამდაუწუმ, როცა კი უნდათ, მახსენებენ ამას.

როცა მოვრჩები, მინდა განათლებული პიროვნება გავხდე, შენსავით, დიკ — მედიცინას ვისწავლი, მაგრამ ვშიშობ, რომ უკვე გვიანღაა. ვიყიდოთ ჩემი ფულით სახლი — ბინების გამოცვლამ დამღალა და შენმა ლოდინმაც. მოგწყინდა ციურიხი, ვიცი, და აქ დრო არა გრჩება, რომ წერო, შენ თვითონ რამდენჯერ გითქვამს, ის მეცნიერი, ვინც არა წერს, სრულყოფილ მეცნიერად ვერ ჩაითვლებაო. მეც რამეს მოვკიდებ ხელს, რაიმე ისეთს, რასაც ისე შევისწავლი, როგორც წესი და რიგია და ეს ძალიან მიშველის, თუ ისევ ისე დამეწყება; შენ დამეხმარები დიკ — მაშინ ისე დამნაშავედ არ ჩავთვლი თავს. სადმე ზღვისპირას დავსახლდებით, სადაც სითბო იქნება, სადაც შეგვეძლება ერთად გავშავდეთ მზეზე და ისევ ახალგაზრ-

დები ვიყოთ.

...აქ დიკის სახლი იქნება, და, იმუშავებს აქ, საოცარია, ეს აზრი ორივეს ცალ-ცალკე, ერთდროულად გაგვიჩნდა. ათ-ჯერ მაინც ჩაგვივლია ტარმთან, ახლა კი ავდექით და შევიარეთ, ვნახეთ იქაურობა, ვნახეთ, რომ ყველა სახლი ცარიელი იყო თითქმის, ორ თავლას გარდა. ვიყიდეთ, ერთი ფრანგის შემწეობით გავაფორმეთ, მაგრამ საზღვაო უწყებამ გაიგო თუ არა, ამერიკელებმა ზღვაზე, მთიანი სოფლის ნაწილი იყიდესო, მაშინვე ჯაშუშები გამოგზავნეს. ყველაფერი გადაჩხრიკეს, სამშენებლო მასალებში ვაითუ ქვემეხები აქვთო გადამალუ-ლი. ბოლოს ბები იძულებული გახდა ჩვენი გულისთვის საქმეში ჩარეულიყო და ნაცნობები მოეძებნა პარიზში, საგარეო საქმეთა სამინისტროში.

გაზაფხულობით რივიერაზე არავინ ჩამოდის, ასე რომ, ცოტა ხალხს შევხვდებით, სტუმრებს არ ველით და შეიძლება საქმე აკეთო. ხანდახან ვინმე გამოჩნდება ხოლმე, ფრანგები-დან — წინა კვირას მისტენგეტი ჩამოვიდა, ძალიან გაუკვირ-და, რომ ოტელი ღია დახვდა, მერე პიკასო და ის კაცი, "Pas

sur la bouche" had poffoho.

...დიკ, ოტელში რად ჩაწერე "მისტერ და მისიზ დაივერები და არა "დოქტორ და მისიზ დაივერები?" რას ამბობ, ისე
ვთქვი, უცებ გამიელვა თავში — შენ თვითონ ყოველთვის მასწავლიდი, რომ ადამიანისთვის ყველაზე მთავარი საქმეა და მე
მჯერა შენი. გახსოვს, ამბობდი, კაცმა უნდა თავისი საქმე
იცოდეს კარგად, და თუ არ იცის, სხვებსავითაა, და საქმე ის
არის, სანამ სხვასავით გახდება ისიც, მაგრად დადგეს ცხოვრებაში, თავისი გზა მანამ იპოვოს. თუ შენ გინდა, რომ ახლა
ყველაფერი პირიქით იყოს, იყოს, ოღონდ მითხარი, ძვირფა-

<sup>1</sup> ოღონდ ტუჩებში არა" (ფრანგ.).

სო, თავდაყირა დადგეს შენი ნიკოლი, იმისათვის, რომ ფეხ-

დაფეხ მოგყვეს და არ ჩამოგრჩეს?

...ეიბ ნორთი ამბობს, ძალიან ცოტას ლაპარაკობო. როცა მოვმჯობინდი, იმის მერე მე და დიკა პირველ ხანებში ბევრს ვლაპარაკობდით, მთელ ღამეს არა ვჩერდებოდით — ვზივართ საწოლში და სიგარეტს სიგარეტზე ვეწევით; ხოლო როცა ირიჟრაჟებდა, თავებს ბალიშებში ჩავრგავდით, რომ სინათლეს დავმალვოდით, ზოგჯერ სიმღერა მიყვარს, ცხოველებთან თამაშიც მიყვარს, მეგობრებიცა მყავს — მერი, მაგალითად. როცა მე და მერი ვლაპარაკობთ, არც ერთი არ ვუსმენთ ერთმანეთს. ლაპარაკი კაცების საქმეა. მე როცა ვლაპარაკობ, ჩემთვის ვამბობ, ახლა, ალბათ დიკი ვარ-მეთქი. ზოგჯერ ჩემი ვაჟიშვილი ვარ, ის ისეთი გონიერია და თანაც დინჯი. ისეც ყოფილა, რომ დოქტორი დომლერიცა ვყოფილვარ, ოდესმე კი, შესაძლოა რაღაცით თქვენნაირიც გავხდე, ტომი ბარბან... მე მგონია, ტომის ვუყვარვარ, მაგრამ ჩუმად, თავისთვის. თუმცა ესეცა კმარა იმისათვის, რომ იმან და დიკმა ერთმანეთი გააღიზიანონ. საერთოდ კი, ახლა ყველაფერი კარგად მიდის. ამაზე კარგად არც შეიძლება: ვცხოვრობ ხმელთაშუა ზღვისპირა მხარეს, ამ წყნარ ადგილას, ჩემთან არიან მეგობრები, ვისაც გუყვარვარ, ჩემი ქმარი, ჩემი ბავშვები, ყველაფერი მშვენიერია — ოღონდ ეს ოხერი მერილენდურად წიწილის გაკეთების რეცეპტის ფრანგულად თარგმნა დამამთავრებინა. რა კარგია ფეხების ჩაფლობა თბილ ქვიშაში.

"ჰო, ვხედავ, კიდევ ახალი ხალხია — რომელი, აა, ეს ქალიშვილი? ვისა ჰგავსო, რა თქვით?.. არა, არ მინახავს, აქ ხშირად არ ჩამოაქვთ ახალი ამერიკული ფილმები. როზმერი? ჰო, მერე? მოდური გახდა ეს პლაჟი და ეგ არის, არ მეგონა ივლისში თუ ასე იქნებოდა. ჰო, კარგი ქალიშვილია, მაგრამ ბევრი ხალხი ჩამოვა, ვატყობ".

# XI

დოქტორი რიჩარდ დაივერი და მისიზ ელსი სპირსი კაფე "კავშირში" ისხდნენ, გრილსა და მტვრიან ხეების ჩრდილქვეშ. აგვისტოს ცხელი დღე იდგა. ნაპირიდან ესტერელს ატანდა, დროდადრო ძლიერად უბერავდა მისტრალი და მეთევზეთა ნავები მისადგომებთან ირწეოდნენ და ანძები ირხეოდა მთვლემარე ცის ფონზე.

"ამ დილით მივიღე როზმერის წერილი", თქვა მისიზ სპირსმა. "საშინელება გადაგხდებოდათ იმ ზანგების გამო.

როზმერიმ მომწერა, ვიცი, ძალიან ზრუნავდით მასზე".

"როზმერის მაგრად ეჭირა თავი, ჯილდო ეკუთვნის, იმ შემთხვევამ კი მართლა შეგვზარა. ერთადერთი, ვინც იმ ამბით არ შეწუხებულა, ეიბ ნორთი იყო — ჰავრში წავიდა, ალბათ,

ჯერაც არ გაუგია ამაზე რამე".

"სამწუხაროა, რომ მისიზ დაივერმა ისეთი მღელვარება გადაიტანა", ფრთხილად შენიშნა მისიზ სპირსმა. როზმერიმ დედას მოსწერა პარიზიდან: "ნიკოლი ლამის შეიშალა. გადავ-წყვიტე ამათ აღარ გამოვყვე სამხრეთში, რადგან დიკს უჩე-მოდაც ბევრი საზრუნავი აქვს".

"უკვე გამოკეთდა, კარგად არის". ლამის მოუთმენლად მიუგო დიკმა. "მაშ ხვალ მიდიხართ აქედან. შტატებში როდისლა წახვალთ?"

"მაშინვე".

"ღმერთო ჩემო, გული მწყდება".

"კარგია, რივიერაზე რომ ჩამოვედით, თქვენი წყალობით მშვენივრად გავატარეთ დრო. თქვენ პირველი კაცი ხართ, ვინც მართლა შეუყვარდა როზმერის".

ქარმა ისევ დაუბერა ლა-ნაპულის მეწამული მთებიდან. ჰაერში ამინდის შეცვლის სუნი ტრიალებდა; შემთვრალი

ზაფხულის თარეში გათავდა.

"როზმერი ყოველთვის ვიღაცით იყო გატაცებული, მაგრამ საბოლოოდ ყველას ჩემ ხელში აგდებდა" — მისიზ სპირსმა გაიცინა, "— ვივისექციისთვის".

"მე დამინდეთ, ესე იგი".

"თქვენ სხვა ხართ, აქ მაინც ვერაფერს გავხდებოდი. როზმერის მანამდე შეუყვარდით, სანამ მე გაგიცნობდით და ხელიც არ შემიშლია".

დიკისთვის ცხადი იყო, რომ არც თვითონ და არც ნიკოლს მისიზ სპირსის გეგმებში თავისთავადობა არ ენიჭებოდათ და — ისიც ცხადი იყო, რომ მისიზ სპირსის ამორალობა მისი-

ვე თვითაღკვეთიდან მომდინარეობდა. ეს იყო მისი სულიერი გენსია, კომპენსაცია, საკუთარ გრძნობებზე უარისათვის. არ-სებობისათვის ბრძოლაში ქალს ყველაფერი ეხერხება და მამაკაცისგან განსხვავებით, ძნელად რომ "სისასტიკე" დააბრალო ქალს. სანამ ტკივილითა და ფეხარევით, სიყვარული თავისი გზით მიდიოდა, მისიზ სპირსს შეეძლო საჭურისის ქირდათა და განზე დგომით ედევნებინა თვალი მისთვის. იმაზეც არ დაფიქრებულა, იქნებ ვნებული თვითონ როზმერი ყოფილიყო — ანდა, იქნება სჯეროდა, რომ არაფერი მოუვიდოდა?

"თუ, რასაც ამბობთ, მართალია, არა მგონია დიდი ტანჯვა გადაეტანა". დიკს ბოლომდე უნდოდა დაეჯერა, რომ როზმერიზე მიუდგომლად, უცხოსავით შეეძლო ფიქრი. "ყოველ შემთხვევაში, თუ რაღაც იყო, გაიარა, ხშირად კი, ცხოვრებაში, შემთხვევითი რამ გგონია და რაღაცად კი იქცევა ხოლმე".

"ეს შემთხვევითი რამე არ იყო". დაჯერებით თქვა მისიზ სპირსმა. "თქვენ მისი პირველი სიყვარული ხართ, იდეალი, ყოველ წერილში ამას ამბობს".

"როზმერი მეტად თავაზიანია".

— "თქვენ და როზმერი ყველაზე თავაზიანი და საყვარელი ხართ იმათ შორის, ვისაც მე ვიცნობ, მაგრამ როზმერი მართა-ლია, ოდნავადაც კი არ აჭარბებს".

"ჩემი თავაზიანობა ჩემი ბუნების პარადოქსია".

ეს ერთგვარად მართალიც იყო. დიკს მამისაგან გადმოეცა ქარგი მანერები იმ ახალგაზრდა სამხრეთელებისა, სამოქალა-ქო ომის მერე ჩრდილოეთში რომ გადასახლდწენ, ხშირად იყენებდა ამ მანერებს და შეგნებულადაც, მაგრამ ხშირადვე ვერ იტანდა მათ, რადგან ხედავდა, აქ ეგოიზმის პროტესტი კი არა, უფრო იმის პროტესტი იყო, რომ ეგოიზმი არ დაენახათ.

"მე მიყვარს როზმერი", უცებ თქვა დიკმა. "სისუსტეა ამის თქმა თქვენთან, მაგრამ ეტყობა, შეღავათი მომსურვებია ჩემი თავისთვის".

სიტყვები რაღაც უცხოდ გაისმა, ოფიციალურად, თითქოს იმისთვის წარმოთქვა, რომ კაფე "კავშირის" სკამებსა და მაგიდებს გაეგონათ და სამუდამოდ დამახსოვრებოდათ. დიკი უკვე ყველგან და ყველაფერში გრძნობდა როზმერის არყოფ-ნას, პლაჟზე იწვა და იმის მზით დამწვარ მხარს ხედავდა;

ტარმში სეირნობდა და ბაღში მისი ფეხის ნაკვალევს სერავდა; ახლა ორკესტრმა "საკარნავალო სიმღერა" დაუკრა, შარშანდელი და უკვე დავიწყებას მიცემული მხიარულების გამოძახილი და, გარშემო თითქოს ყველაფერი აცეკვდა, მაშინდელივით, მასთან რომ იყო. სულ რაღაც ასიოდე საათში როზმერი თითქოს მფლობელი გახდა ყველაფრისა, რაც კი მსოფლიოს შავმა მაგიამ იცის: ბელადონა, დაბინდულს რომ გიხდის მზერას, კოფეინი, ფიზიკური ძალა ნერვულში რომ გადააქვს, მანდრაგორა, სიმშვიდეს რომ გგვრის.

ძალა მოიკრიბა და ერთხელაც სცადა დაეჯერებინა თავისი თავი, რომ როზმერიზე მისიზ სპირსივით, თითქოს "შორი-

დან" შეეძლო მასაც ლაპარაკი.

"თქვენ და როზმერი სულ არ ჰგავხართ", თქვა დიკმა. "თქვენგან მიღებული სიბრძნე ხმარდება იმ სახის, იმ ნიღ-ბის შექმნას, რითაც ის ქვეყანას წარუდგება. როზმერი არ ფიქრობს, სულის სიღრმეში იგი ირლანდიელია, რომანტიკუ-ლი და ალოგიკური."

მისიზ სპირსმა თავადაც კარგად იცოდა, რომ როზმერი, მიუხედავად ნაზი გარეგნობისა, ახალგაზრდა მუსტანგი იყო, დოქტორ ჰოიტის, აშშ მედიცინის სამსახურის კაპიტნის ჭეშ-მარიტი ქალიშვილი. მშვენიერი გარსის შიგნით, რომ გაგეჭ-რათ, ერთმანეთთან მიერთებულ უზარმაზარ გულს, ღვიძლსა

და სულს ნახავდით.

გამომშვიდობებისას დიკი გრძნობდა მისიზ სპირსის მომხიბვლელობას, სურდა არ სურდა, მისთვის იგი როზმერის რაღაც ფრაგმენტი კი არა, მეტიც იყო. შეიძლება გამოიგონა
დიკმა როზმერი, დედამისის გამოგონება მას არ შეეძლო. ასპარეზიდან გასულ როზმერის თუ კვერთხიცა და ძვირფასი
თვლებიც, აღრალები თუ სპეკალები, მოსასხამიც დიკმა უბოძა, მით უფრო ჰგვრიდა სიამეს ახლა, ეყურებინა მომხიბლავი
მისიზ სპირსისთვის, რადგან აქ თვითონ განზე იდგა, ასეთი
ქალები, ვიდრე მამაკაცს სხვა საქმე აქვს, მათთან ყოფნაზე
აღმატებული, ვთქვათ ბრძოლის ველი, ან ოპერაცია, და ხელს
ვერ შეუშლი, ვერ ააჩქარებ, იცდიან ხოლმე, გაათავებს ის
მამაკაცი თავის საქმეს და მერე მონახავს, სადმე იქნება, გაზეთს ფურცლავს, ანდა წყნარად ზის და არ იტანჯება.

"მშვიდობით, მინდა თქვენ და როზმერის გახსოვდეთ, რომ ძალიან შეგვიყვარდით, მეც და ნიკოლსაც".

ვილა "დაიანაში" დაბრუნდა თუ არა, მაშინვე თავის კაბინეტს მიაშურა და დარაბები გამოაღო, წასვლისას დაეხურა, რათა შუადღის პაპანაქებას არ შეეღწია. ორ გრძელ მაგიდაზე
თავისი წიგნის მასალები თითქოს განგებ ეყარა უწესრიგოდ.
პირველი ტომი, რომელშიც სნეულებათა კლასიფიკაციაზე
იყო ლაპარაკი, ავტორის სახსრებით ერთხელ უკვე გამოიცა
მცირე ტირაჟით. ახლა მის მეორე გამოცემაზე შესთავაზეს
მოლაპარაკება. მეორე ტომში მისი პირველი პატარა წიგნი,
"ფსიქოლოგია ფსიქიატრთათვის" უნდა შესულიყო, შევსებული და იმ პირველ წიგნზე აღმატებული. სხვებივით, თვითონაც დაიჯერა, რომ ერთი ან ორი იდეა თუ ჰქონდა მხოლოდ; და წერილების პატარა კრებული, სულ ახლახან ორმოცდამეათეჯერ გამოცემული გერმანიაში, არსებითად საწყისი
თუ იყო იმისა, რაც იცოდა და რაზეც ეფიქრა დღევანდელ
დღემდე.

ახლა კი — ახლა წუხდა ნიუ-ჰეივენში დაკარგული წლების გამო, უფრო კი იმ დროის გამო, დაივერების ცხოვრების
მზარდ ფუფუნებას რომ ხმარდებოდა. გაახსენდა თავისი რუმინელი მეგობრის ნაამბობი იმ მეცნიერზე, არმადილოს ტვინის აგებულებას რომ სწავლობდა მრავალი წლის მანძილზე
და ეჭვი უჩნდებოდა, რომ ბერლინისა და ვენის ბიბლიოთეკებში აუჩქარებელი, მოთმინებააღჭურვილი გერმანელები
უკვე მიადგნენ იმის თემას. ლამის იმ დასკვნამდე მივიდა, რომ
რეზიუმეთი მოეთავებინა და ასიათასსიტყვიან პატარა წიგნად,
მომავალში გამოსაცემი უფრო მეცნიერული ტომების შესავლად გამოექვეყნებინა, რაცა ჰქონდა.

საბოლოოდ ირწმუნა, რომ ასე უნდა მოქცეულიყო, ამაზე ფიქრობდა, როცა ჩამავალ მზის სხივებმიყრილ ოთახში ბოლ-თასა სცემდა. მაშინ უკვე შეიძლებოდა გაზაფხულისთვის გადაეცა გამოსაცემად; როცა ეჭვი ღრღნის და ენერგიის მიუხედავად, მთელი წელი ვერას აკეთებს, — ვინც გინდა იყოს, ცხადზე ცხადია, იმას გეგმა არ უვარგაო, გაიფიქრა.

შენიშვნებით აჭრელებულ ფურცლებს ლითონის მოოქრული ფირფიტები დაადო, პრესპაპიებად ხმარობდა ხოლმე. მერე ოთახი თვითონვე მიალაგა, რადგან აქ მსახურს არ უუვებდა. სააბაზანოში პირსაბანი ბონ ამის პასტით როგორღაც
გაწმინდა, თეჯირი გაამაგრა და წერილით შეკვეთა გაუგზავნა
ციურიხის წიგნის გამომცემლობას. ეს ყველაფერი რომ მოათავა, ჯინი დაისხა, წყალი დაუმატა — ორი წილი და უფრო მეტიც, და ცოტა მოსვა.

ბაღში ნიკოლს მოჰკრა თვალი. იმის გაფიქრებაზე, რომ ახლა ნიკოლს შეხვდებოდა, დიკს ტყვიასავით დააწვა გულზე რაღაცა, ნიკოლთან ვითომ არაფერი, ისე უნდა მოქცეულიყო, და ასე — დღესაც, ხვალაც, ერთი კვირის მერეც და ერთი წლის მერეც. პარიზში მაშინ მთელ ღამეს დიკის მკლავებში თვლემდა ნიკოლი, ლუმინალმა თავისი ქნა, მაგრამ ძილ-ღვიძილში მყოფ ნიკოლს დილით ადრე კინაღამ ახალი შეტევა დაეწყო, დიკმა ალერსითა და ზრუნვით დროზე დაამშვიდა და ისევ ჩაეძინა, დიკის სახეს ეხებოდა იმისი თმა და იმ თბილი თმის სურნელსა გრძნობდა. გაღვიძებამდე ფრთხილად დააწვინა, მეორე ოთახში გავიდა და ტელეფონით ყველაფერი მოაგვარა. როზმერი ამათთან გამოუმშვიდობებლად გადავა სხვა ოტელში, "მამიკოს გოგო" მამიკოს გოგოდ უნდა დარჩეს. ოტელის პატრონი, მისტერ მაკბეთი ძველი ჩინეთის სამი მაიმუნივით იქნება — არაფერს ხედავს, არაფერი ესმის და არაფერს ამბობს. როგორღაც ჩაალაგეს უამრავი ყუთები, ფუთები, ყველაფერი, რაც კი პარიზში იყიდეს და, შუადღით სამხრეთისკენ, რივიერასკენ მიმავალ მატარებელში ჩასხდნენ.

მაშინ იყო, რეაქციამ რომ იჩინა თავი, და როგორც კი ვაგონის კუპეში დაბინავდნენ, დიკმა იგრძნო, რომ ნიკოლი ელოდა ამას; სანამ მატარებელი პარიზის გარეუბნებს გასცდებოდა, მანამდეც მოეძალა ის უნებური, სასოწარკვეთილი სურვილი — ჩამხტარიყო მატარებლიდან, სანამ მთელი სიჩქარით არ მიქროდა იგი, და ისევ პარიზში გაქანებულიყო, მოენახა როზმერი, გაეგო როგორ არის, რას აკეთებდა. პენსნე მოირგო. წიგნი გადაშალა და შიგ ჩარგო თავი, ნიკოლი მოპირდაპირე მხარეს იწვა და დიკი გრძნობდა, თვალს არ აშორებდა. კითხვა არ შეეძლო და თვალები დახუჭა, ვითომ ძალიან დაიღალა, ნიკოლი ისევ უყურებდა, ჯერ კიდევ არ განელებოდა ძილის წამლისგან მოგვრილი მოთენთილობა, მაგრამ დაწყნარებული

და თითქმის ბედნიერი იყო იმით, რომ დიკი ისე**ვ მას ეკუთვ**→ ნოდა.

თვალები დაეხუჭა, მაგრამ ეს უარესი იყო, ბორბლების რიტმში შკაფიოდ მოესმოდა: ვიპოვე-დავკარგე, ვიპოვე-დავკარგე; მაგრამ თავი რომ არ გაეცა, ლანჩამდე იწვა, ლანჩის დროს ცოტათი გამოკეთდა ყველაფერი— დიკს ყოველ**თვის** უყვარდა ეს საუზმე. სულ რომ მოეთვალა, რაც ნიკოლი და თვითონ შუადღისას ლანჩზე მსხდარან, დიდ ოტელებში თუ გზისპირა სასტუმროებში, ვაგონ-რესტორანებში, ბუფეტებსა თუ თვითმფრინავებში, იმათი რიცხვი ათასსაც გადააჭარბებდა. მატარებლების ოფიციანტების ნაცნობი სირბილი, ღვინისა და მინერალური წყლის პატარა ბოთლები, როგორც ყოველთვის, შესანიშნავი სამზარეულო ამ ხაზზე, პარიზი-ლიონიხმელთაშუა და ეს ყველაფერი იმის ილუზიას ქმნიდა, რომ არაფერი შეცვლილა მათ ცხოვრებაში, ოღონდ, პირველად იყო, რომ ნიკოლთან ერთად მგზავრობდა და საითმე კი არა, გზა საიდანღაც მოდიოდა, ღვინო სულ თვითონ დალია თითქმის, ნიკოლმა მხოლოდ ოდნავ მოსვა თავის ჭიქიდან; საუბრობდნენ სახლსა და ბავშვებზე. მაგრამ, კუპეში დაბრუნდნენ და საუბარიც ამოიწურა, ისევ გაჩუმდნენ, მაშინდელივით, ლუქსემბურგის ბაღის წინა რესტორანში რომ ისხდნენ ორთავე. როცა იმავე გზას მიჰყვები, რამაც ტკივილი მოგაყენა, გაიხსენებ, რაც გადაგხდა და — გულზე გეშვება. ამიტომ, თითქოს საჭიროა იმ გზაზე გასვლა, სხვანაირად თავს ვერ დაიხსნი. საკვირველმა მოუთმენლობამ შეიპყრო დიკი; უცებ ნიკოლმა თქვა:

"მაინც კარგად არ გამოვიდა, როზმერი რომ მარტო დავტოვეთ, შენ როგორ ფიქრობ, არაფერი გაუჭირდება?"

"ცხადია, არა. თავს მოუვლის, არ დაიკარგება". ნიკოლს რომ საყვედურივით არ მიეღო, მაშინვე დაუმატა: "ბოლოს და ბოლოს, მსახიობია და დედა კი ზრუნვას არ აკლებს, მაგრამ ბევრ რამეს თვითონაც უნდა გაართვას თავი".

"ძალიან მომხიბლავია",

- "ჯერ ბავშვია".

"სულ ერთია, მაინც მომხიბლავია".

თითქოს უმიზნოდ ისროდნენ ფრაზებს, ესეც, ერთმანე-

თის გულისთვის, რომ საუბარი როგორღაც გამოსვლოდათ.

"არც ისე ჭკვიანია, როგორც თავიდან მომეჩვენა", შენიშ ნა დიკმა.

"საკმაოდ გონიერია"

"საკმაოდ არა, როგორ გითხრა, ბავშვურია, რაც გინდ იყოს".

"ძალიან, ძალიან მომხიბლავია". ხაზგასმით, თითქოს გამო მწვევად უთხრა ნიკოლმა, "და ძალიან მომეწონა იმ ფილმში"

"რეჟისორია კარგი. მისი თამაში კი — ჩემი აზრით, მიბა ძვაა".

"არა მგონია. სერთოდ, ალბათ ძალიან უნდა მოსწო**ნდე**ი მამაკაცებს".

დიკს გული გადაუქანდა. ვინ მამაკაცებს, რამდენ მამაკაცს?

...ხომ არ გეწყინებათ, ფარდას თუ ჩამოვუშვებ? ო, არა. მართლა რა თვალისმომჭრელი სინათლეა... სად არის ახლა? ვისთან არის?

"რამდენიმე წლის მერე შენზე ათი წლით უფროსს ემსგავსება".

"პირიქით. ერთ საღამოს, თეატრში, პროგრამაზე დახატვა ვცადე. ასეთი სახე გვიან ბერდება".

ორთავეს ცუდად ეძინა იმ ღამეს. ხვალ ან ზეგ დიკი შეეცდება როზმერის აჩრდილის განდევნას მანამ, სანამ სამუდამოდ ჩარჩება სახლის ერთ-ერთ კედელში და დაბინადრდება.
მაგრამ ახლა საამისო ძალა არ ჰყოფნიდა. ზოგჯერ ტკივილის
მოშორება სიამეზე მეტადაც გიჭირს; ისე ახსოვდა, თვალებიც
კი სტკიოდა ფიქრით. ვერაფერს იზამდა, უნდა ეთვალთმაქცა.
ძნელი კი იყო, მაგრამ ნიკოლიც ბრაზსა-ჰგვრიდა, ამდენი ხნის
მერე ბოლოს და ბოლოს, ხომ შეიძლება თვითონვე შეამჩნიოს შეტევისწინა სიმპტომები და აირიდოს. ამ ორი კვირის
მანძილზე ორჯერ აიწყვიტა: პირველად ტარმში, ხალხი რომ
დაპატიჟეს სადილზე. დიკს საძინებლიდან მოესმა მაშინ, როგორ უაზროდ ხარხარებდა ნიკოლი და მისიზ მაკისკოს ეუბნებოდა, სააბაზანოში ვერ შეხვალთ, გასაღები ჭაში ჩავარდაო. გაოცებული მისიზ მაკისკო დაიბნა, აღშფოთდა, შეეშინდა კიდევაც, მაგრამ, ეტყობა, რაღაცას მიხვდა. ის შემთხ-

ვევა დიკს დიდად არაფრად ჩაუგდია, რადგან მალე გადაუარა, შეწუხდა და მერე გოსის ოტელშიც კი დარეკა ნიკოლმა, მაგრამ მაკისკოები უკვე წასულები იყვხეხ.

პარიზში კი — ის შეტევა კი სულ სხვა იყო. იმას რომ იხსენებდა, ახლა პირველიც უფრო სერიოზულად ეჩვენებოდა. შესაძლოა იგი ახალ ციკლს, ავადმყოფობის ახალ აფეთქებას მოასწავებდა. როგორც ექიმმა კი არა, როგორც ადამიანმა, ღიკმა ბევრი რამ გადაიტანა ხანგრძლივი რეციდივის დროს, ტოპსის, თავიანთი მეორე ბავშვის გაჩენას რომ მოჰყვა, და იმ აგონიის მერე, მიეჩვია და ძალიან მკვეთრად არჩევდა ხოლმე კარგადმყოფ ნიკოლს ავადმყოფი ნიკოლისაგან. მით უფრო უჭირდა ახლა ერთმანეთისგან გაერჩია ექიმის თავდაცვითი გაუცხოება და რაღაცა ახალი სიცივე თავის გულში. გულგრილობასავით, დიდხანს რომ გრძელდება, ან სულაც არაფრად აგდებენ და თანდათან სიცარიელეში გადაიზრდება ხოლმე, სწორედ ასევე შეეძლო დიკს დაცარიელებულიყო, თავისუფალი ყოფილიყო ნიკოლისგან და იმის წინაშე ნება-გრძნობის ჩაურევლად და ძალდატანებით მოეხადა თავისი ვალი. ვიღაცა წერს, -სულიერი ჭრილობები ხორცდებაო — უაზრო ანალოგია კანის პათოლოგიასთან, ცხოვრებაში ასე არ ხდება, ასეთი ჭრილობა შეიძლება დაპატარავდეს, შეიძლება ქინძისთავის ჩხვლეტასავითღა იყოს, მაგრამ მაინც ჭრილობაა და ყოველთვის ღია. გადატანილი ტანჯვის კვალი თითის, ან ერთ თვალში ჩინის დაკარგვას შეიძლება შეადარო. ეჩვევი ამას და წელიწადში ეგებ ერთხელღა გაგახსენდეს, მაგრამ მაინც რაღას უშველი.

# XII

ნიკოლი ბაღში, გრძელ სკამზე იჯდა, მხრებზე მკლავებშემოჭდობილი. დიკს თავისი ნაცრისფერი, გაუსაძლისი ბავშგური ცნობისმოყვარეობით სავსე თვალები შეახათა.

"კანში ვიყავი", თქვა დიკმა. "მისიზ სპირსს შევხვდი იქ. ხვალ მიდის, ჩამოსვლა უნდოდა, რომ გამოგმშვიდობებოდა, მაგრამ გადავათქმევინე".

"ტყუილად, გამიხარდებოდა. მე მომწონს იგი".

"იცი, კიდევ ვინ ვნახე? ბართოლომეო ტეილორი".

"კარგი ერთი!"

"ბებერი ქრცვინის სიფათი აქვს, მაშინვე იცნობ, რას შეგეშლება. დასაზვერად ჩამოვიდოდა და აი ნახავ — შერმის მთელი სამხეცე აქ გაჩნდება, მე მეგონა მისიზ აბრამზია ავან. პოსტი-მეთქი და ახლა იმათთან ეგ რას მოვა".

"ბები კი სულ ბუზღუნებდა იმ პირველ ზაფხულს, აქ რომ

ჩამოვედით".

"მაგათთვის მაინც სულ ერთია, სად იქნებიან. ვერ გავიგე, რას დადიან, დარჩნენ იმ დოვილში და გაიყინონ".

"იქნებ ქოლერაზე ან სხვა ეპიდემიაზე დავყაროთ ხმე-

ბი?"..

"მეტი კი არაფერი მითქვამს ბართოლომეოსთვის, ზოგი ვერ იტანს აქაურ ჰავას და ბუზებივით იხოცებიან-მეთქი, ზოგიც — რაღა აქ და რაღა ომში მეტყვიამფრქვევე-მეთქი".

"იგონებ, არ ეტყოდი".

"ვიგონებ", გამოტყდა დიკი. "გულითადი საუბარი კი გავაბით. ჩვენი დანახვა ღირდა — შუა ბულვარზე ვიდექით და ხელს ვართმევდით — ზიგმუნდ ფროიდისა და უორდ მაკკალისტერის შეხვედრა".

დიკს საუბარი კი არა, მარტო ყოფნა უნდოდა, რომ დღევანდელ დღესა და სიყვარულზე ფიქრი ხვალინდელ დღესა და საქმეზე ფიქრით ეძლია. ნიკოლი გრძნობდა ამას, ოღონდ ბუნდოვნად და ტრაგიკულად, ცოტათი კიდევაც ეჯავრებოდა დიკი, მაგრამ ცოტათი; რაღაც პატარა მხეცივით, რომ მოსაფერებლად სწვდომოდა მხარში.

, "ძვირფასო", უგულისყუროდ თქვა დიკმა.

სახლში შევიდა, დაავიწყდა რისთვის, მაგრამ გაახსენდა, და როიალისკენ წავიდა. სმენით აიღო რამდენიმე აკორდი, თან უსტვენდა.

მხოლოდ შენ გხედავ, მუხლზე მიზიხარ, ორნი ვართ ქვეყნად, როგორ მინდიხარ, მე შენთვის მოვკვდე, რაღად მიდიხარ... მხოლოდ შენ ერთთან, და ჩემთან ერთად...

მელოდიასთან ერთად ცნობიერებას ნელ დინებასავით დაუარა აზრმა, რომ ნიკოლს ესშოდა და მიხვდებოდა, რა სევდაც კლავდა იმ ორ კვირაზე. რაღაც აკორდით შეწყვიტა დაკვრა და როიალს მოსცილდა.

მიიხედ-მოიხედა. არ იცოდა სად წასულიყო. ეს სახლი ნიკოლმა შექმნა თავისი პაპის ფულით. აქ მხოლოდ ფლიგელი და რაზეც ეს ფლიგელი დგას, ის მიწა ეკუთვნის დიკს. წელიწადში თავისი სამი ათასით და იმით, რასაც დროდადრო გამოქვეყნებულ წიგნებში აძლევდნენ, დიკი იცვამდა, ღვინის სარდაფს ამარაგებდა, ჯიბის ფულად ჰყოფნიდა და ლანიეს ძიძას უხდიდა, — სწავლა-აღზრდისთვის ჯერ ძიძა ჰყავდათ მიჩენილი. ნიკოლის რაც გინდა წამოწყებაში დიკს თავისი წილი ყოველთვის ედო. თვითონ საკმაოდ ასკეტურად ცხოვრობდა. მარტო თუ მგზავრობდა — მხოლოდ მესამე კლასის ვაგონით, სვამდა ყველაზე იაფფასიან ღვინოს, ტანსაცმელს უფრთხილდებოდა, ექსტრავაგანტურობისთვის თავს ისჯიდა ხოლმე და ამით ის მოახერხა, რომ ფინანსურად ერთგვარად თავისთავადიც ყოფილიყო. მაგრამ, თანდათანობით ესეც ჭირდა. ძალიან ხშირად ერთად უნდა ეფიქრათ ხოლმე ნიკოლის ფულზე, იმაზე, როგორ მოეხმარათ. ცხადია, ნიკოლი, რაკიღა სურდა, დიკი ყოველთვის თან ჰყოლოდა და მხოლოდ იმისი ყოფილიყო, იმის მხრით ოდნავ სისუსტესაც კი მაშინათვე ეჭიდებოდა. ირლი არ იყო გასძალებოდა ამდენ ფულსა თუ წამლეკავ ნივთებს. ახლა სულ უფრო შორდებოდნენ იმ მიამიტურ პირობებს, რითაც მაშინ ორთავ შეერთდა ციურიხში. მაგალითად კლდეზე გაშენებული ვილა გამოდგებოდა, ფანტაზიით რომ წარმოიშვა ერთ მშვენიერ დღეს. "რა კარგი იქნებოდა, რომ..." ამბობდნენ ხოლმე, და, "რა კარგი იქნება, როცა..." ამბობდნენ მერე.

მაგრამ არც ისე კარგი იყო ყველაფერი. ნიკოლის პრობ-ლემები დიკის საქმეში აიხლართა და ხელი ეშლებოდა; თანაც ბოლო ხანს ისე სწრაფად იზრდებოდა ნიკოლის შემოსავალი რომ დიკის მუშაობას ფასი ეკარგებოდა. გარდა ამისა, წლების მანძილზე, რაკი იგი ავადა ჰყავდა და უნდა ეზრუნა, თავი დააჯერა, ძალიან მეოჯახე ვარო და იშვიათად თუ მოსცილდებოდა იქაურობას. ეს მოჩვენებითობაც სულ უფრო ძნელი ასატანი ხდებოდა ამ უღონო უძრაობაში, სადაც იგი მიკროს-კოპის ქვეშ იყო და მუდამ სინჯავდნენ. რაკი დიკი ბოლომდე

ვეღარ უკრავს რის დაკვრაც უნდოდა, ეს იმის ნიშანია, რომ ცხოვრება წერტილამდეა დასული. კიდევ კარგა ხანს იჯდა დიდ ოთახში, სადაც როიალი იდგა და ელექტრო საათის ზუ-ზუნს უგდებდა ყურს. უსმენდა, როგორ მიდიოდა დრო.

ნოემბრის თვეში ზღვა შავად მოიქცა, ტალღები სულ უფრო მეტად ეხეთქებოდა ჯებირს და ასანაპირო გზამდე გადმოდიოდა. წავიდა ზაფხულის ცხოვრება და მიტოვებული პლაჟებიც შესაბრალისად იყურებოდნენ მისტრალსა და წვიმაში. გოსის ოტელი დაიხურა, რომ შეეკეთებინათ და გაეფართოებინათ და ჟუან-ლე-პენის საზაფხულო კაზინოსაც ემატებოდა და ემატებოდა საშენი ხე-ტყე. კანსა და ნიცაში დაივერებს ახალი ნაცნობები შეემატნენ — ორკესტრანტები, რესტორატორები, მებაღე ენთუზიასტები, გემთმშენებლები,—დიკმა თავისთვის ძველი, მოტორიანი დიდი ნავი იყიდა, — და "სინდიკატ ინიციატივის"¹ წევრები. თავიანთი მსახურების ზნე-ჩვევები ორთავემ კარგად იცოდა და ბავშვების აღზრდაზეც ბევრს ფიქრობდნენ; დეკემბრისთვის ნიკოლი უკვე ისევ გამოკეთდა; მთელ იმ თვის მანძილზე დიკს ერთხელაც არ შეუმჩნევია დაძაბული მზერა, მოკუმული პირი ან უმიზეზო სიცილი, არ გაუგონია ერთი უაზრო რემარკაც კი, და საშობაოდ დაივერები შვეიცარიის ალპებში წავიდნენ.

# XIII

შიგ შესვლამდე დიკმა ქუდით ჩამოიფერთხა თოვლი მუქი ლურჯი სათხილამურო კოსტიუმიდან. ჩაის მერე დიდი ჰოლი უკვე დაეცალათ, მაგიდები კედელთან მიედგათ და ორ
ათეულ წელს სათხილამურო ფეხსაცმლის დიდ ლურსმნებდაკვალულ იატაკზე, ნაყვავილარს რომ ჰგავდა, ახალგაზრდა ამერიკელები ცეკვავდნენ. ასამდე იქნებოდნენ, სუყველა გშტადის
დასახლების სკოლელები: "ნუ მოგყავს ლულუს" მხიარულ
ჰანგზე ხტოდნენ და ჩარლსტონის შმაგ რიტმში შეპყრობილები-

<sup>1</sup> ადგილობრივი რესურსების გამოვლენის ორგანიზაცია.

ვით იკრუნჩხებოდნენ. აქ გულუბრყვილო და უფიქრელი ახალგაზრდობის კოლონია იყო — მოთარეშე მდიდრებს სენ მო-რიცში მოეყარათ თავი — ბები უორენი გრძნობდა, თავი რომ გაიმეტა და დაივერებს გშტადში წამოჰყვა.

დიკმა იოლად შეამჩნია დები ხალხში, პლაკატებივით თვალშისაცემი სათხილამურო კოსტიუმები ეცვათ — ნიკოლს ცასავით ლურჯი, ხოლო ბების აგურისფერ-წითელი. ახალგა-ზრდა ინგლისელი რაღაცას უამბობდა, მაგრამ არ უსმენდნენ. ცეკვის რიტმს ისინიც აეტანა და მიმორწეულ ჰოლში მოცე-კვავე ქალ-ვაჟიანს თვალს არ აშორებდნენ.

თოვლისაგან ისედაც ღაწვებაწითლებული და გაბრწყინებული ნიკოლი დიკის დანახვაზე კიდევ უფრო გაბრწყინდა.

"ჰო, სად არის?"

"მატარებელზე დააგვიანდა, შემდეგს გამოჰყვება". დიკი დაჯდა, ფეხი ფეხზე გადაიდო, მძიმე ფეხსაცმელს აქანავებდა.

"გასაგიჟებლები ხართ ორივენი. ხანდახან მავიწყდება, რომ აქ ერთადა ვართ და თქვენ დანახვაზე ლამის არის ჭკუა დავკარგო".

ბები მაღალი იყო, ლამაზი გარეგნობისა, კარგად მოვლილი და არ ემჩნეოდა, რომ მალე ოცდაათს გადასცდებოდა.
ლონდონიდან ორი თანამგზავრი ჩამოეყვანა — ერთი ჯერაც
კემბრიჯელი სტუდენტი, მეორე კი ვიქტორიანული ტიპის
ხანშესული უზნეო მამაკაცი. შიგდაშიგ ბები უკვე ავლენდა
შინაბერულ ჩვევებს — ზედმეტ მგრძნობიარობას მიკარებაზე,
შეკრთომას — ვინმე თუ უცებ შეეხებოდა, ისეთი ხანგრძლივი კონტაქტები კი, როგორიც კოცნა ან მოხვევაა, სხეულს
ატანდა და პირდაპირ გონებაზე გადადიოდა. ჟესტიკულაციას
იშვიათად მიმართავდა — ეს მთელი ტანის მოქნილობას მოითხოვდა, და ფეხის დარტყმას ამჯობინებდა, ანდა, თითქმის
ძველმოდურად თავის გაქნევას. თუ ნაცნობთაგანს უბედურება შეემთხვეოდა, სიამოვნებას ჰგვრიდა სიკვდილის წინათგრძნობა და გემოს ატანდა ნიკოლის ტრაგიკულ ხვედრზე ფიქრს.

იმ ინგლისელებიდან უფრო ახალგაზრდა, როცა თხილამურებით სეირნობდნენ, ან მთიდან მარხილით ეშვებოდნენ, დებს თან ახლდა. დიკი მეტისმეტ რისკზე წავიდა, პირველსავე დღეს ისეთი ტელემარკი გააკეთა, კოჭი იღრძო და ამიტომ, მხოლოდ ბავშვებთან ერთად თუ შეეძლო "ბალღების ფერდობზე" ესრიალა, ან კიდევ, სულაც ოტელში რჩებოდა და ბურახს სვამდა ერთ რუს ექიმთან.

"გამხიარულდი, დიკ, მოწყენილი ხარ", ჩააცივდებოდა ნიკოლი. "ამდენი გოგოა, გაიცანი, შუადღეზე საცეკვაოდ გაიწვიე და გაერთობი".

"შერე, რაზე უნდა ველაპარაკო?"

"შენ როგორ ფიქრობ, რაზე უნდა ელაპარაკო?" განგებ აიმაღლა თავისი დაბალი, ოდნავ მოგუდული ხმა და კეკლუცად გააბა: "ო, რა კარგია, რა სჯობია ახალგაზრდობას".

"ვერ ვიტან ნორჩ გოგოებს, ზეითუნნარევი საპნისა და პიტნის ჩასატკბარუნებლის სუნი ასდით. იმათთან რომ ცეკვავ, გეგონება, საბავშვო ეტლს დაატარებო".

ეს სახიფათო თემა იყო და დიკს წუთითაც არ ავიწყდებოდა, რომ ფრთხილად უნდა ყოფილიყო — ცდილობდა კიდევაც ქალწულებისთვის არ შეეხედა და სადღაც იმათ თავებზემოთ ეცქირა.

"ბევრი საქმე გვაქვს". თქვა ბებიმ. "ჯერ ერთი, წერილი მივიღე შინიდან იმ ნაკვეთზე, ვაგზლის ნაკვეთს რომ ვეძახით. ამ ნაკვეთის ნახევარი დიდი ხანია რაც იმ ვაგზლის კომპანიამ შეისყიდა და ახლა იმავე კომპანიამ მთლიანად იყიდა ნაკვეთი. ეს მიწა მემკვიდრეობის ნაწილია, დედას ეკუთვნოდა, საკითხი ასე დგას: დაბანდდეს აღებული ფული".

ინგლისელმა, ვითომ, აქაოდა ასეთი თემა არ მაინტერესებსო, ვიღაც ქალიშვილი გაიწვია საცეკვაოდ. ბებიმ მიბნედილი მზერა გააყოლა, იმ ამერიკელი ქალიშვილებივით, მთელი თავიანთი ცხოვრება ყველაფერ ინგლისურს რომ აღმერთებენ, და მერე ისევ საუბარს დაუბრუნდა:

"ფული კარგა ბევრია. თითოეულზე სამას ათასამდე მოდის. ჩემი კაპიტალდაბანდება ჩემი საქმეა, მივხედავ, მაგრამ ნიკოლს ამ საქმეში არაფერი გაეგება და მგონია, არც თქვენ გაგეგებათ".

"მატარებელზე არ დამაგვიანდეს", ორჭოფულად თქვა დიკმა.

გარეთ თოვდა. ჩამობნელდა, სველი ფიფქები სახეში ეყრებოდა და ეყლაპებოდა. სამმა პატარა ბიჭმა ციგებით ჩაუარა, რაღაც გაუგებარ ენაზე დაუძახეს, აფრთხილებდნენ. ცოტა ხნის მერე უკვე ქვევიდან, მოსახვევიდან მოისმა იმათი ხმა. მთაზე ამავალი ცხენის მარხილის და კლარუნების ხმა გაიგონა. დღე-სასწაული ახლოვდებოდა და ვაგზალიც ბრწყინავდა. კაბუკები და ქალიშვილები კიდევ ქაბუკებისა და ქალიშვილები გიდევ ქაბუკებისა და ქალიშვილების ჩამოსვლას ელოდნენ; ეს რიტში დიკსაც გადაედო და მატარებლიდან ჩამოსულ ფრანც გრეგოროვიუსს ისეთი სახით შეხვდა, გეგონება გაუთავებელი ლხინიდან ცოტა ხნით ძლიკისივობით დაეღწია თავი, რომ აქ მოსულიყოო. მაგრამ ფრანცს რაღაც მიზანი ჰქონდა და დიკის ლხენაც ვერ გადაახვევინებდა ფრანცს ამ მიზნიდან. "მე შემიძლია ციურიხში ჩამოსვლა, ერთი დღით მაინც", იწერებოდა დიკი, "ან იქნებ თქვენ მოახერხოთ და ჩამოხვიდეთ ლოზანაში?" ფრანცმა გშტადში ჩამოსვლაც მოახერხა.

ფრანცი ორმოცი წლისა იყო. ჯანმრთელი შესახედაობისა, კარგი, პროფესიული მანერებით, მაგრამ ამ მანერებზე მეტად ერთგვარი პედანტიზმი უფრო იცავდა, ამით შეეძლო ზიზღებოდა ის მდიდარი პაციენტები. რომლებისთვისაც ხელახლა უნდა ესწავლებინა ცხოვრება. მეცნიერული მემკვიდრეობა დიდ სამყაროს უშლიდა წინ, მაგრამ, ეტყობა თვითონ უფრო მოკრძალებული ცხოვრებისეული პოზიცია ამჯობინა და ეს ცოლის არჩევითაც დაადასტურა. ოტელში ბები უორენმა ახედედ-დახედა და რაკი ღირსსაცნობი ვერაფერი აღმოაჩინა, ვერც სინატიფე-დახვეწილობა, ერთი სიტყვით ვერაფერი, რითაც ერთმანეთს მაშინვე ცნობენ პრივილეგიური კლასები, მხოლოდ მეორეხარისხოვანი ყურადღების ღირსი გახადა. ნიკოლს, როგორც ყოველთვის, ცოტათი ეშინოდა ფრანცის. დიკს მოსწონდა, და როგორც ყველა თავის მეგობარს, ამასაც ისე ექ-ცეოდა, ზედმეტი არ უყვარდა.

საღამოთი ისინი გორაკის ჩავლით სოფელში დაეშვნენ პატარა მარხილებით. მარხილები აქაურებისთვის ის იყო, რაც ვენეციელებისთვის — გონდოლები, სოფელს ოტელიცა ჰქონდა, შვეიცარიული ძველი სახამროთი — ფიცრული კედლებით, ექოსავით არეკლილ ხმებს რომ აყენებდა, საათებით, კასრებით, კათხებითა და ირმის რქებით. გრძელი მაგიდები ერთმანეთზე მიედგათ, იტყოდით, დიდი ქეიფი აქვთო. ყველანი

ძნელმოსანელებელ, უელსურ საჭმელს შეექცეოდნენ და ზედ შეზავებულ წითელ, ცხელ ღვინოს აყოლებდხენ.

ღრეობდნენ, ძაღლი პატრონს ვერ იცნობსო, თქვა ახალ გაზრდა ინგლისელმა და დიკმაც კვერი დაუკრა, ზუსტიაო ცხელი, შეზავებული ღვინო თავში აუვარდა, ეჩვენებოდა, რომ ოთხმოცდაათიანი ოქროს წლების ჭაღარა ვეტერანების, პიანინოს რომ მისხდომოდნენ და ძველ სიმღერებს გაჰყვიროდნენ, იმათ აყოლილი ახალგაზრდა ხმებისა და ელვარე კოსტიუმების თამბაქოს კვამლში შერეული ფერების გამო, ყველაფერი ისევ თავის ადგილას დალაგდა სამყაროში. წამით თითქოს ხომალდზე იყვნენ ზღვაში, და საცაა ხმელეთს დაინახავდნენ. ქალწულებრივი სახეები, მომლოდინე, რომ ეს საღამოცა და ეს ლხინიც რაღაცა ახალს ჰპირდებოდა... დიკმა მალულად გაიხედა, ადრე რომ შეამჩნია, იმ ამერიკელ ქალიშვილს ეძებდა თვალით, მოეჩვენა, რომ ისიც მაგიდას უჯდა, ოღონდ ამათ უკან — მერე სულაც გადაავიწყდა და მიეთმოეთს მოჰყვა, რაღაცებს იგონებდა, თავისებს ართობდა.

"მინდა გელაპარაკოთ", ინგლისურად უთხრა ფრანცმა.

"მხოლოდ ორი დღით წამოვედი".

"მივხვდი, გუნებაში რაღაცა გქონდათ".

"გეგმა მაქვს — შესანიშნავი". ფრანცმა თავისი მძიმე ხელი დიკის მუხლს დაადო. "გეგმა, რომელიც ჩვენ ორივეს გამოგვადგება".

"ho shob?"

"დიკ, შეგვიძლია საკუთარი კლინიკა გვქონდეს — გახსოვთ ბრაუნის ძველი კლინიკა ცუგის ტბაზე? ძველია, მაგრამ თითქმის მთლიანად ახალი ტექნიკით აღჭურვილი. ბრაუნი ავად არის და ავსტრიაში სურს წასვლა. იქ თუ უნდა წუთისოფელს დაემშვიდობოს, ალბათ ამისთვის. ასეთი შანსი ცხოვრებაში ერთხელ გეძლევა კაცს. თქვენ და მე — უკეთეს წყვილს ვერც ინატრებ! არა, მოიცათ, ბოლომდე მათქმევინეთ".

ბების თვალებში ყვითელმა ცეცხლმა დაკვესა და დიკი

მიხვდა, რომ ყურს უგდებდა.

"ეს საერთო საქმე იქნება. თქვენ მიიღებთ ბაზას, ლაბორატორიას, საკუთარ ექსპერიმენტულ ცენტრს და ხელფეხშებოჭილიც არ იქნებით — ბევრი-ბევრი ექვსი თვე იყოთ აღ-

გილზე, კარგი თვეები, კარგ ამინდში, ზამთარში კი შეგიძლიათ წახვიდეთ ამერიკაში ან საფრანგეთში და ახალი კლინიკური გამოცდილების ბაზაზე წიგნები წეროთ". ფრანცმა ცოტა ხმას დაუწია. "ოჯახისთვისაც გამოგადგებათ კლინიკის რეჟიძი, ატმოსფერო". დიკს ვერ შეატყო მხარდაჭერა და ამ პუნქტს მოეშვა, ენის წვერი ოდნავ გამოყო და უმალ დამალა. "ჩვენ შეგვეძლება პარტნიორობა, მე ადმინისტრატორი ვიქნები, თქვენ — თეორეტიკოსი, ბრწყინვალე, მაღალკვალიფიციური კონსულტანტი და ასე შემდეგ. მე ვიცი ვინ ვარ და რა ვარ. ვიცი, მაინცდამაინც დიდი ნიჭით ვერ დავიკვეხნი, თქვენ პირიქით. მაგრამ კარგ კლინიცისტად ვითვლები და მკურნალობის ახალი მეთოდებიც ვიცი, ამ მხრივ მეტად კომპეტენტურიცა ვარ. ზოგჯერ თვეობით ვუძღვებოდი ძველ კლინიკას. პროფესორი აღტაცებულია ამ გეგმით. არ გადაიფიქროთო, მირჩევს. სიცოცხლეს არ ვეთხოვები და ბოლო წუთამდე ადგილზე ვიქნებიო, ამასაც ამბობს",

სანამ საქმიან მხარეს შეეხებოდა, დიკმა წინასწარ წარმო-

იდგინა მთელი ეს პერსპექტივა.

"ფინანსურ მხარეზე რას იტყვით?" ჰკითხა ბოლოს.

ფრანცს ყველაფერი, ნიკაპი, წარბები, არც ისე ღრმა ნაოჭები შუბლზე, თითები, იდაყვები, მხრები, რაღაცა აეზიდა, ფეხის კუნთები ისე დაეჭიმა, რომ შარვლის ქსოვილზეც კი შეეტყო. გულიც კი ყელთან მიებჯინა, ხმა კი თითქოს ხახას მიეკრა.

"საქმეც ეგ არის! ფული!" მწარედ წამოიძახა. "ფული ცოტა მაქვს. ბრაუნმა კლინიკა ამერიკულ ფულზე ორას ათას დოლარად შეაფასა. აუცილებელია მოდერნი-ზა-ცია" — ბოლო სიტყვა ისე წარმოთქვა, გეგონება გემოს ატანდა თითოეულ მარცვალს, — "ოცი ათასი დოლარი დაჯდება. მაგრამ ეს კლინიკა ოქროს საბადოა, გეუბნებით, ასეა, ღრმად მჯერა. საქმეს უკვე, ასე თუ ისე, გადავხედე. ორას ოცი ათასი დოლარის დაბანდებით ამ საქმეში, ისეთი შემოსავალი გვექნება…"

ბები ლამის გათავდა ცნობისმოყვარეობისაგან, ეყოფაო, გაიფიქრა დიკმა და თქვა:

"ბები", მიმართა მან, "ერთი მითხარით, ევროპელს თუ

სასწრაფოდ ამერიკელი დასჭირდა, ეს უეჭველად · ხომ იმას ნიშნავს, რომ საქმე ფულს ეხება?"

"რა ხდება?" უცოდველად იკითხა ბებიძ.

"ამ ახალგაზრდა პრივატ-დოცენტს სურს, ჩემთან ერთად დიდი ბიზნესი წამოიწყოს — კლინიკა გახსნას ნერვებით დაა-გადებული ამერიკელებისათვის".

ფრანცი შეშფოთებით შეაჩერდა ბების, დიკი ისევ ლაპა-

რაკობდა:

"ჰო, მაგრამ, ვინა ვართ ჩვენ, ფრანც? თქვენ დიდი წინაპრების სახელს ატარებთ, მე კი ფსიქიატრიის ორი სახელმძღვანელო გამოვაქვეყნე. განა ეს კმარა ავადმყოფების მისაზიდად? თანაც, არც მე მაქვს ბევრი ფული — მეათედიც არა
მაქვს". დიკმა შეამჩნია, ფრანცმა უნდობლად ჩაიცინა. "პატიოსან სიტყვას გეუბნებით, არა მაქვს. ნიკოლი და ბები მდიდრები არიან, კრეზებივით, მაგრამ ეს სიმდიდრე ჩემ ხელთ არ
არის, ვერ მოვახერხე ათვისება".

ახლა სუყველა ამათ ლაპარაკს უგდებდა ყურს — შეიძლება ის ქალიშვილიც, სადღაც უკანა მაგიდასთან რომ ზისო, გაიფიქრა დიკმა. ამ აზრმა გაართო კიდევაც. ადგეს და ბებიმ ილაპარაკოს მის მაგივრად. თავისთვის დაასკვნა, იმ კაცებივით,
ხშირად ქალებს რომ ალაპარაკებენ საქმეზე, მაგრამ იციან,
რომ ბოლო სიტყვა მათზე არ არის. ბები უცებ მთლად პაპამისად იქცა, იმისი დინჯი და საქმიანი იერი მიიღო.

"ჩემი აზრით ამაზე დაფიქრება ღირს, დიკ. კარგად არ ციცი რა თქვა დოქტორმა გრეგორიმ, მაგრამ, მე მგონია…"

ის ქალწული კვამლის რგოლებში ჩაიხარა უკან და იატაკიდან რაღაცა წამოკრიბა. ნიკოლის სახე დიკის წინ იყო — მისი სილამაზე, ახლა თითქოს განგებ მღელვარე და მომლოდინე, იღვრებოდა და თითქოს ერთვოდა დიკის სიყვარულს, იმ სიყვარულს, ყოველთვის რომ იცავდა ნიკოლს.

"მოიფიქრეთ, დიკ", ჩაციებით ამბობდა აღელვებული ფრანცი. "არ შეიძლება ფსიქიატრიაზე წერო, თუ კლინიკასთან კავშირი არა გაქვს. იუნგი წერს, ბლეილერი წერს, ფროიდი წერს, მიხედეთ ფორელსა და ადლერს, ყველანი წერენ და გონებრივი აშლილობის შემთხვეგებს ყველანი კლინიკებში აკვირდებიან, ეს კავშირი ყველას სჭირდება".

"მერე, მე რისთვისა ვარ?" გაიცინა ნიკოლშა, "მე თუ მკიპ თხავთ, ერთი ასეთი გონებრივი აშლილობა მეტიც არის ერთი კაცისთვის".

"ეს სულ სხვა რამეა", ფრთხილად შენიშნა ფრანცმა.

ბები კი უკვე ფიქრობდა იმაზე, რომ ნიკოლის კლინიკასთან ახლო ცხოვრება მასზე ჯავრს თითქმის გაუქრობდა.

"ჩვენ ყველაფერს მოვიფიქრებთ", თქვა მან.

ბების თავხედობამ გააცინა დიკი, მაგრამ ცოტა გაბრაზდა კიდეც. "საქმე მე მეხება, ბები", მშვიდად შენიშნა მან. "რა თქმა უნდა, ძალიან მსიამოვნებს, რომ მზადა ხართ მიყიდოთ კლინიკა".

იგრძნო ბებიმ, კარგად არ გამოუვიდა და მაშინვე უკან დახევა სცადა.

"რა თქმა უნდა, დიკ, ეს მთლიანად თქვენი საქმეა".

"ასეთ საკითხს სახელდახელოდ ვერ გადაწყვეტ, რამდენიმე კვირა მაინც გჭირდება კაცს, რომ მოიფიქრო. თანაც არ
ვიცი, როგორ გავძლებთ მე და ნიკოლი ციურიხში. მე..."
ფრანცს მიუბრუნდა, წინასწარ მიხვდა, რა პასუხსაც მიიღებდა. "ჰო, რა თქმა უნდა, ვიცი, ციურიხში წყალიც არის, გაზიც და ელექტრონიც — სამი წელი ვცხოვრობდით იქ".

"მოიფიქრეთ, მე არ გაჩქარებთ", თქვა ფრანცმა, "მაგრამ

მჯერა, როშ..."

ასი წყვილი ხუთგირვანქიანი მძიმე ფეხსაცმელი აბრახუნდა გასასვლელთან და თავისი კომპანიითურთ დიკიც სხვებს
მიჰყვა. გარეთ, მთვარის ცივ ნათებაში ისევ მოჰკრა თვალი იმ
ქალიშვილს. ციგის მარხილზე მიბმას ცდილობდა. თავიანთი
მარხილი მონახეს, ზედ ავიდნენ, ცხენები აიძაგრნენ და შეძახილსა და მათრახების ტკაცუნში დაიძრნენ, მკერდით მიარლვევდნენ ღამეულ ჰაერს. ვიღაცები სირბილით ეწეოდნენ, ციგებს ეჭიდებოდნენ, ყველაზე ახალგაზრდები ერთმანეთს აწყდებოდნენ და რბილსა და მშრალ თოვლში ეცემოდნენ. მერე
ისევ სირბილით ეწეოდნენ და არაქათწართმეულები დაეხეთქებოდნენ ციგებზე, ან თუ არადა, ღრიალებდნენ, ჩვენი დატოვება გინდათო. გარეშემო მწყალობელ ველებს მიერულათ
გზა, რომელსაც ეს კავალკადა ზევით მიჰყავდა, უსასრულო და
და უსაზღვრო იყო. სოფელთან მიჩუმდნენ. ეტყობა, ატავის-

საანენში უცებ მოიფიქრეს მუნიციპალურ მეჯლისზე წასვლა და მწყემსების, ოტელის მსახურების, დახლიდარების, მოთხილამურე გიდების, ტურისტების, გლეხების ბრბოში გაერივნენ. პანთეისტური შეგრძნების მერე, ისევ სითბო და ხალხმრავლობა რაღაც აბსურდული, რაინდის ბრწყინვალე სახელის დაბრუნებასა თუ ომში მძიმე და დეზებიანი ჩექმებივით ზარდამცემსა და გასახდელში კი ბეტონის იატაკზე ფეხბურთის ბუცების ყურთწამღებ ხმასა ჰგავდა. ტიროლურ სიმღერებს მღეროდნენ, იოდელის ნაცნობ რიტმს დიკი იმ რომანტიკულობიდან გამოჰყავდა, რითაც პირველად შეეხედა ამ სანახაობისთვის. გუნება შეეცვალა — გაიფიქრა, ალბათ იმიტომ, რომ თავიდან ამოვიგდეო იმ ქალიშვილზე ფიქრი, მაგრამ მერე გაახსენდა ბების სიტყვები: "ჩვენ ყველაფერს მოვიფიქრებთ..." და ისიც, რაც ამის მიღმა იფარებოდა: "თქვენ ჩვენ გვეკუთვნით, აღრე თუ გვიან ამას თვითონაც აღიარებთ, აბსურდია თქვენი ეგეთი თავდაჭერაც — გითომდა არა".

დიდი ხანია დიკს აღარავისი ზოღმა ჰქონია — იმის მერე, ნიუ-ჰეივენელი პირველი კურსის სტუდენტი `რომ იყო და "გონებრივ ჰიგიენაზე" პოპულარულ ესეს წააწყდა. ახლა ბებიმ გააცოფა პირდაპირ თავისი გულგრილი თავხედობით, აქაოდა, მდიდარი ვარო, და ბრაზს ვეღარ იოკებდა. გულს უნდა მორეოდა, მაგრამ ადვილი არ იყო. ალბათ რამდენი ასი წელი გაივლის, მანამ, სანამ ასეთი ამორძალები მიხვდებიან, რომ ფაქტიურად ადამიანი ყველაზე უფრო მოწყვლადია სიამაყე-ში და უნდა ეცადო არ შეულახო ეს სიამაყე, თუ არადა, ჰამპტი-დამპტი¹ ხდება, ვისაც მერე პირმოთნედაც ექცევა ყველა, და გვიანღა არის. დოქტორი დაივერი თავისმა პროფესიამ. რითაც დაწეწილი სულის პაციენტებთან უხდებოდა ყოფნა, მიაჩვია, სათუთად მოპყრობოდა ადამიანებს. მაგრამ:

"მეტისმეტად თავაზიანი გახდა ყველა", თქვა მან, წყნარად მავალი მარხილებით ისევ გშტადის გზას რომ დაადგნენ.

"მე ვფიქრობ, ეს ძალიან კარგია", მიუგო ბებიშ.

¹ ძველი ინგლისური საბავშვო გამოცანის გმირი (პასუხით: "კვერცხი").

"არა, არ არის ძალიან კარგი", შეესიტყვა დიკი, უსახო გეწვეულს მიმართავდა სიბნელეში. "რა არის ეს მეტისმეტი თავაზიანობა, ის, რომ სუყველა მეტისმეტად სათუთია და უხელთათმანოდ ვერ შეეხები. მერედა, პატივისცემა ადამიანის მიმართ? ცხადია, იოლი არ არის, ვინმეს მატყუარა, ან ლაჩარი დაუძახო, მაგრამ თუკი მთელი სიცოცხლე ხალხის გრძნობებს დაინდობ და პატივმოყვარეობას ასაზრდოებ, მაფინ, ბოლოს და ბოლოს იმას როგორდა მიაგებ პატივს, რაც ჭეშმარიტად ღირსეულია ადამიანში".

"მე ვფიქრობ, ამერიკელები ძალიან დიდ მნიშვნელობას

ანიჭებენ მანერებს", შენიშნა ხნიერმა ინგლისელმა.

"ასეა, ძალიან", დაუდასტურა დიკმა. "მამაჩემს, მაგალითად, შთამომავლობით ჰქონდა ძვალ-რბილში გამჯდარი მანერები, იმ დროიდან, როცა ჯერ იარაღს ესროდნენ ხოლმე ერთმანეთს და მერე ბოდიშსაც მოიხდიდნენ. იარაღასხმული
კაცი — თუმცა თქვენ, ევროპელები უკვე მეთვრამეტე საუკუნის დასაწყისიდან აღარ ატარებთ იარაღს მშვიდობიან
დროს..."

"იქნებ მთლად ასე..."

"მთლად ასე და ისედაც".

"თქვენ ყოველთვის შესანიშნავი მანერები გქონდათ,

დიკ", შემრიგებლურად უთხრა ბებიმ.

ბამბურა ქალები, თავიანთი ბეწვის ქურქებით სამხეცეს ბინადრებს რომა ჰგვანდნენ, შეშფოთებით შესცქეროდნენ დიკს. უმცროსმა ინგლისელმა ვერაფერი გაიგო, ერთი იმ ყმაწვილთაგანი იყო, ლავგარდანებსა და აივნებზე ხტომაზე რომ გიჟდებიან და ამ დროს თავი იალქნიან ხომალდზე ჰგონიათ — და მოჰყვა გრძელსა და უაზრო ამბავს, თავის ძმაკაცთან რომ მოუხდა — კრივი გამართეს თურმე, ძალიან ჰყვარებიათ, მთელ საათს ურტყამდნენ, დაალურჯეს ერთმანეთი ჩხუბის სუყველა წესის დაცვით. დიკი ხუმრობის გუნებაზე დადგა.

"და ყველა მის დარტყმაზე, უფრო აფასებდით, როგორც

მეგობარს?"

"უფრო მეტ პატივს ვცემდი".

"მე ვერ გავიგე თავი და თავი ამ ამბისა. თქვენ და თქვენი ძმაკაცი ჩხუბობთ რაღაც სისულელის გამო..." "თუ ვერ გაიგეთ, რა ვქნა მერე". ცივად მიუგო ყმაწვილმა ინგლისელმა.

— ყოველთვის ასე თავდება ხოლმე, თუკი ისა ვთქვი, რა-

საც ვფიქრობ, გაიფიქრა დიკმა.

დიკს შერცხვა, არა, რა საჭირო იყო ამ ყმაწვილის გალიზიანება, რაღაც უაზრო ამბავს რომ მოჰყვა, მით უფრო უაზროს იმის გამო, რომ თავადაც კარგად არ ესმოდა და თან სო-

ფისტივით ლაპარაკობდა მთელ იმ კრივზე.

საკარნავალო მხიარულებას თავისი გაჰქონდა. ფხიზლდებოდნენ და ერთბაშად ყველა ბარს მიაწყდა, ტუნისელი ბარშენი ჯადოქარივით ცვლიდა შუქ-ჩრდილებს და სინათლის
რთულ კონტრაპუნქტს ქმნიდა — მისი მთავარი მელოდია —
დიდ ფანჯარაში საციგურაოდან არეკლილი მთვარის ნათება.
ის ქალიშვილიც იქ იყო, მაგრამ თითქოს ეშხი წაერთვა ამ
შუქის თამაშში და დიკს ინტერესი დაეკარგა იმის მიმართ.
საინტერესო ის უფრო იყო, ჩაბნელებული ბარისათვის ეცქირა ახლა, სადაც ვერცხლისფრად, ხანაც მწვანედ იწვოდა ხოლმე სიგარეტი წითელი შუქის გაელვებისას. ზოგჯერ კიდევ,
კარის გაღება-დახურვისას, თუ რა უცებ შემოდიოდა და იწელებოდა თეთრი ზოლი.

"ახლა, მითხარით, ფრანც", უთხრა დიკმა, "როგორ ფიქრობთ, მთელ ღამეს რომ ჩაჯდები და ლუდის სმის მეტს არას აკეთებ, შეიძლება პაციენტებთან მიხვიდე და დააჯერო, რომ რაღაცას წარმოადგენ? როგორ გგონიათ, არ იტყვიან, ლო-

თიაო?"

"მე წავალ, დავიძინებ", გამოაცხადა ნიკოლმა. დიკი გაჰყვა, რომ ლიფტამდე მიეცილებინა.

"მეც წამოვიდოდი, მაგრამ ფრანცს უნდა გავაგებინო,

რომ კლინიცისტად არ გამოვდგები".

ნიკოლი კაბინაში შევიდა.

"ბების ძალიან საღი აზრი აქვს", დაფიქრებით წარმოთქვა ნიკოლმა.

"ბები ერთი იმათგანია, ვინც..."

ლიფტის კარი ხმაურით მიიხურა და გვარლის ვიბრაციის ზუზუნში დიკმა ფიქრში დაამთავრა: "ბები შეზღუდული, ანგა-რიშიანი ეგოისტია".

მაგრამ ორი დღის მერე, ვაგზალში, როცა ფრანცს აცილებდა, დიკმა უთხრა, რომ მოიფიქრა და ალბათ თანახმა იქ-

ნებოდა.

"ეტყობა რაღაც ქაჯურ წრეში ვხვდებით". თქვა მან. "დაძაბული ცხოვრებით ვცხოვრობთ, ნიკოლისთვის უკვე ძნელია რივიერაზე ჩვენი პასტორალური ზაფხული კი უკვე გათავდა — მერმინდელ სეზონში უფრო მოდურ აგარაკად იქცევა ეს ადგილი".

ხრაშახრუშა თოვლიან ადგილებსა და საციგურაოებს გასცდნენ, იქ ვენის ვალსების გრიალი ისმოდა, მთის სკოლებზემოთ ფერადი დროშები ფრიალებდა და ფითრ ლურჯ ცისა

ფერს, ფერებს მატებდა.

"...ჰო, ვნახოთ, ფრანც, იქნებ კარგად წავიდეს საქმე. სხვასთან ალბათ არ ვინდომებდი".

მშვიდობით, გშტად! მშვიდობით. საბრალობელო მზრალო ყვავილნო, ფიფქებო ღამის სინანულისა, კისკასო სახე. მშვი-დობით გშტად, მშვიდობით!

## XIV

ივლისის ერთ მშვენიერ დღეს დიკს დილის ხუთ საათზე გაეღვიძა, ომი ესიზმრა. ფანკარასთან მივიდა და ცუგის ტბას გახედა. სიზმრის დასაწყისი პირქუშად დიდებული იყო. ბნელ მოედანზე ცისფერუნიფორმიანებმა მარშით გაიარეს, სასულე ორკესტრი პროკოფიევის "სამი ფორთოხლის სიყვარულს" უკრავდა. მერე მიდიოდნენ სახანძრო მანქანები, უბედურების სიმბოლოები, სულ ბოლოს კი შემაზრზენი ამბოხი დაჭრილებისა შესახვევ პუნქტში. დიკმა სასთუმლის ლამპა აანთო და სიზმარი ჩაიწერა, ბოლოს ცოტა ირონიული ფრაზაც მიაყოლა: "კონტუზია ზურგში".

საწოლის კიდეზე იჯდა და ეჩვენებოდა, რომ გარშემო სიცარიელე იდგა, სახლი, ოთახი, ღამე, ყველაფერი ცარიელი იყო. გვერდით ოთახში ნიკოლმა ნაღვლიანად წაილაპარაკა ძილში, დაიკვნესა. ეტყობა, რაღაცა უსიამოვნოს ხედავდა და დიკს შეეცოდა იგი. მისთვის დრო ხან სულაც ერთ ადგილზე იდგა, ხანაც სწრაფად მიქროდა, კინოფირივით. ნიკოლისთვის კი წლები წარსულში რჩებოდა, წარსულს ბარდებოდა, საათობით, კალენდრით, დაბადების დღეებით, მძაფრად რომ აგრძნობინებდა თავის წარმავალ სილამაზეს.

ეს თვრაშეტი თვეც ცუგის ტბაზე ნიკოლს დაკარგულ დროდ მიაჩნდა, წელიწადის დროთა ცვლასაც იმათი სახეებით თუ იგებდა, გზებზე რომ მუშაობდნენ — მაისში უწითლდებოდათ, ივლისში ყავისფერი უხდებოდათ, სექტემბერში ლამის უშავდებოდათ, გაზაფხულისთვის კი ისევ თეთრები იყვნენ. პირველი შეტევის მერე ცხოვრებას კვლავდაბრუნებული და იმედიანი, ბევრ რამეს ელოდა, მაგრამ ცხოვრება არც არაფერი არ აღმოჩნდა, ვერაფერს ჩაეჭიდა, გარდა დიკისა, ბავშვებისა, რომელთადმი ჭეშმარიტი სიყვარული არცა ჰქონია, გეგონება ობლები აეყვანა გასაზრდელად. ისინი, ვინც ნიკოლს მოსწონდა, მეამბოხე სულისა უფრო იყვნენ, მაგრამ იმათთან ყოფნა ხიფათს უქადდა, სიმშვიდე ერღვეოდა. უნდოდა ჩასწვდენოდა იმ სასიცოცხლო ძალის საიდუმლოს, ასეთ ხალხს თავისთავადებს, გამტანებსა ან შემოქმედებს რომ ხდიდა, მაგრამ ამაოდ, საიდუმლო ბავშვობის ბრძოლებში ჩამარხულიყო და დიდი ხნის წინათ დაევიწყათ. ნიკოლში უფრო მომხიბვლელობა და მოჩვენებითი ჰარმონია აინტერესებდათ, რითაც მისი ავადობა იფარებოდა, და მარტო იყო ცხოერებ ში, დიკს იკუთვნებდა და დიკს კი არავის კუთვნილება არ უნდოდა რომ ყოფილიყო.

ბევრჯერა სცადა თავისი ძალის შესუსტება დიკმა ნიკოლზე, მაგრამ ამაოდ. ხშირად ატარეს კარგი დრო ერთდ, ბევრი თეთრი დამე ჰქონიათ ლაპარაკსა და სიყვარულში, მაგრამ წასვლისას დიკი ყოველთვის თავის თავში იძირებოდა, თვითონ კი არაფერთან რჩებოდა და ეჭიდებოდა ამ არაფერს, შესცქეროდა, რა სახელს აღარ ეძახდა, მაგრამ იცოდა, ეს მხოლოდ იმედი თუ იყო იმისა, რომ ისევ დიკი დაბრუნდებოდა ძალიან მალე.

დიკმა ბალიში აიღო, დაწვა და კისერქვეშ ამოიდო იაპონელებივით, სისხლის მიმოქცევის შენელება რომ უნდათ ხოლმე. ცოტა ხანს ისევ დაეძინა. მოგვიანებით, პირს რომ იპარსავდა, ნიკოლი ადგა, დიკს ესმოდა, ოთახებში რომ დადიოდა და მსახურებსა და ბავშვებს მითითებებს აძლევდა. ლანიე მოვიდა, რათა ენახა, როგორ იპარსავდა პირს მამა. მთელ ამ ხანში, ფსიქიატრიულ კლინიკასთან რომ ცხოვრობდნენ, ლანიე დიდი ნდობითა და აღტაცებით ეკიდებოდა მამას, სხვებს კი, დიდების უმრავლესობას, გულგრილად უყურებდა. ავადმყოფებს ან რაღაც უცნაურებად და შერეკილებად თვლიდა, ანდა მოსაწყენ, ზედმეტად კარგად აღზრდილ ხალხად — ინდივიდუალობა არა აქვთო. ლანიე ლამაზი, საინტერესო ბიჭი იყო და დიკი ბევრ დროს უთმობდა მას. მათი ურთიერთობა კეთილი, მაგრამ მომთხოვნი ოფიცრისა და თავაზიანი რიგითის ურთიერთობასა ჰგავდა.

"მამა", ჰკითხა ლანიემ, "როცა იპარსავ, რატომ გრჩება ცოტა ქაფი საქოჩრეზე?"

დიკმა ფრთხილად გაიცალკევა საპნიანი ტუჩები.

"მე თვითონ არ ვიცი რადარანაირად. მე მგონია, ქაფი ჯერ თითზე მხვდება, ბაკებს როცა ვისწორებ და იმიტომ, მაგრამ მერე როგორღა ადის საქოჩრეზე, ეგ აღარ ვიცი".

"ხვალ თავიდანვე უნდა ვუყურო და ვნახო".

"საუზმემდე მეტი შეკითხვა აღარ გექნება?"

"ეს რა შეკითხვაა".

"როგორ არა, ერთ შეკითხვად უკვე ჩაგითვალე".

ოცდაათი წუთის მერე შინიდან გასული დიკი ადმინისტრაციული კორპუსისაკენ მიდიოდა. დიდი ხანი არ იყო, რაც ოცდათვრამეტისა გახდა, წვერს არ უშვებდა, მაგრამ პროფესიული აურა მაინც მიეცა — რივიერაზე არ იყო ასეთი. თვრამეტი თვე გავიდა, რაც აქ ცხოვრობდა და მუშაობდა კლინიკაში, რომელიც თავისი აღჭურვილობით ერთ-ერთი საუკეთესო იყო ევროპაში და დომლერის კლინიკასავით, ესეც ახალი ტიპისა — არც ერთი ბნელი და პირქუში შენობა — აქა-იქ ჩადგმული კოტეჯები კი სოფლურ მყუდროებას ქმნიდა. დიკისა და ნიკოლის გემოვნება აქაურობასაც დაეტყო და ტყუილად როდი იყო, რომ ციურიხში თუნდაც გავლით მოხვედრილ ყველა ფსიქიატრს, აუცილებლად უნდა შემოევლო და ენახა იგი. გოლფისა და ჩოგბურთისთვის საჭირო ნივთების შესანახი სპეციალური სახლიც რომ ყოფილიყო, შეიძლება ქალაქგარე კლუბადაც მიგეჩნიათ. "ასკილი" და "წიფელი", პატარა სახლები იმათთვის, ვინც წყვდიადში უკვე სამუდა-

მოდ ჩაძირულიყვნენ, მწვანე ჩირგვნარით იყო გაცალკევებული მთავარი კორპუსისგან — სიმაგრეები, კამუფლა**ჟით** კარგად დაფარული. იმის იქით ბოსტნები ჩანდა, ფერმის ერთ ნაწილს კლინიკის პაციენტები ამუშავებდნენ. აქ, ერთ სახურავქვეშ, სამი სახელოსნო იყო ერგოთერაპიისთვის და თავის დილის შემოვლასაც სწორედ იქიდან იწყებდა დოქტორი დაივერი. ერთში ხუროს საქმეს აკეთებდნენ, მზით იყო გაჩახჩახებული და ნახერხის მოტკბო, მივიწყებული ხის საუკუნის სუნი ტრიალებდა; იქ ყოველთვის ხუთი-ექვსი კაცი მაინც იყო, რანდავდნენ, ხერხავდნენ, კრავდხენ, გაჩუმებულები. მისი დანახვისას თავები ასწიეს და ზამი თვალებით შემოხედეს. დიკმა თვითონაც კარგად იცოდა ხუროს საქმე და ხელსაწყოებზე ჩამოუგდო ლაპარაკი. მშვიდად, გულწრფელი ინტერესით ლაპარაკობდა. გვერდით, წიგნების საამკინძაოში უფრო მოძრავი პაციენტები მუშაობდნენ, თუმცა, ამათაც არა ჰქონდათ მორჩენის შანსი. მესამეში ქსოვდნენ, მძივებს ასხამდნენ, თითბრისგან რაღაცებს აკეთებდნენ. ესენი ხანდახან შვებით ამოიოხრებდნენ, ისეთი იერით, გეგონება რაღაც ძნელმისახვედრის მიხვედრაზე ბოლოს და ბოლოს ხელი ჩაიქნიესო, მაგრამ, მათი ოხვრა ფიქრის მხოლოდ ახალი წრის დაწყებას მოასწავებდა, ფიქრისა, რომელიც ნორმალურივით, ხაზად კი არა, წრეზე რჩებოდა და ტრიალებდა, ტრიალებდა, ტრიალებდა, დაუსრულებლად ტრიალებდა. მაგრამ სახელოსნოში ნივთებისა და ფერების სიჭრელის გამო, ვინმე უცხოს წამით ის ილუზია შეექმნებოდა, თითქოს აქ ურიგოდ არა იყო რა, ისე როგორც საბავშვო ბაღში. დოქტორ დაივერის დანახვაზე ბევრმა გაიღიმა. პაციენტებიდან დოქტორ გრეგოროვიუსზე მეტად ბევრს დიკი უფრო მოსწონდა, მეტადრე იმათ, ვისაც სხვა ცხოვრებისა და სხვა საშყაროს ნახვა მოესწროთ. ზოგი ისეთიც იყო, ჩიოდა, რომ დიკი მათ უბრალოდ, არა ცნობდა, არ ამჩნევდა და პოზიორობდა. — არც ისე დიდი სხვაობააო სხვა გარემოსგან, ფიქრობდა დიკი, ოღონდ, აქ ყველა გრძნობა უფრო მძაფრი იყო და გამრუდებული.

ერთი ინგლისელი ქალი იმ თემაზე ელაპარაკებოდა ხოლ-

მე, თავის საკუთრებად რომ თვლიდა.

"დღეს იქნება მუსიკა?"

"არ ვიცი", მიუგო დიკმა. "ჯერ არ შინახავს დოქტორი ლადისლაუ. როგორ მოგეწონათ გუშინდელი კონცერტი მისიზ ზაკსი და მისტერ ლონგსტრიტი რომ უკრავდნენ?"

"მაინცდამაინც ბევრი არაფერი".

"მე მგონია, ძალიან კარგი იყო, შეტადრე შოპენი".

"არა, არა, ბევრი არაფერი".

"თქვენ როდისღა დაუკრავთ ჩვენთვის?"

როგორც ყოველთვის, უკვე რამდენი წელიწადია, ამ კითხვით როცა მიმართავდნენ, სიამოვნებდა და მხრებს აიჩეჩავდა ხოლმე, ახლაც ასე მოიქცა.

"როდისმე. მაგრამ მე ისე რა, კარგად არ ვუკრავ".

ყველამ იცოდა, რომ დაკვრა არც იცოდა, იმისი ორი და ცნობილი მუსიკოსი გახდა, ამან კი, ბავშვობაში ნოტებიც ვერ ისწავლა.

აქედან დიკი "ასკილისა" და "წიფლისაკენ" წავიდა. გარედან ეს პატარა სახლებიც სხვა სახლებივით მყუდრო ჩანდა. ჰო, ნიკოლმა მოიფიქრა დეკორაცია, თვალს არა ხვდებოდა გისოსები, ურდულები, მძიმე ავეჯი, ადგილიდან რომ ვერ დაძრავდი. საქმემ გამოგონებისკენაც უბიძგა, თუმცა ამისი უნარი არა ჰქონდა, მაგრამ ფანტაზიამ თავისი ქნა და წარმატებითაც გაართვა თავი ყველაფერს — ვინც არ იცოდა, ფიქრადაც არ მოუვიდოდა, რომ ფანჯრებზე გაქრული შნოიანი ფილიგრანული ბადეები ბორკილებს ცვლიდა, რომ თითბრის მოღუნული მილების მოდური სკამები ედუარდისდროინდელ მასიურ ნაკეთობებზე უფრო მძიმე იყო — ყვავილების ვაზებიც კი რკინისა, მაგრად იდგა და ძვრასაც გერ უზამდი. რადარანაირი ორნამენტიცა და მოსართავიც ისევე საჭირო იყო და თანაც ისე თავის ადგილას, როგორც საყრდენი კოჭებია ცათამბჯენების სახურავებზე. ნიკოლის დაუღლელმა მზერამ რაღა არ შეამჩნია და რისი გამოყენებაც კი შეიძლებოდა, გამოიყენა. თუ შეაქებდნენ, ნიკოლი უხეშად იტყოდა ხოლმე, ოსტატი მრჩილავი ვარო.

ვისი კომპასებიც დეპოლარიზებული არ იყო, იმათ ბევრი რამ გაუგებარი და უცნაური ეჩვენებოდათ ამ სახლებში. "ას-კილში", კაცების შენობაში, უცნაური პატარა ექსჰიბიციონის-ტი ჰყავდათ, რომელთან საუბარი ზოგჯერ ართობდა ხოლმე

დიკს. ეს ახირებული კაცი იმ აზრისა იყო, თუ არ დამიულიან და ტრიუმფალური თაღიდან თანხმობის მოედნამდე დედიუო-ბილას გამატარებენ, ამით ბევრი პრობლემა გადაიჭრებაო—ვინ იცის, იქნება მართალიაო, ფიქრობდა დიკი.

დიკის ყველაზე საინტერესო პაციენტი მთავარ კორპუსუი იწვა. ოცდაათი წლის ამერიკელი ქალი. ექვსი თვის წინათ მოვიდა კლინიკაში, მხატვარი იყო და დიდხანს პარიზში ცხოვრობდა. იმისი ისტორია კარგად არ იცოდნენ, ბიძაშვილს უნახავს, რომ ვერ იყო კარგად და ერთ ქალაქგარეთა, ვიღაც შარლატნის სამკურნალოში მიუყვანია, სადაც ძირითადად ლოთობისა და ნარკოტიკების მსხვერპლი ტურისტები მიჰყავდათ ხოლმე. იქ მკურნალობას, ცხადია, შედეგი არ გამოუღია და ამის მერეღა ჩამოუყვანია შვეიცარიაში. ემჩნეოდა, რომ საოცრად ლამაზი და მომხიბლავი იქნებოდა, ახლა კი, უკვე აგონიაში ჩავარდნილიყო. სისხლის ანალიზი დადებით რეაქციას არ იძლეოდა და ბოლოს საკმაოდ გაურკვეველი დიაგნოზი დაუსვეს: ნერვული ეგზემა. ორი თვე იყო, რაც ჩაწვა, რკინის მარწუხებში მოქცეულივით იტანჯებოდა, მაგრამ გონება არ დაჰკარგვია და თავისი ზღვარდაუდებელი ჰალუცინაციების საზღვრებში, საღად და თანმიმდევრულად აზროვნებდა, ელვარედაც კი.

დიკის პირად პაციენტად ითვლებოდა. მწვავე აგზნების პერიოდებში სხვა ექიმი ვერას შველოდა. მხოლოდ ერთხელ, ღამეები თეთრად რომ გაათენა და უძილობისგანაც გაწამდა,
ფრანცმა ჰიპნოზით მოახერხა და რამდენიმე საათით მიჰგვარა
ძილი, მაგრამ ეს მხოლოდ ერთხელ იყო. დიკს ისედაც არა
სჯეროდა ჰიპნოზისა, იცოდა, რომ საამისოდ გუნებ-განწყობა
სჭიროდა და იშვიათად თუ იყენებდა. ერთხელ სცადა ჰიპნოზით ნიკოლზე ემოქმედა და ნიკოლმა დაცინვით შეხედა
მას.

იმ პალატაში შევიდა, ქალმა ვერ დაინახა დიკი, შესიებულ თვალებს ვეღარ ახელდა. ძლიერი, მღელვარე ხმის პატრონი იყო, მოგუდული ხმით უთხრა:

"როდემდე იქნება ასე, არ გათავდება? თუ არასოდეს?" "ცოტაც მოითმინეთ, დოქტორმა ლადისლაუმ მითხრა, რომ კანი ალაგ-ალაგ უკვე მთლად გაიწმინდა". "რომ არ ვიცი რად ვიტანჯები, რა ცოდვა მაქვს, ეს უფრო

მკლავს".

"მისტიკაში გადავარდნა არ არის კარგი, ნერვული დაავადების ფენომენია, ასე ვფიქრობთ; ესეც იმას უკავშირდება, რაც ადამიანს აიძულებს გაწითლდეს ხოლმე, იოლად წითლდებოდით, როცა პატარა გოგო იყავით?"

სახე ჭერისკენ ჰქონდა მიქცეული.

"სიბრძნის კბილების ამოსვლის მერე არაფერზე გავწითლებულვარ".

არ დაგიშვიათ რაიმე შეცდომა, ან თუნდაც პატარა ცოდვა არ ჩაგიდენიათ?"

"თავს ვერაფერს გუსაყვედურებ".

"ბედნიერი ქალი ყოფილხართ".

სანამ რამეს იტყოდა, ცოტა ხანს ფიქრობდა. შეხვეული სახიდან რაღაც ხმაურით, მიწის სიღრმიდან ამოსულივით მოდიოდა ხმა.

"მე ზიარი ვარ ჩემი დროის ქალების ხვედრისა, იმათი, ვინც მამიკაცების ბრძოლაში გაწვევა მოიწადინეს".

"და თქვენდა გასაოცრად, ესეც ისეთივე ბრძოლა აღმოჩნდა, როგორც ყველა სხვა ბრძოლა". ტონის აყოლით უთხრა დიკმა.

"ისეთივე, როგორც სხვა ბრძოლა". აზრის ჩაწვდომას ცდილობდა. "ან იმარჯვებ პიროსის გამარჯვებით, ანდა მარცხდები, ნადგურდები და დანგრეული კედლის ჩრდილის ექო ხარ მხოლოდ".

"არც დამარცხებული და არც განადგურებული თქვენ არა ხართ". მიუგო დიკმა. "რა, ხომ არ გგონიათ, რომ მართლა ბრძოლაში იყავით?"

"შემომხედეთ!" შმაგად იყვირა.

"იტანჯებით, მაგრამ რამდენი ქალი დატანჯულა, და სხვა მიზეზითაც". ეს უკვე კამათი იყო და მაშინვე დაიხია: "რაც უნდა იყოს, პატარა მარცხი სრულთან არ უნდა გააიგივოთ".

"ლამაზი ფრაზაა", მწარედ ჩაიცინა ქალმა და ამ ტკივილს

ამოყოლილ სიტყვებზე სინდისის ქენჯნა იგრძნო დიკმა.

"კარგია ვიცოდეთ ის თავი და თავი მიზეზი, რამაც აქამდე მოგიყვანათ", დაიწყო მან, მაგრამ ქალმა მოუჭრა. "მე აქ სიმბოლოსავითა ვარ, ოღონდ, რისი სიმბოლო, ეს არ ვიცი, მე შეგონა, თქვენ გაიგებდით".

"თქვენ ავადა ხართ", უნებურად მიუგო დიკმა.

"მაშინ რა იყო, რის მიჯნაზე ვიყავი მე?"

"უფრო მძიმე ავადმყოფობა".

"სულ ეს არის?"

"სულ ეს არის". ტყუოდა და ეს ზიზღსა ჰგვრიდა, მაგრამ აქ, ახლა, მხოლოდ სიცრუეში ჩაეტეოდა და შეიკვროდა მთელი ამ თემის სიფართოვე. "იმ ზღვარს იქით, მხოლოდ ქაოსია და არეულობა. კი არ გარიგებთ, ძალიან განვიცდი, რომ ასე გაწამებთ ფიზიკური ტანჯვა, მაგრამ მხოლოდ და მხოლოდ ყოველდღიური პრობლემებით, რაგინდ მომაბეზრებლადაც უნდა გეჩვენოთ, და მათზე ფიქრით, შეიძლება მიაღწიოთ იმას, რომ ყველაფერი ისევ თავის ადგილზე დადგეს. ამის მერე კი — შეიძლება ისევ იფიქროთ..."

უცებ გაჩერდა, რომ ბოლომდე არ ეთქვა, რასაც ფიქრობდა... "— ცნობიერების საზღვრებზე". ეს საზღვრები, რომელთაც ხელოვანნი უნდა იკვლევდნენ, ამ ქალისათვის სამარადისოდ წაშლილიყო. მეტისმეტად მყიფე და სათუთია, ასეთი გაჩნდა და ვერ გაუძლო. შეიძლება, დრო რომ გაივლის, მშვიდ
მისტიკაში დაივანოს თავისი თავი, ამ კვლევას კი სხვები შეუდგნენ, ჯანმრთელ გლეხურ სისხლს შერეულები, სქელკოჭება
და თეძოგანიერები, სხეულისა და სულის ყველა სჯას პურ-მარილივით რომ ინელებენ.

"— ოღონდ თქვენ არა", ლამის ხმამაღლა თქვა. "ეს თამაჰ. ში თქვენთვის არ არის".

მაინც, იმისი საზარელი ტანჯვის შემყურე, დაუოკებელ, თითქმის სექსუალურ ჟინსა გრძნობდა, უნდოდა მოხვეოდა და თავისი მკლავებით ჩაეთბო, ისე როგორც ბევრჯერ ნიკოლი ჩაუთბია, ზრუნვით ფიქრობდა იმის ყველა შეცდომაზეც კი, რადგან ისინი, მასში გამჯდარი, უკვე მისი ნაწილი იყო. ნარინჯისფერი ფარდებს ატანდა, სარკოფაგივით იწვა იგი, სახელაქაღა, ხმა მვედრებელი, და — არსაით გამოძახილი.

შეხვეულ სახეზე ცრემლები ღვარად წამოუვიდა, დიკი

რომ წამოდგა.

"ეს ისე არ არის, რაღაც ხდება", ჩურჩულითა თქვა. "რალაცისთვის არის საჭირო".

დიკი დაიხარა და შუბლზე აკოცა.

"უნდა ვეცადოთ კარგები ვიყოთ". თქვა მან.

იქიდან გამოსულმა მომვლელი ქალი შეგზავნა მასთან. კიდევ რამდენიმე ავადმყოფი უნდა ენახა, ჯერ ის თხუთმეტი წლის ამერიკელი გოგონა, იმ პრინციპით აღზრდილი, რომ ბავშვობა იმისთვის არის, როგორც გინდა ისე გაერთო და ქვეყანაზე არც არაფერი დაგიშალონ. დიკი სასწრაფოდ გამოიძახეს მასთან, რადგან ის-ის იყო მანიკიურის მაკრატლით თმა ალაგ-ალაგ შეეკორტნა. ვერაფერს უშველიდნენ, ნევროზი ჯიშში ჰქონდათ და აღზრდითაც გაემწვავებინათ. მამამისი, თვითონ ნორმალური და სინდისიერი კაცი, ცდილობდა თავის ბუდობას ქვეყნის შფოთი ასცდენოდა და იმას მიაღწია, რომ ცხოვრების უეცრობებისთვის ბავშვები ოდნავადაც ვერ შეამზადა. დიკი ბევრს არ მოჰყოლია: "ელენ, როცა არ იცი რა გააკეთო, მომვლელს ჰკითხე და რჩევას მოგცემს. სიტყვა მომეცი, რომ ასე იზამ".

მაგრამ სიტყვას რა აზრი ჰქონდა, როცა თავში ყველაფერი რიგზე არ იყო? დიკმა ერთ გალეულ ემიგრანტ კავკასიელსაც შეუარა, ჰამაკივით რაღაცაში იწვა და დროდადრო თბილ, საკურნებელ აბაზანაში ეშვებოდა. გვერდით პალატაში პორტუგალიელი გენერლის სამი ქალიშვილი მოინახულა, პარეზით რომ იტანჯებოდნენ. შემდეგი პაციენტი პროფესიით თავადაც ფსიქიატრი გახლდათ, აქ უფრო დიდხანს გაჩერდა დიკი, აჯერებდა, რომ კარგად იყო, უფრო კარგად და ისიც უსმენდა, უნდოდა დიკის სახეზე წაეკითხა ამ სიტყვების უტყუარობა. რადგან სამყაროს რეალობასთან დოქტორ დაივერის ხმა და ამ ხმაში რწმენაღა თუ აკავშირებდა. შემოვლის მერე დიკმა ერთი უგერგილო სანიტარი დაითხოვა და ამასობაში ლანჩის დრომაც მოაწია.

V X

პაციენტებთან ზიარი ტაბლა დიკს აპათიას ჰგვრიდა. ამათთან "ასკილისა" და "წიფლის" ბინადარნი რა თქმა უნდა, არ იყვნენ ხოლმე და ერთი შეხედვით, უწყინარი პურის ჭამა გეგონებოდათ, მაგრამ მაინც ჩანდა, რომ მძიმე სევდა და მწარე ნაღველი მოსძალებოდათ. ვინც იქ ექიმი იყო, ყველა ლაპა-რაკს ცდილობდა, ოღონდ, თვითონ ისინი ჩუმად ჭამდნენ, ან თავიანთ თეფშებზე იყურებოდნენ და ლაპარაკით ძალიან ცო-ტას ლაპარაკობდნენ, ვითომ იმ დილით უკვე დაღლილ-დაქან-ცულები, მაგრამ იმიტომ უფრო, რომ უძნელდებოდათ ხალხ-ში ყოფნა.

ლანჩის მერე დიკი შინ წავიდა. ნიკოლი სასტუმრო ოთახ-

ში დახვდა და როგორღაც უცნაურად შეხედა.

"წაიკითხე", უთხრა.

დიკმა წერილი გახსნა, ერთი პაციენტი ქალისგან იყო, რომელიც, ამას წინათ, ექიმების აზრის მიუხედავად, რომ ჯერ
ადრე იყო მისი გაწერა, მაინც წასულიყო კლინიკიდან. მიუკიბავ-მოუკიბავად ადანაშაულებდა დიკს, ვითომ იმისი ქალიშვილი, კრიზის დროს დედას რომ არ მოშორებია, დიკს
შეეცდინოს და ბოლოს წერდა, — მისიზ დაივერმა კარგია
გაიგოს, იმის მეუღლე რასაც წარმოადგენსო.

დი კარგი ინგლისურითაც იყო დაწერილი, მაგრამ იოლად მიხვდა, მანიაკის ბოდვა რომ იყო. მაშინვე გაახსენდა ის ქალიშვილი, თავნება, კეკლუცი, შავგვრემანი, ერთადერთხელ, როგორღაც მისივე თხოვნით დიკმა ციურიხში წაიყვანა მანქანით
და საღამოს უკანვე, კლინიკაში მოიყვანა. გზაში, სხვათა შორის, უფრო ზრდილობისთვის, ერთხელ აკოცა. იმ ქალიშვილმა რამდენჯერმე ცოტა შორს წასვლაც მოინდომა, მაგრამ
დიკს არა სურდა და არც აყოლა უნდომებია, მერე კი, და იქნებ ამის გამოც, ქალიშვილმა დიკი შეიძულა და საჩქაროდ
წაიყვანა დედამისი კლინიკიდან.

"გიჟობაა". თქვა დიკმა. "იმ ქალიშვილთან, საერთოდ არაფერი საქმე არ მქონდა, არც კი მომწონდა".

"ჰო, ვცადე რომ ასე მეფიქრა", თქვა ნიკოლმა.

"იმედია, არც გიფიქრია დაგერება?"

"მე სულ შინა ვარ".

დიკი გვერდით მიუჯდა, საყვედურშერეული ხმით უთხრა: "სისულელეა, ნიკოლ. ეს წერილი შეშლილისაა".

"შეშლილი მეც ვიყავი".

დიკი ადგა და უფრო ავტორიტეტულად თქვა: "გეყოფა, ნიკოლ, უაზრობაა. მოემზადე, ბავშვები ნახე და მოიყვანე, უნდა წავიდეთ".

მანქანა ტბის გაყოლებაზე პატარა კონცხებს მიუყვებოდა, ხან მარადმწვანე კასკადებში შეიკარგებოდნენ და ხანაც ისევ გამოვიდოდნენ, საქარე მინას შხეფები ეყრებოდა და მზით ჩახჩახდებოდა. ეს დიკის საკუთარი მანქანა, "რენო" იყო, ისეთი პატარა, რომ შიგ ყველანი გოლიათებივითა ჩანდნენ ბავშვების გარდა, რომლებიც უკან ისხდნენ და შუაში კი მადმაზელი ანძასავით ამართულიყო.

გზის თითო მეტრიც ზეპირად იცოდნენ — სად ფიჭვის წიწვების სურნელი სცემდათ და სად კიდევ ბუხრებიდან შავი კვამლი ამოდიოდა. მზე თავის კოჭიმელზე იდგა, დახატულს ჰგავდა და ბავშვების ჩალის შლაპებზე შმაგობდა.

ნიკოლი დუმდა; მკაცრი და გაშტერებული მზერა კარგს არას მოასწავებდა და დიკი მოეშვა. ხშირად მოსდიოდა ასე, იმის გვერდით იყო და მარტო იყო, ნიკოლი ხშირად ქანცავდა ხოლმე, როცა თავს ვერ იჭერდა და ნიაღვარივით გადმოხეთ-ქავდა, დიკისთვის ჰქონდა ეს ნიაღვარივით გადმოხეთქვა, "ასეთი ვარ — ასეთი ვარ და რა ვქნა". მაგრამ დღეს დიკს ერ-ჩივნა ელაპარაკა, ელაპარაკა ენაგაკრეფით, რომ წამით მაინც ჩაეხედა ნიკოლის არეულ გონებაში. ყველაზე სახიფათო თავის თავში ასე ჩაკარგვა იყო ხოლმე, როცა ყველა კარსა და აგრელს დაგმანავდა.

ცუგში მადმაზელი გადავიდა და დაივერებმა გზა განაგრძეს. სანამ აგირის ბაზრობაზე მივიდოდნენ, გზაზე ჩახერგილი
დიდი სატკეპნი მანქანებისთვის უნდა აევლოთ, დიკმა მანქანა
გააჩერა და რაკი ნიკოლი თვალმოუშორებლივ უყურებდა,
თვითონვე უთხრა: "გადმო, ძვირფასო". უცებ ავად გაეხსნა
ბაგე ნიკოლს, გულ-მუცელამღვრეულმა დიკმა არ შეიმჩნია და
და ისევ უთხრა: "გადმოდი, ბავშვები ისე ვერ გამოვლენ".

"ო, როგორ არა, გადმოვალ", მიუგო მან, რომელიღაც სიუჟეტიდან ამოგლიჯა ეს სიტყვები, სიუჟეტიდან, ელვის სისწრაფით რომ ტრიალებდა იმის თავში, ისე თავბრუდამხვევად, რომ დიკი ძნელად თუ ჩაავლებდა, ვერ ჩასწვდებოდა.

"ნუ წუხხარ, გადმოვალ..."

"ჰოდა, გადმოდი".

გვერდიგვერდ მიდიოდნენ, ნიკოლი შეტრიალდა, მაგრამ სახეს ისევ ის ირონიული და უცხო ღიმილი ურევდა, მხოლოდ მაშინ, ლანიემ რამდენჯერმე რომ დაუძახა, ძლივს შეძლო მზერის ერთ რაღაცაზე შეჩერება, თოჯინების მოხეტიალე დასის ტაკიმასხარებს მოჰკრა თვალი და იმათ შეაჩერდა.

დიკმა სცადა რაღაცა მოეფიქრა. ნიკოლისთვის ის ქმარიც იყო და ფსიქიატრიც და ეს ორმხრივობა თანდათანობით ძალას ულევდა. ამ ექვს წელიწადს, უკვე რამდენჯერ თავის თავს აყოლილი ნიკოლი ხან თავის შეცოდებით, ხანაც ახირებითა და მომთხოვნელობით აიძულებდა ხოლმე რაც უნდოდა ის ეკეთებინა და მერე, გეგონება, მძიმე რაღაცა გადაიტანა და გონს მოდისო, დიკი ხვდებოდა, რომ მისი აყოლის მოწადინეს, ისევ თავისი გაეტანა.

ტოპსი და ლანიე გინიოლზე შეკამათდნენ, ეს ის პანჩია, შარშან კანში რომ გნახეთ თუ სხვა არისო, მაგრამ მალე და-შოშმინდნენ და მთელი ოჯახი ბაზრობისთვის ღია ცის ქვეშ აგებული ფარდულებისკენ დაიძრა. კანტონებიდან ბლომად ქალები ჩამოსულიყვნენ და იმათი ხავერდის ჟილეტები, თეთრი თავსაბურები და ნაოჭასხმული ღიაფერა ქვედა კაბები ლურჯ-ნარინჯისფრად შეღებილ ფარდულებსა და კარვებთან, სადაგი ჩანდა.

ჟღარუნა აჟღარუნდა, ჩხარუნა აჩხარუნდა, ბობღანს და — ჰუჩი-კუჩი დაიწყო.

უცებ ნიკოლი ადგილიდან მოწყდა და გაიქცა, მოულოდნელად, ისე, რომ დიკმა მაშინვე ვერც შეამჩნია. გვიან, ნიკოლის ყვითელი კაბა უკვე შორს, ბრბოში რომ შეიგრიხა, — ოხრასფერი ბილიკი სიზმარეულისა და ცხადის მიჯნაზე, — მაშინლა მიხვდა. სირბილით მიჰყვა, მალულად მირბოდა ნიკოლი და დიკიც მალულად მიჰყვებოდა, ამ პაპანაქება სიცხეში ძრწოლამ აიტანა და ბავშვები გადაავიწყდა; შემოტრიალდა, იმათკენ გაქანდა და ხელი ჩაჰკიდა, კარავ-კარავ დადიოდა და ეძებდა ნიკოლს. "მადამ!" ლატარიის თეთრ ბორბალთან ახალგაზრდა ქალი იჯდა და იმას დაუძახა. "ხომ არ შეიძლება ეს ბავშვები ორ წუთს დაგიტოვოთ? სასწრაფო საქმე მაქვს — ათ ფრანკს გა-დაგიხდით".

"რა თქმა უნდა".

დიკმა ბავშვებს კარვისკენ უბიძგა.

"ამ კარგ ქალთან იყავით".

"კარგი. დიკ".

ისევ გაიქცა, მაგრამ დაკარგა. კარუსელისთვის უნდა აეარა და თავის წინ სულ ერთ და იმავე ცხენს რომ ხედავდა, მაშინღა მიხვდა, რომ კარუსელთან ერთად უვლიდა. იდაყვებით შეგლიჯა ბრბო, ბუფეტთან მივიდა, მერე მკითხავის კარავი დაინახა, გაახსენდა, რომ ნიკოლი ლამის ტრფიალი იყო მკითხაობისა და შიგ შეიხედა. ვიღაცა რაღაცას ზუზუნ-ზუზუნით ლაპარაკობდა.

"ნილოსის ნაპირებზე დაბადებული მეშვიდე ქალიშვილის

შეშვიდე ქალიშვილი... მობრძანდით, მესიე"

კარვის კალთას ხელი უშვა და ახლა ტბისკენ გაიქცა დიკი. ლურჯი ცის ფონზე ბრუნავდა მცირე "ეშმაკის ბორბალი". იქ ნახა ნიკოლი.

მარტო იჯდა ვაგონეტში, ზევიდან ქვევით რომ ეშვებოდა ახლა და მიახლოებისას დიკმა გაიგონა, რომ ისტერიკულად ხარხარებდა. მორიგ ბრუნზე დიკი ისევ ჭრელ ბრბოს შეერია, ვიღაცებმა, ეს რანაირი სიცილიაო, და გაჩერდნენ.

"შეხედეთ მას!"

"შეხედეთ იმ ინგლისელ ქალს!"

ვაგონეტი ისევ ქვევით ეშვებოდა, ბორბალი ნელაღა ბრუნავდა და მუსიკაც ნელდებოდა. ერთი ათი კაცი მაინც შემოეხვია ვაგონეტს, როცა ბორბალი გაჩერდა. ნიკოლის სიცილზე
იმათაც უნებლიეთ ეღიმებოდათ. დიკის დანახვაზე სიცილი
პირზე შეაშრა, გაქცევა სცადა, მაგრამ დიკმა მაგრად ჩასჭიდა
ხელი და იქაურობას გამოაშორა.

: "ასე რად აიწყვიტე?"

"ძალიან კარგად იცი, რადაც".

"sho, sh 30go".

"უაზრობაა — გამიშვი — შენ მე შტერად მთვლი. შენ Scanned by CamScanner გგონია, ვერ დავინახე, ის გოგო რომ გიყურებდა, პატარა შავი გოგო. ო, რა სეირია — ის ხომ მთლად ბავშვია, თხუთმეტი წლისა ძლივს იქნება. გგონია, ვერ დავინახე?"

"ცოტა ხანს გავჩერდეთ, დაწყნარდი".

მაგიდას მიუსხდნენ; ნიკოლს დაძაბული და იჭვნეული მზერა ჰქონდა, ხელს მალიმალ იქნევდა, გეგონება, რაღაცის დანახვა უნდა და რაღაცა ხელს უშლისო.

"დალევა მინდა, ბრენდი მოატანინე".

"გრენდი შენთვის არ შეიძლება — თუ გინდა ლუდი დალიე".

"ბრენდი რატომ არ შეიძლება?"

"არ შეიძლება, მორჩა და გათავდა. ახლა იმ შავ გოგოზე, მომისმინე — ეს ჰალუცინაციაა, გასაგებია?"

"ყოველთვის ჰალუცინაციაა, თუ ის დავინახე, რაც არ გინდა, რომ დავინახო".

დიკმა რაღაცა ბრალი იგრძნო. ასე კოშმარულ სიზმარში ხდება, როცა გადანაშაულებენ რაღაცაში და შენც აღიარებ დანაშაულს, იღვიძებ და ხვდები, რომ თურმე, — არცარა ბრალი არა გქონია, მაგრამ ის სიზმრიდან გამოყოლილი შეგრძნება მაინც ისევა გრჩება. თვალი აარიდა ნიკოლს.

"ბავშვები კარავში დავტოვე ერთ ბოშა ქალთან. უნდა წამოვიყვანოთ".

"ვინ გგონია შენი თავი?" ჟინიანად ეკითხებოდა ნიკოლი. "ჰიპნოტიზიორი სვენგალი "ტრილბიდან?"

თხუთმეტი წუთის წინ ეს ოჯახი იყო. ახლა, როცა უნებლიეთ მხრით აწვებოდა, დიკი ფიქრობდა, რომ უბედური შემთხვევის მსხვერპლნი თუ იყვნენ, ყველა, დიდიან-პატარიანად.

"ახლა შინ წავალთ".

"შინ!" ისე იღრიალა, ჰაერი აღარ ეყო და სიმივით, ტკაცანით გაუწყდა ხმა. "და იჯექი და იფიქრე, რომ ყველა ვიხრწნებით, გამოაღებ რაგინდარა უჯრას და ყველგან ბავშვების ჩანაცრებული ნეშტებია, საზიზღრობაა!"

დიკი თითქმის შვებით ხედავდა, ამ ღრიალსა და სიტყვებში როგორ დაიხარჯა და ნიკოლმა, რომელსაც კანმა უგრძნო, რომ დაძაბვა ივლიდა, სახეზე შეატყო, რომ მოეშვა დიკი. თვითონაც რბილი გაუხდა სახე და შეეხვეწა: "მიშველე, მიშველე, დიკ!"

დიკს გულ-მუცელი აუდუღდა. საშინელებაა, რომ ასეთი მუვენიერი კოშკი შეუდგომლად ვერ იდგებოდა, და თვითონ უნდა ყოფილიყო ეს შესადგამი. ალბათ სწორიც არის, მამა-კაცი ამისთვისაა. დვირე და იდეა, კოჭი და ლოგარითმი. მაგ-რამ დიკი და ნიკოლი როგორღაც თანაბრები და ერთი იყვნენ, ერთი მეორეს არ ავსებდა, ეს არ სჭიროდათ, ნიკოლიც დიკი იყო, ძვალ-რბილში რომ ჰყავდა გამჯდარი და ეგრე გულგრილად ვერ ეცქირა, როგორ ირღვეოდა იგი, ეს დაშლა თვითონაც ედებოდა მას. ახლა იმისი ინტუიცია სინაზედ იღვრებოდა და თანაუგრძნობდა ნიკოლს, მაგრამ თანადროული მეთოდებით მხოლოდ პროცესის შენელება თუ შეეძლო, მეტს ვერაფერს გააკეთებდა. დღესვე მომვლელ ქალს გამოიძახებს ციურიხიდან.

"შენ შეგიძლია მიშველო".

მისმა ბავშვურმა ჟინიანობამ ფეხზე წამოაგდო დიკი.

"შენ მე მშველოდი ადრე — და ახლაც შეგიძლია ჩემი შველა".

"მე მხოლოდ ის შემიძლია, რაც ადრე შემეძლო".

"ვიღაცას შეუძლია, რომ მიშველოს მე".

"ალბათ ასეა. შენი თავის შველა ყველაზე მეტად შენ შეგიძლია. წავიდეთ, ბავშვები მოვნახოთ".

თეთრბორბლებიანი კარვები ბევრი იყო. დიკი ეძებდა. როცა პირველ კარავთან მივიდა და ვერ ნახა, შეშფოთდა. ნი-კოლი განზე იდგა და თვალბედითად იცქირებოდა. ახლა ბავ-შვები რად უნდოდა, ბავშვები მისთვის ნაწილი იყო იმ სამყა-როსი, რის ამღვრევასაც ლამობდა იგი. ბოლოს, დიკმა მიაგ-ნო ბავშვებს, ქალები შემოხვეოდნენ და ისე გაბრწყინებით შესცქეროდნენ, გეგონება მონივთულები არიანო. იქვე იყვ-ნენ გლეხის ბავშვებიც და ესენიც პირდაღებულები უყურებ-დნენ.

"გმადლობთ, მესიე. ო, მესიე მეტად გულუხვია. ეს სიამოვნება იყო, მესიე, მადამ. ნახვამდის, პატარებო".

მიდიოდნენ და ცხელი ნაღველი ერეოდათ; მანქანას უნდობელი შიშის სიმძიმე აწვებოდა, ბავშვები კრიჭაშეკრულები ისხდნენ, ნაღვლიანი სახეებითა. გარეშემოც ნაღველივით იყო და უმრუმი ფერი დასდებოდა. ცუგს რომ მიახლოვდნენ, ნიკოლმა, თითქოს კრუნჩხვას მოეაროს, ძლივსა თქვა რაღაც, რაც ადრეც ეთქვა — გზისპირა ყვითელი სახლი საღებავშეუმშრალ სურათსა ჰგავსო, მაგრამ ეს მხოლოდ ცდა თუ იყო იმისა, რომ ჩასჭიდებოდა თოკს, უსწრაფესად რომ იხსნებოდა.

დიკმა საჭესთან დასვენება სცადა. ყველაზე ძნელი ჯერ წინ იყო, იცოდა, მთელ ღამეს ნიკოლთან ჯდომა მოუწევდა ამ გაბზარული, მთრთოლი სამყაროს აღსადგენად. ტყუილად კი არ არის რომ სიტყვა "შიზოფრენია" პიროვნების ცნობიერების გახლეჩას ჰქვია — ნიკოლი ან ის პიროვნებაა, ვისაც არაფრის ახსნა არ სჭირდებოდა, ან ისეთი, გისთვისაც არაფრის ახსნა არ შეიძლებოდა, მასთან აქტიური და დაჯერებული, დაჟინებულიც კი უნდა ყოფილიყავი, ცხად სამყაროში გამავალი გზა ყოველთვის ლია უნდა გქონოდა და მისახვევ-მოსახვევები მაგრად ჩაგეკეტა. მაგრამ ავად გონებას მაინცა აქვს ელვარებაცა და მოხერხებაც, მდინარესავით არის, ჯებირს თუ ვერ გაარღვევს, გადმოხეთქს, თუ ვერ გადმოხეთქს, შემოუვლის და ისე წავა, სხვა ადგილს ნახავს. აქ ერთი კაცი ვერას გახდება. დიკი გრძნობდა, ახლა საჭირო იყო, ნიკოლს თვითონვე მოერჩინა თავისი თავი; არ იჩქარებს, ნიკოლმა თვითონ გაიხსენოს ის მეთოდები, რითაც ადრე კურნავდნენ და თვითონ უარყოს ის მეთოდები, ჯერ კი ისევ ძველ, შარშანწინდელ რეჟიმს უნდა მივმართოო, დაღლილად ფიქრობდა დიკი.

დიკმა გორაკს შემოუარა, გზის შემოკლება სცადა, რომ მალე მისულიყვნენ კლინიკამდე. აქსელერატორს ფეხი დაადგა და უცებ მანქანამ მკვეთრად მოუხვია ჯერ მარცხნივ, მერე მარჯვნივ, გადაიხარა, ორ ბორბალზე დადგა, და როცა ნიკოლის კივილზე გაშტერებულმა დიკმა საჭეს ჩაფრენილ იმის გადარეულ ხელს მაგრად დაარტყა, ისევ ისე, ოთხ ბორბალზე დადგა, მერე ისევ მოუხვია, მოწყდა და ფერდობზე დაქანებული, ხეს მიეჯახა. ბავშვები ყვიროდნენ, ნიკოლიც ყვიროდა, ილანძღებოდა. ძლივს მოიშორა მისი ხელები სახიდან დიკმა. ჯერ ის აფიქრებდა, მანქანა ძალიან ხომ არ იყო გადახრილი, ხომ არ ყირავდებაო, მაგრამ ვიდრე შიგ იჯდა, ვერ გაიგებდა. ზევიდან ფრთხილად ამოვიდა, ორივე ბავშვი გადმოიყვანა, ნახა, მანქანა ქვევით არ ცურდებოდა და გაიმართა, სანამ კიდევ

რამეს-მოიფიქრებდა, იდგა და კანკალებდა, მძიმედ სუნთქავდა.

"შენი!" იყვირა დიკმა.

ნიკოლი ხმამაღლა იცინოდა, არცა რცხვენოდა და არც ეშინოდა, ვინმე უცხოს ამ სცენისთვის რომ შეეხედა, ვერც მიხვდებოდა, რომ იმისი ბრალი იყო ახლა ეს ამბავი; ბავშვს ოხავრობა რომ გაუვა, ისე იჯდა და იცინოდა.

"გეცვალა ფერი! ხომ გეცვალა". აღიზიანებდა დიკს. "სი-

ცოცხლე გინდა, არა?"

სიტყვები ისეთი ძალიანი და დამაჯერებელი გამოუდიოდა, წამით დიკი შეეჭვდა, მართლა ჩემ გამო ხომ არ შევშინდიო, მაგრამ ბავშვები დაინახა, იმათი გაფითრებული სახეები, ხან დედას რომ შეაცქერდებოდნენ და ხან მამას და მოუნდა, ეს კრეჭია სიფათი ერთი მაგრად მიენაყა.

იმათ პირდაპირ, ტყიან ფერდობზე, სასტუმროს თეთრი შენობა ჩანდა; საავტომობილო გზით იქამდე ხუთასი მეტრი მაინც იქნებოდა, გორაკზე თუ ახვიდოდი და გზას გადაჭრიდი, ასი იარდის გავლაღა იქნებოდა საჭირო.

"ხელი ჩასჭიდე ტოპსის", ლანიეს უთხრა დიკმა, "ოღონდ, მაგრად ჩასჭიდე და აი იმ გორაკზე ადით ზევით, იქ ბილიკია, დაინახე? სასტუმროში რომ მიხვალთ, უთხარი, "დაივერებს მანქანა დაემტვრათ", და მაშინვე ვინმე წამოვიდეს".

ლანიეს მომხდარი ამბისა ბევრი რამ არ ესმოდა, მაგრამ იგრძნო, აქ სხვა რაღაცა იყო, რომ საშინელება დატრიალდა

და ჰკითხა:

"შენ რას იზამ, დიკ?"

"ჩვენ აქ დავრჩებით, მანქანასთახ".

წასვლისას არც ერთს არ შეუხედავს დედისთვის.

"ფრთხილად გადადით გზაზე!" მიაძახა დიკმა. "ორივე მხარეს გაიხედეთ!"

დიკმა და ნიკოლმა ერთმანეთს შეხედეს. თითქოსდა შუქი გაელავდა აქეთ-იქითა სახლის ფანჯრებში. მერე ნიკოლმა ჩანთიდან სარკე ამოიღო და საფეთქლებზე ჩამოყრილი თმა გაისწორა. დიკმა ფერდობისკენ გაიხედა, ბავშვები უკვე აბო-ბღებულიყვნენ და იმათ უყურა. ფიჭვნარს რომ შეერივნენ და თვალს მიეფარნენ, თავის "რენოს" შემოუარა, გაიაზრა მან-

ქანას რაცა სჭირდა და რანაირადაც გადაიყვანდა მერე აქედან. ას ფუტზე მაინც, დაქანების კვალი ზიგზაგად ჩანდა გაქელილ გზაზე; სიბრაზე არა, და უფრო აუტანელი ზიზღი კი იგრძნო.

რამდენიმე წუთში სასტუმროს პატრონმაც მოირბინა.

"ღმერთო ჩემო!" წამოიძახა მან, "როგორ მოხდა, დიდი სიჩქარით მოდიოდით? იღბალი გქონიათ, ეს ხე რომ არა, მან-ქანა ძირს ჩაქანდებოდა".

ემილს შავი წინსაფარი ეკეთა, ფუნჩულა სახეზე ოფლი ჩამოსდიოდა და ისეთი რეალური და ნაღდი იყო, დიკმა, რალაცა ძალა იგრძნო, ნიკოლს ანიშნა, მანქანიდან გადმოსულიყო, მოგეხმარებიო, მაგრამ ნიკოლი მიშველებას არ დაელოდა, მანქანიდან გადმოხტა, ფეხი დაუცდა, წაიბორძიკა და წაიქცე-ოდა, მაგრამ დროზე შეიკავა თავი. ნახა, რომ დიკი და ის კაცი მანქანას უტრიალებდნენ, რომ როგორმე დაეძრათ ადგილიდან, და გამომწვევი იერი მიიღო. ესეც უკვე კარგიაო, გაიფიქრა დიკმა და უთხრა:

"წადი ნიკოლ, ბავშვებთან ერთად დამელოდე".

მაგრამ მერეღა გაახსენდა, რომ ნიკოლს კონიაკი უნდოდა და სასტუმროში იოლად იშოვიდა. ემილს უთხრა, წვალებად არ ღირს, მძღოლი მოვა და დიდი მანქანით გზაზე გაიყვანო-სო და მაშინვე წავიდნენ სასტუმროსაკენ.

## XVI

"წასვლა მინდა", ფრანცს უთხრა დიკმა, "ერთი თვით, თვენახევრით, რამდენითაც შევძლებ".

"რა თქმა უნდა, დიკ, წადით. თავიდანვე ხომ ასე შევთანხმდით, თქვენ თვითონ გინდოდათ სულ აქ ყოფნა. თუ თქვენ და ნიკოლი…"

"ნიკოლთან ერთად არ მინდა წასვლა, მარტო მინდა. ამ ბოლო ამბავმა დამაგდო ლამის. დღე-ღამეში ორ საათს მაინც თუ მოვახერხე და დავიძინე, ცვინგლის ერთ-ერთი საოცრება იქნება".

"ცოტა ხანს გინდათ გაცალკევდეთ".

"მე ჩემი თავისაგან მინდა გავცალკევდე, მოიხედეთ, Scanned by CamScanner ფრანც, ბერლინის ფსიქიატრთა კონგრესზე რომ წავიდე, აქ უჩემოდ გაართშევთ თავს? უკვე სამი თვეა ნიკოლი კარგად არის, მეძიძავესაც მიეჩვია. ღმერთო ჩემო, ფრანც, მთელ ქვე-ყანაზე თქვენა ხართ ერთადერთი, ვისაც შემიძლია ესა ვოხო-ვო".

ფრანცმა რაღაც წაიბუზღუნა. ერთ მშვენიერ დღეს ბოლოს, შეიძლება მობეზრდეს კიდეც თავისი პარტნიორის ამბავზე ფიქრი.

ერთი კვირის მერე დიკი ციურიხის აეროპორტში დიდ თვითმფრინავში ჩაჯდა და მიუნხენს გაემგზავრა. ცას შეღრიალებულზე და გრიალზე უფრო ცხადად შეიგრძნო რა დაღლილიც იყო. ნელ-ნელა ეპარებოდა სიმშვიდე, ფიქრი არ უნდოდა, ყველა თავის ანაბარა იყოს, ძრავებმა რამდენიც უნდათ იმდენი იგუგუნონ, კლინიკებში ის ხალხი იყოს, ვინც არის, მფრინავმა კი ამ თვითმფრინავს მიხედოს კარგად. კონგრესის ერთ სესიასაც კი არ დავესწრებიო, ფიქრობდა. ისედაც შეეძლო წარმოედგინა — ბლეილერი და უფროსი ფორელი ახალ ტრაქტატებს წაიკითხავენ, იმათი გაცნობა შინაც შეიძლება და იქნება ასეც ჯობდეს. მერე ის ამერიკელი გამოვა და თავის პაციენტებზე ილაპარაკებს, იმაზე, რომ ადრეულ გონებსუსტობას კბილების ამოღებით ან ნუშისებრი ჯირკვლების მოწვით კურნავს და ყველა ოდნავი ირონიით, მოჩვენებითი ზრდილობითა და ინტერესით მოუსმენს—ამერიკა ხომ ასე ძლიერი და ასე მდიდარი ქვეყანაა. იმის გარდა ამერიკელები სხვებიც იქნებიან — წითური შვარცი, წმინდანის სახითა და ულევი მოთმინებით, რის წყალობითაც, გაორებული, ძველსა და ახალ სამყაროს შუა მოქცეულა, და კიდევ ერთი ოციოდე ფსიქიატრი, უფრო კომერსანტები, თაღლითებს რომ ჰგვანან და პრესტიჟის ასამაღლებლად ჩამოდიოდნენ, აქ ჩამოსვლა ხომ მერე ხეირად ექცეოდათ კრიმინალურ პრაქტიკაში, იციან ეს, და კიდევ იმისთვის, რომ ახალ-ახალი სოფიზმებით ავსებულებს, მერე პირი მოეხსნათ და ელაპარაკათ და ერთმანეთში აერიათ რეალური თუ მოჩვენებითი საფასეები. ცინიკოსი ლათინისტებიც იქნებიან, და ფროიდის რომელიმე ვენელი მოწაფეც. ყველაზე კარგი, გამორჩეული, დიდი იუნგი იქნება მხოლოდ, სუპერმხნე და თავაზიანი, ანთროპოლოგიის უღრანიდან სკოლის ბიჭების ნევროზებზე რომ გადადის ხოლ მე ლაპარაკისას. კონგრესზე პირველები ამერიკელები იქნებიან და ყველაფერი როტარი-კლაბივით წავა თითქმის; ამის მერე უფრო ძლიერი ევროპული სიცხოველე გამოვლინდება და საბოლოოდ ამერიკელები თავიანთ კოზირს ჩამოვლენ, — სტიპენდიებზე, ახალი დიდი კლინიკებისა თუ სასწავლებლების გახსნასა და კოლოსალურ შეწირულობაზე გამოაცხადებენ და იმ ციფრებზე ევროპელებს ფერი წაუვათ, ადგებიან და მორიდებითღა წავლენ-წამოვლენ, მაგრამ დიკი იქ არ იქნება და არც ამას ნახავს.

თვითმფრინავი ფორარლბერგის ალპებს უვლიდა და შვეიცარიული სოფლების დანახვაზე დიკს პასტორალური სიმშვიდე ეუფლებოდა. ხუთი ან ექვსი სახლი, მეტი არა, შუაში ეკლესიით. ყველა სოფელი ასეთი იყო. მაღლიდან როგორ უბრალო ჩანდა დედამიწაზე ყველაფერი, ისე უბრალო, როგორც თამაში თოჯინებთან და სათამაშო ჯარისკაცებთან, თუნდაც სასტიკი, მკაცრი თამაში. ალბათ ყველაფერს ასე უყურებენ გადამდგარი სახელმწიფო მოღვაწეები თუ მხედართმთავრები და ეტყობა სხვებიც. ასე თუ ისე, ყველაზე კარგად ასე ისვეხებ.

იქითა მხრიდან ინგლისელმა დიკთან მუსაიფი მოიწადინა, მაგრამ ბოლო ხანებში, დიკს, ცოტა არ იყოს, აპათია ჰქონდა ინგლისელთადმი. ინგლისს თავაწყვეტილი ორგიის მერე შინდაბრუნებულ მდიდარ კაცს ადარებდა, რაღაცას რომ როშავს და შინაურებს სათითაოდ ესაუბრება, მაგრამ ყველა ხვდება, ასე რადაც იქცევა ახლა — უნდა ისევ ბატონ-პატრონი იყოს სახლში.

აეროპორტის ჯიხურებში დიკს რამდენიმე ჟურნალი ეყიდა: "სენჩერი", "მოუშნ პიქჩერ", "ილუსტრასიონ" და და
"ფლაიგენდე ბლეტერ", მაგრამ კითხვაზე უფრო კარგი ის
იყო, ფიქრში სოფლებში დაშვებულიყო და ყველასთვის ხელი
ჩამოერთმია, ელაპარაკათ. იმ ეკლესიებშიც შევიდოდა, როგორც იმ ერთ დროს ბაფალოში, მამის ეკლესიაში წირვას რომ
ესწრებოდა და გარეშემო, გახამებული საკვირაო ტანსაცმლის

ოგის სუნი სცემდა, ბიბლიურ სიბრძნეს ისმენდა, ჯვარზე გაქრული კვდებოდა და ნათელ ეკლესიაში მიუჩენდნენ განსასვენებელს; და მაშინდელივით, ახლაც იტანჯებოდა, რადგან უკანა მერხზე ის გოგო იჯდა და ყოყმანობდა, თეფშზე რამდენი ცენტი დაედო შესაწირად, ხუთი თუ ათი.

ინგლისელმა რაღაცა უთხრა, ალბათ ისე, გამოლაპარაკებისთვის და მერე ჟურნალები სთხოვა. დიკს გაუხარდა, ახლა
კი თავს დამანებებსო და ოთხივე მისცა. ისევ თავის ამ მოგზაურობაზე ფიქრს გაჰყვა, გრძელბეწვა ავსტრალიური ქურქი
შემოიხვია — ცხვრის ტყავში მგელიო, და ქვეყნის სიამეები
წარმოიდგინა. დაინახა ხმელთაშუა ზღვა, გაუხუნარი და უმანკო და ახლომახლო ზეთისხილები მტვრიან მიწაზე, მზისფერისგან უდაბნოსფერი რომ ედებოდა... სავონასთან გლეხის გოგოს, განათებული კათოლიკური კურთხევანივით ვარდისფერი და მქრქალი სახით, ხელში აიყვანს, საზღვარს იქით გადააცილებს...

...მაგრამ ის გოგო სადაც იყო, იქვე დატოვა, უფრო შორს უნდა წავიდეს ჩქარა, საბერძნეთის კუნძულების, უცხო პორ-ტების ღრუბელნისლა წყლებისა და უცხო ნაპირზე დარჩენი-ლი ქალწულისაკენ, პოპულარული სიმღერების მთვარისკენაც უნდა წავიდეს... ეს ბიჭობისდროინდელი ხარახურა დიკს მეხ-სიერების ერთ კუნჭულში ეყარა, მაგრამ მაინც ამით, იმ ხუთ-ათ ცენტის ამბით იყო, რომ წამებული აზრი ელავდა.

## XVII

ტომი ბარბანი იყო თუ იყო, ტომი გმირი იყო — დიკს მარიენპლაცზე შემოხვდა მიუნხენში, ერთ იმ კაფეში, სადაც "პატარა კამათელზე" შეიყრებოდნენ ხოლმე და მოთამაშეები კამათელს გობელენიან დასტახანზე აგორებდნენ. ჰაერში პოლიტიკაზე ლაპარაკის სუნი ტრიალებდა და დასტახანზე ბანქოს ტყაპანი.

ტომი მაგიდასთან იჯდა და თავისი მეომრული სიცილით იცინოდა: "უმბუ-ჰა-ჰა! უმბუ-ჰა-ჰა!" ბევრს არა სვამდა, გუ-ლადი იყო და ამით იგებდა, მეგობრებს ცოტა ეშინოდათ კი-დევაც მისი. ამას წინათ ვარშაველმა ქირურგმა თავის ქალა-

დან ერთი მერვედი ამოუღო, თმისქვეშა ქსოვილი ჯერ არ შეზრდოდა და იმ კაფეში ყველაზე უღონოსაც კი ხელსახოცის ჩალიკით შეეძლო მოეკლა.

"— იცნობდეთ, თავადი ჩილიშჩევი" — ჭაღარა, შეფერთხილი რუსი იყო, ასე, ორმოცდაათი წლისა, "და მისტერ მაკკიბენ — მისტერ ჰენან". ჰენანი, შავთმიანი და შავთვალა კაცი, დიდი მასხარა ვინმე იყო და დიკს მაშინვე უთხრა:

"სანამ ერთმანეთს ხელს ჩამოვართმევდეთ, ერთი ეს მი-

თხარით, რა ხდება, აბრიყვებთ მამიდაჩემს თუ რა?"

"როგორ, მე..."

"დიახ, თქვენ. და საერთოდ, რისთვის ჩამოხვედით აქ, შიუნხენში?"

"უმბა-ჰა-ჰა!" გაიცინა ტომიმ.

"ალბათ გყავთ მამიდები, არა? ჰოდა, სხვებისას თავი დაანებეთ, სხვებთან რა გინდათ".

დიკს გაეცინა, ჰენანი კიდევ სხვა იერიშზე გადავიდა:

"სიტყვა აღარ გავიგონო მამიდებზე. საიდან ვიცი, იქნებ სულაც თვალის ახვევა გინდოდათ. არა, მართლა, მოდის კაცი, არავინ არაფერი იცის მასზე, ის კი, მოსულიც არ არის და მამიდებზე იწყებს ლაპარაკს. რა ვიცი აბა, რა გაქვთ გულ-ში?"

ტომის ისევ გაეცინა, მერე გულღიად, მაგრამ მოჭრით უთხრა:

"გეყოფათ, კარლი, ნუ აცურდით. დიკ, ჩამოჯექით და თქვით, როგორა ხართ, ნიკოლი როგორ არის?"

ამ კაცებში დიდად არავინ მოსწონდა და არც ვინმეს გამო თავის რაღაც განგებ დაჭერა სჭირდებოდა — ახლა მოდუნდა, ისვენებდა აქ, რომ ხელახალ ბრძოლას შესდგომოდა, იმ
კარგი ათლეტივით, რომელიც, თავდაცვაზეც გადადის ხოლმე,
იმისათვის, რომ დროში მოიგოს და მერე მიაწვეს, წვრილფეხობა კი, როცა ისვენებს, მაშინაც კი დაჭიმულია და დაწყვეტაზეღა აქვს ნერვები, ლამის გათავდეს.

ჰენანი მაინც ვერ დაცხრა, პიანინოსთან მივიდა, რამდენიმე აკორდი აიღო, დროდადრო დიკს გადახედავდა და ჩაიბუტბუტებდა, "მამიდათქვენები", მერე და მერე კადენციით ჩაიმღერა, "განა გითხარ მამიდა, არა, გითხარ რა მინდა". "ჰო, როგორა ხართ?" გაუმეორა ტომიმ. "მთლად ისე..." გუსტ სიტყვას ეძებდა, "უდარდელი არ ჩანხართ, უწინდე-

ლივით, ისეთი პეწი... ხვდებით, რისი თქმაც მინდა".

რემარკა ნართაულად ეჩვენა დიკს, ცხოვრების ძალა ძველებური ვეღარა გაქვთო, თითქოს უთხრეს, რაღაცის სათქმელად მოემზადა თვითონაც და ტომისა და პრინც ჩილიშჩევის
უცნაურ თარგზე აჭრილ, ფანტასტიკურ კოსტიუმებს შეხედა,
გილ-სტრიტზე კვირაობით მოსეირნეებსა ჰგვანდნენ, მაგრამ
თავადმა დაასწრო და აუხსნა.

"ვხედავ, კოსტიუმებზე გვიყურებთ", თქვა მან, "ჩვენ

რუსეთიდან ჩამოვედით ახლახანია".

"პოლონეთში გამოვიარეთ, კოსტიუმები სასახლის კარის მკერავმა შეგვიკერა", უთხრა ტომიმ. "ჰო, არა ვხუმრობ — პილსუდსკის პირადმა მკერავმა".

"ტურისტებად იყავით?" ჰკითხა დიკმა.

ორთავემ გადაიხარხარა, თავადი ზომაგადასულად ურტყამდა ხელს ტომის ზურგზე.

"ზუსტად, ტურისტებად, თანაც კარგა ხნით".

დიკი ელოდა, გამაგებინებენო. მისტერ მაკკიბენმა გააგებინა ორი სიტყვით:

"გამოქცეულები არიან".

"აი ამას კი ვეღარ ვიგებ მაგ ამბავში", თქვა მისტერ მაკკიბენმა. "მაინც რად უნდა დაეშალათ თქვენთვის წამოსვლა?"

პიანინოსთან მჯდარი ჰენანი წამოდგა და დანარჩენებს თვალი ჩაუკრა.

ლაპარაკი ისევ ჩილიშჩევსა და ტომიზე გადავიდა, არ გეშინოდათო, ჰკითხეს.

"როცა ციოდა, მაშინ, თქვა ტომიმ. "სიცივის ყოველთვის მეშინია, ომშიც კი მეშინოდა".

მაკკიბენი წამოდგა. .

"მე უნდა წავიდე, ხვალ დილით ინსბრუკში მივდივარ ცოლით, ბავშვებით და — გუვერნანტით, მანქანით წავალთ,"

"ხვალ მეც ინსბრუკში უნდა წავიდე", თქვა დიკმა.

"რას ამბობთ!" წამოიძახა მაკკიბენმა. "ჩვენთან ერთად

წამოდით. დიდი "პაკარდი" მაქვს, ბევრნიც არა ვართ — ცო-ლი, ბავშვები, მე თვითონ... და გუვერნანტი..."

"მე, ალბათ..."

"ცხადია, მთლად გუვერნანტიც არ არის", დაუმატა მაკკიბენმა და თითქმის პათეტიკურად შეხედა დიკს. "სხვათა შორის, ჩემი ცოლი თქვენს ცოლისდას, ბები უორენს იცნობს".

მაგრამ დიკს იქ გარევის თავი არ ჰქონდა.

"ორ ნაცნობს უკვე შევუთანხმდი, ერთად მივდივართ".

"ო", მაკკიბენს გული დასწყდა. "რას ვიზამთ, მაშინ დაგემშვიდობებით". მოშორებით მაგიდის ფეხზე მიბმული წმინდა სისხლის ორი ტერიერი აუშვა, რომ თავის ძაღლებიანად წასულიყო. დიკმა წარმოიდგინა ინსბრუკის გზაზე ძლივს მიმავალი გაჭედილი "პაკარდი" შიგ ცოლ-ქმარი მაკკიბენებით, მათი ბავშვებით, ბარგი-ბარხანით, მოწკავწკავე ძაღლებით და გუვერნანტით.

"გაზეთში წერია, რომ იციან, ვინც მოკლა". ტომის ხმა გაიგონა დიკმა. "მაგრამ რაკი სპიკიზი¹ იყო ის ადგილი, სადაც ეს მოხდა, ბიძაშვილებს არ უნდათ გაახმაურონ. ამაზე

რას იტყვით?"

"ოჯახის სახელს უფრთხილდებიან".

ჰენანმა აკორდი აიღო, რომ ყურადღება მიექცია.

"ჩემი აზრით", თქვა მან, "რაც ადრე დაწერა, ისიც არ იყო დიდი რამე, ევროპელებს რომ თავი დავანებოთ, ამერიკაშიც ცოტა როდი წერს ისევე, როგორც ნორთი წერდა".

დიკი ახლაღა მიხვდა, რომ ეიბ ნორთზე ლაპარაკობდნენ.

"ჰო, ოღონდ იმ სხვაობით, რომ ეიბი პირველი იყო", თქვა ტომიმ.

"ეგრე არ არის", დაჟინებით ამბობდა ჰენანი. "მეგობრების ბრალია, კარგი მუსიკოსის სახელი რომ ჰქონდა, მის გაუთავებელ ლოთობას მაგითი ხსნიდნენ…"

"ვისზე ამბობთ, ეიბ ნორთზე ლაპარაკობთ?" იკითხა დიკმა, "ეიბს რამე მოუვიდა? რა მოუვიდა?"

"დილანდელი "ჰერალდი არ წაგიკითხავთ?"

<sup>1</sup> მაგარი სასმელებით უკანონოდ მოვაჭრე ბარი (ამერ. ჟარგ.).

"oho".

"ეიბი მოკვდა. ნიუ-იორკის სპიკიზიში სასიკვდილოდ სცემეს. ძლივს მივიდა თავის რეკეტ-კლაბამდე და იქ მოკვდა".

"ეიბ ნორთი?"

"ჰო, გაზეთშია..."

"ე ი ბ ნ ო რ თ ი?" დიკი წამოდგა. "მართლა იცით, რომ მოკვდა?"

ჰენანი მაკკიბენს მიუბრუნდა.

"რეკეტ-კლაბამდე არ მისულა, ჰარვარდ-კლაბში მოკვდა. ეგ რეკეტ-კლაბის წევრი არ იყო".

"ჰერალდში" ასე წერია". დაჟინებით ამბობდა მაკკიბენი.

"შეცდომაა, გეუბნებით, ასე არ არის".

"სასიკვდილოდ სცეშეს სპიკიზიში".

"რეკეტ-კლაბში თითქმის ყველას ვიცნობ", ამბობდა ჰენანი, "ეგ ჰარვარდ-კლაბში იყო".

დიკი წამოდგა, ტომიც ადგა. თავადი ჩილიშჩევი უღიმდამო ფიქრებისაგან გამოერკვა, შეიძლება ისევ რუსეთიდან გამოქცევის შანსზე ფიქრობდა, ამაზე უკვე იმდენი ეფიქრა, რომ იოლად ვეღარ მოიშორებდა, ადგა და ამათ მიჰყვა თვითონაც.

"ეიბ ნორთს სცემეს და მოკვდა".

რა გზით, რანაირად მიდიოდა ოტელში დიკი, ვერა გრძნობდა. ტომი ლაპარაკობდა.

"მკერავს ველოდებით, რომ დაამთავროს, რამდეხიშე კოსტიუმი შევუკვეთეთ და როგორც კი მზად იქნება, პარიზში წავალთ. ბირჟის მაკლერის საქმეს მინდა ხელი მოვკიდო და იქ
ასე ვერ გამოვჩნდები, არ მიმიღებენ. ამერიკაში თქვენთან
ახლა ყველა მილიონს აკეთებს. ხვალ მართლა მიდიხართ? ერთხელაც კი ვერ ვისადილებთ ერთად. მე მგონია, მიუნხენში
თავადს ქალი ჰყავდა ადრე. დაურეკა, მაგრამ უთხრეს, ხუთი
წლის წინათ გარდაიცვალაო, დღეს იმის ორ ქალიშვილთან
ვიქნებით სადილზე".

თავადშა თავი დაიქნია.

"იქნებ დოქტორ დაივერისთვისაც მომეხერხებინა".

"არა, არა", ჩქარა თქვა დიკმა.

მაგრად ეძინა, უსიზმრებოდ. ფანჯრიდან სამგლოვიარო მარშის ყრუ ხმა მოესმა და იმან გააღვიძა. ქუჩაში გრძელ მწკრივად მიდიოდნენ 1914 წლის ნაცნობ მუზარად-უნიფორმიანები, სქელი კაცები ფრაკებითა და ცილინდრებით, ბიურგერები, არისტოკრატები, უბრალო ხალხი. ვეტერანების საზოგადოებას ომში დაცემულთა საფლავებზე გვირგვინები მიჰქონდა. ნელა და დინჯად მიდიოდნენ, ძველი დიდების, დაკარგულ ძალის, დავიწყებული მწუხარების პატივსაცემად. სახეებზე ფორმალური სევდა ეხატათ, მაგრამ დიკს, იმათ შეხედვაზე ლამის ფილტვები დაეხეთქა. იმიტომ რომ ეიბი მოკვდა,
იმიტომ რომ ათი წლის წინათ წაუვიდა ახალგაზრდობა.

## XVIII

ინსბრუკში დღის მიწურულს ჩავიდა, ბარგი ოტელში გაგზავნა და ქუჩებს დაუყვა. მზის ჩასვლაზე იმპერატორ მაქსიმილიანს მუხლი მოეყარა და თავის ბრინჯაოს მეგლოვეებზე
ლოცულობდა. ოთხ ახალბედა იეზუიტს, უნივერსიტეტის ბაღში ხეივანს რომ აუყვებოდ-დაუყვებოდა, წიგნები ეჭირათ და
ჩასცქეროდნენ. მზე ჩავიდა და უძველესი ალყებისა და წლისთავების, ქორწინებების მარმარილოს მოწმენიც გაქრნენ;
დიკმა მწვანე ბარდის სუპს და წვრილ ძეხვს ოთხი კათხა პილზენური ლუდი დააყოლა და კაიზერის თავშესაქცევის საშიშ
დესერტზე უარი თქვა.

გადმოწოლილი მთების მიუხედავად შვეიცარია მაინც შორს იყო. ნიკოლიც შორს იყო. საღამოთი, ოტელის ბაღში სეირნობისას, ნიკოლზე ფიქრობდა, ფიქრობდა სიყვარული-თა და განმარტოებით იმაზე, რაც ყველაზე კარგი იყო ხიკოლში. გაახსენდა, როგორ მოირბინა ერთხელ მასთან ცვრიან ბალახზე თხელი სანდლებით, მთლად რომ დასველებოდა და დიკის ფეხსაცმელებზე შედგა, უფრო ახლო მიიწია და სახე გადაშლილ წიგნსავით მიუახლოვა.

"როგორ გიყვარვარ ახლა, ძალიან?" ჩურჩულით უთხრა. "მე არ მოვითხოვ, რომ ყოველთვის ასე გიყვარდე, მაგრამ ძალიან გთხოვ, არ დაივიწყო ეს საღამო. სადღაც, გულში, მე სულ ისეთი ვიქნები, როგორიც ახლა".

დიკი კი გამოიქცა, თავისი გადარჩენისთვის გამოიქცა და ამაზე ფიქრობდა. დაკარგა თავისი თავი და როდის, რომელ დღეს, კვირას, თვეს, ან წელიწადს, ეს არ იცოდა. ოდესღაც ჰქონდა მოვლენების წვდომის უნარი, მაშინ ცხოვრების ყვე-ლაზე რთულ მხარესაც კი მა-ტივი პაციენტების პრობლემა-სავით გადაჭრიდა ხოლმე. იმის მერე კი, რაც ნიკოლი ნახაციურიხის ტბაზე, და მერე, როზმერისთან შეხვედრამდე, ესუნარი წართმეოდა.

ღარიბული ეკლესიის მრევლში არსებობისათვის მამამისის ბრძოლის შემყურე დიკმა, თუმცა ბუნებით მომხვეჭელი არა ყოფილა, ისწავლა ფულის ფასი. არა, ეს იმის გამო კი არ მოხდა, უზრუნველი რომ ყოფილიყო — ეს ბუნებრივი იქნებოდა, არა, ნიკოლს როცა ირთავდა, ყველაზე მეტად იმ ხანებში უფრო სჯეროდა თავისი თავის, მაშინ იყო თუ იყო, რომ ფეხზე იდგა და მიუხედავად ამისა, მაინც, გადაყლაპეს, როგორც "გიგოლო"<sup>1</sup> და რაღაცნაირად თვითონაც წავიდა დათმობაზე, რომ მთელი თავისი არსენალი უორენების საგვარეულო სეიფებში ჩაკეტილიყო.

"საჭირო იყო საქორწინო მოლაპარაკების ევროპულ სტილზე შედგენა, მაგრამ ჯერ კიდევ ბევრი რამ წინ არის, რვა წელი ამაოდ დავკარგე, რომ მდიდრებისთვის ადამიანური წესიერების ანაბანა მესწავლებინა, მაგრამ ხელის ჩაქნევა ჯერ ადრეა. ჯერ კიდევ ბევრი კოზირი მაქვს".

უაზროდ დაეხეტებოდა, წაბლისფერშეპარულ ვარდისფერ ბუჩქებს გარს ნოტიო ხვეულა გვიმრები ერტყა. ოქტომბრის თბილი საღამო იყო, მაგრამ დიკს ტვიდის ბოლომდე შეკრულ ქურთუკშიც არ სცხელოდა. რეზინის პატარა ღილ-კილოც შეეკრა, შავმოიისფრო ხეს ქალის ფიგურა გამოეყო, დიკმა შეიცნო, ოტელიდან გამოსვლისას ვესტიბიულში რომ იდგა, ის ქალიშვილი იყო. ახლა ვისაც კი მშვენიერ ქალს დაინახავდა, ყველა უყვარდა. უყვარდა მათი შორს ალანდული სილუეტი, კედელს აკრული იმათი ჩრდილი.

ქალიშვილი ზურგით იდგა და ქალაქის ჩირაღდნებს გასცქეროდა. დიკმა ასანთი გაკრა, იმ ვარაუდით, იქნებ ხმაზე მოტრიალდესო, მაგრამ ქალიშვილი არც შერხეულა.

— გამოწვევაა? თუ პირიქით, არად ჩაგდება? უბრალო

<sup>1</sup> დაქირავებული პარტნიორი დანსინგში (ფრანგ.).

სურვილებისა და ამ სურვილების ასრულების სამყაროს დიდხანს იყო მოშორებული და ეს გაუბედავსა და მერყევს ხდიდა. ალბათ, ფიქრობდა დიკი, მინერალურ წყლებზე აქ აგარაკად ჩამოსულებს რაღაც კოდი აქვთ და იმითი პოულობენ სწრაფად ერთმანეთს.

— საჭირო სვლას იქნებ მისგან ელოდებიან, უცნობი ბავშვები ერთმანეთს რომ დაინახავენ, გაიღიმებენ და იტყვიან ხოლმე: "მოდი ერთად ვითამაშოთ".

ცოტა მიუახლოვდა. ჩრდილი შეირხა. ახლა კი დასცხებენ, როგორც მოხეტიალე მედაფდაფე ბიჭებს — ეს ამბავი აღარც ახსოვს როდის და ვინ უამბო, მაშინ თვითონაც ბიჭი იქნებოდა. გული გამალებით უცემდა გაურკვეველის, შეუსწავლელის, გამოუკვლეველ-ამოუხსნელის სიახლოვით. უცებ დიკი მოტრიალდა, მაშინვე ქალიშვილიც შეირხა და შავმოიისფრო ფოთლოვანი არშიაც დაირღვა, რადგან ქალი თვითონვე იყო ამ არშიაში. ბაღის მერხს შემოუარა და ნელი, მაგრამ მტკიცე ნაბიჯით ოტელისკენ მიმავალ ბილიკზე გადავიდა.

მეორე დილას დიკი, ორი მთამსვლელი და გამცილებელი ბირკარშპიტცეზე ასვლას შეუდგნენ. უკან დარჩა მაღალმ-თიანი საძოვრები, გულს ახარებდა სადღაც ქვევიდან ამოსული ზანზალაკების წკრიალა ხმა, ახლავე უხაროდა, რომ ღამეს მთაში, ქოხში გაათენებდა. მოსწონდა დაღლა, მოსწონდა, რომ გამცილებლის მორჩილი იყო და არავინ იცნობდა აქ. მაგრამ შუადღით ამინდი შეიცვალა, მოშავო ხორხოშელა წამოვიდა და სეტყვაც მოჰყვა, მთებში ჭექა-ქუხილის ხმა დაირხა. დიკ-სა და ერთ ალპინისტს კიდევ უნდოდათ გზის გაგრძელება, მაგრამ გამცილებელმა უარი თქვა. დასანანია, მაგრამ სხვა გზა არ იყო. დაშვებისას ფეხი უსხლტებოდათ, ინსბრუკში დაბ-რუნდნენ, რომ ხვალ დილით ადრე ისევ გზას დასდგომოდნენ.

ცარიელ რესტორანში ერთი ბოთლი იქაური, მაგარი ღვინო შესვა სადილზე და მერე უცებ შეუცნობელმა ღელვამ მოიცვა, შეუცნობელმა მანამ, სანამ ბაღზე არ გაიფიქრა — ვახშმამდე კიდევ შეხვდა იმ ქალიშვილს ვესტიბიულში, ახლა ქალიშვილმა შეხედა და სიმპათიითაც, მაგრამ ამანაც უფრო გაუმძაფრა ნაღველი: "რისთვის, შემეძლო რამდენიც გინდა იმდენი მშვენიერი ქალი მყოლოდა თავის დროზე, მაგრამ ახლა რად მინდა ამის დაწყება, როცა ძველი სურვილებიდან

ნატამალიც კი აღარ შემომრჩა?"

წარმოსახვამ შორს წაიყვანა, მაგრამ უწინდელი ასკეტიზმი, ბევრ რამეზე რომ უარს ათქმევინებდა, ახლაც ყველაზე მაღლა დადგა. "ღმერთო, შემეძლო, რივიერაზე წავსულიყავი და ხვალვე ჯეინის კარიკამენტოსთან ან პატარა უილბერჰეიზისთან გამეთია ღამე, ოღონდ ღირს კი ამ წლების ასე იოლი და მისაწვდომი გზით შემოკლება?"

მაგრამ ღელვა არ დაუცხრა და ვერანდიდან თავის ოთახუი ავიდა, რომ ფიქრს მისცემოდა. იქ ხელს არავინ შეუშლიდა, მარტოობა, ფიზიკური თუ სულიერი, სევდას ბადებს და სევდა კი უფრო აძლიერებს მარტოობას.

ზევით ასული, ოთახში მიდი-მოდიოდა, ფიქრობდა, მთამსვლელის სველ ტანსაცმელს იხდიდა თან და ოდნავ თბილ რადიატორზე ფენდა; ისევ დახედა ნიკოლისაგან გამოგზავნილ ტელეგრამას, როცა კი დიკი წავიდოდა, ყოველდღე ასე უგზავნიდა. ტელეგრამა ვახშმობამდე მოვიდა, დიკმა არ გახსნა — შეიძლება იმ ბაღის გამოც. ახლა გახსნა. კაბლოგრამა იყო ბაფალოდან, ციურიხის გავლით გამოგზავნილი.

"მამათქვენი მშვიდად აღესრულა წუხელ ღამით.

ჰოლმზი".

მწვავე ტკივილმა დაუარა, დაიძაბა, ტკივილმა ჯერ მუცელში გაჰკრა, მერე წელში, და ყელში მოაწვა.

კიდევ ერთხელ გადაიკითხა და საწოლზე ჩამოჯდა გაშტერებული, მძიმედ სუნთქავდა; ჯერ ვერ მოეშორებინა ეგოისტური აზრი, მშობლის სიკვდილის შეტყობისას ბავშვს რომ
უჩნდება, — რა მეშველება, როცა ყველაზე ძლიერი და დიდი
მფარველი აღარა მყავს?

ამ ატავიზმმა რომ გაიარა, ისევ სიარული დაიწყო ოთახში, ზოგჯერ ჩერდებოდა და კაბლოგრამას დახედავდა. ჰოლმზი მამის თანაშემწედ ითვლებოდა, მაგრამ უკვე ათი წელია, რაც ფაქტიურად თვითონ იყო სამრევლო მღვდელი. რით მოკვდა? სიბერით — სამოცდათხუთმეტი წლისა იყო. კარგა ხანს იცო-ცხლა.

დიკს იმაზე ეწვოდა გული, რომ მარტო მოკვდა, ჯერ ცოლის სიკვდილს მოესწრო, მერე ძმები და დები დაკარგა, ბიძაშვილები კი ჰყავდა ვირჯინიაში, მაგრამ ღარიბები იყვნენ და ჩრდილოეთში ვერ წავიდოდნენ, იმიტომაც აწერდა დეპეშას ჰოლმზი ხელს. დიკს მამა უყვარდა — დღემდეც კი, ძალიან ხშირად ცდილობდა ხოლმე წარმოედგინა, რას გააკეთებდა მაშაშისი, ან როგორ მოიქცეოდა, დიკი რომ ყოფილიყო. დიკი იმის მერე, რაც ერთიმეორის მიყოლებით დაიხოცნენ იმისი დები, რამდენიმე თვის მერე დაიბადა და მამას ეშინოდა, ერთადერთი ბავშვი დედამ არ გაანებივროსო, ამიტომაც თავიდანვე თვითონ ითავა ვაჟიშვილის ზნეობის აღზრდა. მაშინაც უკვე დაღლილი იყო ცხოვრებით, მაგრამ თავისი მოწოდების სიმაღლეზე ყოფნა მაინც შეძლო.

ზაფხულობით მამა-შვილი ქალაქში ერთად დადიოდნენ ფეხსაცმელების გასაწმეხდად — დიკს გახამებული ტილოს მატროსის კოსტიუმი ეცვა ხოლმე, მამას თავისი საუცხოო სამოსელი პასტორისა. დიკი ლამაზი, მოხდენილი ყმაწვილი იყო და მამა ძალიან ამაყობდა თავისი ბიჭით. შვილს ჩააგონებდა, რაც თვითონ იცოდა ცხოვრებაზე, უფრო მეტად უბრალო და ურყევ ჭეშმარიტებებს, იმას, რაც თვით მას, მღვდელს შეეძლო ესწავლებინა. "ერთხელ, — იმხანად სასულიერო წოდება ახალი მიღებული მქონდა, ერთ სახლში მომიხდა მისვლა, უცხო ქალაქში. შევდივარ ხალხით სავსე სასტუმრო ოთახში და არ ვიცი ვინ არის მასპინძელი. სტუმრებს შორის რამდენიმე ნაცნობი კი შევამჩნიე, მაგრამ არავისთვის მიკითხავს რამე და პირდაპირ ოთახის სიღრმეში, ფანჯარასთან მჯდომ ქაღარა ქალთან მივედი და ჩემი თავი წარვუდგინე. იმის მერე ბევრს დავუახლოვდი იმ ქალაქში და ბევრი მეგობარი შევიძინე".

ასეთ რამეს გულღიად ყვებოდა — მამამ იცოდა თავის ფასი და მთელი ცხოვრების მანძილზე არ დაუკარგავს ის სიამაყე, თავის გამზრდელი ორი ამაყი ქვრივისაგან რომ გადმოეცა, ისინი მას იმ რწმენით ზრდიდნენ, რომ არაფერია იმაზე უფრო დიდი ღირსება, ვიდრე "სიკეთის ინსტინქტები", ვაჟკაცობა, ზრდილობა და პატიოსნება.

მამას ყოველთვის მიაჩნდა, რომ ცოლის მცირე მემკვიდრეობა ვაჟიშვილს ეკუთვნოდა და სასწავლებელშიც და სამედიცინო კოლეჯში სწავლის წლებშიც დიკს ყოველ წელს, სამ

თვეში ერთხელ ჩეკს უგზავნიდა. ის ერთი იმათგანი იყო, ვისზედაც მოოქრულ საუკუნეში, აქსიომასავით იტყოდნენ ხოლ-

მე: "უდავოდ, ჯენტლმენია, მაგრამ უფხოა".

...დიკმა გაზეთისთვის გაგზავნა ბიჭი. ამერიკაში მიმავალი გემის რეისი ისე შეარჩია, ოთახში წინ და უკან სიარული არ შეუწყვეტია, თან კაბლოგრამას — გახსნილი იყო და — უყურებდა. მერე ციურიხით ნიკოლთან ლაპარაკი შეუკვეთა, სანამ იცდიდა, ბევრი რამ გაახსენდა და დაენანა, რად არ იყო ისეთი კარგი, როგორც უნდოდა ყოფილიყო, ყოველთვის კარგი რად არ იყო.

## XIX

მთელ საათს უკვე წინ მოჩანდა ნიუ-იორკის პორტი, და სამშობლო მიწის დიდებული ფასადი, მამის სიკვდილზე ფიქრით მოცულს, სევდიანი ეჩვენა, მაგრამ როგორც კი ხმელზე ფეხი შედგა, ეს გრძნობა გაუქრა და აღარც დაბრუნებია, არც მაშინ, როცა ქუჩებში მიდიოდა, არც ოტელებში, და არც მატარებლებში, ჯერ რომ ბაფალოში, მერე კი სამხრეთისკენ ვირჯინიაში, მამამისის ნეშტთან ერთად მიაქანებდა. მხოლოდ მაშინ, როცა ძველი მატარებელი უესტმორლენდის მეჩხერი ტყის თიხნარს შეუყვა, დიკმა ისევ იგრძნო, რომ აქაურობის ზიარი იყო. ვაგზალში ცაზე ვარსკვლავი დაინახა და იმ ვარსკვლავს იცნობდა, ჩიზაპიკის უბის თავზე გადმომდგარი ცივი მთვარეც დიკის ნაცნობი მთვარე იყო, ესმოდა ხის თვლების ჭრიალი და რაღაც ხმები, საყვარელი და მიკარგული, იმ პირველყოფილ მდინარეთა სალბუნივით ხმა, მდორედ რომ მიდიოდნენ და ინდიელების სალბუნებივით სახელები რომ ერქვა ყველას.

მეორე დღეს მამამისი ეკლესიის ეზოში მიაბარეს მიწას ასობით დაივერების, დორსების და ჰანტერების გვერდით. სანუგეშო ის იყო, რომ აქ იგი მარტო არ იქნებოდა, ყველა ამათთან ერთად. ფხვიერი, წაბლა მიწისაგან ამართულ პატარა ბორცვზე მიმოფანტეს ყვავილები. აქაურობასთან დიკს აღარაფერი აკავშირებდა და არც ფიქრობდა, რომ როდისმე კიდევ დაბრუნდებოდა. მუხლი მოიყარა. იცნობდა ამ ხალხს, აქ რომ სამარადისო ძილით ეძინათ, ახოვანებს, მზედაკრული სახეებით და ანთებული ლურჯი თვალებით, მათი სულები მეჩვიდმეტე საუკუნის უღრანი ტყის წყვდიადში იყო გამოძერწილი, ახალი მიწით.

"მ'შვიდობით, მაშა — მ'შვიდობით, ყველა ჩემო მამებო".

პორტის გრძელ პირსზე ფეხშედგმული, აღარც იქა ხარ, ხმელეთზე, და აღარც აქა ხარ.

ყვითელი, ნისლიანი კამარა სავსეა მოგუგუნე ხმების ექოთი. ტვირთის გადატანა, ჩასხდომა, გრიალი და გრუხუნი, ონკანების ჩხრიალი და ჟღრიალი, ჰაერს უკვე ზღვის მარილიანი
გემო ერევა. ყველა ჩქარობს, მიუხედავად იმისა, რომ დრო
ქვეყნისაა; წარსული, კონტინენტი — უკანღა დარჩა, მომავალი კი გემის ტრაპს ზევით, გახურებულ ხახაში იცდის; თავგზააბნეული აწმყო — მიხლა-მოხლაა გასასვლელში.

ბოლოს გემზე ხარ, სამყაროს სახეც იკვეთება და ვიწროვდება, ახლა ანდორაზე უფრო პატარა სახელმწიფოს მოქალაქე ხარ, სადაც ყველაფერს უნდა ელოდე. გემის ხაზინადრის კაცებს კაიუტებივით წაგრძელებული და უცნაური სახეები აქვთ; მგზავრები და მათთან მოსული მეგობრებიც გეგონება აგდებულად იყურებიან. მაგრამ ხმამაღალი, ნაღვლიანი სტვენა გაისმის. ერთი ძლიერი შეთრთოლება და გემი, ადამიანის ეს ერთი აზრიც, უკვე მოძრაობაშია, და პირსი და იმასთან ერთად ხალხიც სრიალით გშორდება; წამით გემი პირსის რაღაცა წანატები გგონია, მაგრამ სახეებს უკვე ვეღარ არჩევ და ხმებიც უკვე აღარ მოგესმის, პირსი რაღაცა შორით ლაქაა, ნავთსაყუდელი სულ უფრო სწრაფად იწევა განზე და ზღვაში შედიხარ.

გაზეთების მიხედვით ამ გემის ყველაზე ძვირფას ტვირთად ელბერტ მაკისკო ითვლებოდა. მაკისკო მოდაში იყო. მისი რო- მანები თავისი დროის კარგი მწერლების ქმნილებათა მიბაძვით იქმნებოდა და არ შეიძლება ეს ღვაწლი მისთვის დაეკარგათ; თანაც, კარგადაც ახერხებდა რომ გაებერა, ამარტივებდა იმას, რასაც კი სესხულობდა და ამით ძალიან აამებდა ბევრ მკითხველსაც, მოხიბლულს იმით, რომ მისი გაგება უფ-რო ადვილი იყო. წარმატებამ უკეთესი გახადა, ისეთი დიდ-

გულა და ამპარტავანი როდიღა ჩანდა. იცოდა თავისი თავის ფასი — იძხელა ენერგია ჰქონდა, რომ ბევრს, მასზე მეტად ნიჭიერებსაც მოიტოვებდა და გადაწყვიტა, თავისი წარმატე-ბით, რაც შეიძლება ესარგებლა. "მე ჯერ არაფერი გამიკეთე-ბია", თავისთვის ბჭობდა, "ვიცი, რომ გენიოსი არა ვარ, მაგ-რამ ბევრი თუ ვწერე, ბოლოს შეიძლება მართლა დავწერო კარგი წიგნი". ვინ იცის, ძართლა, — მორყეული ტრამპლინე-ბიდანაც, კარგი ნახტომის მაგალითი რამდენიც გინდათ იმდენია. ძველი წყენა, უთვალავჯერ რომ შეხვედრია, დავიწყებას მიეცა. ისე კი მისი წარმატების ფსიქოლოგიურ საფუძვლად ტომი ბარბანთან დუელი იქცა; მერე, როცა მეხსიერებაში უკვე ბეგრი რამ წაიშალა იმ ამბიდან, თავის თავს უფრო აფა-სებდა.

გემზე მაკისკომ დიკი მეორე დღეს შეამჩნია. ჯერ ფრთხილად გამოხედა, მერე მიუახლოვდა, მეგობრულად წარუდგა
და გვერდით მიუჯდა. დიკი კითხულობდა, წიგნი გვერდზე გადადო; რამდენიმე წუთი თუ დასჭირდა იმისათვის, რომ კარგად შეემჩნია მაკისკოში მომხდარი ცვლილება და ეს ახალი
მაკისკო, გამაღიზიანებელი გრძნობისაგან დაცლილი, საინტერესო მოსაუბრედაც კი მოეჩვენა. "ინფორმაციის წყარო" მაკისკოს უფრო მეტი ჰქონდა, ვიდრე გოეთეს — ერთ
რამედ ღირდა მისი მოსმენა, როცა სიტყვათა უამრავ, იოლად
მისახვედრ წყებებს აგებდა და თავის აზრებად ასაღებდა. ურთიერთობა გაიბა და ხშირად ერთადაც საუზმობდნენ. მაკისკო მეუღლითურთ, კაპიტნის მაგიდასთან იყო მიწვეული, მაგრამ როგორც თვითონვე ახალგამომცხვარი სნობიზმით უთხრა დიკს, "იმ კომპანიას ვერ იტანდა".

ვაიოლიტი ახლა დიდებული ქალი გახლდათ და დიდებული მემოდელეების კაბები ეცვა, დაუსრულებლად იხიბლებოდა პატარა აღმოჩენებით, რასაც კარგად აღზრდილი ქალოშვილები ოც წლამდე უკვე განვლილ ეტაპად მიიჩნევენ. თავის დროზე რაღაცის სწავლა კი შეეძლო დედისგან, მაგრამ
სულიერად იგი უფრო აიდაჰოს იაფფასიან, მცირე კინოთეატრებში ჩამოყალიბდა და დედისთვის დრო აღარა რჩებოდა.
ახლა იგი რამდენიმე მილიონ სხვა კაცთან ერთად "რჩეულებს" ეკუთვნოდა და ბედნიერი იყო, თუმცა ქმარი, როცა

მეტისმეტ გულუბრყვილობას იჩენდა ხოლმე, ისევ ისე უცა. ცხანებდა.

მაკისქოები გიბრალტარში გადასხდნენ. მეორე საღამოს ნეაპოლში, გზად, როცა ოტელიდან ვაგზალში მიდიოდა, დიკი ავტობუსში ერთ საცოდავ ოჯახს გადაეყარა. ხანში შესული ამერიკელი ქალი ორ ქალიშვილთან ერთად დიკმა გემზევე შეამჩნია. ისეთი დაბნეულები და საწყლები ჩანდნენ, ყოვლისწამლეკმა სურვილმა მოუარა: დახმარებოდა, ან იქნებ უნდოდა ასე მოქცეულიყო, რომ მერე დიკით მოხიბლულიყვნენ მატარებელში იმათ გართობის ცდაში იყო და ცხადია, ფრთხილად და ტაქტიანად, ღვინოც კი შესთავაზა, და გულწრფელად გაიხარა, როცა დაინახა, რომ გულდაჯერება მოემატათ, ისე იხარჯებოდა, ასეთი კარგი ბრძანდებითო, რომ ლამის თვითონვე დაიჯერა რასაც ამბობდა, მით უფრო, რომ ილუზიისთვის ბევრსაცა სვამდა; ქალებს კი, სამივეს, ასე ეგონათ, ციდან დაგვატყდაო თავს ეს ამბავი. უკვე რიჟრაჟდებოდა და მატარებელი რწევითა და ქშენით მიდიოდა კასინოდან ფროზიხონემდე, როცა იგი მათ გაეცალა. რომის ვაგზალზე ამერიკულად, დიდი ამბით დამშვიდობების მერე დიკი დაქანცული გაემართა ოტელ "კვირინალისაკენ".

პორტიეს კანტორასთან უცებ გვერდზე მიიხედა და გაქვავებულივით შედგა; თითქოს ღვინო დაელია, ცხელ ტალღასავით დაუარა სხეულში და თავში აუვარდაო. ის დაინახა, ვისი ხახვის იმედიც ჰქონდა, ვისთვისაც მთელი ხმელთაშუა გადმოიარა.

სწორედ ამ დროს როზმერიმაც დაინახა და ისე გაუხარდა, გაშტერებაც ვეღარ მოასწრო; დაბნეულმა შეხედა თავის თანამგზავრ ქალიშვილს, და მაშინვე გამოქანდა. დიკი ელოდა, დაჭიმული, სუნთქვაშეკრული. მოუახლოვდა და როცა თითქმის სულ ახლო იყო, ახლებურად მომხიბვლელი და მოვლილი, როგორც ფაშატი გერგე, მბზინავ ფერდებით და მოსართავით, მხოლოდ მაშინ მოეგო გონს; მაგრამ ეს ყველაფერი ძალიან სწრაფად მოხდა, დიკმა ისღა მოახერხა, რომ დაქანცულობა დაეფარა და როზმერის გულღია და სხივიან მზერას არაგულ-წრფელი პანტომიმა შეაგება, რასაც, სიტყვებით, ალბათ ასე გამოხატავდა — "ვის ნახვას აღარ ვიფიქრებდი, როგორ, თქვენა ხართ?"

როზმერის ხელთათმანიანმა ხელებმა დაფარა დიკის მერ-<sub>ხზე</sub> ჩამოდებული ხელი; "დიკ — ჩვენ აქ "რომის გარდასულ დიდებას" ვიღებთ — უფრო სწორად, გვგონია, რომ ვიღებთ. ერთ მშვენიერ დღეს შეიძლება მივანებოთ თავი".

დიკი ჩაციებით უყურებდა, იქნებ ამ შეხედვით შემცბარ ტოზმერის ვერ შეემჩნია გაუპარსავი პირისახე, დაჭმუჭნილი პერანგი და ჩაკეცილი საყელო. საბედნიეროდ, როზმერის ეჩ-

ქარებოდა.

"ჩვენ ადრე ვიწყებთ, რადგან თერთმეტისთვის უკვე ნის-

ლია — ორის მერე დამირეკეთ".

თავის ოთახში ასული დიკი ცოტ-ცოტა თავის თავს დაუბრუნდა. პორტიეს დაურეკა, რომ ზუსტად თორმეტისთვის გაე**ღ**ვიძებინათ, სწრაფად გაიძრო ტანსაცმელი და ძილს მისცა თავი.

პორტიეს დარეკვა არ გაუგონია, მაგრამ ორ საათზე, გამოძინებულს, თვითონვე გაეღვიძა. ბარგი გახსნა და კოსტიუმები და პერანგები გასამზადებლად ჩააბარა. მერე პირი გაიპარსა, ერთ ოცდაათ წუთს თბილ აბაზანაში ჩაწვა და ისაუზმა. ვია ნაციონალე უკვე მზით იყო გაჩახჩახებული, უნდოდა, ოთახშიც შემოსულიყო მზე და ძველ თითბრის რგოლებზე ჩამოკიდებული მოჟღარუნე პორტიერები ოდნავ გასწია. სანამ გაუთოებულ კოსტიუმს მოუტანდნენ, "კორიერე დელა სერა" გადაშალა და შეიტყო ამბავი "სინკლერ ლუისის რომანისა "უოლ-სტრიტი..."

ვერ ფიქრობდა, არაფერი გამოდიოდა, როზმერი ახალგაზრდა და მომხიბვლელი იყო, მაგრამ ამის თქმა ტოპსიზეც შეიძლებოდა. ხვდებოდა, რომ ოთხ წელიწადში საყვარლები ეყოლებოდა და ალბათ თვითონაც ეყვარებოდა. კაცმა არ იცის, ვის რა ადგილი უჭირავს სხვების ცხოვრებაში. მაინც ამ გაურკვევლობიდან ერთი რამ, თავისი გრძნობა გამოიკვეთა. საუკეთესო ურთიერთობად ის ითვლება, როცა იცი, რომ ბევრი რამ არის ხელშემშლელი, მაგრამ მაინც გინდა, რომ მოყვასად დარჩე. წარსული ისევ მოეძალა და მოუნდა, რომ როზმერის უებრო მზადყოფნა, დიკს დანებებოდა, მხოლოდ დიკისთვის ყოფილიყო და დიკის იქით არ წასულიყო. სცადა თავმოყრა ყველაფრისა, რითაც როზმერის მოხიბლავდა ოთხი წლის წინათ უფრო უხვადა ჰქონდა ხიბლი ვიდრე ახლა.

თვრამეტისები ოცდათოთხმეტი წლისას ახალგაზრდობი სქელ ბურუსში გახვეულები უყურებენ; მაგრამ ოცდაორისე ბი ულმობელი სიცხადით ხედავენ ყველაფერს, რაც ოცდათვ რამეტს შეეხება. თანაც, მათი შეხვედრისას დიკი ემოციურო ბის ზენიტში იყო; იმის მერე დრო გავიდა და, ის ხალისიც აღარა ჰქონდა.

როცა კოსტიუმი მოიტანეს, დიკმა თეთრი პერანგი ჩაიც ვა, შავი ჰალსტუხი გაიკეთა და მსხვილმარგალიტიანი ქინძის თავი გაუყარა; მეორე ასეთივე მარგალიტი პენსნესთვის იყო დაუდევრად რომ ეკიდა ხოლმე. ზაფხულობით რივიერაზე ცხოვრების გამო ნამზეური სახე უკვე მოყავისფრო-კრამიტისფერი გახდომოდა და გამოძინებულს ახლა უფრო ეტყობოდა ეს. მოქნილობისთვის თავდაყირა დადგა სკამზე და სანამ ჯიბიდან კალამი არ ამოუვარდა და ხურდა ფული არ გადმოიყარა, ასე იყო, სამ საათზე როზმერის დაურეკა, მიწვევა მიიღო. იმ თავისი აკრობატული ვარჯიშის მერე თავბრუ დაეხვა და გზად ბარში შეიარა, რომ ჯინი-ტონიკი დაელია.

"ჰეი, დოქტორო დაივერ!"

მხოლოდ იმის გამო, რომ ოტელში როზმერი ცხოვრობდა, დიკმა მაშინვე იცნო კოლის კლეი. ისევ ისეთი დაჯერებული და თავაღერილი, ისევ ისეთი სქელი ყბებით.

"იცით, რომ როზმერი აქ არის?" ჰკითხა მან.

"ჰო, შემთხვევით შევხვდი".

"ფლორენციაში ვიყავი, იქ გავიგე როზმერის აქ ჩამოსვ-ლა და წინა კვირას მეც წამოვედი. ახლა ძნელია მისი ცნობა, დედას პატარა გოგო არ არის", და მაშინვე შეარბილა: "ასე ვთქვათ, იმის თქმა მინდა, რომ სათუთად გაზრდილი, ახლა მსოფლიო ქალი დადგა—ერთი სიტყვით. ხვდებით, რასაც ვგუ-ლისხმობ. რომ იცოდეთ, რა დღეში ჰყავს ეს რომაელი ბიჭე-ბი — დაგრეხილები, და მერე როგორ!"

"ფლორენციაში რას აკეთებთ, სწავლობთ?"

"მე? ეგრეა, არქიტექტურას ვსწავლობ იქ. კვირას დავბრუნდები — დოღისთვის დავრჩი".

გინდა თუ არა, სურდა თავისი ბარში გახსნილი ანგარიშისთვის მიემატებინა ისიც, რაც დიკმა დალია, მაგრამ დიკმა თავისი ქნა და არ დაანება. ლიფტიდან გამოსული დიკი მიხვეულ-მოხვეულ დერეფანში მიდიოდა, შორიდან ხმა მოესმა, გამოღებული კარიდან, და იქით წავიდა. როზმერი შავ პიჟამაში ჩაცმული დახვდა; ოთახში ისევ იდგა პატარა მაგიდა, ყავას სვამდა.

"თქვენ ისევ ისეთი ლამაზი ხართ", თქვა დიკმა, "უფრო

ლამაზი, ვიდრე იყავით".

"ყავა გინდათ, ჭაბუკო?" ჰკითხა როზმერიმ.

"ვწუხვარ, რომ დილით დაღლილი მნახეთ".

"ჰო, დაღლილი სახე გქონდათ — მაგრამ ხომ დაისვენეთ უკვე, არა? ყავას დალევთ?"

"არა, გმადლობთ."

"ახლა თითქმის ძველებური დიკი ხართ ისევ, დილით კი, ლამის შემეშინდა. დედა აპირებს ჩამოსვლას იმ თვეს, თუ აქ დავრჩით. ძალიან ხშირად მეკითხება, დიკი სადმე ხომ არ შეგხვდაო, გეგონება, მეზობლად ცხოვრობდეთ. დედა ყოველთვის კარგი აზრისა იყო თქვენზე — მიაჩნია, რომ ასეთი კატის გაცნობით მე მართლა ბევრი რამ მომემატა".

"მიხარია, რომ ისევ ვახსოვარ".

"რა თქმა უნდა, ახსოვხართ". მიუგო როზმერიმ. "კარგად ახსოვხართ".

"მე რამდენჯერმე გნახეთ ეკრანზე", თქვა დიკმა. "ერთხელ ისიც კი მოვახერხე, "მამიკოს გოგო" მხოლოდ ჩემთვის ეჩვე-ნებინათ".

"ამ ახალ სურათში კარგი როლი მაქვს, მონტაჟის დროხ

თუ არ ამოჭრეს".

ტელეფონისკენ წავიდა, გავლისას, დიკის მხარს შეეხო. დარეკა, რომ მაგიდა გაეტანათ ოთახიდან და მერე ღრმა საფარძელში ჩაჯდა.

"როცა თქვენ შეგხვდით, გოგონა ვიყავი, თითქმის ბავშვი,

დიკ. ახლა ქალი ვარ".

"მინდა ყველაფერი მიამბოთ თქვენზე".

"როგორ არის ნიკოლი — ლანიე და ტოპსი?"

"კარგად, ხშირად გახსენებენ ხოლმე..."

ტელეფონმა დარეკა. სანამ როზმერი ლაპარაკობდა, დიკმა

წიგნები გადაათვალიერა — ორი რომანი, ერთი ედნა ფერზერის, მეორე ელბერტ მაკისკოსი. მოვიდა ოფიციანტი და მაგიდა წაიღო; უიმმაგიდოდ შავ პიჟამაში როზმერი რაღაც მარტოკა დარჩა.

"...სტუმარი მყავს... არა, ძალიან კარგად არა. მერე კიდევ კოსტიუშის მოსარგებად უნდა წავიდე, დიდხანს შევრჩები... არა, ახლა არა..."

როზმერიმ ისე გაუღიმა დიკს, თითქოს, რაკი მაგიდა გაიტანეს, შვება იგრძნოლ, თითქოს ორივემ ერთად მოახერხა. ქვეყანაზე ყველა სატანჯველს გაერიდნენ და მშვიდობით იყვნენ ახლა თავიანთ ნეტარ ზეცაში...

"ესეც ასე", თქვა როზმერიმ. "იცით, ამ ბოლო საათს რას ვაკეთებდი? თქვენთან შეხვედრისთვის ვემზადებოდი".

მაგრამ ისევ დარეკა ტელეფონმა. დიკი ადგა, რომ საწო-ლიდან თავისი შლაპა აეღო და ადგილზე დაედო. როზმერიმ თვალი შეასწრო დიკს, შეშინებულმა დააფარა ხელი ტელეფონს.

"bmd sh dopobsho?"

"არა".

ტელეფონით ლაპარაკი რომ დამთავრდა, დიკმა, უფრო იმისთვის, რომ შუადღის ეს გაწელილი დრო შეეკრა, თქვა:

"მე უკვე ისეთ საუბრებს ვიტან, რომლებიც რაღაც საზრდოს მმატებენ".

"მეც", დაეთანხმა როზმერი. "ახლა ერთი ვაჟბატონი რეკავდა, ოდესღაც იცნობდა ჩემს ბიძაშვილს. წარმოიდგინეთ,

ასეთი მიზეზით რომ დარეკავს ვიღაც!"

ახლა როზმერი სიყვარულისთვის ლაპარაკობდა, სხვა რა იყო ის რამერუმე, ფარდასავით რომ იფარებდა, რათა ამას არ დაენახა? დიკი სიტყვებს წერილებივით გზავნიდა მასთან, გეგონება, სანამ ისინი როზმერიმდე მიაღწევდნენ, თვითონაც რაფიც დროს იტოვებსო.

"ძნელია თქვენთან ახლო ვიყო და არ გაკოცოთ".

ოთახის შუაგულში იდგნენ, ერთმანეთს აკოცეს, ვნებიანად. წამით როზმერი დიკს მიეკრა, და მერე ისევ დაბრუნდა თავის სავარძელთან..

კარგი იყო, მაგრამ დიდხანს ასე ვერ იქნებოდნენ. ან წინ

უნდა წასულიყვნენ, ან დაეხიათ; როცა ისევ ტელეფონმა დარეკა, დიკმა საწოლისკენ გაიარა, ელბერტ მაკისკოს წიგნი აილო და საწოლზე დაწვა. როზმერიმ თითქმის მაშინვე გაათავა ლაპარაკი, შემოვიდა და იქვე ჩამოჯდა.

"საოცრად გრძელი წამწამები გაქვთ", თქვა მან.

"ახლა იქა ვართ, სადაც სტუდენტთა მეჯლისია, დამსწრეთა შორის არიან მისს როზმერი ჰოიტ, გრძელ წამწამების მო-

ყვარე..."

როზმერიმ აკოცა, დიკმა მიიზიდა და გვერდით დაიწვინა და კოცნიდნენ ერთმანეთს ვიდრე სულის შეგუბებამდე. რო-ზმერის სუნთქვა ახალგაზრდული, აგზნებული და მღელვარე ჰქონდა, ტუჩები ოდნავ დახეთქილი, მაგრამ კუთხეებში ისე-ვე რბილი.

სხვა არაფერი იყო უკვე, ერთმანეთის სხეული და — სამოსიანად, მამაკაცის მკლავების ძალა და ამისი ყელი და მკერდი, და როზმერიმ ჩურჩულით უთხრა, "არა, ახლა არ შეიძლება, არ შემიძლია".

დიკმა მორჩილად მიაგდო ვნება გონების სადღაც, ერთ კუთხეში და შერე, როცა როზმერის სათუთი სხეული ზევით ასწია, თავის ტანზემოთ, მშვიდად უთხრა:

"ძვირფასო, ეგ არაფერი — როგორც გინდა".

ქვევიდან ზევით უყურებდა და სულ სხვა ეჩვენა მისი სახე — მარადიული მთვარის შუქით განათებული.

"რომანტიკულად გამართლებული იქნებოდა, და პოეტური, რომ სწორედ თქვენ ყოფილიყავით", თქვა როზმერიმ. დიკს თავი გააშვებინა, სარკესთან მივიდა და ორივე ხელით თმა გაისწორა. მერე სკამი საწოლთან მიდგა და დიკს მიეფერა სახეზე.

"მითხარით თქვენზე, მხოლოდ მართალი", უთხრა დიკმა. "ყოველთვის მართალს გეუბნებოდით".

"ვთქვათ, ასეა — მაგრამ ყოველთვის ყველაფერი ერ**თი** როდია". ორთავემ გაიცინა, მაგრამ დიკი ჩააცივდა.

"თქვენ ისევ ქალწული ხართ?"

"რ-ა-ა-ს ამბობთ!" თითქმის წაიმღერა. "მე მყავდა ექვსას ორმოცი საყვარელი — ასეთი პასუხი გინდათ?" "თქვენ ჩემთან რა ვალი გაქვთ, ეგ ჩემი საქმე სულ არ არის".

"ფსიქოლოგიური კვლევისთვის გამოგადგებით?"

"სავსებით ნორმალურ, ოცდაორი წლის ჯანმრთელ ქალიშვილს რომ გიყურებთ, ათას ცხრაას ოცდარვა წელში მცხოვრებს, ბუნებრივია, თუკი ვიფიქრე, რომ უკვე გიყვარდათ რამდენჯერმე".

"მაგრამ სერიოზულად ერთხელაც არა". მიუგო როზმერიმ.

ვერ დაიჯერებდა. ერთი რამ ვერ გაეგო, როზმერი რაღაც ბარიერს ქმნიდა მათ შორის თუ უბრალოდ, უნდოდა, რომ იმ შემთხვევისთვის, თუ დათმობაზე წავიდოდა, უფრო საფასე გაეხადა ეს დათმობა.

"პინჩიოზე გავისეირნოთ", შესთავაზა დიკმა.

დიკმა სამოსი და თმა გაისწორა, იყო მომენტი და ამ მომენტმა გაიარა. სამი წელიწადია დიკი იდეალი გამხდარიყო
როზმერისათვის, იმით ზომავდა სხვა მამაკაცებს და რა გასაკვირია, რომ უკვე გმირივით იყო მისთვის და არ უნდოდა
სხვა კაცებივით ყოფილიყო, არადა, აქაც მომთხოვნელობა და
მოუთმენლობა, თითქოს უნდოდა მისთვის ცოტა რამ წაერთმია, ჯიბეში ჩაედო და თან წაელო.

გაზონებს მიჰყვებოდნენ, ქერუბიმებსა და ფილოსოფოსებს, ფავნუსებსა და შადრევნებს შორის მიდიოდნენ; როზმერიმ მკლავში ჩაჰკიდა ხელი, ზედ მიეკრა დიკს და ცდილობდა, უფრო მოხერხებულად მიჰყოლოდა, თითქოს უნდოდა, უკუნისამდე ასე ევლო. სიარულისას პატარა რტო მოიწია და მოტეხა, მაგრამ რტოში არ იყო ის სიცოცხლე. უცებ სახეში შეხედა დიკს და ის დაინახა, რისი დანახვაც ძალიან სურდა. ხელთათმანიან ხელზე აკოცა და იმდენი უტრიალა ბავშვივით, სანამ დიკმა არ გაიღიმა, თვითონაც გაიცინა და ახლა კი უკვე კარგად იყო სუყველაფერი.

"არ შემიძლია ამ საღამოს თქვენთან ვიყო, ძვირფასო, დიდი ხანია შევპირდი ნაცნობებს. მაგრამ ადრე ადგომა თუ შეგიძლიათ, ხვალ კინოგადაღებაზე წაგიყვანთ".

დიკმა მარტო ისადილა ოტელში, ადრე დაწვა და შვიდისთვის უკვე როზმერის ელოდებოდა ვესტიბიულში. მანქანაში დიკის გვერდით იჯდა როზმერი, მბრწყინავი და ცვარივით კამკამა, დილის მზის შუქზე. წმინდა სებასტიანოს ჭიზკრის გავლით აპიუსის გზაზე გავიდნენ, ამ გზით კარგა ხანს მიდიოდნენ, მანამდე, სანამ ფორუმის უზარმაზარი დეკორაცია არ დაინახეს, მართალ ფორუმზე უფრო დიდი. როზმერიმ დიკი ერთ მაღალ კაცს ჩააბარა, ამ კაცმა ბუტაფორიული თაღების, ამფითეატრის სკამებისა და ქვიშამოყრილი არენის სანახავად წაიყვანა დიკი. როზმერის იმ სცენაში იღებდნენ, სადაც მოქმედება ქრისტიანი ტყვეების საპყრობილეში ხდება, გადაღების ადგილისკენ გაემართნენ და ნიკოტერა, ახალი როდოლფო კალენტინოს ერთ უამრავ ვარიანტთაგანი დაინახეს, "ტყვე" ქალების წინ მოხდენილად პოზიორობდა. ეს ქალები ათამდე მაინც იქნებოდნენ, თვალ-წარბ-წამწამი მასკარათი შეეღებათ და მელანქოლიური მზერა ჰქონდათ.

როზმერიმ მოირბინა, მუხლებამდე ტუნიკი ეცვა.

"კარგად უყურეთ", ჩურჩულით უთხრა დიკს. "მინდა, რომ თქვენი აზრი მითხრათ მერე. ვინც გასინჯვაზე იყო, ყველამ თქვა…"

"როგორ, გასინჯვაზე?"

"წინა დღით გადაღებულს როცა ნახავენ. ყველამ თქვა, პირველად არის, რომ რაღაც სექსუალური გამიჩნდა".

"მე ამას ვერ ვამჩნევ".

"თქვენ კი! მაგრამ ასეა".

თავის ლეოპარდის ტყავში გახვეული ნიკოტერა მზრუნველად გამოელაპარაკა როზმერის, ამასობაში იმათგან ცოტა მოშორებით გამნათებელი რაღაცაზე. ეკამათებოდა რეჟისორს და
თან იმის მხარსაც ეყრდნობოდა. ბოლოს რეჟისორმა გაბრაზებულმა მოიშორა მხრიდან გამნათებლის ხელი და ოფლიანი
შუბლი მოიწმინდა, დიკის გიდმა კი თქვა: "ისევ უკბინა ბზიკმა და თანაც როგორ!"

"ვის?" ჰკითხა დიკმა, მაგრამ სანამ პასუხს მიიღებდა, რეჟისორი მოვარდა მათთან.

"ვის უკბინა — თქვენ თვითონ გიკბინათ ალბათ ბზიკმა". მერე დიკს მიუტრიალდა გაცხარებული და აგზნებული — არი-ქა, ეს განსჯის თუ განსჯის, ჟიურიაო. "ხედავთ? დალევს თუ არა, ბზიკი უკბენს და ჰგონია, რომ სხვებსაც ყველას უკბინა ბზიკმა, და თანაც როგორ!" გიდს კიდევ ერთხელ შეხედა

მძვინვარედ და მერე ტაშით მიმართა ყველას: "ქარგი, ადგილებზე, ვიწყებთ!"

დიკს ასე ეგონა, რომ დიდსა და არეულ ოჯახს ეწვია. ვიღაც აქტრისა მიუახლოვდა და ერთ ხუთ წუთს ელაპარაკა,
ლონდონიდან ამას წინათ ჩამოსული მსახიობი ეგონა დიკი.
როცა მიხვდა, შემეშალაო, შემცბარი ადგილიდან მოწყდა და
გაიქცა. თითქმის ყველა, ვისაც კი გადაღებასთან ჰქონდა საქმე, გარე სამყაროს ან ზევიდან ქვევით უყურებდნენ, ანდა
ქვევიდან ზევით, უფრო მეტად ზევიდან ქვევით. მაგრამ ესენი ყველა გულმოდგინე და გამბედავი ადამიანები იყვნენ,
თვალსაჩინო ადგილზე რომ წაწეულიყვნენ იმ ქვეყანაში, სადაც მთელი ათი წელია მხოლოდ გართობა სურდათ.

იღებდნენ მანამ, სანამ მზე ნისლით არ დაიბურა — შესანიშნავი განათება მხატვრებისათვის, მაგრამ კინოკამერისთვის — არა, კალიფორნიის გამჭვირვალე ჰაერს ვერ შეედრებოდა. ნიკოტერამ როზმერი მანქანამდე მიაცილა და გამომშვიდობებისას ყურში რაღაც უთხრა, როზმერიმ შეხედა, ნახვამ-

დისო, უთხრა, მაგრამ არ გაუღიმია.

დიკი და როზმერი "კეისრის პალატებში", საუცხოო რესტორანში წავიდნენ ლანჩზე. რესტორანი გორაკზე იყო, მაღალ
ტერასზე და ზევიდან გადმოჰყურებდა დეკადანსის გაურკვეველი ხანის ნანგრევებს ფორუმისა. როზმერიმ კოქტეილი და
ცოტა ღვინო დალია, დიკმა კარგად დალია, ყოველ შემთხვევაში იმდენი, რომ ბუნდოვანი შეგრძნება თავისი თავით უკმაყოფილებისა გაუქრა. მერე ოტელში დაბრუნდნენ, ბედნიერები, ხალისიანები და რაღაც ნეტარი სიმშვიდით სავსე. როზმერის უნდოდა, რომ ერთად ყოფილიყვნენ და იყვნენ ერთად —
და ბოლოს და ბოლოს დასრულდა ის, რაც ბავშვური გატაცებით დაიწყო პლაჟზე.

## XXI

საღამოს როზმერი ისევ უნდა წასულიყო, კომპანიიდან ვიღაცის დაბადების დღის აღსანიშნავ სადილზე იყო მიწვეუ-ლი. ვესტიბიულში დიკი კოლის კლეის შეხვდა, მარტო უნ-დოდა ესადილა და მოიგონა, ოტელ "ექსცელსიორში" მელო-

დებიანო. მაგრამ კოლის კლეის ბარში კი შეჰყვა და კოქტეი-ლის მერე თავისი თავით ბუნდოვანი უკმაყოფილება გამოიკ-ვეთა — მოუთმენლობა. დროა დაბრუნდეს კლინიკაში, გამარ-თლებას ვერ მოუძებნის უსაქმოდ ყიალს. აქ ჩამოსვლა იმდენად უფრო გატაცების გამო კი არა, უფრო მეტად რომანტი-კული გახსენების ამბავი იყო. მისი სიყვარული ნიკოლია, მერე რა, რომ ხშირად უჭირს ნიკოლთან ყოფნა, მაინც ის არის დი-კის ქალი. როზმერისთან დროს გატარება თავის თავისთვის შელავათის მიცემა იყო, კოლისთან დროის ტარება კი — არაფერზე ისევ არაფრის მიმატება.

"ექსცელსიორის" შესასვლელთან ბები უორენს შეეჯახა. ბები დიდი, ლამაზი თვალებით, სათამაშო მარმარილოებივით რომ ჰქონდა, გაოცებითა და ცნობისმოყვარეობით მიაშტერ-

და.

"მე მეგონა, ამერიკაში იყავით, დიკ! ნიკოლიც თქვენთან ერთად არის?"

"ევროპაში ნეაპოლის გავლით დავბრუხდი".

დიკის პიჯაკზე გლოვის ფერი შენიშნა და გაახსენდა: "ძალიან ვწუხვარ".

სხვა გზა არ იყო, ერთად უნდა ესადილათ.

"მიამბეთ ყველაფერი", სთხოვა ბებიმ.

დიკმა, ასე თუ ისე, გააგებინა ბოლო თვეების ფაქტები და ბებიმ წარბები შეიჭმუხნა, თავისი დის ცხოვრებაში კატასტ- როფისთვის ვინმესთვის უნდა დაედო ბრალი და ვიღაცას უნ- და ეზრუნა მასზე, ბები თვლიდა, რომ ახლაც ასე იყო საჭი- რო.

"თქვენ როგორ ფიქრობთ, დოქტორმა დომლერმა იმთავი-

თვე სწორად წარმართა მისი მკურნალობა?"

"მკურნალობის მეთოდები საკმაოდ ერთფეროვანია. ცხადია, პაციენტის ხასიათსა და თვისებებსაცა აქვს მნიშვნელობა, პიროვნებას გააჩნია და ზოგჯერ სხვა მიდგომაცა ხდება საჭირო".

"დიკ, მე ეს საქმე ისე არ ვიცი და რჩევას ვერ მოგცემთ, მაგრამ ნიკოლისთვის იქნებ კარგიც კი იყოს გარემოს შეცვ-ლა, რომ კლინიკის ატმოსფეროდან შორს იცხოვროს, ისე, როგორც სხვა ხალხი ცხოვრობს?"

"მაგრამ თქვენ თვითონ ძალიან მომხრე იყავით კლინიკი<sup>‡\*</sup> სა", გაახსენა დიკმა, "ნიკოლის დარდი აღარ მექნებაო, ამბობდით…"

"ეს იმიტომ, რომ განდეგილივით ცხოვრობდით მაშინ რივიერაზე, სადღაც მთებში ჩაკარგულები, ხალხისაგან შორს, არ მინდა ისევ იქაურობას დაუბრუნდეთ, ამას კი არ ვგულისხმობ. რატომ არ შეიძლება, ვთქვათ, ლონდონში წახვიდეთ? ინგლისელები ყველაზე მშვიდი ხალხია ქვეყანაზე".

"არა, ასე არ არის", არ დაეთანხმა დიკი.

"ასეა, მე საკმაოდ კარგად ვიცნობ მათ. იქირავებდით სახლს ლონდონში, გაზაფხულზე; ერთი ძალიან კარგი სახლი ვიცი უკვე, ტალბოტ-სკვერზე, ავეჯით ქირავდება. იცხოვრებ-დით იქ საღად მოაზროვნე და დინჯ ინგლისელებთან ერთად".

ბები კარგა ხანს არ დაანებებდა თავს ამ 1914 წლის ძველ

პროპაგანდას, მაგრამ დიკმა სიცილით შეაწყვეტინა:

"ამას წინათ ვკითხულობდი მაიკლ არლენის ერთ რომანს და თუ ეს..."

ბებიმ სალათის კოვზის ერთი მოქნევით გაანადგურა მაიკლ არლენი.

"ეგ მხოლოდ ვიღაც კრეტინებზე წერს. მე ღირსეულ ინგლისელებზე ვლაპარაკობ".

მაგრამ ბებისგან ასე უარყოფილი მეგობრების ადგილი დიკის გონებაში იმ უსახო და უგულისყურო უცხოელებმა დაიკავეს, რომლებითაც სავსეა ხოლმე ევროპის პატარა ოტელები.

"რა თქმა უნდა ეს ჩემი საქმე არ არის", ისევ დაიწყო ბებიმ, ახალი შეტევისთვის ემზადებოდა, "მაგრამ ასეთ ვითარებაში მისი მარტო დატოვება…"

"ამერიკაში იმიტომ წავედი, რომ მამა მომიკვდა".

"გასაგებია, მე უკვე გითხარით, რომ ძალიან ვწუხვარ", ბროლის ყელსაბამს აწვალებდა. "მაგრამ ახლა უფრო ბევრი ფული გვაქვს, ყველაფერს ეყოფა, და ისედაც, ჯერ ნიკოლის მორჩენაზე უნდა ვიფიქროთ".

"ჯერ ერთი, ვერ წარმომიდგენია, რა უნდა გავაკეთო ლონ-

"როგორ, რა? მე ვფიქრობ, რასაც აქამდე კლინიკაში აკე-

თებდით, იქაც იგივეს გააკეთებთ".

დიკი უკან გადაიწია, სკამის ზურგს მიეყრდნო და ყურადღებით შეხედა. თუ ბების ოდესმე გუმანით უგრძვნია მართალი მიზეზი ნიკოლის ავადმყოფობისა, მაინც უთუოდ მოიუორებდა ამ სიმართლეს და მტვრიან განჯინაში შეაგდებდა,
იმ ნახატივით, როცა მიმხვდარა, რომ შეცდა და არ უნდა ეყიდა იგი.

საუბარი "ულპიაში", ღვინის კასრებით სავსე სარდაფში გაგრძელდა; კოლის კლეიც იქ იყო, იმათ მაგიდასთან მოვიდა და დაჯდა. გიტარის ხმა, მისი კვნესა და ჟღერა ისმოდა, "იჟ-ღერე, ჩემო ფანფარა", შთაგონებით უკრავდა ახალგაზრდა

გიტარისტი.

"იქნებ მე შესაფერისი ქმარი არა ვარ ნიკოლისთვის", თქვა დიკმა, "მაგრამ მაინც ჩემისთანა ვინმეს გაჰყვებოდა, ის-ეთ კაცს, ვისაც ბოლომდე დაენდობოდა".

"თქვენ ფიქრობთ, რომ სხვა ქმართან უფრო ბედნიერი იქნებოდა?" ბებიმ უცებ ხმამაღლა თქვა თავისი ფიქრი. "შეი-

ძლება, ვცადოთ".

დიკი კინაღამ სიცილისაგან ჩაბჟირდა და მაშინღა მიხვდა

ბები თავისი სიტყვების უაზრობას.

"ო, სწორად გამიგეთ, თუ შეიძლება", სწრაფად უთხრა მან, "არ იფიქროთ, თითქოს მადლიერები არ ვიყოთ იმის, რაც გააკეთეთ. ისიც ვიცი, რომ ბევრჯერ თქვენთვის ძნელი ყოფილა…"

"ღვთის გულისათვის, არ გინდათ, ბები!" წამოიძახა დიკმა.

"მე რომ ნიკოლი არ მყვარებოდა, სხვა საქმეა".

"მაგრამ, ხომ გიყვართ ნიკოლი?" შეშფოთებით ჰკითხა მან.

კოლისს ახლა აშკარად სურდა საუბარში ჩარეულიყო **და** 

დიკმა სწრაფად შეცვალა თემა.

"სხვა რამეზე ვილაპარაკოთ", თქვა მან.. "თუნდაც თქვენზე. რატომ არ თხოვდებით? გავიგეთ, ლორდ პელიზე არისო დანიშნული, იმის ბიძაშვილი..."

"ო, არა". უცებ მორცხვი და გაუბედავი გახდა ბები. **"ეს** შარშან იყო". "შაგრამ მაინც, რატომ არ თხოვდებით?" არ ეშვებოდა დიკი.

"თვითონ არ ვიცი. ერთი, რომელიც მე მიყვარდა, ომში მოკლეს, მეორეს მე არ ვუნდოდი".

"კარგად მითხარით ყველაფერი, ბები. მე ძალიან ცოტა რამ ვიცი თქვენზე — თქვენს შეხედულებებზე, პირად ცხოვ-რებაზე. თქვენ მე არაფერს მეუბნებით. მხოლოდ ნიკოლზე ვსაუბრობთ ხოლმე".

"ინგლისელები იყვნენ, ერთიც და მეორეც. მე ვფიქრობ კიშიან ინგლისელებზე კარგი ხალხი მთელ ქვეყანაზე არ მოიძებნება. ყოველ შემთხვევაში, მე არ შემხვედრია. ის კაცი ო, არა. გრძელი ამბავია, არ მიყვარს გრძელი ამბები, მოსაწყენია, არა?"

"მერე როგორ!" თქვა კოლისმა.

"რატომ, ძალიანაც საინტერესოა თუ კარგი ამბავია და კარგად ყვებიან".

"ამას კარგად თქვენ თუ ახერხებთ, დიკ. თქვენ შეგიძლიათ მიიქციოთ ყველას ყურადღება, როცა ხალხში ხართ, ერთი ფრაზით, ან თუნდაც, ერთი სიტყვით, ამისთვის სხვა ნიჭია საჭირო, შესანიშნავი ნიჭი".

"არა, მარიფათის ამბავია", გაიღიმა დიკმა. ამ საღამოს ეს უკვე მესამედ არ დაეთანხმა ბების რაღაცაში.

"ცხადია, მიყვარს, როცა იციან ფორმის ფასი, მიყვარს, რომ ყველაფერი რიგზე და ფართო მასშტაბით იყოს. თქვენ შეიძლება სხვა კაცი ხართ, დიკ, მაგრამ ის უნდა აღიაროთ, რომ ამით მე უფრო მყარად ვდგავარ":

დიკს ცოტა კიდევაც დაეზარა შეკამათებოდა ამაზე.

"დიახ, ვიცი, რომ ამბობენ, ბები უორენი ევროპას უვ-ლის, ყველა სიახლეს მისდევს და ცხოვრებაში რაც მთავარია, იმას კარგავსო. მე კი სხვა აზრისა ვარ. მე იმ მცირე ჯგუფს უფრო ვეკუთვნი, სწორედ მთავარს რომ არ კარგავენ; ჩვენი დროის ყველაზე საინტერესო ადამიანებს შევხვედრივარ". გიტარისტმა ისევ დაიწყო დაკვრა და ბების ხმას ფარავდა. "მე იშვიათად დამიშვია დიდი შეცდომა…"

"...მხოლოდ ძალიან დიდი შეცდომა, ბები".

დიკის გამოხედვაში რაღაცა დაიჭირა, ირონიას ჰგავდა და სხვა თემაზე გადაიტანა საუბარი. აშკარა იყო, არ შეეძლოთ, — ერთი აზრი ვერ ექნებოდათ. მაგრამ რაღაც ხიბლავდა დიკს ბებიში და სანამ ორთავე, "ექსცელსიორში" მივიდოდნენ, ქათინაურებით აავსო და ცოტა კიდევაც შეცბა ბები.

მეორე დღეს როზმერიმ ლანჩზე თვითონ ისურვა მასპინძლობა. დიკი პატარა ტრატორიაში წაიყვანა, ერთ იტალიელს ეკუთვნოდა, დიდხანს რომ ეცხოვრა და ემუშავა ამერიკაში და იქ ერბო-კვერცხი, შაშხი და ვაფლი მიირთვეს. მერე ოტელში დაბრუნდნენ. დიკის აღმოჩენამ, რომ არც თვითონ უყვარდა როზმერი და არც როზმერის უყვარდა იგი, არ შეასუსტა, პირიქით, უფრო გაუმძაფრა თავისი ვნება. ახლა, რაკი იცოდა, რომ თვითონ დიდი ხნით არ შეიჭრებოდა მის ცხოვრებაში, უცხო ქალივით სურდა იგი. ეტყობა ბევრი მამაკაცი, როცა, მიყვარსო, ამბობს ხოლმე, მხოლოდ ამას გულისხმობს და არა სულის შმაგ ჩაღრმავებას, უთვალავ ფერთა ერთ და უცნობელ ფერში რიალს — ასეთი იყო მაშინ იმისი სიყვარული ნიკოლის, მიმართ. ახლაც კი, ფიზიკურ ტკივილს აყენებდა გაფიქრებაც კი, რომ შეიძლება ნიკოლი მომკვდარიყო, ან გონება დაეკარგა, ან სხვა კაცი შეჰყვარებოდა.

-ნიკოტერა იჯდა როზმერის ოთახში და პროფესიულ თემებზე ლაპარაკობდნენ. როცა ბოლოს როზმერიმ გადაკვრით უთხრა, რომ მისი წასვლის დრო იყო, სასეირო პროტესტით დაეშორჩილა და დამშვიდობებისას საკმაოდ თავხედურად ჩაუკრა თვალი დიკს. ახლაც კიდევ ტელეფონის რეკვა ატყდა, როზმერი კარგა ათ წუთს მაინც ლაპარაკობდა და დიკს

მოთმინება დაეკარგა.

"ჩემთან წავიდეთ, ჯობია", თქვა მან, როზმერი დაეთანხმა. დიდ, განიერ ტახტზე იწვა, თავი დიკის მუხლებზე ედო; დიკი როზმერის თმას ეფერებოდა.

"შეიძლება კიდევ ერთი შეკითხვა მოგცეთ?" ჰკითხა მან.

"რა გაინტერესებთ?"

"კაცებზე, რომლებიც თქვენ გიყვარდათ. უბრალო ცნობისმოყვარე ვარ — გულისთქმას აყოლილი ცნობისმოყვარემეთქი — ამას არ ვიტყვი".

3.7

"თქვენ გინდათ იცოდეთ, რა იყო ჩემს ცხოვრებაში თქვე-

ნთან შეხვედრის მერე?"

"ან, მანაშდე".

"ო, არა", წამოიძახა როზმერიმ. "მანამდე არ ყოფილა, თქვენ იყავით პირველი კაცი, ვინც რაღაცას ნიშნავდა ჩემთ-ვის. თქვენ ახლაც ერთადერთი ხართ, ვინც მართლა რაღაცას ნიშნავს ჩემთვის". გაჩუმდა და ჩაფიქრდა. "იმ გაზაფხულის მერე მთელი წელიწადი არავის დანახვა არ მინდოდა".

"მერე? ვინ იყო?"

"მერე იყო ერთი".

დიკმა ისარგებლა იმით, რომ ბოლომდე არ თქვა.

"გინდათ, მე გეტყვით, როგორც იყო: პირველი საქმიდან არაფერი გამოვიდა და იმის შერე — ხანგრძლივი პაუზა; მეო-რეზე უკეთესად წავიდა საქმე, მაგრამ ის კაცი თქვენ არ შეგ-ყვარებიათ, მესაშე — შეტი რომ აღარ შეიძლება, ისე კარ-გად..."

თავის თავს აწამებდა, მაგრამ ვეღარ ჩერდებოდა.

"მერე გქონდათ ერთი ხანგრძლივი სიყვარული, რომელიც ამოიწურა და მაშინ კიდევაც შეგეშინდათ, რომ აღარაფერი დაგრჩებოდათ იმ კაცისთვის, ვისაც საბოლოოდ შეიყვარებ-დით". თანდათან უფრო ვიქტორიანელი ხდებოდა. "იმის მე-რე რამდენიმე ეპიზოდური ამბავი, და ასე გაგრძელდა ამბოლო დრომდე. როგორია, ახლოა სიმართლესთან?"

როზმერი იცინოდა. სიცილსაცა ჰგავდა და ტირილსაც.

"სულაც არა, ოდნავაც არა". თქვა და დიკმა უნებლიეთ შვება იგრძნო. "მაგრამ ერთ მშვენიერ დღეს მე მართლა შე- მიყვარდება და ვინც შემიყვარდება, არასოდეს გავუშვებ მე- რე".

ამ დროს დიკის ტელეფონმა დარეკა და ნიკოტერას ხმამ ტოზმერი იკითხა. დიკმა ხელისგული დააფარა მიკროფონს.

"გინდათ ელაპარაკოთ?"

როზმერი მივიდა ტელეფონთან და იმისთანა იტალიურს

მოჰყვა, ისე სწრაფად, რომ დიკმა ვერაფერი გაიგო.

"ტელეფონი ბევრ დროს გართმევთ", თქვა მან. "უკვე ოთხია, ხუთზე კი საქმიანი პაემანი მაქვს. იქნებ ჯობია თქვენ წახვიდეთ სენიორ ნიკოტერასთან?"

"სისულელეებს ლაპარაკობთ".

"მაშინ, სანამ აქა ვარ, მე მგონია, შეიძლებოდა გადაგედოთ შეხვედრები ნიკოტერასთან".

"ეს არც ისე იოლია". უცებ ტირილი წასკდა. "დიკ, მე

თქვენ მიშვარხართ, მხოლოდ თქვენ, მეტი არავინ. მაგრამ რა გაქვთ თქვენ ჩემთვის?"

"რა აქვს ნიკოტერას ვინმესთვის, ვინც გინდა იყოს?"

"ეს სულ სხვა საქმეა".

— იმიტომ, რომ ახალგაზრდაა და ახალგაზრდის ძახილი ესმის.

"ვიღაც იტალიელი!" თქვა დიკმა. ეჭვიანობისაგან ხელდებოდა, აღარ უნდოდა ისევ ტკივილი.

"ბავშვია მხოლოდ" — თან სლუკუხებდა, ისე ამბობდა როზმერი. "თვითონვე იცით, რომ თქვენი უფრო ვარ".

ცოტა დაწყნარდა, წელზე მოხვია ხელი, მაგრამ როზმერი დაღლილად უკან გადაიხარა და წუთით ასე, ადაჟიოს დამამ-თავრებელ პოზასავით გაჩერდა, თვალები დაეხუჭა, თმები წყლიდან ამოყვანილი გოგოსავით ეყარა მხრებზე.

"გამიშვით, დიკ, სუყველაფერი ამერია, ჩემს სიცოცხლეში

თავი ასე არ ამრევია".

საზარელფრთება ჟღალ ფრინველს ჰგავდა და როზმერი უნებლიეთ გაიწია განზე. ეჭვიანობით შეშინებული, უსამარ-თლო ეჭვიანობით, ნამქერივით რომ მიეყარა გულისხმიერ სი-ტყვებს და ალერსს, რომელსაც ისე მიჩვეოდა.

"მინდა სიმართლე ვიცოდე", თქვა დიკმა.

"სიმართლე ის არის, რომ ხშირად ერთად ვართ, სურს ჩემი ცოლად შერთვა, მაგრამ მე უარს ვეუბნები. მერედა, რა? როგორ გგონიათ, რა უნდა ვქნა? თქვენი აზრით, უკეთესია, კოლის კლეისთანა შტერებს ვეთამაშო და ასე გავატარო ცხოვრება?"

"გუშინ საღამოს ნიკოტერასთან იყავით?"

"ეს თქვენ არ გეხებათ". ისევ ტირილი წასკდა. "ო, არა, დიკ, ძაპატიეთ. ეს თქვენ გეხებათ. თქვენ და დედა ყველაზე ახლობელი და ძვირფასები ხართ ჩემთვის მთელ ქვეყანაზე".

"ნიკოტერა?"

"მე თვითონ არ ვიცი".

თავის არიდების იმ ზღვარს მიაღწია, როცა ყველაზე უბრალო სიტყვაც კი უკვე ფარულ აზრს იძენს.

"ჩემდაში უკვე აღარა გრძნობთ იმას, რასაც პარიზში

გრძნობდით?"

"როცა თქვენთან ვარ, მშვიდადა ვარ და მიხარია. მაგრამ პარიზში სულ სხვა. იყო. ან, იქნებ ასე მეჩვენება, ძნელია თქვა ამდენი ხნის მერე — ხომ ასეა?".

დიკი ადგა, კარადასთან მივიდა და საღამოს სამოსი შეარჩია — რაკი ქვეყნის სიძულვილი და შხამი შეუშვა თავის გულში, როზმერი ვეღარ ეყვარებოდა.

"ნიკოტერა ახლა არაფერ შუაშია!" წამოიძახა როზმერიმ. "ხვალ მთელ ჯგუფთან ერთად ლივორნოში უნდა წავიდე. ოჰ, რად მოხდა ასე!" ისევ ღვარად წასკდა ცრემლები. "რა გული მტკივა! ნეტავი აქ არ მოსულიყავით, ნეტავი ისევ კარგ მოგო-ნებად დარჩენილიყო ყველაფერი. ისე მძიმედ მაწევს რაღაცა, ასე მგონია დედას ვეჩხუბე".

დიკმა ჩაცმა დაიწყო. როზმერი წამოდგა და კარებთან მივიდა:

"მე ამ საღამოს აღარ წავალ". ეს უკანასკნელი ცდაღა იყო. "თქვენთან დავრჩები. არ მინდა წასვლა".

ტალღად მოაწვა ისევ ახალი მღელვარება დიკს, მაგრამ თავი შეიმაგრა, რომ არ აჰყოლოდა.

"ოთახში ვიქნები", თქვა როზმერიმ. "ნახვამდის, დიკ". "ნახვამდის".

"ო, რა გული მტკივა, დასანანია, რა დასანანი, რა არის ეს, მაინც რა არის?"

"დიდი ხანია მინდა გავიგო და ვერ გამიგია".

"მერე, რად უნდა მოსულიყავით ამით ჩემთან?"

"ვხვდები, რომ შავი სიკვდილივით ვარ", ნელა თქვა დიკმა. "აღარავისთვის აღარ მომაქვს ბედნიერება".

## XXII

ოტელ "კვირინალის" ბარში სულ ხუთი კაცი იყო საღამოთი, სადილის მერე. ერთი იტალიელი ქალი, დიდი ამბით რომ იჯდა დახლთან და შეუჩერებლად ელაპარაკებოდა დაღლილ ბარმენს, "დიახ... დიახ... დიახ..." შეაგებებდა ხოლმე ბარმენი, ეგვიპტელი სნობი,—მარტოობისგან გული უწუხდებოდა, მაგრამ იმ ქალს მაინც უფრთხოდა, ორი ამერიკელი, დიკი და კოლის კლეი, და — თავად ბარმენი. დიკი ყოველთვის ცხადად გრძნობდა და აღიქვამდა, რაც კი გარშემო ხდებოდა ხოლმე, კოლის კლეის კი, გეგონება ბურანშიაო, ყველაზე ძლიერი შთაბეჭდილებებიც კი ეფანტებოდა გამოფიტულ და უკვე დაბნეულ გონებაში. ამიტომ — დიკი ლაპარაკობდა, კოლისი კი, გეგონება ბაბაჭუა შეუჯდაო, ისე უსმეხდა.

მთელი დღის ამბებით დაქანცული დიკი ახლა ბარში იჯდა და იტალიელებზეღა იყრიდა ჯავრს ლაპარაკში. ხანგამოშვე-ბით აქეთ-იქით იხედებოდა, თითქოს იმედი ჰქონდა, რომ ერთი ვინმე იტალიელი გაიგებდა მის სიტყვებს და აღშფოთდე-ბოდა, ბოლოს და ბოლოს.

"ამ დილით ვზივარ "ექსცელსიორში" ჩემს ცოლისდასთან ერთად, ჩაიზე. შემოდიან ორნი, ადგილი აღარ არის, ჩვენ ბოლო მაგიდა შეგვხვდა. ერთი მათგანი მოდის და ამბობს: "ეს მაგიდა ხომ პრინცესა ორსინისთვის იყო?" ვეუბნები, "ბარათი არ დაგვხვედრია მაგიდაზე". ის კი მაინც გაიძახის: "მაგრამ, მე მგონია პრინცესა ორსინისთვის იყო". მე პასუხიც აღარ გა-გეცი".

"მერე, რა ქნა?"

"წავიდა". დიკი სკამზე შეტრიალდა. "არ მიყვარს ეს ხალხი. გუშინ ორი წუთით დავტოვე როზმერი ვიტრინასთან, მაშინვე ვიღაც ოფიცერი მივიდა და წინ და უკან დაიწყო სიარული, თან ქუდი გვერდზე მოექცია".

"არ ვიცი", ცოტა ხნის მერე თქვა კოლისმა, "მე თუ მკითხავთ, აქ უფრო მირჩევნია, ვიდრე პარიზში, იქ ყოველ წუთში ჯიბეების დაცარიელების ცდაში არიან".

კოლისს უყვარდა კარგი ცხოვრება, სიამოვნებას არ იკ-ლებდა და თუ რამ ამ სიამოვნებას ხელს შეუშლიდა, არ მოს-წონდა და არ გაიზიარებდა.

"არ ვიცი", ისევ თქვა კოლისმა, "ურიგო არ არის, მე მოშწონს აქ".

დიკმა გაიხსენა, რაც ამ დღეებში იყო, სურათებივით დაუდგა თვალწინ. "ამერიქენ ექსპრესის" კანტორისაკენ მიმავალი გზა, ვია ნაციონალე, საშაქარლამოების ათასნაირი სუნით რომ იყო გაჟღენთილი. ტალახიანი გვირაბი, ამ გვირაბს ესპანეთის მოედნის კიბემდე, ყვავილების კიოსკებსა და იმ სახლამდე მიჰუავდით, სადაც ჯონ კიტსი მოკვდა; დიკს მხოლოდ ადამიანები აინტერესებდა; ხალხის გარდა ამინდს თუ ამჩნევდა, ქალაქები და საერთოდ, ადგილები, მხოლოდ მაშინ ამახსოვრდებოდა, თუ მათთან რაიმე ამბავი აკავშირებდა. რომში გათავდა იმის ოცნება როზმერიზე.

შიკრიკი ბიჭი მივიდა დიკთან და ბარათი გადასცა.

"არ წავედი წვეულებაზე", ეწერა ბარათში, "ჩემს ოთახში ვარ. დილით ადრე ლივორნოში მივემგზავრებით".

დიკმა ბიჭს ბარათი დაუბრუნა და ფული აჩუქა.

"უთხარით მისს ჰოიტს, რომ ვერა მნახეთ". კოლისს მიუ-

ტრიალდა და "ბონბონიერიში" წასვლა შესთავაზა.

ბარში შემოსული მეძავი შეათვალიერეს, ყურადღების ის მიხიმუმი დაუთმეს, რასაც მისი პროფესია იმსახურებდა, ქალ-მა თამამად, მოურიდებლად გამოხედა; ცარიელი ვესტიბიული გაიარეს, ვესტიბიულის მძიმე ფარდების ნაკეცებში ლამის ვიქტორიანული ხანის მტვერი იყო ჩაბუდებული,—და ღამის კონსიერჟს თავი დაუქნიეს, ამანაც ღამის ყველა შვეიცარივით, გესლიანი პირმოთნეობით დაუკრა თავი. მერე ტაქსიში ჩასხდნენ და ნოემბრის ღამის სინესტესა და მოწყენილობას მიენდნენ. ჩაბნელებულ ქუჩებში ქალები აღარ ჩანდნენ, მხოლოდ კაცები, ფერწასულები, ბოლომდე შეკრული მუქი პალტოებით, ჯგუფებად რომ იდგნენ გზაჯვარედინებთან და ცივი ქვის კედლებს მიყრდნობოდნენ.

"ღმერთო ჩემო!" ამოიოხრა დიკმა.

"რა მოხდა?"

"ის კაცი გამახსენდა, "ექსცელსიორში": "ეს მაგიდა პრინცესა ორსინისთვისაა". იცით, რა არის რომის არისტოკრატია? ეგენი ბანდიტები არიან. მაგათ ჩაიგდეს ხელში ტაძრები და სასახლეები, როცა რომის იმპერია დაიმსხვრა და ხალხს დაერივხენ".

"მე მომწონს რომი" — დაიჟინა კოლისმა. "რატომ არ დადიხართ დოღზე?

"არ მიყვარს დოღი".

"კარგია, ნახოთ, რომ იცოდეთ რა მოსდით ქალებს..."

"ვიცი, მე აქ არაფერი მომეწონება. მე საფრანგეთი მიყვარს, სადაც ყველას ნაპოლეონი ჰგონია თავი — აქ კი ყველას ქრისტე ჰგონია თავისი თავი". "ბონბონიერიში" მისულები, კაბარეში ჩავიდნენ. ცივი ქვის კედლებთან უიმედო და არაგამძლე, რაღაცნაირად უმწეო ჩანდა ხის პანელები. ჯაზორკესტრი უღიმღამოდ უკრავდა ტანგოს და ათი თუ თორმეტი წყვილი ამერიკული თვალისთვის უცხო, დახვეწილსა და რთულ ილეთებს ხაზავდა პარკეტზე. ოფიციანტების სიმრავლე იმის გარანტია იყო, რომ ჩხუბსა და ალიაქოთს, შფოთიან კაცებში მაშინაც კი რომ ატყდებოდა, როცა ისინი ცოტანი იყვნენ, ახლა ადგილი არ ექნებოდა; თუ რაღაცა გამოცოცხლება იგრძნობოდა, ეს ის იყო, რომ ჰაერში მოლოდინი იდგა, თითქოს საცაა რაღაც შეწყდებაო, ცეკვა თუ ღამე, ის, რითაც აქ ყველაფერი თანაბრდებოდა. შთაბეჭდილებიანი სტუმარი მაშინვე გრძნობდა, რომ თუნდაც ეძებნა, აქ სულ ერთია, მაინც ვერაფერს იპოვიდა.

დიკისთვის ხომ ეს ცხადზე ცხადიც კი იყო ახლა. მიიხედმოიხედა, იმ იმედით, რომ თვალს რაღაცაზე შეაჩერებდა, ერთ საათს მაინც გაიყვანდა და იქნებ, გონების არა, მაგრამ წარმოსახვისთვის — ფიქრს გაიჩენდა. მაგრამ ვერაფერი ნახა და ისევ კოლისს მიუტრიალდა. უნდოდა რაღაც ეთქვა მისთვის, დაიწყო, და მობეზრდა, რადგან კოლისი, გულმავიწყი, უგულისყურო, მაინც ვერაფერს გაიგებდა. ოცდაათი წუთის მერეც კი იგრძნო, რომ მასთან ლაპარაკში უკვე თვითონაც შტერდე-

ბოდა.

ერთი ბოთლი იტალიური შუშხუნა ღვინო დალიეს, დიკმა ფერი დაკარგა, რაღაცა ხმაურით ივსებოდა. დირიჟორს ანიშხა ხელით, თავიანთ მაგიდასთან მიუხმო. ზანგი იყო, ბაჰამის კუნძულებიდან, ამპარტავანი და უსიამოვნო, და რამდენიმე წუთის მერე ჩხუბი ატყდა.

"თქვენ მთხოვეთ თქვენთან დავმჯდარიყავი".

"ასეა, და მოგეცით ორმოცდაათი ლირი, ხომ ასეა?"

"ასეა, მომეცით, მერედა რა, მერე რა?"

"ასეა, მერე ის, რომ მოგეცით ორმოცდაათი ლირი, ასეა თუ არა? ახლა მოდიხართ და კიდევ ითხოვთ, რქებზეა საქმე?"

"თქვენ მე დამიძახეთ, ასე არ არის? ასეა თუ არა?"

"ჰო, დაგიძახეთ, მაგრამ ორმოცდაათი ლირი მოგეცით". "ასეა, იყოს ასე".

ზანგი მჟავე გუნებით გაეცალა და დიკი უფრო უარეს ხა-

სიათზე დადგა. მაგრამ უცებ დაინახა, ვიღაც ქალიშვილი უღიმოდა დარბაზის იქითა მხრიდან და მაშინვე გაქრნენ რომაელების აჩრდილები, ფერმკრთალები რომ ირეოდნენ და მოკრძალებით და მორიდებით იხევდნენ უკან. ქალიშვილი ინგლისელი იყო, ქერა და სანდომიანი, ჯანმრთელი ინგლისური სახით, კიდევ გაუღიმა, დიკმა იცოდა ეს ღიმილი — თითქოს ეძახდა, მაგრამ ამ დაძახებასა და შეთავაზებაშიც კი უარს ამბობდა გულისთქმაზე.

"თავსა ვდებ, თუ რაღაც ოინი არ იყოს", თქვა კოლისმა. დიკი ადგა, მაგიდებშუა გაიარა და ქალიშვილისკენ გაემართა. "ხომ არ ვიცეკვოთ?"

ხანში შესულმა ინგლისელმა, ქალიშვილი ვისთანაც იჯდა, ისე თქვა, თითქოს ბოდიშს იხდისო: "მე მალე წავალ".

აგზნებამ გაუარა და ცოტათი უკვე გამოფხიზლდა, როცა ცეკვავდა; იმ ქალიშვილზე გაიფიქრა, რაც რამ კარგია ინგ-ლისში — ყველა, სუყველა ახლა ამაშიაო; წკრიალა ხმა ბუნ-დოვნად ახსენებდა იქაურ ბაღებს, ზღვის ბეჭედში რომ მშვიდად ისხდნენ. ცოტა განზე გადაიხარა, რომ კარგად შეეხედა ქალიშვილისთვის და ქათინაურებით აავსო იგი. ისე გულწრფელად ლაპარაკობდა, ხმაც კი უკანკალებდა. ქალიშვილმა აღუთქვა, როგორც კი ჩემი თანაშგზავრი წავა, მოვალ და თქვენთან დავჯდებიო. როცა დიკმა თავის ადგილას მიიყვანა, ინგლისელი ისევ ისეთი ღიმილით შეხვდა, გეგონება, ბოდიშს იხდისო.

თავის მაგიდასთან დაბრუნდა თუ არა, დიკმა ერთი ბოთლი იტალიური თეთრი შუშხუნაც შეუკვეთა.

"ვიღაც კინომსახიობსა ჰგავს", თქვა მან. "ვერ ვიხსენებ რომელს". მოუთმენლად გაიხედა მხარს იქით. "აქამდე სად არის?"

"კარგია კინომსახიობი ვიყო", ფიქრში წასულმა თქვა კო-ლისმა. "მამაჩემის ბიზნესში ჩაბმა მომიწევს მალე, მაგრამ ეს მაინცდამაინც არ მიზიდავს. იჯექი ატლანტის ოფისში ოცი წელიწადი…"

მატერიალისტური ცივილიზაციის წინააღმდეგ პროტესტივით გაისმა იმისი ხმა.

"თავი მაგისთვის არ გემეტებათ?"

"არა, ეგ არა, მე მაგას არ ეგულისხმობ".

"კი, მაგას გულისხმობთ".

"თქვენ რა იცით, რას ვგულისხმობ? თუ ასე ძალიან მოგწონთ მუშაობა, რატომ არა ხართ პაციენტებთან, ხომ ექიმი ხართ?"

კინაღამ იჩხუბეს, მაგრამ უკვე მაგრად იყვნენ მთვრალები და აღარ ახსოვდათ რაზე უნდა ეჩხუბათ, კოლისი წასასვლე-ლად წამოდგა და ერთმანეთს გულთბილად ჩამოართვეს ხელი.

"თქვენ იცით, კარგად მოიფიქრეთ". შეაგონა დიკმა.

"რა მოვიფიქრო?"

"იცით, რაც". ეგონა, კოლისს მამამისის ბიზნესთან დაკავშირებით რაღაც ძალიან კარგი და საქმიანი რჩევა მისცა.

კლეი სივრცეს შეერია. დიკმა ბოთლში დარჩენილი ღვინო ბოლომდე დალია და ისევ იმ ინგლისელ ქალიშვილთან იცე-კვა, თამამ შეტრიალ-შემოტრიალებას აიძულებდა თავის თავს და თამამი მიხრა-მოხრით უნდოდა ევლო. მაგრამ უცებ საკ-ვირველი ამბავი მოხდა. დიკი ქალიშვილთან ცეკვავდა, მერე მუსიკა გაჩერდა და — ქალიშვილი გაქრა.

"არ იცით, სად არის?"

"3069"

"ქალიშვილი, ვისთანაც მე ვცეკვავდი. აქ იყო, უცებ — აღარ არის, სადმე იქნება".

"არა, არა! ეს ქალების ოთახია".

ბარში შევიდა და ჩამოეყრდნო, ორი სხვა კაციც იდგა, გამოლაპარაკება უნდოდა, მაგრამ არ იცოდა, რითი დაეწყო.
შეიძლებოდა რომზე და კოლონისა და გაეტანის ოჯახების
შფოთიან წინაპრებზე ეამბნა, მაგრამ იფიქრა, დასაწყისისათვის არ ივარგებს, მეტისმეტი და მოულოდნელი იქნებაო. თამბაქოს დახლიდან იენსიური ფაიფურის ფიგურები იატაკზე
გადმოიყარა, აურზაური ატყდა და ბუნდოვნად იგრძნო, თვითონ იყო ამის მიზეზი, კაბარეში დაბრუნდა და ერთი ფინჯანი
შავი ყავა დალია. კოლისი აღარ იყო იქ, ინგლისელი ქალიშვილიც აღარა ჩანდა და სხვა რა გზა ჰქონდა, თვითონაც უნდა
წასულიყო ოტელში, გულდახურული დაწოლილიყო და დაეძინა. გადაიხადა თავისი ჩეკი და პალტო და შლაპა აიღო.

ჭუჭყიანი წყალი გუბეებად იდგა თხრილებში და ალაგ-

ალაგ ქვაფენილზედაც; კამპანიდან ჭაობის სინესტე ატანდა და გადამუშავებული ორთქლის ნარჩენით იწამლებოდა დილის ჰაერი. ოთხი ტაქსისტი შემოეხვია, პატარა თვალებს ატ-რიალებდნენ ბნელ ბუდეებში. ერთი მაინც ძალიან ჩააცივდა, პირდაპირ სახესთან მიჰქონდა თავისი სახე და დიკმა უხეშად მოიშორა.

"Quanto al Hotel Quirinal?"1

"Cento lire"2.

ექვსი დოლარი. თავი გაიქნია და ოცდაათი ლირა შესთავაზა, ეს ორმაგი ფასი იყო იმასთან, რასაც დღისით იხდიდნენ, მაგრამ ოთხივემ, თითქოს ერთი კაციაო, ერთნაირად აიჩეჩა მხრები და მოსცილდა.

"Trente cinque lire e mancie"3, მტკიცედ თქვა დიკმა. "Cento lire".

დიკი ინგლისურზე გადავიდა.

"ნახევარი მილი უნდა გაიაროთ და ასი ლირა? ორმოცზე მეტს არ მოგცემთ".

"არ გამოვა".

დაღლილობისგან ფეხზე ძლივს იდგა. იმ ტაქსის კარი გამოაღო, რომელიც უფრო ახლო იდგა და დაჯდა.

"ოტელი "კვირინალი!" მანქანის წინა კართან ჯიუტად მდგარ მძღოლს უბრძანა. "მოიშორეთ ეგ გესლი სიფათიდან და "კვირინალში" წამიყვანეთ".

"აჰ, არა".

დიკი მანქანიდან გადმოვიდა, "ბონბონიერის" შესასვლელთან ვიღაც ედავებოდა ტაქსისტებს და ვიღაცა ახლა ცდილობდა დიკისთვის აეხსნა, რა უნდოდათ მძღოლებს, ერთი სიტყვით, თარჯიმნობა იკისრა; ამასობაში ის ერთი ისევ ჩააცივდა
დიკს, ყვიროდა, ჟესტებით ელაპარაკებოდა და დიკმა ისევ
მოიშორა თავიდან.

"შე ოტელი "კვირინალი" მ•ნდა". "ის ამბობს, ასი ლირა", აუხსნა იმ კაცმა, თარჯიმნობა რომ იკისრა.

2 "ასი ლირა" (იტალ.).

<sup>1 &</sup>quot;რამდენი, ოტელ "კვირინალამდე?" (იტალ.).

<sup>3 &</sup>quot;ოცდათხუთმეტი ლირა და ქირა" (იტალ.) გ

"გავიგე, ორმოცდაათს მივცემ, ორმოცდაათზე თანახმა ვარ. დამანებეთ თავი!" ეს ბოლო სიტყვები იმ დაჟინებულ ტაქსისტს უთხრა, მესამედაც რომ ჩააციგდა. ამ კაცმა შეხედა დიკს და მერე ზიზღით გადააფურთხა.

რაც იმ ერთ კვირას დაუგროვდა და მოითმინა, ახლა ერთბაშად გადმოხეთქა და ძალად ექცა, ტრადიციული, პატიოსნური გამოსავალი თავისი ქვეყნის; ოდნავ დაიხია, მოუქნია და

სახეში სთხლიშა ტაქსისტს.

ოთხივე ერთად მივარდა დიკს, მუქარით იქნევდნენ ხელებს, ცდილობდნენ შუაში მოექციათ — დიკი კარებთან ზურგით მიეყრდნო კედელს და ალალბედზე ურტყამდა, ცოტათი ეცინებოდა კიდევაც ამათ დარტყმებზე, ამ ვითომ ჩხუბზე და მამლაყინწებზე. იგერიებდა. ერთი-ორი წუთი გაგრძელდა ასე, მერე დიკმა წაიბორძიკა და დაეცა; ტკივილი იგრძნო, მაგრამ ისევ წამოდგა, ვიღაცების ხელები წრესავით ერტყა და ამ წრეში ისევ იწევდა მათზე, მერე ეს წრე უცებ გაიხსნა. რაღაც ახალი ხმა მოისმა, ახალი დავა ატყდა, მაგრამ დიკი კედელთან იდგა, სულშეხუთული და თავისი ამ უაზრო მდგომარეობით გაცოფებული, რომ ღირსება ასე შეელახა. ხედავდა, სიმპათია მის მხარეზე არ იყო, მაგრამ წამითაც არ იფიქრებდა, რომ შეიძლება თვითონაც ჰქონდა ამაში ბრალი.

პოლიციის უბანში უნდა წასულიყვნენ და იქ გაერკვიათ ყველაფერი. ვიღაცამ ძირიდან აიღო დიკის შლაპა და მიაწო-და. ვიღაცამ თავაზით მოჰკიდა მკლავში ხელი, რამდენიმე ნაბიკი გაიარეს, კუთხეს გასცდნენ და ტაქსისტებთან ერთად დიკი ცარიელკედლებიან ბარაკში შევიდა, სადაც ერთადერთი მქრქალი ნათურა ეკიდა ჭერში და უსაქმოდ ისხდნენ კარაბინერები.

მაგიდასთან კაპიტანი იჯდა, იმ კაცმა, ვინც დიკზე და ტაქსისტებზე კაპიტანს უთხრა, გავაშველეო, კარგა ხანს მოჰყვა
იტალიურად, რა როგორ იყო და აღარ ათავებდა, ხანდახან
დიკზე უთითებდა, დროდადრო ტაქსისტები აწყვეტინებდნენ,
გაცხარებულები დიკს სდებდნენ ბრალს და გინების სიტყვებს
ისროდხენ. კაპიტახს მოთმინება ეკარგებოდა. ბოლოს ხელი
ასწია და ამხელა ჰიდრა-თავა მობრალემ, საბოლოოდ კიდევ
რაღაცა ამოიხავლა და როგორც იქნა, ხმა ჩაიწყვიტა. კაპიტანი
დიკს მიუბრუნდა.

"ლაპარაკი Italiano?"1 ჰკითხა მან.

"არა".

"ლაპარაკი Francais?"<sup>2</sup>

"Oui",3 გაუხარდა დიკს.

"ჰოდა, ასე, მომისმინე. წადი "კვირინალში". მომისმინე: თქვენ მთვრალი ხართ, გადაიხადეთ, რამდენსაც თხოულობს შძღოლი, გასაგებია თქვენთვის?"

დიკმა თავი გაიქნია.

"არა, მეარ მინდა".

"როგორ?"

"მე გადავიხდი ორმოც ლირას. ეს სავსებით საკმარისია". კაპიტანი წამოდგა.

"მომისმინე!.." მრისხანედ წამოიძახა მან. "თქვენ მთვრალი ხართ. თქვენ შოფერს სცემეთ. აი ასე, აი აასე... კიდევ კარგია", ორივე ხელი ჰაერში გიჟივით გაიქნია, "რომ თავისუფლად გიშვებთ, გადაიხადეთ რამდენიც გითხრათ — ასი ლირა. წადით "კვირინალში".

შეურაცხყოფისა და აღშფოთებისაგან დიკი გაცოფდა, კა-

პიტანს მიაშტერდა.

"კარგი, მე წავალ!" ძლივს მიტრიალდა კარებისკენ — მის წინ ის კაცი იდგა, ვინც პოლიციაში მოიყვანა და ღვარძლია-ნად იქნევდა თავს, "მე წავალ", დაიყვირა დიკმა, "მაგრამ ჯერ ამ უდღეურს გავუსწორდები".

გაშტერებული კარაბინერების წინ გაქანდა და იმ ღრეჭია სიფათს მოქნეული მარცხენა ხელი გაარტყა ყბაში. კაცი ია-

ტაკზე გაიშხლართა.

ერთ წამს დიკი ეგრე იდგა, ბარბაროსივით ზეიმობდა ტრიუმფს; მაშინათვე, ეჭვმაც გაჰკრა, ახლა კი შეცდომა და-ვუშვიო, მაგრამ ამის ბოლომდე გაფიქრებაც ვერ მოასწრო და თვალთ დაუბნელდა; წააქციეს და გაშმაგებით დაუწყეს ცემა. მუშტებითა თუ ქუსლებით მისდგნენ დაუნდობლად. იგრძნო, ცხვირი გაუტყდა, ხრაშა-ხრუშიც გაიგონა ხრტილისა, თვალები, გეგონება, რეზინისააო, ბუდეებიდან ამოუცვივდა და ისევ

<sup>8</sup> "დიახ" (ფრანგ.).

<sup>1 &</sup>quot;...იტალიურად?" (იტალ.).

² "...ფრანგულად?" (ფრანგ.).

თავის ადგილს დაუბრუნდა, ვიღაცამ წიხლი ჩააზილა და ნეკნი ჩაულეწა. წამით ცნობიერება დაკარგა, მაგრამ გონს მოეგო, რადგან ხელად წამოაყენეს, დასვეს და მაჯებზე ხელბორკილი დაადეს. უნებლიეთ ისევ იწევდა. სამოქალაქოტანსაცმლიანი ლეიტენანტი, დიკმა რომ მიბეგვა, იქით იდგა, ნიკაპზე ცხვირსახოცს იდებდა და წამდაუწუმ ზედ იყურებოდა, უნდოდა გაეგო, სისხლი მოსდიოდა თუ არა; დიკთან ძალიან ახლო მივიდა, ცოტათი ისევ განზე გადგა, მერე ხელი მოიქნია და ძირს დასცა.

დოქტორი დაივერი უმოძრაოდ იწვა იატაკზე, ერთი სათ-ლი წყალი დაასხეს, მაჯებში ხელი წაავლეს და სადღაც წაათ-რიეს. ცალი თვალი ძლივს გაახილა, ზედ სისხლი ჰქონდა, ერთ-ერთი ტაქსისტის შეძრწუნებული და გაფითრებული სახე იც-

ნო.

"წადით ოტელ "ექსცელსიორში", ხრიალით უთხრა, "უთხარით მისს უორენს, ორასი ლირა! მისს უორენი! ორასი ლირა! ოჰ, თქვენი მყვირტე... ღმერთო..."

ისევ მიათრევდნენ, სული ეხუთებოდა, ტიროდა, ცალ თვალზე სისხლი გადაჰკვროდა, ოღრო-ჩოღრო იატაკზე მიათრევდნენ, ბოლოს სადღაც ქვის იატაკზე დააგდეს. ის კაცი გავიდა, კარები გაჯახუნდა და მარტო დარჩა.

## XXIII

ღამის პირველ საათამდე ბები უორენი საწოლში იწვა და შერიონ კროუფორდის ერთ-ერთ საკვირვლად მოსაწყენ ამ-ბავს კითხულობდა რომაული მოთხრობებიდან; მერე ფანჯა-რასთან მივიდა და ქუჩას გახედა. ოტელის პირდაპირ, ტრო-ტუარზე სამკუთხა შლაპებითა და გროტესკული მოსასხამე-ბით, ორი კარაბინერი დადიოდა, ჰალსის ცვლისას დახრილ გროტ-ანძასავით, მოსახვევებში ხან იქით გაქანდებოდნენ და ხანაც აქეთ. იმათ ყურებაზე ის გვარდიელი ოფიცერი გაახ-სენდა, დღეს სამხარზე თვალი რომ აღარ მოაშორა ბების. იმი-სი თავხედობა იმ არაბრგე რასის მაღალი ვინმეს თავხედობასა ჰგავდა, ვისაც სიმაღლე უწევს სხვა ღირსებების მაგივრობას. რომ მოსულიყო ის გვარდიელი და ბებისთვის ეთქვა: "წავი-

დეთ ერთად", ალბათ ეტყოდა: "რატომაც არა?" — ყოველ შემთხვევაში, ახლა ასე ეგონა, სხვა გარემოში ყოფნა თითქოს უფრო სხვაგვარსა ხდიდა, თავისუფალს.

გვარდიელისაგან ფიქრი ნელ-ნელა ისევ კარაბინერებს გა-

დასწვდა, იმათგან — დიკს. დაწვა და სინათლე ჩააქრო.

ოთხი არ იყო, როცა გაეღვიძა, ვიღაც აბრახუნებდა კარზე.

"დიახ — ვინ არის?"

"კონსიერჟი, მადამ".

კიმონო მოისხა და ნამძინარევმა გაუღო კარი.

"თქვენი მეგობარი, სახელი დაივერი, რაღაც შეემთხვა, პოლიციამ დაიჭირა და ციხეში ზის. ტაქსი გამოგზავნა, რომ თქვენთვის ეთქვა, შოფერი ამბობს, ორასი ლირის გადახდას დამპირდაო…" კონსიერჟმა შეიცადა, ფრთხილად შეხედა, რო-გორ მიიღოო ეს ამბავი, "შოფერი ამბობს, მესიე დაივერს ცუ-დი რაღაც შეემთხვა, პოლიციასთან იჩხუბა და საშინლად სცემეს":

"ახლავე ჩამოვალ".

ჩაცმა დაიწყო, ბაგაბუგით უცემდა გული. ათი წუთის მერე ლიფტიდან ჩაბნელებულ ვესტიბიულში გადმოვიდა. შოფერი, დიკს რომ გამოეგზავნა და ამბავი მოეტანა, უკვე წასულიყო; კონსიერუმა სხვა მანქანა გაუჩერა და ტაქსისტს უთხრა რა ადგილასაც იყო ის ციხე. ღამე თანდათან ძალას კარგავდა, და დღესა და ღამეს შუა ეს მერყეობა ბების ნერვებზე შოქმედებდა, ისედაც, ჯერ კარგად გერ გაეღვიძა. ეჩვენებოდა, რომ ძალიან ნელა თენდებოდა და ფიქრით აჩქარებდა რიჟრაჟს; ფართო ავენიუებზე სივრცე ჩანდა და საქმე კარგად მიდისო, ეგონა. მერე უცებ ქარი დაუბერავდა საიდანღაც და როცა თითქოსდა ჩერდებოდა მოძრაობა და გარეშემო აღარ იძვროდა, ისევ ხელახლა იწყებოდა ყველაფერი. მანქანამ შადრევანს ჩაუარა, ხმაურით რომ ეღვრებოდა თავისსავე ჩრდილს, გაშლილ ჩრდილს და, დაგრეხილ მოსახვევში შეუხვია, სადაც სახლებიც ცერად თუ იდგნენ, დაჭიმული, რომ ქუჩაზე არ გადმოშლილიყვნენ, რიყის ქვაფენილზე ერთი შექანდა და ხრიალით გაჩერდა რომელიღაცა შენობასთან. შესასვლელთან, ორივე მხარეს საგუშაგო ჯიხურები იდგა, შენობის მწვანე,

Scanned by CamScanner

ნესტიან და ხავსშოდებულ კედლებთან ამ ჯიხურებს კაშკაში გაჰქონდა. კაშაროვანი შესასვლელის ლილისფერი ბინდიდან მოესმა უცებ დიკის ყვირილი.

"ინგლისელი აქ არავინ არის? ამერიკელები არ არიან? ინგლისელები არ არიან აქ? — ოჰ, ღმერთო ჩემო! უჰ თქვენი, უოპებო!"¹

ყვირილი მიწყდა და ბებიმ ახლა კარებზე რახუნის ხმა გაიგონა. მერე ისევ ყვირილი გაისმა.

"ამერიკელები არ არიან? არიან აქ ინგლისელები?"

იქით გაიქცა, საიდანაც ხმა მოდიოდა, თაღოვანი შესასვლელი გაიარა, ეზოში შევიდა, ერთ წუთს ადგილზე იდგა დაბნეული, მერე ისევ ხმას მიჰყვა და გაარკვია, რომ პატარა საყარაულოდან იყო. კარები შეაღო და შიგ შევიდა. ორი კარაბინერი ფეხზე წამოხტა, მაგრამ ბებიმ ზედაც არ შეხედა და იქით, სადაც საკანი იყო, იმ საკნის კარისკენ გაქანდა იმწამს.

"დიკ!" დაიძახა მან. "რა მოგივიდათ?"

"თვალი ამომიგდეს!" იყვირა დიკმა. "ხელბორკილი დამადეს, მერე მირტყეს, წყეულები, ეგენი..."

ბები მიტრიალდა, სახეზე ფერი აღარ ედო და კარაბინერებისკენ წავიდა.

"რა უყავით?" ისე შმაგად და გააფთრებით მიადგა, რომ კარაბინერებმა უკან დაიხიეს…

"Non capisco inglese"2,

ფრანგულად ლანძღა, მაგრამ რა ლანძღა, იმისი დაუოკებელი აღშფოთების ხმა მთელ ოთახს ავსებდა, შეშინებული კარაბინერები ბებისაგან დატეხილი ბრალდებისაგან ლამობდნენ თავი დაეღწიათ.

"კარი გააღეთ! რაღაც იღონეთ!"

"ჩვენ არაფერი შეგვიძლია, თუ არ გვიბრძანეს".

"Bene! Bay-nay! Bene!"3.

ისევ გააფთრებით მოჰყვა მათ ლანძღვას, კარაბინერები თავიანთი უმწეობის გამო ბოდიშს უხდიდნენ, ოფლში იღვ-

<sup>3</sup> "კარგის მაშ კარგი!" (იტალ.).

¹ უოპ, მეტსახელი, შუა ან სამხრეთ ევროპელ ემიგრანტებს, უფრო მეტად კი იტალიელებს ეძახიან ამერიკელები.
"ვერ ვიგებ ინგლისურად" (იტალ.).

რებოდნენ და დაბნეულები ერთმანეთსღა უყურებდნენ, რაღაც საშინელი გაუგებრობა მოხდა ალბათო. ისევ კამერის კართან მივიდა ბები, ზედ მიეყრდნო, ლამის ეფერებოდა, თითქოს ასე უფრო კარგად გააგებინებდა, რომ აქ იყო იმისი ძალა და შველა.

"საელჩოში მივდივარ, მალე დავბრუნდები!" დაიძახა მან, კარაბინერებს კიდევ ერთხელ მუქარით მოავლო თავისი მზე- რა და გარეთ გავარდა.

ამერიკის საელჩოსთან მისვლისას, ტაქსის შოფერმა, ვერ დავიცდიო, და ბებიმ ფული გადაუხადა. ჯერ კიდევ ბნელოდა, საფეხურებზე სირბილით ავიდა და დარეკა. სამჯერ დარეკა, მესამე ზარზე ნამძინარევმა ინგლისელმა შვეიცარმა გაუღო კარი.

"მინდა ვინმე ვნახო საელჩოში", უთხრა ბებიმ. "სულ ერთია ვინ — ოღონდ ახლავე".

"ყველას სძინავს, მადამ, ცხრა საათამდე არ ვაღებთ". ბების საათის გაგონება არ სურდა.

"ეს უბრალო საქმე არ არის. ერთ კაცს — ამერიკელს საშინლად სცეშეს, ახლა იტალიის ციხეშია".

"ჯერ ყველას სძინავს. ცხრა საათზე..."

"მე არ შემიძლია ცხრა საათამდე მოცდა. კაცს თვალი ამოუგდეს, ჩემი დის ქმარს, ახლა კი ციხეში ჰყავთ და არ უშ-ვებენ. ახლავე უნდა ვნახო ვინმე და ველაპარაკო — გასაგე-ბია? გიჟი ხომ არა ხართ? რას დგახართ და იდიოტივით შე-მომყურებთ?"

"მე არაფერი შემიძლია, მადამ".

"მიდით და გააღვიძეთ ვინმე!" მხრებში წაავლო ხელი და მაგრად შეაჯანჯღარა. "საქმე სიკვდილ-სიცოცხლეს ეხება. თუ ახლავე, ამ წუთში არ გააღვიძებთ ვინმეს და აქ არ მოიყ-ვახთ, საშიხელი დღე დაგადგებათ..."

"თუ შეიძლება, მადამ, გამიშვით, აიღეთ თქვენი ხელი". შვეიცარის ზურგს იქით, ზევით დაღლილი და გროტონული¹ ხმით თქვა ვიღაცამ:

ა გროტონი — ქალაქი მასაჩუსეტსის შტატში, სადაც ვაჟთა პრივილეგიური კერძო სასწავლებელი არსებობდა.

"რა ხდება?"

უვეიცარმა შვებით ამოისუნთქა.

"ერთი ლედი მოვიდა, სერ, და შემაკანჯღარა".

შვეიცარი სალაპარაკოდ განზე გადგა და ბები მაშინვე შევარდა ჰოლში. ზევით, კიბეზე, მოქარგულ თეთრ სპარსულ ხალათში გახვეული, უცნაური ახალგაზრდა კაცი იდგა, ძილისაგან ჯერ კარგად არ გამოფხიზლებულიყო. საშიშარი, არაბუნებრივად ვარდისფერი სახე მკვდარს მიუგავდა, ის ვარდისფერიც არ აცოცხლებდა, პირზე კი რაღაცა ეკეთა, ალიკაპივით. ბების დანახვაზე საჩქაროდ ჩრდილში დაიხია.

"რა მოხდა?" ისევ იკითხა მან.

ბებიმ უამბო. აღელვებისგან თვითონაც ვერ ამჩნევდა, ისე მიიწევდა ზევით და კიბეზე ავიდა, აქ კარგად გაარჩია, რომ ის რაღაც, პირზე რომ მიემაგრებინა, საულვაშე იყო, სახე კი ვარდისფერი კოლდკრემით ჰქონდა დაფარული. ეს ყველაფე-რი საოცრად ეხამებოდა ამ კოშმარულ ღამეს. ბოლოს ბებიმ მოითხოვა, რომ ეს კაცი ციხეში გაჰყოლოდა და დღესვე, დილითვე გამოეყვანათ დიკი იქიდან.

"ცუდი საქმეა". თქვა იმ კაცმა.

"დიახ", მორჩილად დაეთანხმა ბები. "დიახ".

"ჩხუბის ატეხა პოლიციაში, რა ამბავია", პირადი შეურაცხყოფის ტონით წარმოთქვა. "ცხრა საათამდე არაფერი მოხერხდება, მე ასე ვფიქრობ".

"ცხრა საათაძდე!" შეძრწუნებით წამოიძახა ბებიმ. "მაგრამ თქვენ თვითონ ხომ შეგიძლიათ რამე იღონოთ! თუნდაც ის, რომ ახლა ციხეში გამომყვეთ და მოითხოვოთ, რომ აღარ სცემონ".

"უფლება არა გვაქვს ასე მოვიქცეთ. ასეთი საქმეებისათვის საკონსულო არსებობს. საკონსულო ცხრა საათზე გაიღება".

საულვაშეთი დაჭიმულმა და უმოძრაო სახემ კიდევ უფრო

გააშმაგა ბები.

"მე ცხრა საათამდე ვერ-დავიცდი, ჩემი სიძეა დაშავებული, თვალი ამომიგდესო, თქვა. მე უნდა ვნახო იგი. ექიმი უნდა მივუყვანო". ბები კი არ ლაპარაკობდა, ყვიროდა ლამის და არც უცდია თავის შეკავება, პირიქით, გაბრაზებულმა, უფრო აუწია ხმას, იცოდა, ახლა ამ ტონით უფრო გაიტანდა ვიდრე სიტყვებით. "თქვენ ვალდებული ხართ რაღაც იღონოთ, ამერიკელი მოქალაქეების დაცვა, როცა მათ უჭირთ, თქვენი საქშეა".

მაგრამ ახალგაზრდა კაცი წარმოშობით ამერიკის აღმოსავლეთ სანაპიროდან იყო და იოლად ვინ რას გახდებოდა. თავი გაიქნია, მოთმინებით, როგორ არ გესმითო ჩემი მდგომარეობა, უფრო მაგრად შემოიხვია თავისი სპარსული ხალათი და რამდენიმე საფეხურით დაბლა ჩამოვიდა.

"მიეცით ლედის საკონსულოს მისამართი", შვეიცარს უთხრა, "და ცნობარიდან დოქტორ კოლაცოს მისამართი და ტელეფონიც ამოუწერეთ". ბების, გეგონება მოთმინებადაკარგული ქრისტეაო, ისეთი სახით მიუტრიალდა. "ძვირფასო ლედი, დიპლომატიური კორპუსი ოფიციალურად წარმოადგენს შეერთებული შტატების სახელმწიფოს იტალიის სახელმწიფოს წინაშე და მოქალაქეების დაცვა მას არ ეხება, — თუ სახელმწიფო დეპარტამენტის სპეციალური მითითება არ არის ამაზე. თქვენმა სიძემ დაარღვია ამ ქვეყნის კანონები და წაიყვანეს ციხეში ისევე, როგორც წაიყვანდნენ იტალიელს, თუ იგი ნიუიორკში დააშავებდა რამეს და ამით შეერთებული შტატების კანონებს დაარღვევდა. მისი გაშვება მხოლოდ იტალიის სასამართლოს შეუძლია და რაკი თქვენი დის ქმარს ასეთი რაღაც შეემთხვა და თქვენ იურიდიული რჩევა ან დახმარება გჭირდებათ, შეგიძლიათ მიმართოთ საკონსულოს, რომელიც იმისათვის არსებობს, რომ დაიცვას ამერიკელ მოქალაქეთა უფლებები. საკონსულო ცხრა საათზე იღება. საქმე ჩემს სიძეს რომ ეხებოდეს, მაშინაც კი ამაზე მეტის გაკეთებას მე ვერ შევძლებდი..."

"თქვენ შეგიძლიათ დარეკოთ საკონსულოში?" შეაწყვეტინა ბებიშ.

"ჩვენ საკონსულოს საქმეებში არ ვერევით. ცხრა საათზე მოვა კონსული და..."

"შეგიძლიათ მომცეთ მისი ბინის მისამართი?"

წამიერი შეყოვნების მერე ახალგაზრდა კაცმა თავი გაიქნია, შვეიცარს ფურცელი გამოართვა და ბების გაუწოდა.

"ახლა კი, გთხოვთ, მაპატიოთ".

მოხერხებული მანეგრით მიიყვანა ბები კარებამდე: წამით იისფერი რიჟრაჟის ათინათი დაეცა იმის საულვაშეს და ვარ-დისფერ ნიღაბს, მერე კი ბები უკვე მარტო იდგა საელჩოს კორპუსის კარწინ. საელჩოში ათი წუთი შეყოვნდა.

საელჩოს წინა მოედანზე ჭაჭანება არ იყო კაცის, იმ მოხუცს გარდა, ქვაფენილიდან სიგარეტების ნამწვებს რომ კრებდა ლურსმნიან ჯოხით. ბებიმ მაშინვე იშოვა ტაქსი და საკონსულოში წავიდა. მაგრამ იქაც არავინ დახვდა, მხოლოდ სამი საწყალი ქალი, ჯაგრისებით რომ ხეხავდნენ კიბეს. ბებიმ ვერა და ვერ მიახვედრა, რომ კონსულის ბინის მისამართი სჭირდებოდა. უეცრად რაღაცა შიშმა ისევ გარეთ უბიძგა და შოფერს უთხრა, ციხეში წამიყვანეო. შოფერმა ის ციხე არ იცოდა, სად იყო, მაგრამ სიტყვების "სულ პირდაპირ, მარჯვნივ და მარცხნივ", მეშვეობით ბებიმ მოახერხა, რომ ტაქსი მიახლოებით ადგილას მისულიყო, იქ კი მანქანა გაუშვა და უკვე ნაცნობი შესახვევების ლაბირინთში დაიწყო ძებნა. მაგრამ ყველა შესახვევი და ყველა სახლი ერთმანეთს ჰგავდა. ბოლოს რაღაც საცალფეხო გზით ესპანეთის მოედანზე გავიდა და "ამერიქენ ექსპრეს ქამპენის" შენობა დაინახა. "ამერიქენის" დანახვაზე გული შეუქანდა. ერთ ფანჯარაში შუქი მოჩანდა, სირბილით გადაჭრა მოედანი და კარი გამოსწია, მაგრამ კარი დაკეტილი დახვდა. საათი კი მინის იქით, შვიდზე იდგა. ბების კოლის კლეი მოაგონდა.

იმ ოტელის სახელი გაიხსენა, კოლის კლეი რომ ცხოვრობდა ახლა, ის ძველი ვილა, "ექსცელსიორის"გადაღმა იყო, წითელ სუროშემოხვეული. მორიგე ქალს მაინცდამაინც არ უნდოდა დახმარებოდა — მისტერ კლეის შეწუხებაზე უარი თქვა
და არც ის უნდოდა, რომ მისს უორენი მარტო გაეშვა მასთან; ძლივს დააჯერა, რომ სხვა საქმე ჰქონდა, ვნება არაფერ
შუაში იყო, და ბებისთან ერთად ავიდა ზევით.

კოლისი საწოლზე შიშველი იწვა. წინა საღამოს მთვრალი მოვიდა, ახლა გააღვიძეს და მაშინვე ვერ გაიაზრა რა დღეშიც იყო. როცა მიხვდა, გამოსწორება მეტისმეტი თავაზით სცადა. ხელი სტაცა ტანისამოსს და სააბაზანოში შევარდა. იქ ჩქარა ჩაიცვა და თან დუდღუნებდა! "რა ოხრობად, ალბათ თავით

ფეხებამდე კარგად შემხედა!" ტელეფონით მალე გაიგეს სად იყო ციხე და მაშინვე წავიდნენ.

კამერის კარი ღია დახვდათ და დიკი საყარაულო ოთახში, სკამის ზურგს იყო მიწოლილი. კარაბინერებს სახიდან სისხლი მოებანათ, ტანსაცმელი გაეწმინდათ და შლაპისთვისაც თავისი ადგილი მიეჩინათ, შუბლზე ჰქონდა ჩამოწეული. ბები ზღურბულზე გაჩერდა, კანკალებდა.

"შისტერ კლეი დარჩება თქვენთან", თქვა მან, "მე კი კონ-

სულისა და ექიმის მოსაყვანად წავალ".

"კარგი".

"მანამდე წყნარად იყავით".

"კარგი".

"მალე დავბრუნდები".

საკონსულოში წავიდა; უკვე ცხრა იწყებოდა და მისაღებში შეუშვეს. ცხრა საათისთვის კონსული მოვიდა და დაღლილობისა და უღონობისაგან ლამის ისტერიკაში ჩავარდნილი
ბები ისევ თავიდან ბოლომდე მოჰყვა ყველაფერს. კონსული
შეწუხდა. ბები გააფრთხილა, უცხო ქვეყნებში ჩხუბი ძალიან
სახიფათოაო, მაგრამ ყველაზე მეტად იმაზე წუხდა, რომ კაბინეტში არ შეჰყოლოდა, მისაღებში მოიცადეთო. ბებიმ კონსულის ბებრულ თვალებში სასოწარკვეთით ამოიკითხა, რომ
ამ ამბავში მაინცდამაინც დიდი ჩარევა არა სურდა. სანამ
იცდიდა, დრო რომ არ დაეკარგა, აქედან ექიმთანაც დარეკა
ბებიმ. მისაღებში კიდევ ვიღაცები შემოვიდნენ და რამდენიმე
კაცი კონსულის კაბინეტში გამოიძახეს. ნახევარი საათის მერე,
კარი რომ გაიღო და იქიდან ვიღაც გამოვიდა, ბებიმ მომენტი
შეარჩია, მდივანს გაუარა და შიგ შევარდა.

"აღმაშფოთებელია! ამერიკელ მოქალაქეს ლამის სასიკვდილოდ სცემეს და ციხეში ჩასვეს, თქვენ კი თავის შეწუხება არ გინდათ, არ გინდათ უშველოთ".

"ერთი წუთით, მისიზ..."

"მე საკშაოდ დიდხანს ვიცადე. ახლავე წამობრძანდით ჩემთან ერთად ციხეში და მოითხოვეთ, რომ გამოუშვან!"

"მისიზ..."

"ამერიკაში ჩვენი მდგომარეობა თვალსაჩინოა", — ლაპა-

რაკისას უფრო და უფრო მკაცრი ბაგე უხდებოდა. "გახმაურებას რომ არ ვერიდებოდეთ... ასე თუ ისე, მე ვიზრუნებ იმისათვის, რომ თქვენი ინდიფერენტულობა შეიტყონ იქ, სადაც
კერარს. ჩეში სიძე ბრიტანეთის ქვეშევრდომი რომ იყოს, უკვე კარგა ხანია თავისუფალი იქნებოდა, მაგრამ თქვენ უფრო
ის გაწუხებთ, პოლიციაში რას იტყვიან, ვიდრე ის, რისთვისაც
აქ ხართ".

"მისიზ...."

"ახლავე დაიხურეთ შლაპა და წამობრძანდით."

ულაპის ხსენებაზე კონსული აწრიალდა, მაშინვე ქაღალდების ქექვასა და სათვალის წმენდას მოჰყვა, მაგრამ აღარაფერი უშველიდა: ამერიკელი ქალი დაუდგა, აღშფოთებული, და ვერ გაუძლებდა ახირებულ და დაუდგრომელ ზნეს, რამაც მთელ რასას მორალური ხერხემალი გადაუტეხა და კონტიხენტი საბავშვო ბაგას დაამსგავსა. კონსულმა ვიცე-კონსული გამოიძახა — ბებიმ გაიმარჯვა.

დიკი იჯდა, საყარაულო ოთახის ფანჯარაში მზე უხვად შემოდიოდა და თბებოდა. კოლისი და ორი კარაბინერიც აქ იყო და ოთხივენი მოუთმენლად ელოდნენ, რომ რაღაცა უნდა მო-მხდარიყო თავისი ერთი მხედველი თვალით დიკი კარაბინიე-რებს უყურებდა, ტოსკანელი გლეხების თხელ პირისახეს, და იმ სისასტიკეს ვერ უთავსებდა, რაც წუხელ ღამით დაატყდა თავს. ერთი მათგანი ლუდზე გაგზავნა.

ლუდისგან ოდნავ თავბრუ დაეხვა და წამით მთელი ამბავი სარდონიკული იუმორის შუქით განათდა. კოლისი მაინც იმ
აზრისა იყო, რომ ის ინგლისელი ქალიშვილი, "ბონბონიერიდან", ამ ამბავში რაღაცით იყო გახვეული, მაგრამ დიკს სჯეროდა, რომ ამ შეჯახებამდე დიდი ხნით ადრე გაქრა იგი. კოლისი ჯერ კიდევ შეეპყრო იმ ფაქტს, რომ მისს უორენმა
მთლად შიშველი ნახა საწოლზე.

სიშმაგე თანდათან მოერია დიკს, ჯერ შიგნით, გულში უტრიალებდა და მერე უსაზღვრო, კრიმინალურ ბრმა გახელებად გადაექცა. ის, რაც მას შეემთხვა, იმდენად საშინელი რაღაც იყო, რომ თუ მოახრჩობდა და დაივიწყებდა, მხოლოდ მაშინ თუ გადაიტანდა, და რაკი ამისი არა სჯეროდა, იმედი ჰქონდა დაკარგული. ამიერიდან ის სხვა პიროვნება ხდებოდა, და ახლა, როცა ამ დღეში იყო, თავის თავს კარგად ვერ ხედავდა, —
ვინ იქნებოდა ამის მერე. ღვთის ნებით არ იყო ეს ამბავი.
არც ერთ მოზრდილ არიელს არ შეუძლია დამცირება თავის
სასარგებლოდ გამოიყენოს; თუ აპატია, ეს იმას ნიშნავს, რომ
ის დამცირება მისი ცხოვრების წილი გახდა და გააიგივა თავისი თავი იმასთან, რამაც დაამცირა — ამ ამბის ბოლო ეს
არ იყო.

როცა კოლისმა თქვა, თავიანთი უნდა მიეზღოთო, დიკმა მხოლოდ თავი გაიქნია, ხმა არ ამოუღია, ოთახში ცეცხლივით შემოიჭრა კარაბინერების ლეიტენანტი, სწრაფი და სიცოცხლით სავსე, სამ კაცს ეყოფოდა იმისი ცეცხლი. კარაბინერები ფეხზე წამოიჭრნენ და გაიჭიმნენ; ლუდის ცარიელ ბოთლს მოჰკრა თვალი და თავის ხელქვეითებს მისდგა და ლანძღა. ამის მერე ახლებური, საქმიანი კაცის იერი მიიღო და ბრძანა, დაუყოვნებლივ გაეტანათ ლუდის ბოთლი საყარაულო ოთახიდან. დიკმა კოლისს შეხედა და გაიცინა.

ვიცე-კონსული, მუშაობისაგან გადაქანცული ახალგაზრდა კაცი, გვარად სუონსონი, მოვიდა და სუყველა სასამართლოს-კენ დაიძრნენ; წინ დიკი მიდიოდა, აქეთ-იქით კოლისი და სუონსონი მიჰყვებოდნენ, უკან მიდიოდნენ კარაბინერები. მზიანი დილა იყო, ოდნავ ყვითელბურუსიანი; მოედანზე და თაღებქვეშ ხალხი ირეოდა, დიკმა თვალებზე ჩამოიფხატა შლაპა და ისეთი ჩქარი ნაბიჯით წავიდა, მოკლეფეხება კარაბინერები ძლივს ეწეოდნენ. ერთი მათგანი სირბილით მიჰყვა და მოითხოვა, რომ ნელა ევლოთ. სუონსონმა ეს საქმე მოაგ-ვარა.

"თავი მოგჭერით, არა?" მხიარული ტონით თქვა დიკმა.

"მადლობა თქვით, რომ იტალიელებთან ჩხუბში ტოცხალი გადარჩით", ცოტა გაუბედავად მიუგო სუონსონმა. "ახლა ალბათ გამოგიშვებენ, მაგრამ აქაური რომ იყოთ, ორი-სამი თვე ციხეში ჯდომა მოგიწევდათ, მერე როგორ!"

"თქვენ შჯდარხართ როდისშე?"

სუონსონმა გაიცინა.

"მე მომწონს იგი", კლეის უთხრა დიკმა. "სიმპათიური ახალგაზრდა კაცია და კარგი რჩევის მოცემაც იცის, მეტადრე ციხეში ჯდომაზე, მაგრამ თავსა ვდებ, ალბათ თვითონაც მჯდარა, შეიძლება რამდენიმე კვირაც კი გაატარა იქ".

სუონსონმა გაიცინა.

"მე მინდა გითხრათ, რომ მაგათთან ფრთხილად იყოთ, თქვენ არ იცით, რა ხალხია".

"ო, მე კარგად ვიცი რა ხალხიცაა", წამოენთო დიკი, "არამზადა ვიგინდარები!" კარაბინერებს მიუტრიალდა: "გაიგეთ?"

"მე აქ დაგტოვებთ", საჩქაროდ თქვა სუონსონმა. "თქვენშა ცოლისდამ იცის, რომ აქამდე უნდა მოგყოლოდით — მაგრამ სასამართლოში ჩვენი იურისტი დაგხვდებათ და რაც მთა-. გარია, ფრთხილად იყავით".

"ნახვამდის". დიკმა გულთბილად ჩამოართვა ხელი. "უღ-

რმესი მადლობა. მჯერა, ისეთი მომავალი გაქვთ..."

სუონსონმა ისევ გაიღიმა, საჩქაროდ წავიდა და მაშინვე

დაიბრუნა თავისჩ ოფიციალური, მგმობი იერი.

ესენი შიგნით, ეზოში შევიდნენ, სადაც ოთხივე მხრიდან კიბე იყო და ამ კიბეებს მოსამართლეების კანტორებში აჰყავ-დით. ბევრი ხალხი ირეოდა; ამათ რომ ჩაიარეს, ვიშვიში, ლანძღვა, დრტვინვა და სტვენა მოედო ეზოს, გაშმაგებული ბრბო მძვინვარებდა. დიკმა გაშტერებით მიიხედ-შოიხედა.

"რა ამბავია, რა უნდათ?" იკითხა გაოცებულმა.

ერთმა კარაბინერმა იმათ, ვინც უფრო ახლო იდგა, რაღაც უთხრა და დაშოშმინდნენ.

ოთახში შევიდნენ. საკონსულოს იურისტი, დაძენძილსამოსიანი იტალიელი, რაღაცას კარგა დიდხანს უხსნიდა მოსამართლეს და ამასობაში დიკი და კოლისი განზე იცდიდნენ. ეზოში გამავალ ფანჯარასთან ვიღაცა კაცი იდგა, შემოტრიალდა
და ამათ ინგლისურად აუხსნა, რადაც ბობოქრობდა ის ხალხი მაშინ, როცა კოლისისა და კარაბინერების თანხლებით დიკმა მთელი ეზო გადმოიარა. საქმე ის იყო, რომ იმ დღით ერთ
კაცს ასამართლებდნენ, წარმოშობით ფრასკატიდან, რომელმაც ხუთი წლის გოგონაზე ძალა იხმარა და მერე მოკლა, და
როცა დიკი გამოატარეს, ის ეგონათ.

რამდენიმე წუთის მერე იურისტმა უთხრა დიკს, რომ თავისუფალი იყო — სასამართლომ იგი საკმარისად დასჯილად ჩა-

თვალა.

"საკმარისად!" დაიყვირა დიკმა. "რისთვის დასჯილად?" "წავიდეთ", უთხრა კოლისმა. "აქ აღარაფერი საქმე არა გაქვთ".

"მაგრამ, მინდა ვიცოდე, რა დავაშავე. გარდა იმისა, რომ რამდენიმე ტაქსისტთან ვიჩხუბე?"

"ბრალდებაში ნათქვამია, რომ თქვენ პოლიციის აგენტთან მიხვედით, ვითომ იმისთვის, რათა ხელი ჩამოგერთმიათ და სახეში კი გაარტყით..."

"მაგრამ ეს სიცრუეა! მე გავაფრთხილე, რომ უნდა გამერტყა, ისიც არ ვიცოდი, რომ პოლიციის აგენტი იყო".

"ჯობია წახვიდეთ". ურჩია იურისტმა.

. "წავიდეთ". კოლისმა მკლავში მოჰკიდა ხელი და კიბეს ჩაუყვნენ.

"მე მინდა სიტყვა წარმოვთქვა", დაიყვირა დიკმა. "მე მინდა გავაგებინო ამ ხალხს, როგორ ვიხმარე ძალა ხუთი წლის გოგონაზე, იქნებ მე მართლაც…"

"წავიდეთ".

გარეთ ტაქსი იდგა, მანქანაში ბები ელოდა ექიმთან ერთად. დიკს არ უნდოდა შეეხედა ბებისთვის და ექიმი კი არ მოეწონა — შკაცრი მანერის — ასეთები ევროპაში ყველაზე გაურკვეველი ტიპები — ლათინი მორალისტის ტიპები არიან. დიკმა სცადა მომხდარის შეჯამება, მაგრამ არავინ შეეხმაურა, სათქმელი ყველას ცოტა ჰქონდა. "კვირინალში", თავის ოთახში ექიმმა ოფლი და შემხმარი სისხლი მოაშორა და მობანა, კარგად გასინჯა, — დაზიანება სადა ჰქონდა, პატარა ჭრილობებს მიხედა და კარგი სალბუნიც დაადო თვალზე. დიკმა სთხოვა, მორფის ტაბლეტის მეოთხედი მომეცითო, ნერვული აგზნება არ უცხრებოდა და ვერ დაიძინებდა. მორფი მიიღო და დაიძინა; კოლისი და ექიმი წავიდნენ, ბები დარჩა და ინგლისური სამკურნალოდან გამოძახებულ მომვლელ ქალს დაელოდა. ძნელი ღამე გადაიტანა ბებიმ, მაგრამ კმაყოფილი იყო, რადგან, რა კარგიც უნდა ყოფილიყო დიკი მანამდე, ამ ამბით ახლა მორალურად აღმატებული იყვნენ მასზე, მანამდე, სანამ დიკ დაივერი კიდევ რამეთი დასჭირდებოდათ.



## **ᲬᲘᲒᲜᲘ ᲛᲔᲡᲐᲛᲔ**

I

ფრაუ კეტე გრეგოროვიუსი ქმარს თავიანთი ვილის ბილიკ-

ზე დაეწია.

"ჰო, როგორ არის ნიკოლი?" რბილად ჰკითხა, მაგრამ სულს ძლივს ითქვამდა და აშკარა იყო, სანამ მორბოდა, ეს კითხვა თავში უტრიალებდა.

ფრანცმა გაოცებით მოხედა.

"ნიკოლი ავად არ არის. რა მოხდა, რად მეკითხები, ჩემო კარგო?"

"შენ ისე ხშირად ნახულობ — ვიფიქრე, ავად უნდა იყოსმეთქი".

"ამაზე შინ ვილაპარაკოთ".

პეტე მორჩილად დაეთანხმა. ფრანცს კაბინეტი კლინიკაში

Scanned by CamScanner

ჰქონდა, სასტუმრო ოთახში კი აღმზრდელთან ერთად ბავშვები იყვნენ. ცოლ-ქმარი საძინებლისკენ გაემართა.

"მაპატიე, ფრანც", დაასწრო კეტემ, სანამ ფრანცი ეტყოდა რამეს. "მაპატიე ძვირფასო, არ უნდა მეთქვა ასე, მე ვიცი ჩემი მოვალეობა და ვამაყობ ამით. მაგრამ მინდა გითხრა, რომ შე და ნიკოლს არა გვაქვს კარგი ურთიერთობა".

"პატარა ბუდეებში ჩიტები მშვიდობით ცხოვრობენ",დაიქუხა ფრანცმა. მაგრამ მიხვდა, ტონი და აზრი ერთმანეთს არ ეხამებოდა და იმ თანაბარ, მკაფიო რიტმში გაიმეორა, რითაც თავისი ძველი მასწავლებელი, დოქტორი დომლერი ახერხებდა, რომ ყველაზე გაცვეთილი ბანალობაც კი მრავლისმეტყველი გაეხადა. "პატარა — ბუდეებში — ჩიტები — მშვიდობით ცხოვრობენ!"

"მე ეგ მესმის. იმას ვერ იტყვი, თითქოს ნიკოლის მიმართ უყურადღებო ვიყო".

"მე იმას გეტყვი, რომ საღი აზრი გღალატობს. ნიკოლი მხოლოდ ცოლი კი არ არის დიკისა — მისი პაციენტიც არის და შეიძლება ასეთადაც დარჩეს მთელი ცხოვრება. დიკის აქ არყოფნაში კი მე ვაგებ პასუხს". ცოტათი ყოყმანდბდა, ვიდრე ახალ ამბავს ეტყოდა კეტეს; ხანდახან ხუმრობით იცოდა ხოლმე ასე წვალება. "ამ დილით კაბლოგრამა მივიღე რომიდან. დიკი გრიპით ყოფილა ავად, ახლა კარგად არის და ხვალ მოე-მგზავრება".

კეტეს გაუხარდა, ახლა მართლა დაწყნარებული ტონით განაგრძო ლაპარაკი.

"მე ვფიქრობ, ნიკოლი არც ისე ავად არის, როგორც ჰგონიათ — თვითონვე სწყალობს თავის ავადმყოფობას და თავისი ძალის იარაღად იყენებს. ეგ, შენი ნორმა ტოლმეჯი-ვით, კინომსახიობი უნდა ყოფილიყო, ყველა ამერიკელი ქალის ოცნება და ბედნიერება კინოშია".

"იქნება ფილმის ნორმა ტოლმეჯზე ეჭვიანობ?"

"არ მიყვარს ამერიკელები. ეგოისტები არიან, ეგოისტები!"

"დიკიც არ გიყვარს?"

"დიკი მიყვარს", მიუგო კეტემ. "მაგრამ დიკი სულ სხვაა, დიკი სხვებზეც ფიქრობს". — ნორმა ტოლმეჯიც, — ფიქრში თქვა ფრანცმა. წორმა ტოლმეჯი, მარტო ლამაზი კი არა, ალბათ კეთილი და ჭკვიანიც არის. ეგ არის მხოლოდ, სულელურ როლებს აძლევენ და ისიც თამაშობს, მეტი რა ქნას. ნორმა ტოლმეჯი ის ქალია, ვისი გაცნობაც პრივილეგია უნდა იყოს.

მაგრამ კეტეს უკვე დაავიწყდა ნორმა ტოლმეჯი, თუმცა მთელი გზა ერთხელ ლამის გული გადაელია ფილმის მერე,

ციურიხიდან რომ ბრუნდებოდნეხ.

"დიკშა ფულისთვის შეირთო ნიკოლი", თქვა კეტემ, "ცთუნებას ვერ გაუძლო — შენგან ვიცი, ერთ საღამოს გადაკვრით შითხარი".

"ეს ღვარძლიანი ლაპარაკია".

"კარგი, კარგი, არ უნდა მეთქვა". დაიხია კეტემ. "შენი თქმისა არ იყოს, ჩვენ ყველამ ისე უნდა ვიცხოვროთ ერთად, როგორც ჩიტები ცხოვრობენ თავიანთ ბუდეში. მაგრამ ძალი-ან ძნელია, როცა ნიკოლი ისე იქცევა, თითქოს... — როცა ხედავ, რომ ნიკოლი ცდილობს განზე გადგეს, სუნთქვის შეკავებასაც კი ცდილობს თითქოს — გეგონება, რაღაცა სუნი ამდიოდეს!"

კეტე სიმართლეს შეეხო, ეს მოგონილი რამ არ იყო. მთელ საქმეს ლამის თვითონვე აკეთებდა და თანაც, ძნელად რომ თავის სამოსზე დაეხარჯა რამ. ყველა ამერიკელი ქალიშვილი, დოის ბოლოს, როცა შინ ბრუნდება მაღაზიიდან და თავის ორ წყვილ საცვალს საღამოობით რომ ირეცხავს, მაშინვე იგრძნობდა, კეტეს გუშინდელი ოფლის სუნი რომ ასდიოდა, ეს სუნიც კი არ იყო, არამედ რაღაც გამუდმებული შრომისა თუ ხრწნის, რაღაც ამიაკის მაგვარი რამ. ფრანცისთვის — მეტად ბუნებრივი, როგორც კეტეს თმის შედედებული, მსუყე სურნელი, ერთიც და მეორეც მის ცხოვრებაში აუცილებელი რამ გამხდარიყო და ვერც ერთს ვეღარ შეელეოდა; მაგრამ ნიკოლს ბავშვობიდანვე გამძაფრებული ყნოსვა ჰქონდა, ძიძის თითების სუნს ვერ იტანდა ხოლმე როცა აცმევდა და ახლა შეურაცხყოფილიც იყო, რომ გასაძლებადა ჰქონდა საქმე.

"ბავშვებიც", განაგრძო კეტეშ. "ნიკოლს არ მოსწონს, იმისი ბავშვები ჩვენებთან როცა თამაშობენ" — მაგრამ ფრანცს

ეყო, აღარ უნდოდა რამის გაგება.

"ენას კბილი დააჭირე — არ გვარგებს ასეთი ლაპარაკი. ნიკოლის ფული რომ არა, კლინიკაც არ გვექნებოდა. წავიდეთ, ვისაუზმოთ".

კეტე მიხვდა, რომ შეცდა და არ იყო ახლა გონივრული ეს აფეთქება, მაგრამ ფრანცის ბოლო შენიშვნამ მოაგონა, რომ ფული ამერიკელებს სხვებსაცა ჰქონდათ და ერთი კვირის მე-რე სხვა სიტყვებში ჩადო ნიკოლისადმი სიძულვილი.

ეს იმის მერე მოხდა, რაც დიკის ჩამოსვლის გამო გრეგოროვიუსებშა დაივერები სადილად მიიწვიეს. სადილის მერე ბილიკსაც არ იყვნენ გაცდენილები, რომ კეტემ კარები მიხურა და ფრანცს უთხრა:

"ნახე, რა ჩაშავებული თვალები ჰქონდა დიკს? დებოშის კვალია!"

"მოიცა, ჩქარობ", შეაჩერა ფრანცმა. "დიკმა თვითონ მიამბო, როგორც კი ჩამოვიდა; ტრანს-ატლანტურ გემზე ჩაბმულა კრივში, ამერიკელმა მგზავრებმა ამ ტრანს-ატლანტურ რეისებზე იციან ხოლმე კრივში ჩაბმა".

"გგონია დავიჯერე?" დაცინვით თქვა კეტემ. "ერთი ხელი, ეტყობა სტკივა, როცა ხმარობს, საფეთქელთან კი ჯერაც არ შეხორცებია ნაიარევი, ის ადგილიც ეტყობა, სადაც თმა აუჭრიათ".

. ფრანცს არ შეუმჩნევია ეს დეტალები.

"როგორ გგონია", არა ცხრებოდა კეტე. "კლინიკისთვის კარგია ასეთი რაღაცა? ამ საღამოსაც ვიგრძენი ღვინის სუნი, რაც დაბრუნდა, იმის მერე თითქმის სულ სვამს".

ხმას დაუწია, რომ რის თქმასაც ახლა აპირებდა, აზრი კიდევაც მიმატებოდა: "დიკზე უკვე ვეღარ იტყვი, რომ სერიოზული ექიმია".

ფრანცმა მხრები შეარხია, გეგონება, კეტეს დაჟინებას იშორებსო, კიბეზე ანიშნა, ზევით ავიდეთო და იქ, საძინებელში მიუტრიალდა.

"დიკი მართლა ყველაზე სერიოზული ექიმიც არის და ელვარე ექიმიც, ამას წყალი არ გაუვა. იმათ შორის, ვინც ამ ბოლო ათ წელიწადში ნევროპათოლოგიაში დაიცვეს დისერტაცია ციურიხში, დიკი ყველაზე ელვარედ არის მიჩნეული მე ჯერ სადა ვარ!" "გრცხვენოდეს!"

"ეს სიმართლეა — რად უნდა მრცხვენოდეს. ძალიან რთუ-ლი შემთხვევა თუა, ყოველთვის დიკისთვის მიმიმართავს და რჩევა მითხოვია. მაგისი გამოცემები დღემდე სანიმუშოდ ით-ვლება თავის სფეროში — მიდი, რომელ საშედიცინო ბიბლი-ოთეკაშიც გინდა იკითხე. სტუდენტების უმრავლესობას ჰგო-ნია, რომ დიკი ინგლისელია — არა სჯერათ, რომ ასეთი საფუ-ძვლიანი მეცნიერება ამერიკიდან მოდიოდეს". მოურიდებლად დაამთქნარა და ბალიშქვეშიდან პიკამა გამოიღო, "კეტე, ასე რად ლაპარაკობ — მე მეგონა, რომ გიყვარდა დიკი".

"გრცხვენოდეს!" თქვა კეტემ. "ექიმი შენა ხარ, მეცნიერი, და მთელ საქმესაც შენ აკეთებ. ეს კურდღლისა და კუს იგავსა ჰგავს — და მე თუ მკითხავ, კურდღელი უკვე მორჩა რბენას".

"BB! BB!"

"კარგი, ოღონდ, იცოდე, მე მართალი ვარ". გაშლილი ხელი მოიქნია ფრანცმა და ჰაერი ჩააპო. "გეყოფა!"

ამ ლაპარაკის ბოლოს ის იყო, თითქოს ერთმანეთს ორმა მოკამათემ თავისი აზრი გაუზიარა. კეტემ თავისთვის აღიარა, რომ დიკის მიმართ მკაცრი იყო და ძალიან მკაცრიც, დიკისა, რომელსაც აღმერთებდა და კრძალვაც კი ჰქონდა იმის მიმართ, ვისაც შეეძლო გაეგო მისთვის, კეტესთვის, და პატივსაც სცემდა. რაც შეეხება ფრანცს, რაკი ერთხელ შეუშვა თავში კეტეს აზრი, ფიქრობდა, დიკი სერიოზული მეცნიერი არც არასოდეს ყოფილაო და მერე კი, რაც დრო გადიოდა, თავისი თავი დააჯერა, რომ მანამდეც ასე ეგონა მუდამ.

## II

დიკმა ნიკოლს შეცვლილი ვერსია უამბო იმისა, რაც რომში გადახდა — ამ ვერსიით მან ფილანთროპიული მოსაზრებით იჩხუბა, მთვრალ მეგობარს მივეშველეო. ბები უორენის იმედი ჰქონდა, იცოდა, ენას კბილს დააჭერდა, რადგან საკმაოდ კარგად დაანახვა, რა დამღუპველიც იქნებოდა ნიკოლისთვის მართლის შეტყობა. ეს ყველაფერი მაინც არაფრად ჩანდა იმ დაღუპვასთან, რაც თვითონ მას, დიკს ემუქრებოდა. რეაქცია ის იყო, რომ ინტენსიურად, თავდაუზოგავად ჩაეგა თავის მუშაობაში და ფრანცმა, რომელიც უკვე ფიქრობდა, 
რომ დაშორებოდა დიკს, არ იცოდა უთანხმოება რით დაეწყო. არც ერთ მეგობრობას, თუკი ჭეშმარიტად მეგობრობა 
ყოფილა იგი, არ მოღებია ერთ საათში ბოლო ისე, რომ მტკივნეული ხორცის გლეჯა არ მოჰყოლოდა, — ამიტომ ფრანცმა 
თანდათანობით სცადა დაეჯერა, რომ დიკი ემოციურადაც და 
ინტელექტუალურადაც სწრაფი ტემპით მიდიოდა და ეს სისწრაფე ვერ უთავსდებოდა ფრანცის ტემპს და რიტმს — ადრე 
მიაჩნდათ, რომ ეს კონტრასტი საქმეს კიდევაც ადგებოდა, მაგრამ ადრე — როგორც გიჭირდეს ისე გილხინდესო, — ახლა 
უკვე სხვა საქმე იყო.

პირველი სოლის ჩარჭობის შემთხვევა კი მხოლოდ მაისში მიეცა ფრანცს. იმ შუადღეს დიკი კაბინეტში შევიდა მასთან, დაღლილი იყო, ფერწასული, კარებთან დაჯდა და უთხრა:

"ის ქალი აღარ არის".

"მოკვდა?"

"გულმა უმტყუნა".

გატანჯული იჯდა, სამი ღამე გაუთენა იმ ეგზემიან უცნობ მხატვარ ქალს, ფორმალურად, იმისთვის, რომ ადრენალინი გაეკეთებინა, მაგრამ სიყვარულით რჩებოდა მასთან, რომ რაც შეიძლება დიდხანს სჭეროდა მბჟუტავი შუქი მოწოლილ ბნელთან.

ფრანცმა თანამგრძნობის სახე მიიღო და მაშინვე გამოთქვა თავისი აზრი:

"მე ვფიქრობ, ნერვულ-სიფილისური გამონაყარი იყო და ვერავითარი ვასერმანი აზრს ვერ შემიცვლის. ზურგის ტვინის სითხე…"

"რა მნიშვნელობა აქვს", თქვა დიკმა. "ო, ღმერთო, რა მნიშვნელობა აქვს! თუკი თვითონ უნდოდა, რომ არავის გაე-გო და თავისი საიდუმლო თან ჩაეტანა, ყოფილიყო ასე".

"კარგი იქნებოდა ერთი დღე მაინც დაგესვენათ".

"დავისვენებ, ნუ ღელავთ".

ესეც ასე, ფრანცმა ჩაასო სოლი; დეპეშა უნდა შეედგინა, რომ გარდაცვლილის ძმისთვის გაეგზავნა, თავი ასწია და ჰკითხა:

"იქნებ ლოზანაში წასულიყავით, ცოტა გაგევლოთ?" "obens oho".

"გასართობად არა, საქმეა ლოზანაში, ერთი პაციენტის ნახვაა საჭირო. ჩილიდან არის — დღეს მთელი დილა ტელეფონით შელაპარაკა მამამისი..."

"რამხელა ძალა ჰქონდა", თქვა დიკმა. "და რამდენ იტანჯებოდა". ფრანცი თანაგრძნობით იქნევდა თავს და დიკი

გამოერკვა. "მაპატიეთ, ფრანც, შეგაწყვეტინეთ",

"კარგი იქნებოდა ცოტა ხნით გარემოც შეგეცვალათ. საქმე ის არის, რომ მამას არ შეუძლია დააჯეროს თავისი ვაჟიშვილი აქ, კლინიკაში წამოვიდეს, და გვთხოვს, ლოზანაში ჩა ვიდეს ვინმე".

"რა არის? ალკოჰოლიზმი? ჰომოსექსუალიზმი? რაკი საქ-

მე ლოზანაში წასვლას ეხება..."

"ცოტა-ცოტა ყველაფერი".

"კარგი, წავალ. ფული აქვთ?"

"კი, თანაც ბევრი, ორი-სამი დღე დარჩით და თუ მიიჩნევთ, რომ მეთვალყურეობა სჭირდება, აქ წამოიყვანეთ ბიჭი. მაგრამ ასე იქნება თუ ისე, არ იჩქაროთ, შეათავსეთ საქმე-სიამე".

მატარებელში ორი საათი ეძინა დიკს, დაისვენა და სენიორ პარდო ი სიუდად რეალთან შესახვედრად უკვე კარგ ხასიათზე იყო.

იცოდა, რაც იქნებოდა ეს შეხვედრა. ოჯახის წევრის ისტერია ფსიქოლოგიურად თვითონ პაციენტის მდგომარეობასავით საინტერესოა ხოლმე ხშირად. ეს შემთხვევა გამონაკლისი როდი იყო. სენიორ პარდო ი სიუდად რეალი, ჭაღაროსანი, ლამაზი ესპანელი, კეთილშობილური გარეგნობისა, სიმდიდრისა და ძალმოსილების აღჭურვილობით, "ოტელ დე ტრუა მონდის" თავის აპარტამენტში, გახელებული აქეთ-იქით აწყდებოდა, დიკს ვაჟიშვილის ამბავს უყვებოდა და რაღა მთვრალი ქალი და რაღა ესა, თავს ვეღარ იჭერდა.

"სხვა აღარაფერი შემიძლია, ჩემი ვაჟიშვილი უზნეოა, უზნეო იყო ჰაროუში, უზნეო იყო კემბრიჯის სამეფო კოლეჯში. გამოუსწორებელი უზნეოა. ახლა კი, ეს სიმთვრალეც რომ დაემატა, რაღას დაფარავ, და სკანდალი სკანდალზეა. გაუთავებლად. ყველაფერი ვცადე — ერთი ნაცნობი მყავს, ერთად დავსახეთ გეგმა და ფრანსისკოსთან ერთად გავგზავნე ესპანეთში სამოგზაუროდ. საღამოობით იგი ფრანსისკოს კანტა რიდინს უშხაპუნებდა და მერე ორივე ერთად მიდიოდა რომელიმე წესიერ საროსკიპოში, ერთ კვირამდე ასე იყო და ამან თითქოს უშველა, მაგრამ ისევ დაიწყო ძველებურად. ბოლოს და ბოლოს თავი ვეღარ შევიკავე და წინა კვირას აქ, ამ ოთახში, უფრო ზუსტად იქ, სააბაზანოში..." თითით კარზე მიუთითა, "ვაიძულე ფრანსისკო, წელამდე გაეხადა და მათ-რახით ავაჭრელე..."

თავისივე ემოციებით ღონემიხდილი, სავარძელში ჩაეშვა. ამის მერე დიკმა დაიწყო ლაპარაკი.

"ეს არ უნდა გექნათ — არც ის ესპანეთში წასვლა უშველიდა". ძლივს იკავებდა თავს, რომ არ გადაეხარხარა — კარგი
ვინმე კი იქნებოდა ის ექიმი, ასეთ დილეტანტურ ექსპერიმენტზე როგორ დათანხმდა. "—სენიორ, უნდა გითხრათ, რომ
ასეთ შემთხვევებში ძნელია რაიმეს დაპირება, რაც შეეხება
ალკოჰოლიზმს, ხშირად კარგ შედეგს ვაღწევთ ხოლმე — რაღა
თქმა უნდა, თუ პაციენტიც მოგვეხმარება. მაგრამ ასე თუ ისც,
ჯერ თქვენი ბიჭი უნდა ვნახო და იმისი ნდობა მოვიპოვო, და
გავიგო, თუ თვითონ რას იტყვის თავის თავზე".

ის ბიჭი, ვისთან ერთადაც ტერასაზე იჯდა, დაახლოებით

ოცი წლისა იქნებოდა, ლამაზი, ცოცხალი სახე ჰქონდა.

"მე მინდა ვიცოდე, თქვენ რას ფიქრობთ", თქვა დიკმა. "ხომ არ ამჩნევთ, რომ საქმე თანდათან უარესდება? გინდათ, რომ ყველაფერი შეიცვალოს?"

"დიახ, კარგი იქნებოდა", მიუგო ფრანსისკომ. "მე ძალიან უბედური ვარ".

"უფრო რის გამო, როგორ გგონიათ, იმის გამო, რომ ძალიან ბევრს სვამთ თუ უზნეობის გამო?"

"მე მგონია, მაგის გამო დავიწყე სმა". აქამდე ბიჭი სერიოზულად ლაპარაკობდა, მაგრამ უცებ შეუკავებელი სიცილი წასკდა, "არა, იცით, არაფერი მეშველება; ჯერ კიდევ კემბრიჯში, სამეფო კოლეჯში "ჩილელ დედოფალს" მეძახდნენ, ახლა კი, ესპანეთში წასვლის მერე ხომ, სულ ამ წასვლამ ქნა ქალის დანახვაზე გული მერევა". დიკმა მკვახედ შეაწყვეტიხა.

"თუ თქვენ ეს მოგწონთ, მე ვერ გიშველით, და უბრალოდ ვკარგავთ დროს".

"არა, კიდევ ვილაპარაკოთ, სხვებთან ლაპარაკი მეზიზღე-

გა".

გუნებისაგან რაღაც კაცური იყო ამ ბიჭში, რაც თითქოს ახლა მამისადმი აქტიურ ურჩობადღა გადაქცეოდა, მაგრამ თვალებში ჰქონდა ის ტიპური და ცბიერად ცეტი გამოხედვა, რითაც ყველა ჰომოსექსუალისტი ლაპარაკობს თავის თავზე.

"ეს საკუთარ თავთან დამალობანას თამაშსა ჰგავს", უთხრა დიკმა. "თქვენი ცხოვრება ამაზე მიდის და აღარც დრო გრჩებათ და აღარც ძალა სხვა, ღირსეული და კარგი საქმისთვის. თუ გინდათ ქვეყანას თვალებში შეხედოთ, უნდა დაიოკოთ თქვენი მიდრეკილება და პირველ რიგში სმას დაანებეთ თავი, იმიტომ რომ ალკოჰოლი..."

დიკი მექანიკურად ლაპარაკობდა, რადგან ფიქრში, უკვე ათი წუთიც იქნებოდა, უარი თქვა ამ პაციენტზე. ტერასაზე კიდევ ერთ საათს მაინც კარგად ისაუბრეს, ფრანსისკოს სახლზე ჩილიში, იმის ამბიციებზე — მხოლოდ პროფესიული ინტერესით არ უსმენდა დიკი, ფრანსისკო მომხიბვლელი იყო და თავისი მომხიბვლელობა ეხმარებოდა დანაშაული ჩაედინა ზნეობაში, დიკისთვის კი მომხიბვლელობას თავისთავადი არსებობა ჰქონდა ყოველთვის, როგორიც გინდა ყოფილიყო, გადარეული სიმამაცე იმ უბედურისა, ამ დილას რომ მოკვდა კლინიკაში თუ აღერილი გრაცია, რითაც ეს დაკარგული ბიჭი გაცვეთილ ამბებზე ლაპარაკობდა. დიკი ცდილობდა, ცხოვრება რაღაც პატარ-პატარა სეგმენტებად დაეყო, რათა შეენახა და გამოეზოგა — ესმოდა, რომ მთელ ცხოვრებას სულ სხვა სახე აქვს და სეგმენტებს კი სხვა ხასიათი, მაგრამ როცა კაცი ორმოცის ხდება, მხოლოდ ცალკე სეგმენტებში უფრო ჩანს იგი. სიყვარული ნიკოლისა და როზმერის მიმართ, მეგობრობა ეიბ ნორთთან, ტომი ბარბანთან, ომისშემდგომი ხანის გახლეჩილ სამყაროში — ასეთ კონტაქტებში პიროვნება ყოველთვის თითქოს მასში, დიკში გადადიოდა, ემატებოდა და თვითონ ხდებოდა — ან ყველაფერი უნდა მიეღო, ან არაფერი; და ახლა, ხვედრივით, ბოლომდე უნდა ეტარებინა თავის თავში

ყველას მეობა, ვისაც კი ადრე იცნობდა და ვინც კი ოდესმე ჰყვარებია, და როგორც ისინი იქნებოდნენ მთლიანობაში, თვითონაც ისე იქნებოდა და მხოლოდ ასე იარსებებდა. არ იყო ეს იოლი ხვედრი, მარტოობა ერია მასში, რა ადვილია, როცა უყვარხარ, როცა გიყვარს — გაუსაძლისი.

ფრანსისკოსთან ერთად ვერანდაზე რომ იჯდა, უცებ ვიღა-ცის ჩრდილი ამოიწია წარსულიდან. მაღალი მამაკაცი უცნაური რწევით გამოსცდა ბუჩქებს და გაუბედავად მოუახლოვდა ამათ. წამით თითქოს ქარზე აშრიალებული პეიზაჟის რაღაც დეტალ-სა ჰგავდა ეს ფიგურა და დიკმა მაშინვე ვერ შეამჩნია. მაგრამ მერე ფეხზე წამოდგა და ჩამოართვა ხელი. "ღმერთო ჩემო, მე აქ მთელი ბუდე ავშალე!" გაიფიქრა დიკმა და თავს ძალას ატანდა გაეხსენებინა მისი სახელი.

"დოქტორი დაივერი ბრძანდებით?"

"დიახ — თქვენ მისტერ დამფრი?"

"როიალ დამფრი. ერთ საღამოს, იმ მშვენიერ ბაღში სადილზე ვიყავი თქვენთან".

"რა თქმა უნდა მახსოვს". მისტერ დამფრის ენთუზიაზმის განელება უნდოდა და დიკი მშრალ ქრონოლოგიაზე გადავი-და. "ეს იყო ათას ცხრაას ოცდაოთხ თუ ოცდახუთ…"

განზრახ არ ჯდებოდა, მაგრამ პირველი გამოჩენისას მეტად მორცხვი როიალ დამფრი ჯერ არ აპირებდა გუდა-ნაბადის აკვრას, ხმა დაიდაბლა და ინტიმურად დაელაპარაკა ფრანსის-კოს, მაგრამ ამას, ეტყობა, რცხვენოდა მისი, და უნდოდა ისევ დიკთან გაება ლაპარაკი.

"დოქტორო დაივერ — ვიდრე წახვალთ, მინდა გითხრათ — რომ არ მავიწყდება ის საღამო თქვენთან, ბაღში, თქვენი მიღება, შესანიშნავი იყავით თქვენც და თქვენი მეუღლეც. ის საღამო ჩემთვის ერთ-ერთი საუკეთესო მოგონებაა ცხოვრე-ბაში. ასეთ დახვეწილ . ხალხს, ერთად თავმოყრილს, ძნელად თუ სადმე შევხვედრივარ".

დიკი ნელ-ნელა, ცხრაფეხასავით იხევდა უკან ოტელის ყველაზე ახლო კარებისაკენ.

"მიხარია, რაკი ასეთი კარგი მოგონება დაგრჩათ. მე უნდა წავიდე, რომ ვნახო..." "მე შესმის", მაშინვე თანაგრძნობით მიუგო როიალ დამფრიმ. "გავიგე, რომ კვდება".

"ვინ კვდება?"

"იქნებ მე არ უნდა მეთქვა — მაგრამ ჩვენ ერთი ექიმი გვყავს".

დიკი შეფიქრიანდა, გაკვირვებით შეაჩერდა. "ვისზე ლაპარაკობთ?"

თქვენი ცოლის მამა, რა თქმა უნდა — მე იქნებ..." "ჩეში ვინ?"

"მე ვფიქრობ — როგორ, თქვენ მხოლოდ ჩემგან..."

"თქვენ იმის თქმა გინდათ, რომ ჩემი ცოლის მამა აქ, ლოზანაშია?"

"მაგრამ, მე მეგონა, თქვენ იცოდით — მე მეგონა, თქვენ აქ ამისთვის ჩამოხვედით".

"ვინ არის ის ექიმი, თქვენ რომ ახსენეთ?"

დიკმა ექიმის გვარი ჩაიწერა, ბოდიში მოიხადა და მაშინგე ტელეფონის ჯიხურისკენ წავიდა.

დოქტორ დანჟეს ახლავე შეეძლო დოქტორი დაივერი მიე-

ღო სახლში.

ახალგაზრდა ჟენეველ დოქტორს ჯერ შეეშინდა, შეძლებულ პაციენტს დავკარგავო, მაგრამ დიკმა დაამშვიდა, ამის შიში ნუ გექნებათო და დოქტორმა დანჟემ უთხრა, რომ მისტერ უორენი მართლა კვდებოდა.

"მხოლოდ ორმოცდაათი წლისაა, მაგრამ ღვიძლის მძიმე დისტროფია აქვს, ამ პროცესის დაჩქარების მიზეზია მემთვ-

რალეობა".

"სხვა?"

"სითხის გარდა, ვერაფერს იღებს — ბევრი-ბევრი ერთ კვირას გაძლოს, უფრო კი — სამ დღეს".

"მისს უორენმა, უფროსმა ქალიშვილმა, იცის მისი მდგომარეობა?"

"მისი საკუთარი ნების თანახმად, თავისი კამერდინერის გარდა არავინ იცის. მხოლოდ ამ დილას ვიგრძენი, რომ თვითონ მისთვისვე უნდა მეთქვა. ძალიან აღელდა, თავიდან კი, რელიგიურად შეეგუა თავის მძიმე მდგომარეობას".

"ასე "—ცოტა ფიქრის მერე თქვა დიკმა. "ასე თუ ისე,

ჯერჯერობით ჩემზე უნდა ავიღო ეს ამბავი. მაგრამ, მე მგონია, ოჯახი კონსილიუმს მოინდომებდა".

"როგორც გნებავთ".

"მათი სახელით გთხოვთ დაუკავშირდეთ ტბის მხარის ყვე-ლაზე დიდ ავტორიტეტს მედიციხაში — დოქტორ ჰერბრიუგეს ჟენევიდახ".

"მეც ვფიქრობდი ჰერბრიუგეზე".

"საღამომდე აქ ვრჩები და შეგეხმაურებით".

იმ საღამოს დიკი სენიორ პარდო ი სიუდად რეალთან წავიდა და ილაპარაკეს.

"ჩილიში თვალუწვდენელი მამულები გვაქვს "—თქვა მოხუცმა. "მე შემეძლო ფრანსისკოსთვის მიმენდო იქაურობის გაძღოლა, ან შეეძლო პარიზის ათობით საქმიანი წამოწყებიდან ერთ-ერთის მოთავე ყოფილიყო..." წუხილით გაიქნია თავი, წინ და უკან დადიოდა იმ ფანჯარასთან, რომლის, იქით შხაპუნა წვიმა მოდიოდა, გაზაფხულის, და ისეთი ხალისიანი, რომ გედებიც კი საფარქვეშ არ შემალულიყვნენ. "ჩემი ერთადერთი ვაჟი! რატომ არ შეგიძლიათ წაიყვანოთ თქვენთან, კლინიკაში?"

ესპანელი უცებ ფეხებში ჩაუვარდა დიკს. "არ შეგიძლიათ მოარჩინოთ ჩემი ვაჟი? მე მჯერა თქვენი — თქვენ შეგიძლიათ წაიყვანოთ კლინიკაში, მოარჩინეთ იგი".

"იმ შიზეზით, რაც თქვენ ახლა თქვით, არ შეიძლება, გინც გინდა იყოს, თავს მოახვიოთ იძულებითი მკურნალობა, მე ამ-ას არ ვიზამდი, თუნდაც შემეძლოს".

ესპანელი წამოდგა.

"ავღელდი — ამ ამბავმა მაიძულა..."

ვესტიბიულში ჩასული დიკი დოქტორ დანჟეს შეეჯახა.

"ეს-ეს არის ვაპირებდი თქვენთან დარეკვას", უთხრა მან, "იქნებ ტერასაზე გავიდეთ და ვილაპარაკოთ?"

"მისტერ უორენი გარდაიცვალა?" — იკითხა დიკმა.

"არა, ჯერ ყველაფერი ისევ ისეა. კონსილიუმი ხვალ დილით შედგება. მაგრამ ძალიან უნდა თავისი ქალიშვილის თქვენი ცოლის ნახვა — მე მგონია, რაღაც უთანხმოება ყოფილა…"

"შე ყველაფერი ვიცი".

ორივე ექიმი ერთმანეთს უყურებდა, ფიქრობდნენ.

"იქნებ თქვენ თვითონ გენახათ იგი, ვიდრე რამეს მოიფიქრებდეთ?" შესთავაზა დოქტორმა დანჟემ. "ძნელი სიკვდილით არ გათავდება, მხოლოდ დასუსტდება და მშვიდად ჩაიძირება".

დიკს გაუჭირდა დათანხმება.

. "დიახ, ვნახავ".

აპარტამენტი, სადაც ძნელი სიკვდილით არ თავდებოდა დევრე უორენი, ისეთივე იყო, როგორც სენიორ პარდო ი სიუდად რეალისა — ამ ოტელში ბევრი იყო ასეთი პალატები, სადაც დაუძლურებული მდიდრები და სამსგავროს გამოქცეულები, ანექსირებული სამთავროების ტახტის პრეტენდენტები, ოპიუმისა თუ ბარბიტოლის პრეპარატებით ცხოვრობდნენ და შოუშორებელ რადიოსავით, გამუდმებით ისმენდნენ ძველი ცოდვების ტლანქ მელოდიებს. ევროპის ამ კუთხეში იმდენად წარმტაცი ბუნებისთვის კი არ მოდიან, უფრო იმიტომ, რომ უხერხულ კითხვებს ერიდებიან. აქ ორი გზა ჯვარედინდება იმათი, ვინც კერძო სანატორიუმებსა თუ მთაში ტუბერკულოზის აგარაკებზე იტანჯებიან და იმათი, ვინც უკვე პერსონა გრატა აღარ არის საფრანგეთსა თუ იტალიაში.

პალატა ჩაებნელებინათ. მონაზონი წმინდანის სახით უვლიდა კაცს, მისტერ უორენს, თეთრ ზეწარზე ეგდო მისი კრიალოსანი და გამხდარი თითებით მარცვლავდა მას. იგი ისევ ლამაზი იყო და როცა ოთახიდან დანჟეს გასვლის მერე დიკს დაელაპარაკა, ხმაშიც კი თითქოს ძველი დღეების ჩახშობილი გამოძახილი შერეოდა.

"ცხოვრების ბოლოს ბევრ რაღაცას ვიგებთ, დოქტორო დაივერ. მხოლოდ ახლა გავიგე ის, რაც ადრე უნდა მცოდნო-და".

დიკი იცდიდა.

"მე ცუდი კაცი ვიყავი. თქვენ იცით, რომ ნიკოლის კვლავ ნახვეს მხოლოდ ძალიან მცირე უფლება მაქვს, მაგრამ ის, ვინც მაღლა დგას ჩემზეც და თქვენზეც, მიტევებასა და შებრალე-ბას გვასწავლის ყველას". თითებიდან კრიალოსანი გაუცურ-და, ატლასზე ჩასრიალდა და დიკმა აიღო, მიაწოდა. "მე რომ

ნიკოლის ნახვა შემეძლოს, თუნდ ათი წუთით, ბედნიერი წავიდოდი ამ ქვეყნიდან".

"ამას მე თვითონ ვერ გადავწყვეტ", თქვა დიკმა. "ნიკოლი არც ისე ძლიერია". დიკს უკვე მოეფიქრებინა და გადაეწყვი-ტა კიდევაც, მაგრამ თავს ისე იჭერდა, თითქოს ეეჭვება და ყოყმანობსო. "ჩემს კოლეგას უნდა ველაპარაკო კლინიკაში".

"რას იზამთ, დოქტორო — როგორც თქვენი კოლეგა იტყვის. ნება მიბოძეთ გითხრათ, თუ რა მოვალე ვარ თქვენი...

დიკი სწრაფად წამოდგა.

"დოქტორ დანჟესგან შეიტყობთ პასუხს".

თავის ოთახში დაბრუნდა თუ არა, მოითხოვა ცუგის ტბაზე, კლინიკასთან დაეკავშირებინათ. კარგა ხნის ლოდინის მერე კეტემ შინიდან უპასუხა.

"ფრანცს მინდა დაველაპარაკო".

"ფრანცი ზევით, მთაშია, ახლა მე თვითონ მივდივარ იქ, რამე უნდა გადავცე, დიკ?"

"საქმე ნიკოლს ეხება — მამამისი ლოზანაშია, კვდება. უთხარით ფრანცს, იცოდეს, რომ სასწრაფო საქმეა; სთხოვეთ იქიდან დამირეკოს".

"დიახ".

"უთხარით, რომ სამიდან ხუთამდე და შვიდიდან რვამდე ოტელში ვიქნები, ჩემს ოთახში, მერე შეუძლია რესტორანში მიკითხოს".

ამ საათებზე ლაპარაკის გამო დაავიწყდა გაეფრთხილებინა კეტე, რომ ნიკოლისთვის არ უნდა ეთქვა. უცებ გაახსენდა და გათიშეს კიდევაც. ალბათ თვითონვე მოიფიქრებდა კეტე და ნიკოლს არ ეტყოდა.

...სანამ პატარა ორთქლმავალით მთა-უდაბურში, მინდვრის ყვავილებისა და უეცარი ქარების გორაკისაკენ მიდიოდა, კეტეს არც უფიქრია იმაზე, ეთქვა თუ არა ნიკოლისთვის, რომ დიკმა დარეკა. აქ ბაზა ჰქონდათ, სადაც ზამთარში პაციენტები სათხილამუროდ მიჰყავდათ და გაზაფხულზე კი ისინი მთაზეც ადიოდნენ. მატარებლიდან ჩამოვიდა თუ არა, მაშინვე დაინახა ნიკოლი, თავის ბავშვებს მწყემსავდა, რაღაცას თამაშობდნენ, ერთი ამბავი ჰქონდათ და აშოშმინებდა. კეტე მიფიდა, მხარზე ნაზად დაადო ხელი და უთხრა:

"თქვენ ისე კარგად აგვარებთ ბავშვებთან ყველაფერს, ამ

გაფხულს ცურვა უნდა ასწავლოთ მათ".

თამაშში ისე იყვნენ გართულები, ნიკოლმა უცებ უნებურად გაიქნია მხარი და გამოვიდა, რომ უხეშად მოიშორა კეტე. კეტეს უხერხულად ჩამოუვარდა ხელი და მაშინვე გადაუხადა სიტყვებით მწარედ.

"ხომ არ გეგონათ, გეხვეოდით?" ავად და უკშეხად მიახალა. "უბრალოდ, დიკის გაშრ, ტელეფონით ველაპარაკე და შემე-

ცოდა..."

"დიკს რამე დაემართა?"

კეტე უცებ მიხვდა თავის შეცდომას, მაგრამ გვიანღა იყო, უტაქტოდ მოიქცა და ნიკოლის დაჟინებულ კითხვებზე: "...მაშ რად თქვით, რომ დიკი შეგეცოდათ?" უნდა ეპასუხა.

"დიკს არაფერი, მე ფრანცი უნდა ვნახო".

"არა, დიკს რაღაც მოუვიდა".

ნიკოლს სახეზე საშინელება ეწერა და დაივერების ბავშვებსაც შეძრწუნებული სახეები ჰქონდათ, იქვე იდგნენ და ყველაფერი ესმოდათ. კეტემ ვეღარ გაუძლო და ამოთქვა:

"შამათქვენი ავად არის, ლოზანაშია და დიკს უნდა ფრანცს

ამაზე ელაპარაკოს".

"ძალიან ავად არის?" ჩაეკითხა ნიკოლი — სწორედ ამ დროს მოვიდა ფრანციც, თავისი თბილი იერით, როგორიც პა-ციენტებთან იყო ხოლმე და გახარებულმა კეტემ მთელი სიმ-ძიმე მოიშორა — მაგრამ რაც დააშავა, იმას ვეღარას უშველიდა.

"მე ლოზანაში მივდივარ", გადაჭრით თქვა ნიკოლმა.

"ერთი წუთით", უთხრა ფრანცმა, "არ გირჩევთ, არ არის საჭირო, კარგია, ჯერ დიკს ველაპარაკო ტელეფონით".

"მაგრამ მერე აქაურ მატარებელზე დამაგვიანდება", არ დაეთანხმა ნიკოლი, "და ვეღარ მივასწრებ ციურიხის სამი საათის მატარებელს. თუ მამაჩემი კვდება, მე უნდა..." აღარ დაამთავრა, შეეშინდა ხმამაღლა ეთქვა. "მე უნდა წავიდე. თუ არ გავიქეცი, მატარებელზე დამაგვიანდება". მართლა მი-რბოდა უკვე, თან ლაპარაკობდა და თან მირბოდა იქითკენ, სადაც პატარა ორთქლმავალი თეთრი ორთქლის გვირგვინს ად-გამდა შიშველ ფერდობს და ქშენით იძვროდა. ერთხელაც მო-

იხედა და ფრანცს დაუძახა, "დიკს თუ დაელაპარაკებით ტელეფონით, უთხარით, რომ მივდივარ, ფრანც!"

...დიკი თავის ოთახში იჯდა და "ნიუ-იორკ ჰერალდს" კითხულობდა, როცა უცებ ოთახში მერცხალივით შემოიჭრა მონაზონი. ტელეფონმაც, ის იყო, დარეკა.

"გარდაიცვალა?" იმედით ჰკითხა მონაზონს დიკმა.

"მესიე, იგი გაქრა!"

"რა?"

"იგი გაქრა" — მისი კამერდინერიც გაქრა და ბარგიც", წარმოუდგენელი იყო. ასეთ მდგომარეობაში მყოფი კაცი ამდგარიყო და წასულიყო!

დიკი ტელეფონს მისწვდა, ფრანცი რეკავდა. "მაგრამ ნიკოლისთვის არ უნდა გეთქვათ!" ჩასძახა დიკმა.

"კეტემ უთხრა, ვერ მოიფიქრა და უთხრა."

"ჩემი ბრალია, რა თქმა უნდა. ქალს არაფერი არ უნდა უთხრა თავის დრომდე. კარგი, რაც არის, არის, გაგზალზე და- ვხვდები ნიკოლს... ფრანც, აქ გასაგიჟებელი ამბავი მოხდა... ეს კაცი ადგა და წავიდა..."

"რა ავიდა? ვერ გავიგე, რა თქვით".

"წავიდა-მეთქი, უორეხი — წა-ვი-და!"

"მერე რა მოხდა?"

"უკვე თითქმის კვდებოდა, კოლაფსისგან... ადგა და წავიდა, ალბათ ჩიკაგოში, მე ასე მგონია... არ ვიცი, მომვლელმა ქალმა მოირბინა, აქ არის ახლა... არ ვიცი, ფრანც — მეც ესეს არის გავიგე ეს ამბავი... მოგვიანებით დამირეკეთ".

თითქმის ორი საათი დაკარგა დიკმა უორენის კვალის ძებნაში, პაციენტმა, ეტყობა ისარგებლა პაუზით, როცა დღისა
და ღამის მორიგე მომვლელ ქალს ერთმანეთი უნდა შეეცვალათ, ბარში ჩავიდა და სწრაფად გადაკრა ოთხი ვისკი, ოტელისთვის ათასდოლარიანი ბანკნოტით გადაიხადა, დაიბარა,
ხურდა გადაეგზავნათ მისთვის და გაემგზავრა — ალბათ ამერიკაში. დანჟესთან ერთად ამაოდ სცადა დიკმა ვაგზალში დასწეოდა და ამასობაში ნიკოლსაც. ასცდა. ერთმანეთს ოტელის
ვესტიბიულში შეხვდნენ, ნიკოლი დაღლილი ჩანდა და მისი
მაგრად მოკუმული ბაგის დანახვაზე დიკს გული ჩაუვარდა.

"როგორ არის მამა?" იკითხა მან.

"უკეთესად. ეტყობა მაინც ძალა ჰქონდა". დიკი ყოყმანობდა, უცებ ვერ უთხრა. "ფაქტი ის არის, რომ ადგა და წავიდა".

დალევა მოუნდა, აქეთ-იქით სირბილში სადილის დროც აღარ იყო. გაოცებული ნიკოლი ბარში შეიყვანა, კოქტეილი

და ლუდი შეუკვეთა და ტყავის სავარძლებში ჩასხდნენ.

"ის კაცი, მას რომ მკურნალობდა, შეიძლება შეცდა პროგნოზში და ალბათ დიაგნოზშიც — მოიცა ერთ წუთს, დრო აღარ შქონდა ამაზე კარგად რომ მეფიქრა".

"ისე რომ, წავიდა?"

"პარიზის საღამოს მატარებელს მიუსწრო".

ორთავე გაჩუმდა. უსაზღვრო, ტრაგიკული აპათია მოღიოდა ნიკოლისაგან.

"ეს ინსტინქტია", თქვა ბოლოს დიკმა. "მართლა კვდებოდა, პაგრამ ძალა მოიკრიბა და თავისი ადრინდელი რიტმი აღიდ-გინა — მედიცინისთვის უცხო არ არის ასეთი შემთხვევები — ძველი საათივით — ხომ იცი, ერთი გაქანება და ისევ ისე ამუ-შავდება. მამაშენიც…"

"არ გინდა", თქვა ნიკოლმა.

"მისი ძირითადი საწვავი ყოველთვის შიში იყო, შეეშინდა და ამან შემატა ძალა. ალბათ ოთხმოცდაათ წლამდე იცოცხ-ლებს..."

"თუ შეიძლება, არ არის საჭირო". თქვა ნიკოლმა. "თუ შე-

იძლება, — მეტის ატანა არ შემიძლია".

"კარგი. ის ბიჭი, ვისი გულისთვისაც აქ ჩამოვედი, უიმედოა. ისე რომ, ხვალვე შეგვიძლია აქედან წასვლა".

"არ მესმის რად — რისთვის გჭირდება ეს ყველაფერი",

აღმოხდა ნიკოლს.

"ო, არ გესმის? ზოგჯერ მეც არ მესმის".

ნიკოლმა ხელი დაადო ხელზე.

"ო, მაპატიე, დიკ, არ უნდა მეთქვა".

ვიღაცამ ბარში პატეფონი შემოიტანა, ისხდნენ და "დახატული თოჯინის ქორწილს" უსმენდნენ. ერთი კვირის მერე, დილით ადრე წერილებისთვის კანტორაში შესულმა დიკმა რაღაც ხმაური გაიგონა: პაციენტი ფონ
კონ მორისი კლინიკას ტოვებდა. მისი მშობლები, ავსტრალიელები, ბარგს ბრაზმორეულები ყრიდნენ დიდ ლიმუზინში, იქვე იყო დოქტორი ლადისლაუ და უფროსი მორისის აგზნებულ
ჟესტიკულაციაზე უმწეოდ შლიდა ხელებს. თვითონ ახალგაზრდა მორისი, როცა მათ დოქტორი დაივერი მიუახლოვდა, განზე იდგა და მთელ ამ ამბავს ცინიკური იერით უყურებდა.

"რა აჩქარებაა, მისტერ მორის?"

მისტერ მორისი შეკრთა, დიკის დანახვაზე მისი ღაჟღაჟა სახე და კოსტიუმის მსხვილი ხაზები ელექტრონის შუქივით ერთბაშად ჩაქრა და მერე ისევ აინთო. დიკისკენ ისე წამოვიდა, საცაა უნდა გაარტყასო.

"კიდევაც გვიან მივდივართ, ადრე უნდა წავსულიყავით, და ისინიც, ვინც ჩვენთან ერთად მოვიდნენ თქვენთან", დაი-წყო და შეჩერდა, რომ სული მოეთქვა, "ადრე უნდა წავსული-

ყავით, დოქტორო დაივერ, უფრო ადრე".

"იქნებ ჩემთან, კაბინეტში გველაპარაკა", შესთავაზა დიკმა. "არა! ლაპარაკით ვილაპარაკებთ, მაგრამ მე ჩემდათავად არც თქვენთან და არც ამ კლინიკასთან აღარაფერი საქმე არა მაქვს, მე ხელები დამიბანია". თითს უქნევდა დიკს. "ამ დოქტორს მე ასეც ვუთხარი. ტყუილუბრალოდ დავკარგეთ ფულიც და დროც".

სლავმა დოქტორმა ლადისლაუმ თავისი ორჭოფულობით რაღაც უღონო, ვითომ პროტესტი გამოხატა. დიკს არ უყვარ-და კლადისლაუ. აღელვებული ავსტრალიელი როგორღაც ბი-ლიკზე გადაიყვანა და ისევ შესთავაზა კაბინეტში ელაპარაკათ.

ავსტრალიელმა თავი გაიქნია.

"ეს თქვენ, თქვენ გეხებათ დოქტორო დაივერ, სწორედ თქვენ, სხვას არავის. დოქტორ ლადისლაუს იმიტომ მივმართე, რომ თქვენ ვერა გნახეთ, დოქტორო დაივერ; დოქტორი გრე-გოროვიუსი კი საღამომდე არ დაბრუნდება, საღამომდე კი ვერ მოვიცდი, არა სერ! ერთ წუთსაც კი ვერ მოვიცდიდი ამის მე-რე, ჩემმა ვაჟიშვილმა ყველაფერი მითხრა".

მუქარით მიუახლოვდა და დიკს ხელი უკვე მზადა ჰქონდა,

რომ თუკი საჭირო იქნებოდა, დაეგდო კიდეც.

"ჩემი ვაჟიშვილი აქ იმისათვის მოვიყვანე, რომ ალკოჰოლიზმისაგან მომერჩინა, მან კი მითხრა, რომ თვითონვე აგდით
ღვინის სუნი. დიახ, სერ!" სწრაფად უნდოდა შეესუნთქა, მაგრამ არ გამოუვიდა. "თანაც, ერთხელ კი არა, ორჯერ შეგამჩნიათ ფონ კონმა, რომ ღვინის სუნი აგდიოდათ. არც ჩემს მეუღლეს და არც მე მაგარი სასმელი ერთი წვეთიც კი არ ჩაგვიშვია პირში, არასოდეს. ჩაგაბარეთ ფონ კონი, რომ მოგერჩინათ, მან კი ერთ თვეში ორჯერ იგრძნო, რომ ღვინის სუნი
აგდიოდათ. მითხარით, რა მკურნალობაზე შეიძლება იყოს აქ
ლაპარაკი?"

დიკი ყოყმანობდა; მისტერ მორისს ზედ კლინიკის ჭიშკარ-

თანაც შეეძლო სცენა გაემართა.

"ბოლოს და ბოლოს, მისტერ მორის, ხომ არ შეიძლება ზოგიერთებმა, ვინც გინდა იყოს, უარი თქვან იმაზე, რაც საზრდოს ეხება, მხოლოდ იმისთვის, რომ თქვენი ვაჟიშვილი..."

"მაგრამ, თქვენ ექიმი ხართ, კაცო!" გაცოფებულმა დაიყვირა მორისშა. "როცა მუშა ლუდს ეძალება, რაც უნდა ის ქნას, თავი ჩაიხრჩოს თუკი უნდა — მაგრამ თქვენ ხომ იმისთვის ხართ აქ, რომ სხვები მოარჩინოთ…"

"ეს მეტისმეტია. თქვენი ვაჟი ჩვენთან იმიტომ მოიყვანეთ,

რომ კლეპტომანია სჭირს..."

"მერე, რისგან?" უკვე მთელი ხმით ყვიროდა. "შავი სმისგან. იცით თუ არა რა ფერია შავი? შავია! ბიძაჩემი ამ სმის გულისთვის ჩამოკიდეს, გაიგეთ? ჩემი ვაჟიშვილი სანატორიუმში მიმყავს და იქ კი თურმე თვითონ ექიმი ილეწება!"

"მე უნდა გთხოვოთ, რომ დატოვოთ აქაურობა".

"მთხოვოთ! თვითონ მივდივართ, თვითონ!"

"თქვენ რომ ცოტა მოთშინება გქონდეთ, გეტყოდით, რასაც მივაღწიეთ ამ ხნის მანძილზე. ამ ვითარების მერე კი, ბუნებრივია, თქვენი ვაჟიშვილის, როგორც პაციენტის აქ დარჩენა აღარ იქნება…"

"თქვენ ბედავთ და მე მელაპარაკებით მოთმენაზე!" დიკმა დოქტორ ლადისლაუს მიუხმო და როცა იგი მიუახლოვდა, უთხრა: "კეთილი ინებეთ და ჩვენი სახელით პაციენტსა და შიზ

ოჯახს მშვიდობით მგზავრობა უსურვეთ".

ოდნავ თავი დაუხარა მორისს, კაბინეტში შევიდა და წამით მიხურულ კარებთან იდგა გამეხებული, მანამდე, სანამ
ხეპრე მშობლები და იმათი უსუსური, დეგენერატი ნაშიერი
ადგილიდან დაიძვრებოდნენ. წინასწარ უკვე კარგად ხედავდა,
როგორც მოივლიდა ეს ოჯახი მთელ ევროპას და თავიანთი
დახშული გონებითა და ფულით დააფრთხობდა წესიერ ხალხს,
მაგრამ ამ ქარავნის წასვლის ხმაური მიწყდა თუ არა, მერეღა
გაჩნდა ფიქრი იმაზე თუ რა ბრალი ჰქონდა მთელ ამ ამბავში.
სადილზეც და ვახშამზეც დიკი კლარეტს, წითელ ღვინოს სვამდა, დღის ბოლოს ცხელ რომს, ხანდახან შუადღითაც გადაკოავდა ჯინს — ჯინი თითქმის არ ტოვებს სუნს, ძალიან ძნელად თუ შეატყობ. ერთი სიტყვით, დღეში ნახევარ-პინტი ალკოჰოლი გამოდიოდა — თავისი სისტემისთვის ძალიან ბევრია,
გადაწვაც შეიძლება.

თავის მართლებას შეეშვა, მაგიდას მიუჯდა და რაღაც რეჟიმი შეადგინა თავის თავისთვის. ამ რეჟიმით ალკოჰოლი
ერთიორად მცირდებოდა. ექიმები, შოფრები და პროტესტანტი მღვდლები მაგარ სასმელს არ უნდა გაეკარონ, მხატვრების, მაკლერებისა და კავალერიის ოფიცრების საქმე სხვა
არის; თავის თავს დიკი იმას აბრალებდა, რომ არ გაფრთხილდა. მაგრამ ამბავი ჯერ კიდევ-არ იყო გათავებული; ეს ცოტა
ხნის მერე გაირკვა, როცა ორი კვირით ალპებში მყოფი ფრანცი მოვიდა და ხალისით სავსე, მუშაობასაც, ეტყობა ისე დანატრულდა, რომ კაბინეტში შესვლამდეც კი ჩაიძირა თავის
საქმეში. დიკი იქ, კარებთან შეხვდა ფრანცს.

"როგორ არის ევერესტი?"

"ხუმრობა იქით იყოს და ისეთი ტემპით მივდიოდით, ევერესტზე ასვლასაც კი მოვახერხებდით. ამაზედაც ვიფიქრეთ უკვე. აქ საქმე როგორ მიდის? როგორ არის ჩემი კეტე, როგორ არის თქვენი ნიკოლი?"

"შინ ყველაფერი რიგზეა, თქვენთანაც და ჩემთანაც. მაგრამ, ღმერთო ჩემო, ფრანც, კლინიკაში ერთი ოხერი ამბავი მოხდა დღეს, ამ დილით".

"როგორ, რა იყო?"

ფრანცი უკვე ტელეფონს მისწვდა, რომ კეტესთვის თავიანთ ვილაში დაერეკა და ვიდრე ოჯახურ ამბებზე ლაპარაკს მოათავებდნენ, დიკი ოთახში ბოლთასა სცემდა. მერე უთხრა: "მორისებმა ბიჭი წაიყვანეს — ერთი სკანდალი იყო".

"ვიცი, რომ უკვე წაიყვანეს, ლადისლაუ შემხვდა ვერან-

დაზე".

"რა გითხრათ ლადისლაუშ?"

"ახალგაზრდა მორისი რომ წავიდა და მთელ ამბავს თქვენ მეტყოდით. მიამბეთ რა მოხდა".

"ის, რაც ასეთ დროს ხდება ხოლმე. თავსა და ბოლოს რომ ვერ გაუგებ".

"გატიალებული ვიღაც კი იყო ის ბიჭი".

"მეტი რომ აღარ შეიძლება", დაეთანხმა დიკი, "მაგრამ სანამ მე მივდიოდი, მამამისი კოლონიზატორივით მიადგა ამ ლადისლაუს. ფრანც, ლადისლაუზე რა აზრისა ხართ? ღირს იმის აქ გაჩერება? მე ვფიქრობ, არ ღირს — ვერ გაიგებ ეს რა კაცია, თავს ხომ ვერაფერს ვერ მოაბამს". მართლის თქმის მიჯნასთან შედგა. სივრცე და რაღაც დრო სჭირდებოდა მანევრისთვის და შეიცადა. ფრანცი საგზაო ხელთათმანებითა და ტილოს სამტვრეთი, ეგრევე ჩამოჯდა მაგიდის კიდეზე. დიკმა დაიწყო:

"ეს მორისი მამამისთან ბევრ რაღაცას მიედ-მოედო და ერთი ის იყო, რომ თქვენი სახელოვანი კომპანიონი ლოთად დაუხატა. მამაშისი ფანატიკოსია და ფხიზლებზე გიჟდება. იმისმა შთამომავალმა კი ვითომდა აქაური ღვინის კვალი აიღო ჩემში".

ფრანცი დაჯდა, ქვედა ტუჩი წინ გამოსწია და ზედ დაიხე-

"შეგიძლიათ მერე მიამბოთ, რაც კი იყო". თქვა ბოლოს.

"ახლა გიამბობთ, რად გადავდოთ?" მიუგო დიკმა. "თქვენ თვითონ იცით, რომ მაგარ სასმელებს მე ისედაც არ ვეძალე-ბი", ელვის უმალ გაუყარეს თვალი თვალში, ორთავემ ერთად. "ამ ლადისლაუს გამო კი იმ კაცმა ისე აიშვა თავი, რომ დაც-ვაზელა უნდა მეფიქრა. ხომ შეიძლება პაციენტები გამოსუ-ლიყვნენ და იმათ ენახათ ეს ამბავი, როგორია, ასეთ სიტუა-ციაში თავის დაცვა".

ფრანცმა ხელთათმანები წაიძრო და სამტვრე მოიხსნა. მერე კარებთან მივიდა, მდივანს უთხრა: "არავინ შემოვიდე-სო" და ოთახში შესული ისევ თავის გრძელ მაგიდას მიუახ-ლოვდა. წერილებს არჩევდა, მაგრამ ცითომ არჩევდა, იმ ხალ-ხივით, ნიღაბი რომ სჭირდებათ ხოლმე, რათა იოლად თქვან, რაც სათქმელად ძნელია მათთვის.

"დიკ, მე თქვენ გიცნობთ როგორც თავდაოკებულსა და მეტად დინჯ კაცს, სხვა ამბავია ის, რომ ალბათ ერთნაირი აზრი არა გვაქვს ალკოჰოლზე, მაგრამ ახლა დადგა დრო — დიკ, გულწრფელად გეტყვით, რამდენჯერმე შევამჩნიე, რომ შეუფერებელ მომენტშიც კი დაგილევიათ და ესეც არის ერთი მიზეზი, იქნებ სცადოთ, იქნებ ერთხელაც ცოტა ხნით წასვლა საჭიროა?"

"სულაც წასვლა", უნებლიეთ თქვა დიკმა. "ცოტა ხნით წასვლა არაფერს შეცვლის".

ორივეს ბრაზი ერეოდა, ფრანცს — დაბრუნების სიხარულის ჩახშობისა და ჩაშხამებისთვის.

"ზოგჯერ თქვენ კარგავთ საღ აზრს, დიკ".

"ვერასოდეს ვერ ვიგებდი რას ნიშნავდა საღი აზრი რთულ შემთხვევებში — თუ არა იმას, რომ ზოგადი პროფილის ექიმს შეუძლია ოპერაციის გაკეთება და ქირურგ-სპეციალისტზე უფრო კარგადაც".

დიკი უცებ აუტანელმა ზიზღმა მოიცვა იმის მიმართ, რაცა ხდებოდა. ახსნა, რაღაცის გამთელება — ამ ასაკიდან უკვე ორი-ვე გამოვიდა — ისევ ძველი ჭეშმარიტების გაბზარული ხმის ექო იყოს, ასე ჯობია.

"ერთი გზა უკვე აღარა გვაქვს", მოულოდნელად თქვა მან.

"მეც ასე ვფიქრობ, ასე მგონია", აღიარა ფრანცმა. "საქმის ინტერესი დაკარგეთ, დიკ, გულს აღარ უდებთ".

"ვიცი, და მინდა საქმიდან გამოვიდე — შეიძლება ისე გაკეთდეს, რომ ნიკოლს ფული ერთბაშად კი არ დაუბრუნოთ მხოლოდ თანდათან".

"ამაზე მეც ვიფიქრე, დიკ — დიდი ხანია ვატყობ, რომ ასე მოხდებოდა და ამ საუბარს ვერ ავცდებოდით. ახლა ისიც შემიძლია, რომ სხვა შევიგულო კომპანიონად და წლის ბოლოს ფული უკვე მთლიანად დაგიბრუნოთ".

დიკს არ ეგონა, ასე ჩქარა თუ გადაწყვეტდა, იმასაც არ ელოდა, რომ ფრანცი თითქმის მზად იყო გათიშულიყვნენ და მაინც, შვება იგრძნო. კარგა ხანია გრძნობდა და ლამის უსა-სოოდაც, თავისი პროფესიის ეთიკის ამ დაშლა-ჩანაცვრას.

## IV

დაივერები რივიერაზე დაბრუნდებოდნენ, რივიერაზე იყო იმათი სახლი. მაგრამ ვილა "დაიანა" მთელი ზაფხულით ისევ რენტითა ჰქონდათ მიცემული და სანამ ზაფხული გავიდოდა, გერმანიის მინერალურ წყლებსა და საკათედრო ტაძრებით ცნობილ საფრანგეთის ქალაქებში იმყოფებოდნენ, აქ კარგად იყვნენ, რამდენიმე დღე მაინც ყოველთვის კარგად იყვნენ. დიკი ცოტ-ცოტას წერდა, ოღონდ უსისტემოდ, მხოლოდ ხანდახან; ცხოვრების ერთი ის ხანა იყო, როცა ელი, და უნდა ელოდა — მუშაობისთვის არა, და არც ახალი შეტევისათვის — ნიკოლს არგო მოგზაურობამ, კარგად იყო; უბრალოდ, უნდა ელოდა. ერთი ფაქტორი, რაც იმ ხანას აზრს ანიჭებდა, ბავშ-ვები იყო.

გავშვებისადში ინტერესი იმათ ასაკთან ერთადაც უფრო მატულობდა. ლანიე ახლა თერთძეტის იყო, ტოპსი კი ცხრისა. დიკმა მოახერხა გუვერნანტებისა და ძიძებისთვის შემოევლო და დაახლოებოდა მათ იმ პრინციპით, რომ ვერც მეტისმეტი სიმკაცრე და ვერც იმის შიში, რომ ბავშვებს სიმკაცრე არ შეემჩნიათ, გერ შეცვლიდა ზრუნვასა და შეუნელებელ ყურადღებას, თვალყურის დევნებას და თანაბარზომიერებას, რასაც ერთი ბოლოსაკენ მივყავართ მერე, რომ გარკვეული დისციპლინისა იყვნენ ბავშვები. ორივეს ზნე და ხასიათი ახლა ნიკოლზე უკეთ იცოდა დიკმა და გერმანული, ფრანგული ან იტალიური ღვინოებით ცოტაოდნად შეხურებული, დიდხანს ეთამაშებოდა და ელაპარაკებოდა ხოლმე ორივეს. ორთავეს ჰქონდა ის ნაღვლიანი მომხიბვლელობა, თითქმის სევდა, იმ ბავშვებს რომ ახასიათებთ, რომლებსაც ადრე ასწავლიან, რომ არც სიცილს უნდა აჰყვნენ ძალიან და არც ხმამაღლა უნდა იტირონ. თითქოს ამათ არც კი იცოდნენ დაუდგრომლობა,

მორჩილი იყვნენ თავინთი ცხოვრების ამ სადა რეჟიმის და იოლადაც სჭერდებოდნენ სადა გართობას ან უბრალო სია-მოვნებას. თანაბარი, მშვიდი ცხოვრებით ცხოვრობდნენ, რო-გორც დასავლეთ სამყაროს ძველ, კარგ ოჭახებშია მიღებუ-ლი და აღზრდა მათთვის გამოცდად და შემოწმება-გამოჩენად არა ქცეულა. დიკს, მაგალითად, მიაჩნდა, რომ ბავშვებს, თუ-კი დუმილს მიაჩვევ, მერე და მერე დაკვირვების უნარიც უფ-რო კარგი ექხებათ.

ლანიე მეტად ცოდნისმოყვარე ბიჭი იყო. ხშირად ძალიან უცნაურ რამეს იკითხავდა. "მაინც რამდენი შპიცია საჭირო ერთი ლომის დასაჭერად, მამა?" და გაუთავებლად ქანცავდა დიკს ასეთი კითხვებით. ტოპსი უფრო დამყოლი იყო, მშვეხიერი, ქერა, თეთრი და გრაციოზული — ნიკოლივით, და ეს მსგავსება ერთხანს კიდევაც აშფოთებდა დიკს; მაგრამ ცხრა წლისა მომაგრდა და თავისი ტოლი ამერიკელი ბავშვებივით ძლიერი ჩანდა. კმაყოფილი რომ იყო დიკი ორივეთი, ამას ბავშვებთან არასოდეს იტყოდა ხოლმე. ცუდად არ უნდა მოქცულიყვნენ — "ვინც შინ არ სწავლობს ზრდილობასა და კარგ საქციელს", ამბობდა დიკი, "იმას ცხოვრება მერე მათრახით ასწავლის ჭკუას და დაიტანჯება. რა მოხდა, ტოპსი თუკი არ "გამაღმერთებს?" ცოლად კი არ გზრდი".

ეს ზაფხული და შემოდგომა სხვა რაღაცითაც გამოირჩეოდა — ჭარბი ფულით. ფრანცი გზავნიდა კლინიკიდან და ამერიკიდანაც მოდიოდა ნიკოლის ფული — უფრო და უფრო დიდი მოგება. ფული იმდენი იყო, რომ მარტო იმასღა უნდებოდნენ, რაზე დაეხარჯათ და მერე კი, რაც ეყიდათ, მოევლოთ მისთვის, განცხრომით და მართლა საარაკოდ მოგზაურობდნენ.

ერთი ასეთი მოგზაურობა ბაიენში მატარებლით ჩასვლაც კი იყო, ორი კვირით რომ წავიდნენ იქ დაივერები. საძინებელ ვაგონში თავმოყრა იტალიის საზღვართან დაიწყო. მეორე კლასის ვაგონიდან მადამ დაივერისა და გუვერნანტის მოახლეები მოვიდნენ, რომ ბარგისა და ძაღლების დაბინავებაში მიხმარებოდნენ. მადმაზელ ბელუას ხელის ბარგისათვის უნდა მიეხედა, ერთ მოახლეს სილიჰემ-ტერიერები ჩააბარეს, მეორეს კიდევ — პეკინესები, ჩინურები. ასეთ ცხოვრებას რომ

იქმნის ქალი, მაინცდამაინც მისი სულის სიმჭლევე კი არ ვლინდება ხოლმე — აქ ინტერესთა სიჭარბეცა ჩანს, თუკი ნიკოლი ავად არ იყო, ყველაფერს კარგად უძღვებოდა. თუნდაც იმოდენა ბარგი — ბაიენში საბარგო ვაგონიდან ოთხი საგზაო დიდი კარადა გადმოიტანეს, ფეხსაცმელების ზანდუკი, სამი საგზაო შლაპების სკივრი და კიდევ ორი მუყაოს ყუთი შლაპებისთვის, გუვერნანტის და მოახლეების ბარგი-ბარხანა, კარტოთეკების პატარა ყუთი, საგზაო აფთიაქი, სპირტქურა და მისი სათავსი, კალათები პიკნიკისათვის, ჩოგბურთისთვის ჩოგნები, ერთი ოთხი მაინც, შალითებსა და პრესებში, პატეფონი და საბეჭდი მანქანა. გარდა ამისა, თან მიჰქონდათ ოცამდე საკვოიაჟი, ზურგჩანთები და პაკეტები. ყველა ნივთს ჰქონდა ციფრიცა და იარლიყიც. ხელჯოხებსაც კი, თავიანთი ბუდეებითა. ასე, ამგვარად, რომელ პლატფორმაზეც უნდა გადმოსულიყვნენ, ორ წუთშიც კი შეიძლებოდა ამ ყველაფრის შემოწმება ორი სიით, "დიდი სიით" და "მცირე სიით", ყოველთვის თავის ჩანთაში რომ ედო ნიკოლს, ხოლო მერე ზოგს შესანახად გადადებდნენ, ზოგსაც იღებდნენ, რომ თან ჰქონოდათ. ნიკოლმა ბავშვობაშივე შეიმუშავა ეს სისტემა, თავის ჯანით სუსტ დედასთან ერთად რომ მოგზაურობდა ხოლმე და ყოველთვის პოლკის იმ ინტენდანტის პუნქტუალობით იცავდა მას, სამი ათასი ჯარისკაცის გამოკვებასა და ამუნიციაზე რომ უნდა იფიქროს.

დაივერები მატარებლიდან გადმოიშალნენ და ხეობის უკვე შედედებულ, ნაადრევ ბინდბუნდს შეერივნენ. საუკუნის წინათ იტალიაში ლორდ ბაირონის პილიგრიმობა რომ იწვევდა, ისეთი კრძალვის შიშით შეჰყურებდნენ იმ სოფლის ბინადრები ამათი ბარგის გადმოლაგებას. მასპინძელი გრაფინია დი მინგეტი იყო, ყოფილი მერი ნორთი. ნიუარკში მეშპალერეს სავაჭროს თავზე, პატარა ოთახიდან დაწყებული გზა საკვირველი და უცნაური ქორწინებით დაგვირგვინდა თურმე ახლახან.

ტიტული "გრაფი დი მინგეტი" მერის მეუღლეს არცთუ ისე დიდი ხნის წინათ უბოძა პაპმა — მისი სიმდიდრის გამოც მოხდა ეს — მერის მეუღლე სამხრეთ-დასავლეთ აზიის მანგა-ნუმის საბადოების მფლობელი იყო. სახის კანის ფერი საკმა-ოდ მუქი ჰქონდა და მეისნ-დიქსონის სამხრეთის ხაზზე, პულ-

მანის ვაგონში არ შეუშვებდხენ. იმ ქაბილ-ბერბერ-სებეურინდუსურ მოდგმას ეკუთვნოდა, ჩრდილო აფრიკასა და აზიას სარტყლად რომ გასდევს. ევროპელები ამათ უფრო სიმპათიი-

თაც ექცევიან, შერეულ რასებზე უფრო მეტად.

წარჩინებული ოჯახები, ერთი აღმოსავლური, და ერთი კიდევ დასავლეთიდან, ვაგზლის ბაქანზე რომ შეხვდნენ ერთმანეთს, დაივერების განცხრომა მათთან, ახალი ქვეყნის ახალ ბინადრის სისადავესღა ჰგავდა ახლა. ამათ მასპინძლებს თან ახლდნენ იტალიელი მაჟორდომი ხელში კვერთხით, ოთხი ჩალმიანი მოტოციკლისტი და ორი ჩადრიანი ქალი, თვალებილა უჩახდათ მხოლოდ. ისინი ოდხავ მოშორებით, მოკრძალებით მოჰყვებოდნენ მერის, ნიკოლს აღმოსავლურ მანერაზე უძღვნეს სალამი და ამ ჟესტის გამო, გაოცებული ნიკოლი შეხტა.

თავად მერის, ისევე როგორც დაივერებს, ეს ცერემონია ცოტა არ იყოს, კომიკური ეჩვენებოდა, თავის მართლებასავი-თაც კი ჩაიცინა; ოღონდ, როცა მეუღლე წარუდგინა მათ, მი-სი აზიური ტიტული ქედმაღლურად წარმოთქვა და კარგა ხმა-

მაღლაც.

თავიანთ ოთახებში, სადილისთვის რომ იცვლიდნენ სამოსს, დიკმა და ნიკოლმა ერთმანეთს გადახედს და გაილიმეს: მდიდრებს, რომლებიც თავიანთ თავს დემოკრატებად მიიჩნევენ, უყვართ ხოლმე გათამაშება, თითქოსდა სხვების აშკარა ტრაბახს ვერ იტანენ.

"პატარა მერი ნორთმა იცის რაც უნდა", ჩაიდუდუნა დიკმა, სახეზე საპარსი კრემი ესვა და იპარსავდა. "ეიბმა გაანათლა

და ახლა ბუდასაც გაჰყვა ცოლად".

ნიკოლმა ნესესერიდან ასწია თავი. "დიკ, ენას კბილი დააჭირე, გაიგე?" მაგრამ თავი ვერ შეიკავა და გაიცინა. "როგორც გინდა თქვი, დიდებულები კი არიან. მათი გამოჩენისას სამხედრო გემები ქვემეხებს ისვრიან თუ სალუტს აძლევენ და რაღაც ასეთი. როცა მერი ლონდონში ჩადის, იქ მეფურად ხვდებიან ხოლმე".

"კარგი, კარგი", დაეთანხმა დიკი. ნიკოლი ვიღაცას უხს ნიდა კარებთან, რომ ქინძისთავები სჭირდებოდა, დიკმა გაიგონა და დაუძახა: "იქნება უთხრა, ცოტა გისკიც მოიტანონ! მთის ჰაერისაგან ძალა მომეცა".

"უკვე ვუთხარი". ახლა სააბაზანოდან მოესმა ნიკოლის ხმა. "ვაგზალში რომ დაგყხვდხენ, იმ ქალებიდან ერთ-ერთი იყო, ოღონდ, უჩადროდ".

"თავის ცხოვრებაზე რა გიამბო მერიმ?"

"თითქმის არაფერი — უფრო მაღალი წრის ახალი ამბები აინტერესებს — ჩემი გენეალოგიაც გამოიკითხა და ბევრი ასეთი რამეები — გეგონება რამე ვიცოდე. მის მეუღლეს, როგორც გავიგე, ორი შავგვრემანი შვილიცა ჰყავს ამის წინა ქორწინებიდან. ერთ მათგანს რაღაც აზიური სნეულება სჭირს, ჯერ ვერ დაადგინეს — რა. ბავშვები უნდა გავაფრთხილო, მოერიდონ. რაღაც ძალიან უხერხული კი გამოდის, მერი იგრძნობს, რომ ამაზე ვღელავთ". შეშფოთებული გაჩერდა წუთით.

"არაფერია, მერი გაიგებს". დაამშვიდა დიკმა. "თანაც,

ბავშვი ალბათ მწოლიარეა".

სადილზე დიკი ჰოსეინს ესაუბრებოდა, ინგლისურ სკოლაში სწავლობდა თურმე. ჰოსეინი ბირჟაზე და ჰოლივუდზე ეკითხებოდა დიკს და ესეც, შამპანურით შეხურებული, რაღა რა უაზრო ამბავს არ უყვებოდა.

"ბილიონები?" კიდევ ერთხელ ეკითხებოდა ჰოსეინი.

"ტრილიონები", არწმუნებდა დიკი.

"მე ეს ვერც კი წარმომედგინა..."

"ან, შეიძლება მილიონები", დათმობაზე წავიდა დიკი. "ოტელში ყველა სტუმარი შედის ჰარამხანაში — ან, რაც თითქმის ჰარამხანაა".

"თუნდაც რეჟისორი ან აქტიორი არ იყოს?"

"სულ ერთია, თუნდაც ჩვეულებრივი კომივოიაჟერი იყოს. მე თვითონაც მაშინვე ერთი ათი კანდიდატი გამომიგზავნეს, მაგრამ ნიკოლმა ხელი შემიშალა".

თავიანთ ოთახში მარტო რომ დარჩნენ, ნიკოლი საყვედურებით მიადგა.

"ამდენი ვისკის დალევა რა იყო? რად უნდა გეხმარა მასთან "შავი მაშხალა?"

"მაპატიე, უნებურად წამომცდა, მინდოდა რომ "შაშხანა" შეთქვა".

"დიკ, პირდაპირ, ვეღარა გცნობ".

"კიდევ მაპატიე. ჩემს თავს თვითონაც ვეღარა ვცნობ ბო-

ლო ხანებში".

იმ ღამით დიკმა სააბაზანოს ფანჯარა გამოაღო, ფანჯარა თაგვისფერი ციხესიმაგრის მილივით ვიწრო ეზოში გადიოდა და იქიდან რაღაც უცხო და ნაღვლიანი, ფლეიტის ხმასავით სევდიანი ჰანგი მოესმა. რომელიღაც აღმოსავლურ ენასა თუ დიალექტზე გალობდა ორი კაცი. ბევრი "კ" და "ლ" იყო ამ დიალექტში. დიკმა ფანჯრიდან გადაიხედა, მაგრამ ვერავინ დაინახა; რელიგიური იყო გალობა, ამის მიხვედრა არა ჭირდა და გრძნობებისაგან დაცლილს და დაღლილს, მოუნდა, რომ ახლა მისთვისაც ელოცათ იმათ, მაგრამ რისთვის, ეს არ იცოდა, მხოლოდ იმისთვის, რომ უთმენელ სევდას საბოლოოდ არ დაერია ხელი, ამისთვის?

დილაადრიან სანადიროდ გამეჩხრებულ ტყიან ფერდობზე გავიდა ყველა. გამხდარ, ძვალტყავა ფრინველებს ესროდნენ, კაკბებსა ჰგვანდნენ. თითქოს ინგლისურ მანერაზე ნადირობდნენ, ერთი ათი უხეირო ბაზიერით, და იმის შიშით, რომ მათთვის არ მოეხვედრებინა, დიკი მხოლოდ ჰაერში, თავზემოთ ისროდა.

დაბრუნებისას, თავიანთ ოთახში ლანიე დახვდათ — ელოდებოდა.

"მამა, შენ მითხარი, რომ თუ სადმე ავადმყოფ ბიჭთან ახულო ვიქნებოდით, მაშინვე მეთქვა".

ნიკოლმა იმწამს შიშით შეჰკივლა.

"...ჰოდა, დედა", დედას მიუბრუნდა და განაგრძო ლანიემ, "ეს ბიჭი ყოველ საღამოს ბანაობს აბაზანაში და დღეს ჩემ წინ იბანავა, მერე მე უნდა ჩავსულიყავი იმის წყალში და წყალი ჭუჭყიანი იყო".

"რა, რა თქვი?"

"მე ვნახე, რომ იმ აბაზანიდან ამოიყვანეს ტონი, მერე მე მითხრეს, რომ ჩავსულიყავი, და წყალი ჭუჭყიანი იყო".

"მაგრაშ — ჩახვედი?"

"ჰო, დედა".

"ღმერთო!" წამოიძახა ნიკოლმა და დიკს შეხედა.

დიკი ლანიეს ჩაეკითხა: "ლჲუსიენმა თვითონ რატომ არ მოგიმზადა აბაზანა?" "ლიუსიენს არ შეუძლია — რაღაცნაირი უცნაური სანთებელია, გუშინ ალი გამოვარდა და მკლავი დაეწვა, და ახლა ეშინია, და იმ ქალებიდან ერთ-ერთი..."

"ამ სააბაზანოში შედი ახლა და დაიბანე".

"ოღონდ, თქვენ არ უთხრათ, რომ მე გითხარით", კარიდან გამოიხედა და სთხოვა ლანიემ.

დიკი უკან მიჰყვა და აბაზანას კარბოლმჟავა მოასხა. კარი რომ მიხურა, ნიკოლს უთხრა:

"ან მერის უნდა მოველაპარაკოთ, ან იქნებ უკეთესი იყოს სულაც წავიდეთ აქედან".

ნიკოლი დაეთანხმა და დიკმა განაგრძო:

"თავიანთი ბავშვები სხვებისაზე სუფთები ჰგონია ყველას და ავად თუ გახდნენ, როგორ იქნება იმათგან რამე გადაედოთ".

შემოვიდა, ღვინო დაისხა, ბისკვიტს მიადგა და აბაზანაში მოთქრიალე წყლის რიტმის აყოლებით, გამწარებით და გააფ-თრებით მოჰყვა ხრამახრუმს.

"მანამდე კი უთხარი ლჲუსიენს, ისწავლოს იმ სანთებლის ანთება", ურჩია მან. სწორედ ამ დროს ოთახში იმ აზიელმა ქალმა შემოიხედა, ვისზეც ლანიე ლაპარაკობდა.

"გრაფინია —"

დიკმა თავის დაქნევით სთხოვა ოთახში შემოსულიყო და კარი მიხურა.

"როგორ არის პატარა ბიჭი, ახლა კარგად?"

"დიახ, უკეთ არის; ოღონდ, ბუგრი ჯერ ისევა აქვს".

"არ არის კარგი — ვწუხვარ. ოღონდ იცით — როცა ის გავშვი იბანავებს, არ შეიძლება მერე ჩვენი ბავშვების ბანაო-ბა იმავე წყალში. არ შეიძლება ამის დაშვება. უეჭველია თქვე-ნი ქალბატონი აღშფოთდებოდა, ალბათ არ იცის, რომ ეს გაა-კეთეთ".

"მე?" თავზარდაცემულმა შეხედა დიკს. "მე უბრალოდ დავინახე, რომ თქვენი მოახლე ვერ ანთებდა სანთებელს და — ვაჩვენე, როგორ უნდა აენთო იგი".

"მაგრამ ის ბიჭი რომ ამოიყვანეთ, ჯერ წყალი უნდა გაგეშვათ და ის აბაზანა ძალიან კარგად გაგერეცხათ".

"შე?"

გეგონება სული შეეხუთაო, ძლივს ამოისუნთქა, ქვითინი წასკდა და ოთახიდან გავარდა.

"რა მაინცდამაინც ახლა უნდა, რომ ეზიაროს დასავლურ

ცივილიზაციას", ბრაზმორევით თქვა დიკმა.

იმ დღესვე, სადილზე დიკმა უკვე გადაწყვიტა, რომ გიზი-ტი ჩაიშალა და რაც უფრო ჩქარა წავიდოდნენ, მით უკეთესი. ჰოსეინი თავის ქვეყანაზეც კი ვერაფერს ამბობს, ერთი იმას გაიძახის, რომ იქ ბევრი მთები და თხებია და იმ თხებს მწყემსები მწყემსავენ მთებში. გულჩახვეული ჯეელი იყო — ძნელად იცოდა ლაპარაკი და კაცს ძალა უნდა დაეხარჯა საამისოდ. დიკს კი შინაურებისთვის უფრო უნდოდა ახლა ეს ძალა. სადილის მერე ჰოსეინმა მალე დატოვა მერი და დაივერები, მაგრამ ის სიახლოვე სადღა იყო — ამათ შუა სოციალური ველი იყო და მერი ხდებოდა ველის მპყრობელი. დიკობა შვება იგრძნო, როცა ასე, ათისთვის, მერის ბარათი მიუტანეს, მერიმ იმ ბარათს გადახედა და წამოდგა.

"თუ შეიძლება მაპატიეთ. ჩემი ქმარი მიემგზავრება, რა-

ღაცა სასწრაფოა და მე მასთან უნდა ვიყო ახლა".

დილით, ჯერ არც კი ამდგარიყვნენ, ის იყო, ყავა შემოუტანეს და ოთახში მერიც შემოვიდა. ესენი იწვნენ და მერის კი, ეტყობოდა, კარგა ხანია ამდგარიყო. სახეზე დაოკებული რისხვა აჩნდა.

"ეს რა ამბავი და რა ლაპარაკია, თითქოს ლანიე ჭუჭყიან წყალში აბანავეს?"

დიკმა დაიწყო მაგრამ შეაწყვეტინა:

"როგორ მოხდა, რომ თქვენ ჩემს ერთ-ერთ მულს ლანიესთვის აბაზანის გარეცხვა უბრძანეთ?"

ისევ იდგა, მოუთმენლად შესცქეროდა და ესენი კი, მუხ-ლებზე ლანგრები ედოთ და კერპებივით გაშტერებული უყუ-რებდნენ. ორთავემ ერთად წამოიძახა:

"მულს!"

"როგორ უბძანეთ ჩემი ქმრის დას, რომ აბაზანა გაერეცხა!"

"რას ამბობთ!" ისევ ერთხმად და ერთი და იგივე ფრაზა წამოიძახეს — "შე მოახლეს ველაპარაკე".

"თქვენ ელაპარაკებოდით ჰოსეინის დას".

დიკს მხოლოდ ამის თქმაღა შეეძლო:

"შე ვიფიქრე ეს ქალები მოახლეები არიან-მეთქი".

"მე აგიხსენით, ვინც არიან — ჰიმადუხ".

"რა?" დიკმა ხალათი მოისხა და როგორღაც ადგა საწოლიდან.

"მე გუშინწინვე აგიხსენით, როიალთან რომ ვისხედით.

სადილზე არც ისე ბევრი დალიეთ, რომ ვერ გაგეგოთ".

"რა თქვით მაშინ? თავიდან ვერ მოგისმინეთ, მერი, თანაც მე, როგორღაც ვერ — სხვებზე გვეგონა. რახან ასეა, მხოლოდ ის უნდა გავაკეთოთ, რომ მივიდეთ და ბოდიში მოვუხადოთ".

"ბოდიში მოუხადოთ! მე თქვენ აგიხსენით, რომ როცა ოჯახის უფროსი წევრი, როცა გვარის უფროსი გამგრძელე-ბელი ცოლს შეირთავს, მაშინ ორი უფროსი და აღთქმას დე-ბენ, რომ მისი ცოლის მხლებლები გახდნენ, სეფექალები, ამ-ას ჰქვია — ჰიმადუნი".

"იმიტომ ხომ არ წავიდა უცებ ჰოსეინი?"

მერი შეყოყმანდა; მერე თავი დაიქნია.

"სხვაგვარად არ შეეძლო — დებიც იმასთან ერთად გაემგზავრნენ. აქ ოჯახის ღირსებაზეა ლაპარაკი".

ნიკოლიც ადგა და ახლა ორივე დაივერი უკვე იცვამდა. მერიმ განაგრძო:

"ის რაღაა, აბაზანაში წყლის ამბავი — თითქოს შეიძლება, რომ ასეთი რამე მოხდეს ამ სახლში! ახლავე დავუძახებთ ლა-ნიეს და ვკითხავთ".

დიკი საწოლის კიდეზე ჩამოჯდა, და ისე, რომ მერის არ შეემჩნია, ნიკოლს ანიშნა. ამასობაში მერიმ კარი გამოაღო და ვიღაცას იტალიურად უბრძანა რაღაც.

"მოიცათ მერი", თქვა ნიკოლმა. "არ მინდა აქ ბავშვის ჩარევა".

"თქვენ ბრალი დაგვდეთ", მიუგო მერიმ, ამ ტონით ადრე მას არასოდეს მიუმართავს ნიკოლისათვის. "ახლა მე უფლება მაქვს, რომ შევამოწმო".

"მე არ მინდა, რომ ბავშვი ჩარიოთ ამ საქმეში". ნიკოლმა ჯაჭვის პერანგივით შემოიჭირა სამოსელი.

"კარგი, ნიკოლ", უთხრა დიკმა. "მოვიდეს ლანიე და გავარკვევთ ბოლოს, რა არის ფაქტი და რა შეთხზული". ლანიე შემოიყვანეს, ჯერ ისევ ეძინებოდა და უფროსების ბრაზიან სახეებს აბნეული და გაშტერებული აცქერდებოდა.

"ლანიე, ლანიე", მიმართა მერიმ, "როგორ მოხდა, როგორ იფიქრე, რომ იმ წყალში ჩაგსვეს, რომელშიც უკვე იბანავეს?" "თქვი", უთხრა დიკმა.

"ჭუჭყიანი იყო და შეტი არაფერი".

"მაგრამ, შენი ოთახიდან ხომ გესმოდა, როგორ მოჩხრია-

ლებდა წყალი?"

ლანიეს შეეძლო დაეშვა, რომ იქნება ასეც იყო, მაგრამ აზრი მაინც არ შეუცვლია — წყალი ჭუჭყიანი იყო. ცოტა შე-შინებული ჩანდა და მეტის თქმაც სცადა:

"არ შეიძლება ახალი წყალი ყოფილიყო, იმიტომ, რომ..."

სიტყვაზე დაიჭირეს.

"რატომ?"

ოთახის შუაგულში თავისი პატარა კიმონოთი საწყლად იდგა და მშობლებს შეებრალათ, მერი ელოდა, მოუთმენ-ლად — და ლანიემ თქვა:

"წყალი ჭუჭყიანი იყო, იმიტომ, რომ შიგ საპნის ქაფი

იყო".

"როცა არ გჯერა რასაც ამბობ" — დაიწყო მერიმ, მაგრამ ნიკოლმა შეაჩერა:

"თავი დავანებოთ, მერი, რაკი წყალში ქაფი იყო, ბუნებრივია ეფიქრა, რომ იმ წყალში უკვე სხვამ იბანავა. მამამისმა კი გააფრთხილა ეთქვა, რომ თუკი…"

"არავითარი საპნის ქაფი არ შეიძლება შიგ ყოფილიყო". ლანიემ საყვედურით შეხედა მამას, რად გამეციო. ნიკოლ- მა მხარზე მოჰკიდა ხელი და ოთახიდან გაუშვა ბავშვი. დიკმა გაიცინა და დაძაბულობაც მაშინვე გაქრა. მერის ადრინდელი წლები და დაივერებთან მეგობრობა გაახსენდა, მიხვდა, რა შორეული გამხდარიყვნენ ერთმანეთისთვის და დაოკებულმა, მშვიდი ტონით თქვა: "ბავშვების გამო ყოველთვის ასე ხდება ხოლმე".

წარსული ისევ ახსენებდა თავს და უხერხულობაც იზრდებოდა.

"ოღონდ, სისულელე იქნება თუ ამის გამო აქედან წახვალთ — ჰოსეინი ისედაც უნდა წასულიყო, საქმე ჰქონდა. ბოლოს და ბოლოს, თქვენ ჩემი სტუმრები ხართ, და რა მოხდა, შეცდით, ვინ არ შემცდარა".

მაგრამ დიკი გააბრაზა ამ მიკიბ-მოკიბვამ, მეტადრე იმან, რომ სიტყვა "შეცდით" იხმარა მერიმ, მიტრიალდა, რომ უკვე ბარგისთვის მიეხედა და თქვა:

"იმ ახალგაზრდა ქალების გამო ვწუხვარ, კარგად არ გამოვიდა. იმასთან კი, ამ ოთახში რომ შემოვიდა, მინდოდა ბოდიში მომეხადა".

"ეს ყველაფერი იმის ბრალია, რომ როიალთან როცა ვისხედით, არ მისმენდით!"

"ჰო, მაგრამ, საშინლად მოსაწყენი გახდით, მერი. გისმენდით, რამდენიც შემეძლო".

"გაჩუმდი, დიკ!" წამოიძახა ნიკოლძა.

"თავის ქათინაურს თვითონ ვუბრუნებ", მწარედ და წყენით უთხრა მერიმ. "ნახვამდის, ნიკოლ". და გავიდა.

ამის მერე, ცხადია, გასაცილებლადაც არ მოვიდოდა; ყვე-ლაფერი, რაც დაივერების გამგზავრებისთვის იყო საჭირო, მაჟორდომს დაეკისრა. ჰოსეინს და იმის დებს დიკმა პატარა, ოფიციალური ბარათები დაუტოვა. ატ წასულიყვნენ, არ იქნებოდა, მაგრამ ყველას რაღაცა აწვა მძიმედ და ლანიეს კი ყველაზე მეტად.

"მე მაინც იმას ვამბობ", უკვე მატარებელში იყო, როცა

ისევ დაიწყო, "რომ წყალი ჭუჭყიანი იყო".

"გეყოფა, ლანიე", უთხრა მამამ. "გირჩევ დაივიწყო მთელი ეს ამბავი — თორემ გაგეყრები. რა, არ იცოდი, რომ საფრან-გეთში ახალი კანონი მიიღეს უკვე და მშობლებს კიდევაც შეუძლიათ თავიანთ შვილებს გაეყარონ?"

ლანიეს სიცილი წასკდა და დაივერების ოჯახიც ახლა ისევ შეიკრა — დიდხანს თუ გასტანსო ასე, გაიფიქრა დიკმა.

## ۷

ნიკოლი ფანჯარასთან მივიდა, ტერასიდან რაღაცა ჩხუბი და ლანძღვა ისმოდა, გადაიხედა და ყური მიუგდო. ამათი მზა-რეულის, ოგიუსტინის ღვთისმოსავ პირისახეს სულ ერთნაი-რად ავარდისფრებდა აპრილის მზე, მთვრალი იყო, ხელში

დიდი დანა ეჭირა და დანის პირსაც ცისფრად გაუდიოდა ლაპლაპი მზეზე. იმ დანას აქეთ-იქით ატრიალებდა. სამი თვე იყო, რაც ოგიუსტინი ამათთან მზარეულობდა, იმის მერე, თებერვლის თვეში ისევ თავიანთ ვილა "დაიანაში" რომ დაბრუნდნენ დაივერები.

ფარდულისპირა ქარაბაკი ეფარებოდა და დიკს ვერ ხედავდა ნიკოლი; მხოლოდ იმისი თავი და ბრინჯაოს ბუნიკიანი ჯოხი ჩანდა, რომელიც ხელში ეჭირა დიკს. დანა და ხელჯოხი, რითაც ერთმანეთს ემუქრებოდნენ, სამკაპას და იმ მოკლე მახვილსა ჰგავდა, რასაც არენაზე საბრძოლად გასული გლადიატორები ხმარობდნენ ხოლმე.

ჯერ დიკის სიტყვები მოესმა ნიკოლს:

" — სამზარეულოს ღვინო რამდეხიც გინდათ იმდეხი სვით, მაგრამ შაბლი-მუტონის ბოთლით თუ დაგინახეთ..."

"თქვენ მე რა უნდა მითხრათ სმაზე!" ყვიროდა ოგიუსტინი და თავის ხანჯალს იქნევდა. "თქვენ თვითონ სვამთ — მთელი დღე სვამთ!"

"რა მოხდა, დიკ?" ზევიდან დაუძახა ნიკოლმა და დიკმა ინგლისურად ამოსძახა:

"ეს დედაკაცი სარდაფიდან სამარკო ღვინოებს ეზიდება. გავაგდე, ან თუ არადა — ვცდილობ გავაგდო".

"ღმერთო! ფრთხილად იყავი, დიკ, ეგ დანა არ მოგახვედროს".

ოგიუსტინმა თავი ასწია, ახლა ნიკოლისკენ იქნევდა დანას. ბებრული პირი ორ პატარა შეტყლეჟილ ალუბალს მიუგავდა.

"თქვენ ალბათ არც კი იცით, მადამ, თქვენი ქმარი როგორა სვამს, ჩაჯდება და სვამს, ლოთია რაღა…"

"ახლავე ენა გააჩერეთ და წადით აქედან!" დაუყვირა ნიკოლმა "თუ არადა, ჟანდარმებს გამოვიძახებთ".

"თქვენ გამოიძახებთ ჟანდარმებს? ჩემი ძმაა თვითონ ჟანდარმი! თქვენ გამოიძახებთ — ამერიკული თავხედობა!"

"ბავშვები გაიყვანე სახლიდან და ამას მოვუვლი", ისევ ინგლისურად ასძახა დიკშა.

"ეს თავხედი ამერიკელები დადიან აქ და დაიწყებენ მოელი ჩვენი საუკეთესო ღვინოების სმას. სულ ეგენი ათავებენ რა", ბალაგანური ხმით გაჰკიოდა ოგიუსტიხი. დიკმა უფრო მტკიცე ტონით მიმართა.

"ახლავე აიღეთ თქვენი ბარგი-ბარხანა და წადით. რაც გერგებათ, გადაგიხდით".

"დიახაც, გადაძიხდით! და უნდა გითხრათ", დიკთან უფრო ახლო მივიდა, ისე გააფთრებით იქნევდა დანას, რომ დიკმა თა-ვისი ხელჯოხი შემართა. მაშინ ოგიუსტინი სამზარეულოში შევარდა და იქიდან ახლა ცულით აღჭურვილიც დაბრუნდა.

ვითარება სახარბიელოს არა ჰგავდა — ოგიუსტინი მაგარი ქალი ჩანდა და მისთვის ახლა ცულისა და დანის წართმევა რისკიც იყო, შეიძლება კიდევაც რამე დაშავებოდა, და მერე ამას გართულებაც კი მოჰყვებოდა — კანონი იცავს და მკაცრადაც იცავს ფრანგ მოქალაქეთა შეუხებლობას. მაინც, დიკმა, უფრო მეტად მზარეულის შესაშინებლად, ასძახა ნიკოლს:

"დარეკე პოლიციაში". მერე ოგიუსტინს მიუტრიალდა და დანასა და ცულზე მიუთითა. "ესეცა კმარა იმისათვის, რომ ციხეში წაგიყვანონ".

"ჰა, ჰა!" დემონურად გადაიხარხარა ოგიუსტინმა, მაგრამ უფრო ახლო აღარ მისულა. ნიკოლმა დარეკა პოლიციაში, მაგრამ იქიდანაც ოგიუსტინის სიცილის ექო მოესმა თითქოს. რაღაც სიტყვები თუ ბუტბუტი გაიგონა, მერე რაღაც ჩხაკუნი და — გაითიშნენ, ან სულაც, შეიძლება დაკიდეს კიდეც.

ნიკოლი ფანჯარასთან დაბრუნდა და დიკს ჩასძახა: "ზედმეტი გადაუხადე!"

"ტელეფონით მაგათთან მე უნდა მელაპარაკა!" მაგრამ გზა მოქრილი ჰქონდა და დიკი კაპიტულაციაზე დათანხმდა. ორმო-ცდაათი ფრანკი ასამდე ავიდა — დიკი ამაზეც თანახმა იყო, ოლონდ ჩქარა მოეშორებინა და ოგიუსტინმაც ფარ-ხმალი დაყარა, თუმცა, უკან დახევისას ლანძღვა-გინების კორიანტელი დააყენა და სულ "მოთრეულებს" იძახდა. ისიც მოითხოვა, ჩემი ძმისწულის მოსვლამდე აქ უნდა დავრჩე, ბარგს ის წაშალებინებსო. ასე თუ ისე, დიკი ფრთხილად იყო და სამზარეულოსთან ახლომახლო ტრიალებდა. გაიგონა ბოთლიდან საცობის ამოგდების ხმა, მაგრამ გადაწყვიტა, ამ ფაქტისთვის ახლა ყურადღება არ მიექცია. ალიაქოთი აღარ ატეხილა. ძმის-წული რომ მოვიდა, დაწყნარებული ოგიუსტინი დიდი ამბით დაემშვიდობა დიკს და ლამის კიდევაც მოეფერა, წასვლისას

ნიკოლის ფანჯარასაც ახედა და დაუძახა: "ნახვამდის, ქალბატონო! კარგად იყავით!"

დაივერები ნიცაში წავიდნენ და იქ ისადილეს. მოატანინეს მოშუშული თევზისა და ზაფრანისაგან გაკეთებული შეჭამა-დი, საკაზმით კარგად შენელებული, ბაქმაზიანად — და ერთი ბოთლი ცივი შიბლი. ოგიუსტინი მეცოდებაო, შენიშნა დიკმა.

"მე სულაც არა". თქვა ნიკოლმა.

· "მე კი მეცოდება — თუმცა სიამოვნებით გადავაგდებდი. ამ კლდიდან ზღვაში".

ბოლო ხანს უკვე ცოტა რამეზეღა ლაპარაკობდნენ ერთმანეთთან; ამა თუ იმ მომენტისთვის საჭირო სიტყვას ეძებდნენ ხოლმე და ის სიტყვა ხშირად იმის მერეღა მოდიოდა, როცა ვეღარ გაიგონებდნენ და აზრი არ ჰქონდა. თავის ფიქრებში ჩაძირული, თავიანთთვის ცხოვრობდნენ, ცალკე, გარიყულები. ოგიუსტინთან იმღამინდელი ჩხუბისაგან ახლა თითქოს ისევ შეერთდნენ და ცხარე საჭმლისა და ღვინისაგან შეხურებული — ალაპარაკდნენ.

"არ შეიძლება ასე გაგრძელდეს", თქვა ნიკოლმა. "როგორ გგონია, შენ რას იტყვი?" შეძრწუნებულმა იმით, რომ დიკს არც უცდია უარეყო ეს მოსაზრება, დაუმატა, "ზოგჯერ მგონია, რომ ჩემი ბრალია ყველაფერი — მე დაგღუპე".

"მაშ, დაღუპული ვარ, არა?" გაიცინა და ჰკითხა დიკმა.

"მე ეს არ მითქვამს. მაგრამ უწინ გინდოდა რაღაცის შექმნა, ახლა კი, თითქოს დანგრევა გინდა ყველაფრისა".

ცოტა კიდევაც ეშინოდა, რომ დიკს ახლა ასე განიკითხავდა და დიკის დუმილიც უძლიერებდა თავის ამ შიშს. გუმანით
გრძნობდა, რაღაც ხდებოდა დუმილს იქით, დიკის ცისფერი,
გამკაცრებული თვალების მიღმა და იმის იქითაც, რომ ბავშვებისადმი ასეთ ინტერესს იჩენდა ახლა. ისიც ძალიან აკვირვებდა, რომ დიკი უცებ აენთებოდა ხოლმე, როცა გინმეზე ან
რამეზე, სულ ერთია, პიროვნებაზე, ერზე, კლასზე, ცხოვრებაზე თუ აზროვნებაზე ლაპარაკობდა, თითქმის ზიზღით და კარგა ხანს აღარ ჩერდებოდა, თითქოს მასში უთვალავი ამბავი
იყო თავმოყრილი და მხოლოდ მაშინ, როცა გარეთ გამოდიოდა ის ამბები, იმ წამებში თუ მიხვდებოდა ცოტაოდნად, რაცა
ხდებოდა დიკის გულში.

"ბოლოს და ბოლოს, რას იღებ აქედან?" ჰკითხა ნიკოლმა. "იმას, რომ ვიცი, შენ დღითი დღე უფრო მაგრდები, რომ რეციდივების შემცირების კანონის თანახმად, შენი ავადმყოფობა უკან იხევს".

შორიდან მოდიოდა ნიკოლთან ეს ხმა. თითქოს ძალიან შორეულსა და აკადემიურ რაღაცაზე ლაპარაკობდა; შეშფოთებულმა წამოიძახა, "დიკ!" და მაგიდის ზემოთ გაიწვდინა ხელი მისკენ. დიკმა უნებურად გასწია ხელი, მაგრამ გონს მოეგო და დაუმატა:

"ამ სიტუაციაში ბევრ რამეზე შეიძლება რომ დაფიქრდე, არა? საქმე მხოლოდ შენ არ გეხება". ხელი დაადო ნიკოლის ხელს და ძველი დიკის, მხიარულების, გიჟმაჟური და ხმაუ-რიანი საღამოების მოთავე დიკის ხმით უთხრა ახლაც: "იმ თეთრ იახტას ხედავ იქით?"

ტ. ფ. გოლდინგის მოტორიანი იახტა იყო, მშვიდად ირწეოდა ნიცის უბეში, ტალღებს ზნექდა და დაუსრულებელ რომანტიკულ მოგზაურობაში იმყოფებოდა ადგილიდან დაუძვრელადაც.

"ახლა იქ წავალთ და იმ ხალხს ვკითხავთ, როგორ არიან,

ბედნიერები თუ არიან".

"მაგრამ ჩვენ თითქმის არ ვიცნობთ გოლდინგს", მიუგო

ნიკოლმა.

"გოლდინგმა გვთხოვა, მიგვიწვია, ესეც არ იყოს, ის ხომ ბების მეგობარია — უკვე ცოლად მიჰყვება — თუ მიჰყვებო-და?"

როცა ბარკასი დაიქირავეს და პორტიდან გამოვიდნენ, ზაფხულის ბინდი წვებოდა უკვე და "მარჯინის" თეთრი კორპუსის გაყოლებით სპაზმური უთანაბრობით ინთებოდა სინათლეები. იახტასთან მისვლისას ნიკოლი ისევ შეშფოთდა.

"მე მგონია, სტუმრები ჰყავს..."

"არა, რადიოს ხმაა", დაამშვიდა დიკმა.

დაივერები შეამჩნიეს — თეთრკოსტიუმიანი ჭაღაროსანი ბუმბერაზი გადმოიხარა, გადმოხტა და დაიძახა.

"ამას რას ვხედავ, დაივერები არიან მართლა?"

"ჰეი, "მარჯინ", ტრაპი, გესმით?"

ბარკასი ტრაპთან მიიყვანეს; გოლდინგი ნიკოლს მიეხმარა

გადმოსვლაში და ხელი რომ გაუწოდა, ლამის შუაზე მოიკეცა ეს ბუმბერაზი.

"კარგ დროს, სწორედ სადილისათვის".

კიჩოზე პატარა ორკესტრი უკრავდა.

"თქვენი ვარ, ოღონდ დაგჭირდეთ — მაგრამ, მანამდე ჯერ მე..."

და გოლდინგის ციკლონურმა მკლავებმა, არც კი მიკარებია, კიჩოსკენ ისე გააქანა დაივერები. ნიკოლმა უფრო ინანა,
რომ წამოვიდნენ და ცოტა კიდევაც ბრაზობდა დიკზე. ბოლო
წლებში, ხან დიკის მუშაობისა და ხანაც იმის გამო, რომ ნიკოლი ხშირად ავად იყო, თავშესაქცევ საღამოებზე არ დადიოდნენ და ყველამ იცოდა, რომ დაივერები განზე იდგნენ და
უარს ამბობდნენ მიწვევაზე. ამ ბოლო ხანს რივიერაზე ჩამოსულები ზოგჯერ იმასაც ამბობდნენ ხოლმე, დაივერების პოპულარობა დაიბინდაო. ასე თუ ისე, რაკი ამ ახალ პოზიციაზე
იდგნენ, ნიკოლს მიაჩნდა, რომ რაღაც უბრალო გართობისათვის კომპრომისი არ სჭირდებოდათ.

მთავარ სალონზე გავლისას მოეჩვენათ, რომ კიჩოზე, ცოტაოდნად განათებულ წრეში ცეკვავდნენ. მაგრამ ეს მხოლოდ
მირაჟი იყო — მუსიკის ხიბლი, უცნაური განათების ილუზია
და წყალი გარშემო. ფაქტიურად კი სტუმრები გემბანს შემოვლებულ განიერ დივანზე ისხდნენ და ისვენებდნენ. რამდენიმე სტიუარდი თუ დადიოდა საქმიანად აქეთ და იქით. წითელი, თეთრი, ჭრელი სამოსი ბუნდოვნად ჩანდა, კაცები თეთრი
ქათქათა. პერანგებით იყვნენ გემბანზე. ერთი მათგანი მათ
შესახვედრად წამოდგა, ნიკოლმა იცნო და გახარებულმა შეჰყვირა:

, "ტომი!"

ტომი ცერემონიულად დაიხარა ნიკოლის ხელის საამბოროდ, მაგრამ ნიკოლმა გალიციზმს აუარა და ლოყა მიადო
ტომის ლოყას. ერთად დასხდნენ, ან უფრო სწორად, ანტონიოურ დივანზე მიწვნენ. ტომის ლამაზი სახე ისე ძალიან გაშავებოდა, რომ მოოქროსფრო-მიხაკისფერი გადასვლოდა, მაგრამ მაინც ის მოლურჯო ელვარე ფერი, რაც ასე ძალიან უხდებათ ზანგებს, კანს ვერ მიეღო — გათრიმლული ტყავივით
ჰქონდა. უცხო მხარეთა უცხო მზეებით ნამზეურობა, უცხო

მიწის სურნელი და ეგზოტიკური დიალექტების გამოძახილი, უცნაური მღელვარება და დაძაბულობა საუბრისას — რაღაც უცნობი შიშის კვალი — ეს ყველაფერი აჯადოებდა და აბრუებდა ნიკოლს — შეხვედრისას ფიქრში თითქოს მიეყრდხო მის მკერდს და გაყუჩდა... მერე თავდაცვის ინსტინქტით ისევ თავის სამყაროს დაუბრუნდა და უდარდელი, ნებიერი ხმით უთხრა:

"სათავგადასავლო ფილმის გმირს ჰგავხართ ზუსტად, — მაგრამ, ამდენ ხანს რად დაიკარგეთ?"

ტომი ბარბანმა უნდობლად და ფრთხილად შეხედა, ელვა გაკრთა თვალის გუგებში.

"ხუთი წელი", რაღაცა გაბზარული ხმით და თითქოს არაფრის იმიტაციით განაგრძო ნიკოლმა, "მთელი საუკუნეა, არ შეგეძლოთ, სადღაც ჟლეტა-მუსვრის მერე, რაკი ეს ასე საჭიროა, დაბრუნებულიყავით ცოტა ხნით მაინც, რომ სული მოგეთქვათ?"

ძვირფასი და სათუთი არსების სიახლოვეს გაევროპელება ტომისთვის ისევ იოლი იყო.

"Mais pour nous hèros", თქვა მან, "il nous faut du temps, Nicole. Nous ne pouvons pas faire des petits exersices d'héroisme—il faut faire les grandes compositions"1

"ინგლისურად მელაპარაკეთ, ტომი".

"Parlez français avec moi, Nicole"2.

"მაგრამ აქ რაღაც სხვაობა არის — ჰეროიზმსა და მამაცობაზე ღირსებით გამოდის ფრანგულად ბჭობა, თქვენ იცით ეს. ინგლისურად კი, ჰეროიზმსა და მამაცობაზე ლაპარაკისას, ცოტათი სასაცილო ხდები და თქვენ ესეც იცით. ამიტომ მე მირჩევნია ინგლისურად მელაპარაკოთ".

"კაცმა რომ თქვას", უცებ ჩაიცინა ტომიმ. "მე ინგლისურადაც გმირი გარ და ბევრი ასეთი".

ნიკოლმა, ვითომ, მეტი აღარ შეგვიძლიაო, გაიცინა, მაგრამ ტომი არ შეცბუნებულა.

<sup>1 &</sup>quot;მაგრამ, ჩვენ, გმირებს, დრო გვჭირდება, ნიკოლ. მცირე ვარჯიშით იოლად გასვლა არ შეიძლება ჰეროიზმში — აქ დიდი მასშტაბებია საჭირო" (ფრანგ.). ² "ფრანგულად მელაპარაკეთ, ნიკოლ" (ფრანგ.).

"უბრალოდ, მე ვიცი ის, რასაც ფილმებში აჩვენებენ", თქვა მან.

"ცხოვრებაში ისეა, როგორც კინოფილშებში?"

"კინოც კარგია — თუნდაც რონალდ კოლმანი — გინახავთ მისი ფილმები ჩრდილო-აფრიკულ კორპუსზე? — ცუდი არ არის".

"ძალიან კარგი, ამის მერე, როცა კინოში ვიქნები, მეცოდინება, რომ იმ დროს თქვენ თავზეც ის ამბავია, რაც იქა ხდება".

საუბრისას ნიკოლმა მომცრო ტანის, ფერმკრთალი, სანდომიანი ახალგაზრდა ქალი შეამჩნია, მშვენიერი ბრინჯაოსფერი
თმით, — გემბანის განათებისაგან მწვანე ფერი დაჰკრავდა. ტომის იქით იჯდა და შეიძლება ყურს უგდებდა ამათ და იმათაც, ვინც ახლო, ოღონდ სხვა მხარეს ისხდნენ. თითქოს რაღაც უფლება ჰქონდა ტომიზე და რაკი მიხვდა, ტომის ყურადღება ახლა უკვე სხვას ეთმობაო, თავდაუოკებლად წამოდგა
და გულაგდებით გადაიარა მთელი გემბანი.

"ჰო, კაცმა რომ თქვას, მე გმირი ვარ", მშვიდად თქვა ტომიმ, ცოტა ხუმრობდა, მაგრამ მთლად ხუმრობითაც არ ამბობდა. "შიში რა არის, მე არ ვიცი, როცა ვიბრძვი, ლომივითა

ვარ, ან მთვრალივით, გადარეული და აწყვეტილი".

ნიკოლმა დააცადა, ვიდრე ამ ტრაბახის ექო ბოლომდე ჩაუცხრებოდა — ხვდებოდა, რომ ასე ტომის სხვასთან ალბათ
არც ელაპარაკა თავის თავზე, მერე მიიხედ-მოიხედა. უცნობი
სახეები შეათვალიერა — ისევ ის რეტდასხმული ნევრასთენიკები, ვითომ მშვიდები, საშინელებას რომ ჰგვრით ქალაქი და
თავიანთი ხმა, რაღა ხმა, რაღა კამერტონი, თუ არ გავიდნენ
და ბუნებას თუ არ შეერივნენ... ნიკოლმა ჰკითხა:

"ის ქალი ვინ არის, თეთრებში?"

"აქ რომ იჯდა? ლედი კეროლაინ სიბლი-ბირს". გაჩუმდნენ და იმის ხმას მიუგდეს ცოტა ხნით ყური.

"...არამზადაა ეს კაცი, ოღონდ მაინც მაღალი რანგის. მთელი ღამე ცხრას გთამაშობდით, შმენდეფერს, და ათასი შვეიცარიული ფრაწკი ვალი დამადო..."

ტომიმ გაიცინა და თქვა: "ლედი კეროლაინი ყველ<sup>აზე</sup> უზნეო ქალია ლონდონში—ევროპაში დაბრუნებისას მაშინვე იმას ვიგებ ხოლშე, რომ ლონდონელი უზნეო ქალების ახალი ბუდობა გაჩენილა. ეგ ყველაზე წინა დგას ახლა, მაგრამ, მგო-ანია მეტოქე გამოუჩნდა".

გემბანის აქეთა მხრიდან ნიკოლმა ისევ გახედა იმ ქალს, გამხდარი, უღონო, ვიწრომხრებიანი, ფილტვებით ავადმყოფს ჰგავდა — დაუჯერებელი იყო, რომ ამ ვიწრო მხრებს და უსუ-სურ ხელებს შეეძლო მაღლა სჭეროდა დეკადანსის ემბლემა, მქრალი იმპერიის უკანასკნელი ბაირაღი. შესახედად უფრო ჯონ ჰელდის ილუსტრაციების ქალებსა ჰგავდა, ახალი მოდის ვაჟურ ქალწულებს და არა იმ მაღალ, მიბნედილ ქერებს, ომი-ს სწინა წლებიდანვე, მხატვრებისა და მწერლების მოდელებად რომ იქცნენ მერე.

გოლდინგი მოვიდა, ძალიან ცდილობდა ცოტათი მაინც დაეთრგუნა ის თავისი ბუმბერაზობა, რითაც იმის ნება-სურვი-ლი გარგანტუასებური ძალისმიერით გადადიოდა, და ნიკოლმა, თუმცა უხალისოდ, მაგრამ მაინც დაუთმო: სადილის მერე "მარჯინი" მაშინვე კანისკენ წავა, რომ, მართალია, უკვე ისადილეს, მაგრამ ხიზილალა და შამპანური მაინც ყოველთვის შეიძლება; რომ დიკმა, სულ ერთია, უკვე დარეკა და შოფერს უთხრა, ნიცაში არ გაჩერდეს, კანაში წავიდეს და მანქანა კაფე "კავშირთან" გააჩეროს, იქ მას იოლად მოძებნიან დაივერები.

სალონში, სადილზე დიკი ლედი სიბლი-ბირსის გვერდით იჭდა. ნიკოლმა შეამჩნია, ნამზეური სახე ახლა გაფითრებოდა. დიკი კატეგორიული ტონით ლაპარაკობდა, ნიკოლამდე მხო-

ლოდ ცალკეული ფრაზები აღწევდა:

"...მაგრამ, უნდა იცოდეთ, რომ თქვენთვის, ინგლისელებისთვის ეს სიკვდილის როკვაა... დანგრეულ ციხესიმაგრეში ჯარი — სიპაი, მხიარულება ციხესიმაგრეში და ალაყაფის კარებთან ისევ სიპაი დგას და ასეა ახლა. მწვანე შლაპის დრო წავიდა, გაქრა".

ლედი კეროლაინი ზმა-ფრაზებით აძლევდა პასუხს, "რა?"
"ზუსტად!" "ოჰო, რას ბრძანებთ!" მაგრამ დიკი ვერ ამჩნევდა რომ აფრთხილებდნენ, ან არ უნდოდა, რომ შეემჩნია, ბოლოს უცებ გაცხარებით წამოიძახა რაღაც, ნიკოლმა ვერ გაიგო რა, მაგრამ დაინახა, რომ ის ახალგაზრდა ქალი წამოჭარხლდა, დაიძაგრა და მერე მკვახედ თქვა:

"ააფრინე ალალიო, რაც არ არი, არ არიო".

კიდევ აწყენინა ვიღაცას — არ შეეძლო ენისთვის ცოტა კბილი დაეჭირა? როდემდე გაგრძელდება ასე? თუ სიკვდი-

ლამდე ასე იქნება?

ახალგაზრდა, ქერა შოტლანდიელმა ორკესტრანტმა (ორკესტრს "ედინბერეს კოლეჯის რეგტაიმ-ჯაზი" ერქვა, ასე ეწერა დაფდაფზე), დენი დივერის რეფრენივით დაიწყო, აკომპანიატორი თვითონვე იყო, როიალის ხმა ჩუმად ისმოდა და სიტყვებს ისეთი ძალით ამბობდა, გეგონება ვეღარ უძლებდა იმ სიტყვების აზრს.

რა ჯოჯოხეთში იყო ის ქალი, ზარის რეკვაზე შეკრთებოდა და წვავდა ალი, რადგან ცოდვილი იყო დიდი, დიდი ცოდვილი, ზარის რეკვაზე შეკრთებოდა და წვავდა ალი, და წვავდა ალი (ბუმბუმ)
და წვავდა ალი (ტუმტუმ)
რა ჯოჯოხეთში იყო ის ქალი...

"ეს კიდევ რაღა არის?" ტომიმ ჩურჩულით ჰკითხა ნიკოლს.

მხარშექცევით ერთი ქალიშვილი იჯდა და იმან უპასუხა: "სიტყვები კეროლაინ სიბლი-ბირსმა დაწერა, მუსიკა თვითონ".

"რა ბავშვობაა!" ჩაიბურტყუნა ტომიმ იმ დროს, როცა მომღერალი უკვე მეორე სტროფზე გადავიდა, რომელშიც შე-მკრთალი ახალგაზრდა ქალის შემდგომი განცდები იყო გად-მოცემული. "შეიძლება იფიქრო, რომ რასინს კითხულობს!"

ერთი შეხედვით ისე ჩანდა, თითქოს ლედი კეროლაინი არც კი უსმენდა თავის ქმნილებას. ნიკოლმა ისევ შეხედა და გაოცდა — ეს ქალი ჭკუითა და ხასიათით კი არ ახდენდა შთა-ბეჭდილებას — მხოლოდ პოზით; მაგრამ, რაღაცით საშინელიც არისო, გაიფიქრა და მალევე ნახა, რომ არა ცდებოდა. სუფრიდან რომ წამოიშალნენ, დიკი არ ამდგარა, იჯდა და რაღაც უცნაურად იყურებოდა, და უცებ უადგილო გააფთრე-ბით წამოისროლა:

"ვერ ვიტან ამ ინგლისურ გამაყრუებელ და გადაკრულ ჩურჩულს".

ლედი კეროლაინი უკვე კარებთან იყო, ამ სიტყვებზე მო-Scanned by CamScanner ტრიალდა, ძალიან ახლო მივიდა დიკთან და ხმადაბლა უთხრა, მაგრამ განგებ მკაფიოდ, ისე რომ იქ მყოფთ გაეგონათ.

"თქვენ თავს დააბრალეთ — ჩემი ქვეყნის ხალხი აიგდეთ და დაამცირეთ, ჩემი მეგობარი მერი მინგეტიც. მე უბრალოდ ისა ვთქვი, რომ ლოზანაში თქვენ საეჭვო ხალხთანა გნახეს. გამაყრუებელი ჩურჩულია? იქნებ მხოლოდ თქვენ გაგაყრუ-ათ?"

"საამისოდ ხმადაბლა იყო", თქვა დიკმა, მაგრამ ცოტა გვიან თქვა. "ასე რომ, თქვენი აზრით მე პირწავარდნილი…"

გოლდინგმა თავისი ხმით ჩაახშო ფრაზის ბოლო, "გემბანზე! გემბანზე!" და ძლიერი და ვეება ტანით უბიძგა თითქოს
კარისკენ ყველას .ნიკოლი უკვე კარებთან იყო, მოტრიალდა და დაინახა, რომ დიკი ისევ თავის ადგილზე იჯდა იმ მაგიდასთან. ბრაზდებოდა ლედი სიბლი-ბირსის ჩმახვაზეც და
დიკზეც, რომ აქ წამოსვლა მოინდომა და უზომოდა სვა, იმაზე, რომ თავისი ეკლიანი ირონია ვეღარ დამალა, რომ დაამცირეს და ღირსება ვერ შეინარჩუნა პაექრობაში. ცოტა თავის
თავზეც ბრაზობდა, რადგან ის ინგლისელი ქალი ამის გამო
გაღიზიანდა იმთავითვე, იმიტომ რომ მოსვლისთანავე დაეუფლა ტომი ბარბანს.

ცოტა ხნის მერე თვალი მოჰკრა დიკს, ტრაპთან იდგა და გოლდინგს აშკარად მშვიდი იერით ელაპარაკებოდა. მერე კარგა ხანს აღარ დაუნახავს გემბანზე და ოცდაათი წუთის მერე კი კანაფზე ასხმული ყავის მარცვლებით ერთ თავსატეხ მალაფურ თამაშს რომ თამაშობდნენ, ადგა და ტომის გადაულაპარა-კა:

"წავალ, დიკს მოვძებნი".

ჯერ კიდევ სადილზე ისხდნენ, როცა "მარჯინმა" ღუზა აუშვა და ახლა მთელი სვლით მიდიოდა დასავლეთისკენ. დიზელების ხმა ისმოდა რბილად და ღამეს ეღვიძა, მშვენიერ ღამეს, გაზაფხულის თბილი ქარი მიეახლა და თმას შემოევლო. უცნობელმა ღელვამ გათანგა დიკის დანახვაზე, ფლაგშტოკთან იდგა, ნიკოლი შეიცნო და წყნარი ხმით თქვა:

"მშვენიერი ღამეა".

"სადა ხარ, შევშფოთდი".

"შეშფოთდი? ვითომ?"

"ასე რად ამბობ, დიკ. რომ იცოდე რა სიამოვნებით გავაკეთებდი შენთვის რამეს, თუნდაც სულ მცირეს, ოღონდ შემეძლოს, და ოღონდაც რამე მოვიფიქრო".

დიკი მიტრიალდა, ვარსკვლავების ფარდის მიღმა აფრიკა იწვა. იქით იხედებოდა.

"მჯერა, ნიკოლ. ზოგჯერ ისიც მჯერა, რომ რაც მცირე იქნება ის რაიმე, მით უფრო დიდი სიამოვნებით გააკეთებდი".

\_"არ გინდა ასე ლაპარაკი — დიკ, არ გინდა".

ვარსკვლავიანი ცის შუქს იჭერდნენ თეთრი შხეფები და ისევ ცისკენ ტყორცნიდნენ, ზევით. გაფითრებული ჩანდა, მაგრამ ბრაზის კვალიც არ ეტყობოდა სახეზე დიკს. განდეგილიფით იყო ახლა, და მოჭადრაკე რომ სვლის გაკეთებას დააპიტიბს, ისე, თანდათან გადაიტანა მზერა ნიკოლზე; მერე მაჯაზე მოჰკიდა ხელი და თავისკენ ნელა მიიზიდა.

"ამბობ, რომ შენ დამღუპე? ალერსით ჰკითხა. "მაშინ მე და შენ ორივე ვართ დაღუპულები. ასე რომ..."

შიშისაგან ცივმა ოფლმა დაასხა და მეორე მაჯაც დიკიზ მოჭერილ ხელში მოაქცია. ძალიან კარგი, დიკთან ერთად ივლის, გაჰყვება — ისევ ცხადად და მძაფრად იგრძნო გრილი ღამის მშვენიერება, ახლა უფრო, თავის გაწირვის და სულიერი გამოძახილის ამ წამებში — ძალიან კარგი, მაშინ...

...მაგრამ დიკმა უცებ გაუშვა ხელი, მძიმედ ამოიოხრა და და შეტრიალდა.

ნიკოლს ცრემლები წასკდა—ვიღაც მოდიოდა და თანდათან ამათ მოუახლოვდა — ტომი ბარბანი.

"აჰა, იპოვეთ! ნიკოლს ეგონა, გემბანიდან გადახტით, დიკ", თქვა მან. "იმის გამო, რომ იმ ინგლისელმა პრანწიამ იმდენი სლენგი დახარჯა თქვენთან".

"კარგი იქნებოდა, გემბანიდან გადახტომაზე რომ მეფიქრა", წყნარად თქვა დიკმა.

"მართლაც!" სწრაფად აუბა მხარი ნიკოლმა. "სარტყლები ავიღოთ და გადავხტეთ წყალში. კარგი იქნება ეფექტურ რამეს თუ მოვიფიქრებთ. მე მგონია, ძალიან დავშორდით მხიარულ ცხოვრებას".

ტომიმ ორივეს ისე გადახედა, თითქოს ყნოსავდა და სიტუაციისათვის იქნებ ახლა ამ გრილ ღამეში აეღო ალღო. "წავიდეთ და ლედი ლუდ-წყალწყალას ვკითხოთ რჩევა, ახალი რამერუმეები ალბათ იმან უნდა იცოდეს. მისი სიმღე-რა, "რა ჯოჯოხეთში იყო ის ქალი", ზეპირად უნდა ვისწავ-ლოთ. ფრანგულად მე ვთარგმნი — კაზინოში გასაგიჟებელი წარმატება ექნება, მე კი ფულს მოვხვეტავ".

"ტომი, თქვენ მდიდარი ხართ?" ჰკითხა დიკმა, როცა სამ-

თავი ისევ კიჩოსკენ მიდიოდა.

"არც ისე ძალიან, ბირჟამ დამღალა და თავი დავანებე. მაგრამ ფასიანი ქაღალდები, რომლებიც მეგობრებს მივანდე, ცუდად არა მაქვს დაბანდებული, ასე რომ, ცხოვრება კარგად მიდის".

"დიკი აპირებს გამდიდრებას", თქვა ნიკოლმა. რეაქციის გამო იყო, რომ ხმა ოდნავ უთრთოდა.

კიჩოზე სამი წყვილი ცეკვავდა, გოლდინგს თავისი. დიდრონი ხელები შემოეხვია და საცეკვაოდ გაეყვანა. ნიკოლი და ტომიც მათ შეუერთდნენ, ტომიმ შენიშნა:

"დიკი ბევრს სვამს".

"არც ისე ბევრს", გამოექომაგა ნიკოლი.

"ზოგი ვერ იტანს სმას, ზოგი იტანს. ეტყობა დიკი ვერ იტანს და თქვენ უნდა დაუშალოთ".

"მე"! გაკვირვებით წამოიძახა ნიკოლმა. "მე უნდა დავუშა-

ლო ან არ დავუშალო დიკს რამე?"

"მარჯინი" უკვე კანს მიუახლოვდა, დიკი ისევ ხმას არ იღებდა, ძილმორეულივით დუმდა. ბარკასი ჩაუშვეს, ლედი კეროლაინის მერე გოლდინგი თავად მიეხმარა დიკს გადასვლაში, ლედი კეროლაინ სიბლი-ბირსი მაშინვე წამოდგა ბარკასში და სხვა მხარეს დაჯდა. დოკზე გადმოსვლისას დიკმა მეტისმეტი ცერემონიობით დაუკრა თავი და წამით შედგა, თითქოს იმისთვის, რომ რაღაც მოსწრებული ეპიგრამა ეტყორცნა, მაგრამ ტომის იდაყვი მოხვდა ხელზე და სამთავე დაივერების მანქანისკენ წავიდა.

"მე წაგიყვანთ შინ", შესთავაზა ტომიმ.

"არა, რატომ — ტაქსითაც წავალთ".

"სიამოვნებით წაგიყვანდით, თუკი ღამესაც გამათევინებთ".

ვიდრე მანქანა ჯერ გოლფ-ჟუანის ყვითელ მონოლითს მიჰ-Scanned by CamScanner ყვებოდა, და მერე კი ჟუან-ლე-პენსაც გასცდა, სადაც არასდროს არა ცხრება საკარნავალო მხიარულება და ღამე მუსიკის ჰანგებითა და მრავალენოვან სიმღერებით ივსება ხოლმე, უკან, საზურგეს მიწოლილი დიკი ჩუმად იყო. მაგრამ როცა მანქანამ გორაკისკენ გაუხვია და ტარმისკენ აიღო გეზი, უცებ გაიმართა, შესაძლოა იმის გამოც, რომ მოსახვევში გადაიხარა, და სიტყვის წარმოთქმა სცადა:

"მომხიბვლელი წარმომადგენელი — "წამით ენა დაება, "—ფირმისა — მოიღეთ ტვინები ათქვეფილები ინგლისურად". მერე საზურგეს მიაწვა და ღრმა ძილს მიეცა, ხანგამოშვებით გულაღმართადაც ფშვინავდა იმ თბილსა და ლბილ სიბნელეში.

## ۷I

დილაადრიან დიკი ნიკოლთან შევიდა ოთახში.

"ვიცდიდი, სანამ ადგებოდი. ალბათ საჭიროც არ არის იმის თქმა, რომ ძალიან ვწუხვარ გუშინდელის გამო, მაგრამ რაც იყო იყო — შენ რას იტყვი?

"თანახმა ვარ", გრილად მიუგო ნიკოლმა და სახე სარკეს

მიუახლოვა.

"შინ ტომიმ მოგვიყვანა? თუ დამესიზმრა?"

"იცი, რომ მოგვიყვანა".

"ეტყობა ასეა", მიუგო დიკმა, "რაკი მისი ხველება მესმის.

წავალ, ვნახავ".

ნიკოლს გაუხარდა რომ წავიდა, თავის სიცოცხლეში თითქმის პირველად გაუხარდა დიკის წასვლა — იმ თავისმა საშინელმა უნარმა, რომ ყოველთვის მართალი ყოფილიყო, უმუხთლა ბოლოს, როგორც იქხა.

ტომი უკვე ტრიალებდა საწოლში და რძიან ყავას ელოდე-

ბოდა.

"როგორა ხართ?" ჰკითხა დიკმა.

ყელი მტკივაო, დაიჩივლა ტომიმ და დიკი პროფესიულად მიუდგა ამ ამბავს.

"კარგია რამე გამოივლოთ".

"გაქვთ გამოსავლები?"

"თქვენ წარმოიდგინეთ, არა მაქვს. ნიკოლს ექნება რამე".

"ნიკოლის შეწუხება არ ღირს".

"უკვე ადგა".

"როგორ არის?"

დიკი ნელა შეტრიალდა. "გეგონათ, რაკი ბევრი დავლიე, ნიკოლი ამას ვერ გადაიტანდა?" ღიმმორეული ლაპარაკობდა. "ახლანდელი ნიკოლი ჯორჯიული ფიჭვივითაა, ეს ხე ყველაზე მაგარი ხეა ქვეყანაზე, ახალზელანდიური ევკალიპტის მერე".

ნიკოლი კიბეზე ჩამოდიოდა და გაიგონა მათი ბოლო ფრაზები. იცოდა, რომ ტომის უყვარდა, ყოველთვის უყვარდა; და
ისიც იცოდა, რომ ტომი მტრული ხდებოდა დიკისადმი, რომელმაც ეს მანამდე იგრძნო, სანამ ტომი გაიაზრებდა და დიკი
რომ ურეაქციოდ არ დატოვებდა ტომის ცალმხრივ ვნებას, ესეც
იცოდა. ამ ფიქრმა წუთით ნაღდი ქალური კმაყოფილება მოჰგვარა. ბავშვები საუზმობდნენ, ნიკოლი მაგიდასთან იდგა და
გუვერნანტს მითითებებს აძლევდა, ზევით კი ორი მამაკაცი საუბრობდა და ორთავე მასზე ფიქრობდა ახლა.

კარგ გუნებაზე, ბედნიერი გავიდა ბაღში. სხვა არაფერი არ უნდოდა, ოღონდაც ასე გაგრძელდეს მერეც — ორთა ჭი-დილი, ერთმანეთისთვის ეტყორცნათ ასე ნიკოლზე ფიქრი — დიდი ხანია აღარ უგრძვნია რომ არსებობდა, თუნდაც ერთი რაღაც ბურთივით.

"რაო, ბოცვერებო, კარგია, არა? როგორ გგონია, — ჰეი, ბოცვერო — ჰო, რა იყო, ხომ კარგია — თუ შენ სხვას ფიქ-რობ?"

გიდესო, მაგრამ ისევ კომბოსტოს ფოთლები ერგო და დაე-თანხმა. ნიკოლი თავის საქმეს შეუდგა ბაღში. ლარნაკებისთ-ვის ყვავილები მოჭრა, დათქმულ ადგილებში დააწყო — მებალე სახლში შეიტანდა. ზღვისპირა ფლატემდე, პარაპეტთან მივიდა და მოუნდა, ვინმე ყოფილიყო, რომ ელაპარაკა, მაგრამ არავინ იყო და ისევ ფიქრს მიჰყვა. თითქოს შემცბარი იმით, რომ თურმე შეუძლია რაღაცა იგრძნოს სხვა კაცის მი-შართ — მაგრამ სხვა ქალებს ხომ ჰყავთ საყვარლები — შეცა რატომ არა? გაზაფხულის ამ მშვენიერ დილას მამაკაცის სამ-ყაროსადმი ჩახშული აზრი სადღაცა გაქრა, ფიქრი ყვავილის

ფერებსა ჰგაუდა, ქარი უშლიდა თმას და შერე გონებასაც ერეოდა. სხვა ქალებს ხომ ჰყავთ საყვარლები — და ის ძალა, რომელიც გუშინ დიკისთვის თავდადებისა და სიკვდილამდე ერთგულებისკენ უბიძგებდა, დღეს ქარს მიჰქონდა, და ბედნიერი
იყო ამ ლოგიკით — შეც რატომ არა?

დაბალ პარაპეტზე ჩამოჯდა, ზღვას უყურებდა, მაგრამ სულ სხვა ზღვის, ფანტაზიის, თვალუწვდენელი ზღვის სიღრმეში რაღაც ხელშესახები და ძვირფასი რამ ნადავლი ჰპოვა.
თუკი მას არ მოეთხოვება რომ ისე იყოს, ვითომ ერთნი არიან თვითონ და დიკი, ისეთი დიკი, გუშინ რომ იყო, მაშინ იგი
თავისთავადი უნდა იყოს და არა როგორც დიკის გონების ანარეკლი და მედლის გარშემო მარადიულად ბრუნვამისჯილი.

პარაპეტის ამ ადგილზე იმიტომ დაჯდა, რომ მთიანი ფერდობის დაქანებაზე ცოტათი ქვევით ბაღჩა მოჩანდა. ახლართული ტოტების იქით ორი გლეხი დაინახა, ფოცხები და თოხები მოეტანათ და იქაურითა და პროვანსული, შერეული დიალექტიკით ლაპარაკობდნენ.

"ზუსტად ამ ადგილას გადავაქციე".

"იქა, გაზებს იქით შევიყვანე".

"ის დედაკაცი კი, ვითომც არაფერი — ის კაციცა. ჰოდა, ის ოხერი ძაღლი რომ არა, ეგ კი არის, სწორედ ამ ადგილას გადავაქციე და…"

"ფოცხები რა უყავი, შენა გაქვს?"

"მანდ ახლო ყრია, შე მასხარა".

"ძაან არ მაინტერესებს, სად გადააქციე, აი. იმ ღამემდე ერთ დედაკაცსაც არ ჩავხუტებივარ, იმის მერე, რაც ცოლი "შევირთე — თორმეტი წლის წინათ და "შენ რაებს მეუბნები..."

"მოიცა, იმ ძაღლზე უნდა გითხრა..."

ტოტებსა და ტოტებშუა უყურებდა მათ ნიკოლი; ეჩვენებოდა, რომ ორთავე მართალი იყო — ერთისთვის ისე იყო კარგი, მეორეს სხვა უნდოდა, მაგრამ მაინც, რაც გაიგონა, მამაკაცების სამყარო იყო და შინ მიმავალი ისევ დაეჭვდა.

დიკი და ტომი ტერასაზე ისხდნენ. ნიკოლმა გაუარა მათ, და სახლში შევიდა, იქიდან თავისი სახატავი გამოიტანა და ტომის თავის ხატვა დაიწყო.

"ხან რა და ხან რა სართავი ჯარა — საქმე წინ წავა". სი-

ცილით თქვა დიკმა. როგორ შეუძლია ასეთი ტრივიალური რაღაცების თქმა, როცა გუშინდლიდან სახეზე ისევ ფერი არ ადევს, იმდენად არის გაფითრებული, რომ ჟღალი წვერი წი-თელიღა ჩანს და თვალებიც იმ წვერის ფერი აქვს.

ტომის მიუბრუნდა და უთხრა:

"ყოველთვის შემიძლია რაღაც ვაკეთო. ერთხანს ერთი პო-ლინეზიური მაიმუნი მყავდა, ციდამტკაველა, ხანდახან საათო-ბით ვუჯექი და რაღანაირ ფოკუსს არ ვასწავლიდი, მაგრამ შინაურებს ლამის გულზე შემოეყარათ და დამიშალეს, სულიმაზე ლაპარაკობდნენ, თვალი დაადგეს..."

დიკს განგებ არიდებდა თვალს. ცოტა ხნის მერე დიკმა ბოდიში მოიხადა და სახლში შევიდა. — ნიკოლმა დაინახა წყალი რომ დაისხა, ჭიქას ჭიქაზე ცლიდა, და უფრო გამაგრდა ამის დანახვაზე, უფრო გაქვავდა.

"ნიკოლ—" დაიწყო ტომიმ, და გაჩერდა. ყელის ტკივილმა შეუშალა, ხველა აიტეხა, რომ ხმა მოსვლოდა.

"სპეციალურ ქაფურის მალამოს მოგცემთ და შეიზილეთ", შესთავაზა ნიკოლმა, "ამერიკული მალამოა, დიკი ძალიან ენ-დობა მას. ახლავე მოვიტან".

"წასვლის დროც არის".

დიკი შემოვიდა და თავის ადგილზე დაჯდა.

"რას ვენდობი მე?" იკითხა მან. მალამოთი რომ დაბრუნდა ნიკოლი, ისევ ისე ისხდნენ, მაგრამ მიხვდა, იმის აქ არყოფნაში ორთავე რაღაცნაირი გაცხოველებით ლაპარაკობდნენ არაფერზე.

შოფერი უკვე კარებთან იცდიდა, დიდი ჩანთა ეჭირა, — ტომის კოსტიუმით, ახლა ტომის დიკისა ეცვა, ნიკოლი უყუ-რებდა და რაღაც ცრუ სიბრალულს გრძნობდა. გეგონება ტო-მი ვერასოდეს ვერ იყიდდა ასეთ რაღაცას.

"ოტელში რომ მიხვალთ, ამით შეიზილეთ მკერდი და ყელი, მერე კი ღრმად შეისუნთქეთ", არიგებდა ნიკოლი.

"მოიცა, ნიკოლ", ტომიმ კიბე რომ ჩაიარა, ხმადაბლა უთხრა დიკმა, "მთელ ქილას ნუ აძლევ, ხომ იცი, აქ ეს მალამო არ იყიდება — პარიზიდან უნდა გამოვიწეროთ".

ტომი ისევ დაბრუნდა, კიბესთან მივიდა, სამთავე მზეში იდგა, ტომი ქვევით, მანქანასთან ახლო, და ზევიდან ისე ჩანდა, გეგონება, ახლა ოდ**ნავ** დაიხრება და მანქანას ზურგზე მოიგდებსო.

ნიკოლი ერთი საფეხურით ძირს ჩამოვიდა.

"დაიჭირეთ!" დაუძახა. "ოღონდ არ გაგიტყდეთ, ძნელად იშოვება".

იგრძნო, თავის გვერდით როგორ ჩუმად ამაღლდა დიკი; იმისგან კიდევ ერთი საფეხურით ჩავიდა დაბლა და ადგილიდან დაძრულ მანქანას, რომელშიც ტომი და ქაფურის სპეციალური დასაზელი, მალამო იყო, ხელი დაუქნია. მერე მოტ-რიალდა, რომ თავისი წამალი, რაც ეკუთვნოდა ის მიეღო.

"არ იყო საჭირო", თქვა დიკმა, "ჩვენ აქ ოთხნი ვართ, და უკვე ამდენი წელია, თუ ვინმეს ხველა დაეწყება…"

ერთმანეთს შეხედეს.

"შეგვიძლია ახალი ქილა გამოვიწეროთ—"

მთელი თავისი გამბედაობა ერთბაშად გაქრა და მორჩი-ლად მიჰყვა ზევით, სადაც დიკი მაშინვე დაწვა თავის სა-წოლზე, და არაფერი თქვა.

"გინდა, საუზმე აქ მოგიტანონ?" ჰკითხა ნიკოლმა.

დიკმა თავი დაუქნია და ჭერს მიაშტერდა. ნიკოლი დაბნეული გავიდა, მსახურს ეტყოდა, რომ საუზმე ამოეტანათ, და
როცა ისევ ზევით ამოვიდა, დიკის ოთახში შეიხედა — ისევ
ისე იწვა, თვალები, ორი ცისფერი პროჟექტორი, ბნელ ცას
სერავდა. წუთით კართან შეჩერდა, გრძნობდა თავის ბრალს
დიკის წინაშე და შემოსვლა უჭირდა... მერე ხელი გაიწვდინა,
თავზე უნდოდა მოფერებოდა, მაგრამ დიკმა დამფრთხალი ნადირივით გაიწია და ამის ატანა აღარ შეეძლო: მზარეულივით
დაფეთდა, ოთახიდან გავარდა და დაბლა დაეშვა; შიში მოერია, როგორ იქნება ეს გაბზარული და გულგატეხილი კაცი
და რაღას მისცემს მას, ჯერაც პირმშრალ ძუძუმწოვარას, ისევ
ისე რომ ეკვროდა დიკს ცარიელ მკერდზე.

ერთი კვირის მერე ნიკოლს კიდევაც დაავიწყდა ტომით თავისი გატაცება — ადამიანებს ძხელად იმახსოვრებდა და ადვილად ივიწყებდა. მაგრამ ივნისის საშინელ, პირველ ცხელ დღეს გაიგო, რომ ტომი ისევ ნიცაში იყო, ბარათი გამოუგ-

ზავნა ორივეს — ნიკოლმა შინიდან წამოღებული წერილები ქოლგის ქვეშ გახსნა, ტომის ბარათი წაიკითსა და დიკს გადა-უგდო, დიკმა დეპეშით გაუცვალა, ნიკოლს მუხლებზე პლაჟის პიჟამა ედო და დეპეშა ზედ დაუგდო:

ძვირფასებო ხვალ გოსთან ვიქნები სამწუხაროდ უდე-

დოდ იმედია გნახავთ

როზმერი

"გამიხარდება მისი ნახვა", თქვა ნიკოლმა და მოიღრუბლა.

## VII

მაგრამ დილით, როცა დიკთან ერთად პლაჟზე გავიდა, ისევ მოიცვა ავმა შიშმა, რომ დიკმა რაღაცა განწირული და უსასოო გამოსავალი ჩაიფიქრა. გოლდინგის იახტაზე საღამოს მერე გუმანით ხვდებოდა, რაც ხდებოდა. ისევ ძველ კედელს ეყრდნობოდა, რაც ყოველთვის უსაფრთხოების გარანტია იყო, მაგრამ უკვე გრძნობდა, რომ ერთი ნახტომი და — სხვა იქნებოდა, შეიცვლებოდა მისი არსება, სისხლი, კუნთები, ყველაფერი, ოღონდ, ამისიც ეშინოდა და ბოლომდე ფიქრსაც ვერ ბედავდა. დიკის, თავისი სახეები, ბუნდოვანი და გაურკვეველი, ფანტასმაგორიულ როკვაში ჩაბმულებივით, მოჩვენებებად ირეოდნენ იმის თვალწინ, თვეების მანძილზე ამათგან თქმული ყველა სიტყვა რაღაც სხვა აზრსაც შეიცავდა და როდის ან როგორ გაირკვეოდა ის სხვა აზრი, ეს მხოლოდ დიკის საქმე იყო. ეს ვითარება, შესაძლოა სასიკეთოც კი ყოფილიყო მერე—ხანგრძლივი წლებით, როცა ნიკოლის ცხოვრება რაღაც დაბინდულს ჰგავდა, მასში გაცოცხლდა თვისებები, რაც ადრეულად ჩაკლა თავისმა ავადობამ, და რაც დიკს არც მოუძიებია, ოღონდ დიკს არა ჰქონდა ამაში ბრალი, — არ შეიძლება ერთი ბუნება, ერთი რაობა ბოლომდე ჩასწვდეს სხვა ბუნებას და სხვა რაობას. შემაშფოთებელი კი მაინცა ჩანდა რაღაცა. ყველაზე სავალალო მათ ურთიერთობაში დიკის გულგრილობა იყო, უფრო და უფრო რომ იზრდებოდა და ახლა იმაში ვლინდებოდა, რომ ბევრსაცა სვამდა; თვითონ მას, ნიქოლს რა მოელოდა, დაიმსხვრეოდა თუ გადარჩებოდა, არ იცოდადიკის მთრთოლი ხმა და გულდახურვა უბნეგდა თავგზას. ვერა ხვდებოდა, რას იზამდა დიკი მაშინაც, როცა ნელა და თანდათანობით გაიშლებოდა დაკლაკნილი გზა, და ვერც იმას ხვდებოდა, რა მოხდებოდა ბოლო წუთში. მერმინდელი არ აფიქრებდა, ალბათ, ტვირთი რომ მოეხსნება კაცს, ან თვალებიდან სახვეგი ახსნეს, ისე იქნება. ნიკოლში ყველაფერი მოძრაობისა და ფრენისთვის იყო გამოთვლილი, ფრთებად და ფარფლებად ფული ჰქონდა. რაც მოხდებოდა და შეიცვლებიდა, უბრალოდ, სასრბოლო მანქანის იმ შასივით, დიდი ხნის წინათ ოჯახის ლიმუზინის ძარას ქვეშ რომ ამოუდვიათ და ახლა მოაძრეს, რათა, რისთვისაც საჭიროა, იმისათვის გამოიყენონ, — იმ შასივით თუ იქნებოდა. ახალი სიოს ქროლვას ნიკოლი უკვე გრძნობდა — მარტო სევდის, მარტო დარდისა ეშინოდა, იმ სევდისა, შავით და ბნელით რომ მოდიოდა და განშორება რომ მოუტანდა.

დაივერები პლაჟზე გავიდნენ, თეთრი კოსტიუმები ეცვათ, ნამზეურ სხეულებზე კიდევ უფრო თეთრი, ქათქათა ჩანდა სამოსი. ნიკოლი ხედავდა, რომ დიკი თვალებით ლანიესა და ტოპსის ეძებდა სხვადასხვა ფერისა და ფორმის ქოლგების ჩრდილებშუა და სანამ დროებით დიკმა თითქოს დატოვა და მასთან არ იყო, ნიკოლმა ცალკე მყოფივით შეხედა მას და გაიფიქრა, ბავშვები ახლა თავის დასაცავად სჭირდება და არა იმისთვის, თვითონ დაიცვას ისინიო. ეს პლაჟი, ალბათ, უფრო შიშსა ჰგვრის, დამხობილი მბრძანებელივით, ფარულად რომ მოსულა, რათა თვალი შეავლოს თავის სასახლეს. უკვე მოასწრო დიკის სამყაროს შეძულება, თავაზიანობითა და დელიკატური ხუმრობით სავსე სამყაროსი და დაავიწყდა, რომ წლების მანძილზე ერთადერთი ღია სამყარო მისთვის ეს იყო. დადგეს და უყუროს თავის პლაჟს ახლა, იმათი გემოვნებით გადაკეთებულს, ვინც გემოვნების არა იცის რა; მოვიდეს აქ და იხეტიალრს თუნდაც მთელი დღე, სულ ერთია, ერთ ქვასაც ვეღარ იპოვის იმ ჩინურ კედლიდან, რითაც ოდესღაც შემოზღუდა აქაურობა, გერსად იპოვის ძველი მეგობრის ფეხის ნაკვალევს.

წამით ნიკოლს დაენანა, რომ ასე იყო; გაახსენდა როგორ იღებდა დიკი მაშინ გროვად დაყრილი ხარახურიდან შუშის ნამსხვრევებს, მატროსის შარვლები და სვიტერებიც გაახსენდა, ნიცის გარეუბნის ქუჩებში რომ იყიდეს — ამ სამოსლის მიხედვით იყო, რომ მერე პარიზელი მემოდელეები ახალ მოდას ქმნიდნენ აბრეშუმისგან. გაახსენდა ზვირთსამსხვრევზე ამოსული სოფლელი გოგონები, ჩიტებივით რომ ჟღურტულებდნენ: "ეი! ეი!" და ტარმის დილის რიტუალი, როცა მთელი სახლი მშვიდად და სიხარულით ეგებებოდა მზესა და ზღვას; რალას აღარ მოიგონებდა დიკი ამტეხი, შემაქცევარი, და ყველაფერი ღრმად ჩამარხულა, უსწრაფესად, სულ რამდენიმე წელიწადში...

ახლა ეს პლაჟი "კლუბად" იქცა, ვინ და საიდან აღარ იყვ-

ნენ მისი წევრები და ყველას შეეძლო შიგ შესულიყო.

დიკი.ჭილოფზე წამოიწია და თვალით როზმერის ძებნა დაიწყო. ნიკოლმა მზერა დაიჭირა და ისევ ქვასავით იქცა თითქოს. თვალი მოავლო იქაურობას. ახლა პლაჟზე ათასნაირი რაღაცა იყო, ღერძები, რგოლები, მოძრავი გასახდელი კაბინები, მცურავი კოშკურები, პროჟექტორები — გუშინდელი ზეიმის მერე, ველოსიპედის საჭეებიანი ორნამენტის მოდერნისტული თეთრი ბუფეტი თვალსა ღლიდა.

წყალში როზმერის დანახვის იმედი არ ჰქონდა დიკს, ახლა ბევრი არ შედიოდა იმ ლაჟვარდ სამოთხეში, ბავშვები თუ და კიდევ ერთი კამერდინერი, დიდი ამბით ყოველ დილას რომ ხტებოდა წყალში ორმოცდაათი ფუტის სიმაღლის კლდიდან — გოსის ბინადართა უმრავლესობა მარტო იმიტომ იძრობდა ბიჟამას და აჩენდა თავის თონთლოობას, რომ ზუსტად შუად-ღით, დალევის მერე ერთხელ ჩაეყვინთათ და ამოსულიყვნენ.

"იქ არის", შენიშნა ნიკოლმა.

დიკს შეხედა, როცა როზმერის უყურებდა ის; ტივიდან ტივამდე მიცურავდა და უყურებდა. ნიკოლმა ამოიოხრა, მაგ-რამ ამ ამოოხვრამ, გულს რომ ამოჰყვა, რაღაც ძველი და და-გუბებული, ხუთი წლის წინანდელი გაიყოლია.

"წავიდეთ, გავცუროთ, როზმერი ვნახოთ", შესთავაზა

დიკმა.

"შენ წადი".

"არა, ორივე წავიდეთ".

წუთით სცადა გასძალებოდა ამ გადაჭრით ამოთქმულ სი-Scanned by CamScanner ტყვებს, და უკვე ერთად მიცურავდნენ, ლიფსიტა თევზების კვალს მიჰყვებოდნენ, ბრჭყვიალა სატყუარასაგან დაბრმავებუ-ლი კალმახებივით რომ ტრიალებდნენ წყალში როზმერის ახ-ლომახლო, იმ თევზების კვალს.

ნიკოლი წყლიდან არ ამოსულა, დიკი ტივზე აძვრა და როზმერისთან დაჯდა, ზღვის წყლით გაბანილები, წვეთები რომ
ჩამოსდიოდათ, ისე ლაპარაკობდნენ, თითქოს ამათ არც არასოდეს ჰყვარებიათ და არასოდეს მიჰკარებიან ერთმანეთსო.
როზმერი მშვენიერი იყო — ნიკოლს იმისი ახალგაზრდობა აოცებდა, მაგრამ გაუხარდა, როცა შეამჩნია, რომ თვითონ ოდნავ, თმის ღერზე უმსხოსად თხელი იყო, ნიკოლი ტივთან ახლო
ცურავდა და როზმერის ლაპარაკს უგდებდა ყურს, გახარება, მოლოდინი, სილაღე ჰქონდა ამ ხმაში და კიდევ — ოდნავ
უფრო მეტი გულდაჯერება ვიდრე ხუთი წლის წინათ.

"დედა ძალიან მომენატრა, პარიზში დამხვდება ორშა-

ბათს".

"ხუთი წლის წინათ გამოჩნდით ამ პლაჟზე", უთხრა დიკმა, "მაშინ ძალიან სასაცილო გოგონა იყავით, გოსის ოტელის საბანაო ხალათი გეცვათ და რა სასაცილო გოგონას ჰგავდით!"

"როგორ გახსოვთ ყველაფერი! წინათაც გახსოვდათ — და

თანაც ყოველთვის კარგი რაღაც".

ისევ იწყება ქათინაურებით თამაში, გაიფიქრა ნიკოლმა. ჩაიყურყუმელავა და წყალქვეშ გაცურა, ამოყურყუმელავები-სას გაიგონა:

"მინდა ისე იყოს, თითქოს ეს ხუთი წელი არც ყოფილა და ისევ თვრამეტისა ვარ. თქვენთან ყოველთვის კარგი იყო, კარგად ვიყავი, ბედნიერი — არა, ისე კი არა, რაღაც ძალიან ბედნიერი — თქვენთან და ნიკოლთან ერთად. ასე მგონია ახლაც ყველას გხედავთ პლაჟზე, ყველას ერთ ქოლგას შეფარებულს — ისეთ კარგ ხალხს მე მანამდე არ შევხვედრივარ და ასე მგონია, აღარც შევხვდები".

ნიკოლმა გაცურა, ოღონდ მანამდე შეამჩნია, რომ დიკს როზმერისთან ლაპარაკისას ღრუბელი ოდნავ გადაეყარა, თი-თქოს ამ ძველმა თამაშმა ახლა გამქრქალებული კარგი სურა-თის დარად იჩინა თავისი ხიბლი; ცოტა ღვინოც და — როზმე-რის წინ რგოლებზე ჩამოეკიდება, უწინდებურად მარდად არა,

მაგრამ მაინც ეცდება ტრიუკები აჩვენოს. ეს პირველი ზაფხულია, რაც სიმაღლიდან წყალში ხტომას ერიდებაო, გაიფიქრა ნიკოლშა.

მოტრიალდა, ფაქტიურად კი ისევ იმ ტივთან ახლო ცუ-

რავდა და დიკიც დაეწია.

"როზმერის მეგობრებს სწრაფმავალი კატერი ჰყავთ, აგერ, იქა დგას, გინდა აკვაპლანზე შევდგეთ? მე მგონია, კარგი იქნება".

ნიკოლს გაახსენდა, იყო დრო, დიკი ყირას ჭიმავდა ფიცრის ბოლოზე დადგმულ სკამზე და ახლა თავისი ვაჟის, ლანიესა-ვით მოუნდა მისი განებივრება. შარშან, თავიანთ ბოლო ზაფხულში ცუგის ტბაზე, ხშირად ერთობოდნენ ამ სასიამოვნო წყლის თამაშით, ერთხელ, ფიცარზე დგომისას დიკმა მხრებით ასწია კაცი, რომელიც ორას გირვანქას იწონიდა, და ასე გაჩერდა. მაგრამ ქალები კაცებს იმათი ყველა ნიჭითა და მოხერხებით ირჩევენ ქმრებად და მერე კი უკვე, ძნელია ქალის გაკვირვება, თუმცა ხანდახან თავს ისე იჭერს, ვითომ კიდევაც ოცდება ხოლმე, ნიკოლი კი მაინცდამაინც არც ასე იჭერდა თავს დიკთან, ბევრი-ბევრი, ეტყოდა — "ჰო", ან კიდევ: "ასეც ვფიქრობდი, რომ გამოგივიდოდა".

ახლა კი ნიკოლმა ისიც იცოდა, რომ გადაქანცული იყო დიკი და მხოლოდ როზმერის სიახლოვემ და ახალგაზრდობან შემატა ძალა და მღელვარება. ასეთი აღმაფრენით დიკი თავიანთი ახალდაბადებული ბავშვების სხეულის დანახვისას ახსოვდა ნიკოლს და გულგრილად გაიფიქრა, სასაცილოდ არ გაი-

ხადოსო თავისი თავი.

კატერზე დაივერები ყველაზე უფროსები იყვნენ — ახალგაზრდები თავაზითა და კრძალვით ექცეოდნენ, მაგრამ ნიკოლი მაინც გრძნობდა რაღაცა შეფარულ აზრს — "ეს რაღაა კარგი, რა, ვინ არიანო", დიკი მისწრება იქნებოდა აქ, სიტუაციას იოლად აუღებდა ალღოს და თავის ნებაზე წაიყვანდა ყველაფერს. მაგრამ დიკს საამისოდ არ ეცალა — ახლა იმაზე ფიქრს მოეცვა, რას ანდა როგორ გააკეთებდა.

ნაპირიდან ორასი იარდის მოშორებით მოტორის ხმაური მიწყდა, ერთი ტაბუკთაგანი გაშლილად გადაეშვა წყალში, მოქანავე ფიცრისკენ გაცურა, გაასწორა და ფრთხილად ზედ შედგა — ჯერ მუხლებით, მერე კიდევ — წამოიწია და გაიმართა. გადაიზნიქა და ასე მართავდა მსუბუქ "ხომალდს", მოხერხე-ბულად, თანაბარი რწევა-რხევით, გადაქანებისას სუნთქვაშეკ-რულს კატერის კვალდაკვალ მიჰყავდა იგი, კატერი თანდათან უმატებდა სიჩქარეს და ბოლოს გაასწორა ფიცარი ტალღაზე, თოკი გაუშვა, ერთ წუთს ისევ ინარჩუნებდა წონასწორობას, ფეხით უბიძგა და გადაეშვა, მშვენიერების ქანდაკებად ჩაიძი-რა და ისევ გამოჩნდა ზღვაში რაღაცა პატარა თავად კატერი-დან, მის შესახვედრად რომ უხვევდა უკვე.

ნიკოლმა, როცა მოუწია, უარი თქვა; მერე როზმერის ჯერი დადგა. ფრთხილად და გაუწაფავად დადგა ფიცარზე, თაყვანისმცემლები ხმამაღალი შეძახილებით ამხნევებდნენ. სამი
მათგანი ისეთი მონდომებითა და თავგამოდებით ცდილობდა
პატივი რგებოდა და თვითონ მიშველებოდა როზმერის ნავში
გადმოსვლაში, რომ კინაღამ იჩხუბეს და ამასობაში ის მოახერხეს, რომ როზმერის მუხლი და თეძო დაეჟეჟა.

"თქვენი ჯერია, დოქტორო", თქვა მექსიკელმა მესაჭევრემ.

დიკი და ის ჭაბუკი, ბოლოს რომ დარჩა, ნავიდან გადახტნენ და ფიცრის მიმართულებით გაცურეს. დიკი თავისი ტრიუკის გაკეთებას აპირებდა და ნიკოლი დამცინავი ღიმილით ადევნებდა თვალს. დიკის ეს მონდომება, რომ როზმერის კარგად დანახვებოდა, ყველაზე მეტად აბრაზებდა.

როცა ორთავემ, რხევა-რწევით ფიცარი გაასწორეს, დიკი მუხლებით დაეყრდნო მას, თავი "კომპანიონის" ფეხებშუა გაყო, თოკს ხელი მოჰკიდა და ნელ-ნელა წამოიწია, რომ გა-მართულიყო.

კატერიდან ხედავდნენ, რომ უჭირდა. ახლა იგი ერთ მუხ-ლზე იდგა, ტრიუკის სიძნელე ის იყო, რომ იმავე მოძრაობით მეორე ფეხიც დაედგა და გამართულიყო. წამით სული მოი-თქვა, მერე თავს ძალა დაატანა, სახე დაეძაგრა, კუნთები და-ჭიმა და აიწია.

ფიცარი ვიწრო იყო. ის ჭაბუკი ას ორმოცდაათ გირვანქაზე მეტს არ იწონიდა, მაგრამ მაინც ვერ მოერია თავის სიმძიმეს, ამას ისიც დაერთო, რომ დიკის თავს ჩაეჭიდა. ბოლოს, ზურ-გის კუნთების უკანასკნელი, სასოწარკვეთით დაჭიმვა და დიკ-

მა მოახერხა გამართულიყო, იმწამსვე ფიცარიც გადაიხარა და ორთავე წყალში გადაყირავდა.

კატერში როზმერის წამოძახილი გაისმა:

"შესანიშნავია! თითქმის გამოვიდა!"

მაგრამ როცა კატერმა მათ შესახვედრად მოუხვია, ნიკოლი სახეზე დააკვირდა და ბრაზი შეამჩნია — ასეც იცოდა, რადგან ჯერ კიდევ ორი წლის წინათ მეტად იოლად აკეთებდა დიკი ამ ტრიუკს.

მეორეჯერ უფრო ფრთხილობდა. ჯერ ნელა წამოდგა, ტვირთის სიმძიმეს ამოწმებდა, ისევ დაეშვა ცალ მუხლზე და მერე — "ალე ოპ!" — წამოიძახა და წამოდგომა დაიწყო, მაგ-რამ ვიდრე მთლად გაიმართებოდა, უცებ ფეხებში მოიღუნა და ძლივს მოასწრო ფეხის წაკვრით ფიცარი განზე გაეწია, რომ ზედ არ დასცემოდა.

როცა კატერი მოახლოვდა, ახლა ყველამაც შეამჩნია, რომ

დიკი გაბრაზდა.

"ხომ შეიძლება ერთხელაც ვცადო?" წყლიდან ამოიყვირა. "თითქმის ბოლომდე მივიყვანეთ".

"კარგი, მიდით".

ნიკოლს მოეჩვენა, რომ სახეზე ფერი აღარ ედო და გააფრთხილა:

"დღეისთვის იქნებ აღარა ღირს?"

დიკმა არ უპასუხა, პარტნიორმა, მე მეტი აღარ შემიძლიაო, და ნავზე აიყვანეს, მექსიკელი მესაჭევრე გადავიდა, იმან იკისრა მაგივრობა.

ეს პირველზე უფრო მძიმე იყო. ვიდრე კატერი სიჩქარეს უმატებდა, დიკი პირქვე იწვა ფიცარზე და ცოტათი დაისვენა მერე პარტნიორის ფეხებშუა შეძვრა, თოკს ხელი მოჰკიდა და კუნთებისა და ძალის დაძაბვით წამოდგომა სცადა.

ვერ ადგა. ნიკოლი ხედავდა, როგორ შეცვალა პოზა და ერთხელაც სცადა, მაგრამ როგორც კი პარტნიორი ფიცარს მოს ცილდა და მთელი სიმძიმით დააწვა მხრებზე, თითქოს გაქვავდა. კიდევ ერთხელ სცადა — ერთი დუიმით, ორი დუიმით, ნიკოლიც დაიძაბა იმასთან ერთად, გრძნობდა, დიკს თითქოს ყველა ფორი გაეხსნა შუბლზე და ოფლად იღვრებოდა — წუთით როგორღაც იყო ასე, მერე ერთბაშად დავარდა ისევ მუხლებზე და გადატრიალდნენ, ფიცარი აყირავდა და დიკი ძლივს გადარჩა, რომ თავი ფიცრისთვის ზედ არ დაერტყა.

"ჩქარა, უკანვე!" დაუძახა ნიკოლმა მესაჭევრეს და უცებ დაიყვირა, როცა დაინახა, რომ დიკი წყალქვეშ გაუჩინარდა; მაგრამ მალე ისევ ამოყო თავი და ზურგზე გაწვა. მისაშველებლად გაცურეს. საუკუნე გავიდა თითქმის, სანამდე ახლო მივიდოდნენ, მაგრამ როცა ბოლოს და ბოლოს მიახლოვდნენ, ნიკოლმა დაინახა, უძალღონო და პასიური, დიკი ტალღაზე ირწეოდა, თითქოს გარშემო არა იყო რა, მხოლოდ ცა და ზღვა, და უცებ ის შიში გაუქრა და მძულვარე გახდა.

"მოგეხმარებით, დოქტორო... ფეხზე მოჰკიდეთ ხელი...

ასე... ახლა ერთად..."

დიკი დაჯდა, მძიმედ სუნთქავდა, არსაით არ იყურებოდა. "ასეც ვიცოდი, რომ არაფერი გამოგივიდოდა", თავი ვეღარ შეიკავა ნიკოლმა.

"იმ ორჯერ ცდამ დაღალა", თქვა მექსიკელმა.

"სისულელე იყო, არ უნდა ეცადა", ისევ თქვა ნიკოლმა. როზმერი ტაქტიანად დუმდა.

დიკმა, როგორც იყო, მოითქვა სული. "ამჯერად ქაღალდის თოჯინასაც ვერ ავწევდი".

ვიღაცას სიცილი წასკდა და ამ მარცხის გამო დაძაბულობაც მაშინვე გაქრა. დოკზე რომ გადადიოდნენ, ყველა ცდილობდა ყურადღება გამოეჩინა დიკის მიმართ. მაგრამ ნიკოლი იყო გაბრაზებული—ახლა მას უკვე ყველაფერი, რასაც კი დიკი აკეთებდა, ბრაზსა ჰგვრიდა.

ნიკოლი და როზმერი ქოლგის ქვეშ დასხდნენ. დიკი ბუფეტისკენ წავიდა, რომ რაღაცა დაელია და მალე დაბრუნდა, ორივესთვის ხერესი მოჰქონდა.

"ცხოვრებაში თქვენთან დავლიე სულ პირველად", თქვა როზმერიმ და უეცარი გახალისებით დაუმატა, "მე ისე ძალიან მიხარია, რომ ისევ გხედავთ, და თანაც ვიცი, რომ კარგადა ხართ. მე მეშინოდა — " გაჩერდა და ფრაზა ასეღა დაამთავრა, "იქნებ, როგორ არიან-მეთქი".

"თქვენამდე მოაღწია ხმამ, რომ დიკ დაივერი ქვევით დაქანდა?"

"ო, რას ამბობთ! უბრალოდ — ვიღაცამ მითხრა, რომ გა-

მოიცვალეთ და მიხარია, საკუთარი თვალით ვხედავ, რომ ასე არ არის".

"ასეა", თქვა დიკმა, როცა თვითონაც ჯდებოდა მათთან. "დიდი ხანია გამოვიცვალე, ოღონდ თავიდან ამას ვერ ამჩნევ-დნენ. როცა შიგნით ბზარი გაჩნდება, ერთხანს გარედან ყვე-ლაფერი ისევ ისე ჩანს".

"რივიერაზე პრაქტიკა გაქვთ?" სწრაფად ჰკითხა როზმე-

"ურიგო არ იქნებოდა, სუბიექტები საამისოდ აქ ბლომად არიან". ოქროსფერ ქვიშაზე თავით აქეთ-იქით ხალხის ჯგროს-კენ გაახედა. "ბევრნი არიან, აგერ იქ, ძველი მეგობარი მისიზ აბრამზი, ჰერცოგის მეუღლეს თამაშობს მერი ნორთის — დედოფლის წინაშე. მაგრამ არ შეგშურდეთ — გაიხსენეთ რა დიდხანს ეწვალა მისიზ აბრამზი, როცა ოთხზე ადიოდა "რიტ-ცის" უკანა კარის კიბიდან, ძლივს ააღწია კიბეზე ზევით და მთელი ხალიჩის მტვერიცა ყლაპა".

როზმერიმ შეაწყვეტინა. "მაგრამ ეს მართლა მერი ნორთია?" გაკვირვებით გახედა ქალს, ამათ მხარეს რომ მოდიოდა რამდენიშე თანმხლებთან ერთად, რომლებიც თითქოს მიჩვეულები იყვნენ იმას, რომ უყურებდნენ. დაივერებისგან ათიოდე ნაბიჯითღა იყვნენ დაცილებული, რომ მერიმ ცერად და სწრაფად გამოხედა მათ, ეს ერთი ის უხეირო გამოხედვა იყო, როცა გაგრძნობინებენ, რომ შეგამჩნიეს, მაგრამ ყურადღების ღირსად არ გთვლიან. არც დაივერები და არც როზმერი ჰოიტი თავიანთ თავს არასოდეს მისცემდნენ ნებას ვინმესთვის ასე შეეხედათ. დიკი ცოტა კიდევაც გაართო იმან, რომ როცა მერიმ როზმერი იცნო, გადაიფიქრა და უკვე ამათკენ წამოვიდა, ნიკოლს გულითადად დაელაპარაკა, დიკს კი თითქმის არც შეხედა, გეგონება ეშინია, რაღაცა არ გადამედოსო, არც გაიღიმა, ისე დაუქნია თავი, — დიკმა თავის მხრივ, ირონიულად, ვითომდა დიდი მოწიწებით დაუკრა თავი — მერი როზმერისკენ შეტრიალდა.

"მე უკვე მითხრეს, რომ აქა ხართ. რამდენი ხნით?"

"ხვალამდე", მიუგო როზმერიმ.

თვითონაც შეამჩნია, მერი იმისთვის წამოვიდა დაივერებისკენ, რომ მას გამოლაპარაკებოდა, და ერთგულებამ და მოვალეობამ ამათდამი, ჩააცხრო მისი მღელვარება. არა, დღეს ვერ

მივა სადილზე.

მერი ნიკოლს მიუბრუნდა, მისი მანერა ერთმანეთში არეულსა და გადახლართულ ღელვასა და თანაგრძნობას გამოხატავდა.

"როგორ არიან ბავშვები?" ჰკითხა.

სწორედ ამ დროს ბავშვებმაც მოირბინეს და ნიკოლს სთხოვეს, გუვერნანტს რაღაც უთხარიო — ბანაობა უნდოდათ ზღვაში.

"არა", ნიკოლის მაგივრად უპასუხა დიკმა. "რაკი მადმაზელი ასე ამბობს, ასეა საჭირო".

ნიკოლი იმ აზრს იზიარებდა, რომ უფლებით აღჭურვილი ავტორიტეტის ღირსება არ უნდა შელახო, და უარი უთხრა. მერიმ კი, რომელსაც, ანიტა ლუსის გმირივით, მხოლოდ მომხდარი ფაქტები აინტერესებდა და მიეჩვია, რომ მხოლოდ ასეთ ფაქტებთან ჰქონოდა საქმე — დიკისკენ ისე გაიხედა, გეგონება აღმაშფოთებლად სასტიკი კაცის ჭირვეულობას შეესწროო. მაგრამ დიკი გაბეზრდა ამ სპექტაკლით, ვითომ ძალიან ლეწუხებულმა გამოიკითხა:

"როგორ არიან თქვენი ბავშვები — და იმათი მამიდები?" მერიმ არ უპასუხა; გაქცევის მოწადინე ლანიეს თანაგრძნობით გადაუსვა თავზე ხელი და, წასვლა ინება. მისი წასვლის მერე თქვა დიკმა: "როცა გავიფიქრებ, რამდენი დრო დავკარგე იმისათვის, რომ მაგისგან რაღაც გამოსულიყო".

"მე მომწონს იგი". თქვა ნიკოლმა.

როზმერი გააოცა დიკის მწარე ტონმა, მას ისეთი დიკი ახსოვდა, ვისაც ყველაფერი ესმის და ვინც ყველას ყველაფერს მიუტევებს. უცებ გაახსენდა, რაც მასზე გაეგონა. როზმერისთან ერთად გემით სახელმწიფო დეპარტამენტის რამდენიმე თანამშრომელი, ამერიკელები მგზავრობდნენ, იმდენად გაევროპელებულები, რომ უკვე გაჭირდებოდა თქმა, რომელი ქვეყნის მოქალაქეებად ჩაგეთვალათ. საუბარში სად აღარ მყოფი ბები უორენის სახელი ახსენეს, ითქვა, რომ ბების უმცროსმა დამ თავი დაიღუპა იმით, რომ დაკარგულსა და ლოთ ექიმს გაჰყვა ცოლად. "მას უკვე აღარსად ღებულობენ", შენიშნა ერთმა ქალბატონმა. როზმერი ამ ფრაზამ შეაშფოთა, მიუხედავად იმისა, რომ დაივერები მისთვის იმ წრეში როდი იყვნენ, სადაც ასეთ ფაქტს, თუ ფაქტი იყო, რამე აზრი ეძლევა, მაინც, ამ სიტყვებს მიღმა, რაღაც ბუნდოვნად დაინახა — თითქოსდა ზურგი აქციესო, და ისევ ესმოდა, "მას უკვე აღარსად ღებულობენ". წარმოიდგინა, როგორ ადის დიდებული სახლის კიბეზე, საფეხურებს აივლის დიკი და თავის სადარბაზო ბარათს აძლევს სახლთუხუცესს. ის კი აუწყებს: "ჩვენ თქვენ უკვე ვეღარ მიგიღებთ". მერე დაუყვება ავენიუს, და სადაც კი მივა, უთვალავი სახლთუხუცესები სხვა დესპანების, ნდობით აღჭურვილი პირებისა და ელჩებისა, ერთსა და იმავეს ეუბნებიან…

ნიკოლი წასვლაზე ფიქრობდა. უკვე იცოდა, რაც იქნებოდა, დიკი ჭინჭარდასუსხულივით შეტოკდება, ხიბლს დაიბრუნებს და როზმერიც, რაღა თქმა უნდა, ვერ გაუძლებს. და მართლაც, წუთის მერე დიკის ხმაში -ნატამალიც კი აღარ იყო იმ უსიამოვნო სიტყვებისა, რაც მანამდე თქვა:

"მერიზე, კაცმა რომ თქვას, რა უნდა ვთქვა, როგორც უნდა ისეა და ისე ცხოვრობს. მაგრამ ძნელია კარგად მოექცე იმათ, ვინც შენ აღარ გექცევა კარგად".

როზმერი იმწამსვე იმავე ტონში ალაპარაკდა, მტრედივით

ღუღუნებდა.

"თქვენ ისეთი კარგი ხართ, დიკ. თუნდ აწყენინოთ ვინმეს რამე, ვერ წარმოვიდგენ არ გაპატიონ". მერე მიხვდა, რომ გადაჭარბა, და იმ ზღვარს გადასცდა, მხოლოდ ნიკოლს რომ ეკუთვნოდა, თვალები დახარა და დაივერებს შუა, ქვიშაზე ერთ წერტილს ჩააშტერდა. "სულ მინდა გკითხოთ, ორივეს, რა აზოდსა ხართ ჩემს ბოლო სურათზე — თუ ნახეთ ის ფილმები".

ნიკოლს არაფერი უთქვამს, მხოლოდ ერთი ფილმი ნახა და

მაინცდამაინც ბევრი არ უფიქრია მასზე.

"ერთბაშად, ძნელია რაიმეს თქმა, მაგრამ შევეცდები", თქვა დიკმა. "ვთქვათ ნიკოლი გეუბნებათ, რომ ლანიე ავად არის. ცხოვრებაში როგორი რეაქცია გექნებოდათ ამაზე? ან სხვა, ვინც გინდა იყოს, ამ ამბავს როგორ მიიღებდა? თამაშს დაიწყებდა — სახით, ხმით, სიტყვებით — სახე მწუხარებას გამოხატავდა, ხმა და სიტყვები — შეშფოთებას და თანაგრძნობას".

"დიახ, მესმის".

"სცენაზე სხვაგვარად ხდება. ყველა დიდი კომედიანტი თავის დიდებას იმით აღწევს, რომ უნარი შესწევს ადამიანის ჭეშმარიტი ემოციების — შიშის, შებრალების, სიყვარულის პაროდირებისა".

"გასაგებია". თუმცა, მაინცდამაინც გასაგები არ იყო.

"აქტრისას ეს ბუნებრივი რეაგირება ვერ ექნება. კიდევ ერთი რამ — ვთქვათ გითხრეს, რომ "თქვენი შეყვარებული მოკვდა". ცხოვრებაში ასეთი რამ მოგცელავდათ, მაგრამ სცენაზე
ის უნდა მოახერხოთ, რომ დაძაბული გყავდეთ მაყურებელი—
"ბუნებრივი რეაგირება" თვითვე ექნებათ. აქტრისა, ჯერ
ერთი, ტექსტს მიჰყვება, თან უნდა შეეძლოს, რომ აუდიტორია ფიქრობდეს მასზე და არა რომელიმე მოკლულ ჩინელზე,
ანდა კიდევ სხვა რაღაცაზე, რაც გინდა იყოს. ამისათვის კი
საჭიროა ისეთი რამ გააკეთოს, რასაც არ ელის მაყურებელი.
თუ მაყურებლისთვის ცნობილია, რომ თქვენი გმირი ძლიერია,
სუსტი უნდა აჩვენოთ და თუ სუსტია, ძლიერი უნდა აჩვენოთ
იგი. მთლიანად უნდა გამოხვიდეთ სახიდან — გასაგებია?"

"მთლად გასაგები არ არის", აღიარა როზმერიმ. "რას გულისხმობთ სახიდან გამოსვლაში?"

"აკეთებთ იმას, რასაც არ ელის მაყურებელი, მანამდე, სანამ არ მოახერხებთ, რომ ისევ თქვენზე იფიქროს და ისევ მიიპყროთ ყურადღება".

ნიკოლს მეტის ატანა აღარ შეეძლო. მყვეთრი მოძრაობით წამოდგა უცებ, არ უცდია დაეფარა მოუთმენლობა. როზმე-რიმ, უკვე რამდენიმე წუთის წინათვე ბუნდოვნად იგრძნო, რაღაც ვერ იყო კარგად საქმე, ტოპსის შეხედა, წყნარად, ღიმილით, თითქოს ამათი დაშოშმინება ამითი სურსო.

"გინდა მსახიობი გამოხვიდე, როცა გაიზრდები? მე მჭერა, რომ შესანიშნავი მსახიობი იქნები".

ნიკოლმა ცივად შეხედა და პაპამისის ხმით, აუჩქარებლად და მკაფიოდ უთხრა:

"სავსებით დაუშვებელია სხვათა ბავშვებს ასეთი აზრები ჩაუდოთ თავში. უნდა გახსოვდეთ, რომ ჩვენ შეიძლება სხვა გეგმები გვაქვს, როცა ბავშვებს ეხება საქმე". მკვეთრად მიტ-

რიალდა დიკისკენ. "მე შინ წავალ, მანქანით. შენ და ბავშვებს მიშელს გამოგიგზავნით".

"მაგრამ, რამდენი თვეა საჭესთან აღარ მჯდარხარ", მიუგო დიკმა.

"არაფერია, ტარება არ დამვიწყებია".

არ შეუხედავს როზმერისთვის, რომლის სახეც ცხადად და შმაგად გამოხატავდა "ბუნებრივ რეაგირებას" და ქოლგიდან გავიდა, რომ ჩაეცვა.

კაბინიდან ისევ ისეთი სახით გამოვიდა, გაბრაზებული, შეუღწეველი და მკაცრი იერით. მაგრამ ფიჭვებიან გზაზე გავიდა და სუყველაფერი შეიცვალა — მწვანე ვარჯები ევლებოდა
თავს, ერთი ტოტიდან მეორეზე დახტოდა ციყვი, ფოთლებში
ქარი შრიალებდა, შორით მამალმა დაიყივლა და სიწყნარე
გააპო, მზის სხივები უძრაობის საფარს ატანდა, პლაჟის ხმაური აქამდე არ აღწევდა და ნიკოლი მოეშვა, ახლა ლაღად და
ხალისით იყო, ბედნიერი; ფიქრები წკრიალა ზარებივით მკაფიო გაუხდა — ახლა გრძნობდა, რომ ჯანსაღი იყო, ახალთახალი, უზარმაზარი და ხასხასა ყვავილივით გაიშალა და ლაბირინთიდან გამოდიოდა, ლაბირინთიდან, სადაც ამდენ ხანს ხეტიალობდა უგზო-უკვლოდ; პლაჟზე ფიქრიც კი არ უნდოდა,
ეჯავრებოდა იქაურობა, ყველა ადგილი, სადაც მზე, დიკი იყო
და თვითონ — პლანეტა, იმ მზის გარშემო.

"ახლა მე უკვე კარგადა ვარ", ფიქრობდა იგი. "უკვე თვითონვე ვდგავარ ფეხზე, უიმისოდ". და გახარებული ბავშვივით, ჩქარა უნდოდა სულ ბოლომდე რომ ეგემა ეს სავსეობა, და თუმცა ბუნდოვნად გრძნობდა, იცოდა, რომ აქ დიკის ხელიც ერია და ამას ელოდა ნიკოლისგან, შინ მისვლისთანავე საწოლზე დავარდა და ტომი ბარბანს ნიცაში პატარა, გამომწვევი ბარათი მისწერა.

მაგრამ ეს დღისით იყო — საღამოსთვის კი ნერვული აგზნება თანდათან ჩაცხრა, ნიკოლი მიყუჩდა და შებინდებისას ისევ ისრები წამოვიდა, არ იცოდა, რა ჰქონდა დიკს გუნებაში და ეს აშინებდა; გუმანით ახლაც ისევა გრძნობდა, რომ ბოლო ხანებში თავის საქციელს დიკი თითქოსდა რაღაცა გეგმას უმორჩილებდა, ეშინოდა დიკის გეგმების — ყოველთვის რომ ლოგიკური ასრულება ეწერა ხოლმე, და ნიკოლი ვერას ახერხებდა. თავიდანვე სულ ასე იყო, დიკი ფიქრობდა მათ მაგივრად და მაშინაც, როცა შინ არ იყო, ნიკოლის ყველა საქციელი თავისთავად ეხამებოდა დიკის ნებას, ამიტომაც ახლაც უჭირდა თავისი და დიკის ზრახვები გაეშორა ერთმანეთისგან. არადა, თვითონ უნდა ეფიქრა; ბოლოს და ბოლოს, როგორც იქნა უკვე იცოდა მოჩვენებათა საშინელი სამყაროს კარი და მისი ციფრი, იმ კარისა, რომლის ზღურბლზე თავის საშველად შემდგარისთვის ხსნა აღარ არის; მან იცოდა, რომ ამიერიდან ყველაზე დიდი შეცოდება თავისი თავის მოტყუება იქნებოდა. გაკვეთილი ხანგრძლივი იყო, მაგრამ კარგადაც აითვისა. თვითონ იფიქრე — არადა ისინი, ვინც შენ მაგივრად იფიქრებენ, მთელ ძალას წაგართმევენ, გარდაქმნიან შენს ჩვევებს და გემოვნებას, თავისებურად გაგწვრთნიან და გამოგფიტავენ.

მშვიდად იგახშმეს სასადილო ოთახში, სინათლე არ აუნ-თიათ. დიკი ბევრ ლუდს სგამდა და ბავშვებთან ხალისით ლა-პარაკობდა. მერე შუბერტის რამდენიმე და ამერიკიდან ამას წინათ მიღებული ჯაზური სიმღერები დაუკრა. ნიკოლი ნოტებ-ში იხედებოდა იმის მხარზემოთ და თავისი სასიამოვნო, ოდ-

ნავ ჩახშული კონტრალტოთი ღიღინებდა.

მადლიერი ვარ მამა-ა, მადლიერი ვარ დედა-ა, რომ ერთმანეთს შეხვდით ბედად...

"სისულელეა, არ მომწონს", თქვა დიკმა, და დააპირა სხვა გვერდზე გადაეშალა.

"არა, ბოლომდე დაუკარი!" წამოიძახა ნიკოლმა. "მთელი

სიცოცხლე უნდა ვკრთებოდე სიტყვა "მამაზე?"

— მადლიერი ვარ იმ ცხენისა, საბრალოსი, ორთვალას

რომ ძლივს ეწეოდა, მადლიერი ვარ ორივესი, იმ ღამეს რომ გადაკრულში იყავით ცოტა...

გვიან საღამოს ბავშვებთან ერთად მავრული სტილის ბანზე ისხდნენ და სანაპიროზე ერთმანეთისგან შორიშორი კაზინოების თავზე ავარდნილ ბრიალა შუშხუნებს უყურებდნენ. გარტოობა და სევდა იყო ასე ახლო და გულმშრალად ყოფნა.

მეორე დილას, კანიდან რომ დაბრუნდა, სადაც რაღაცები უნდა ეყიდა, დიკის ბარათი დახვდა, ბარათში ეწერა, რომ რა-მდენიმე დღით მარტო უნდოდა ყოფილიყო და პატარა მანქა-ნით პროვანსში წასულიყო. ჩაკითხვაც ვერ მოასწრო ბარათი-სა და ტელეფონის ზარიც გაისმა — ტომი რეკავდა მონტე კა-რლოდან, წერილი მივიღე და ტარმში მანქანით მოვდივარო. თავისი ბაგის სითბო იგრძნო ტელეფონის მილზე ნიკოლმა, როცა, გელოდებიო უპასუხა.

## VIII

აბაზანის მერე ნიკოლმა ნელსაცხებელი წაიცხო ოდნავ; პუდრი წაისვა სხეულზე, თან პუდრდაყრილ ხაოიან პირსა-ხოცს ტკეპნიდა ფეხის წვერებზე ზეაწეული. მერე თავის თავს კარგა დიდხანს აკვირდებოდა, თავისთვის სჯიდა რა იქნებოდა, მალე თუ დაკარგავდა ეს მშვენიერი და ნარნარი აღნაგობა მომხიბვლელობას. ალბათ ერთი ექვსი წლის მერე, მაგრამ ახ-ლა — ახლა კარგი ვარ, ბევრზე კარგიც, ვისაც კი ვიცნობ, ფი-ქრობდა იგი.

ნიკოლი არ აქარბებდა. ერთადერთი ფიზიკური სხვაობა ახლანდელსა და ხუთი წლის წინანდელ ნიკოლს შორის ის იყო, რომ ახლა უბრალოდ უკვე ქალი იყო, მაგრამ მაინც შუ-რდა თავისზე ახალგაზრდებისა — ახალგაზრდობის თანადროუ-ლი კულტი იჩენდა თავს, ერთმანეთში არეული მირიადი სა-ხები ახალმოზარდი, ლამის ბავშვი ვარსკვლავებისა, ეკრანით თითქოს ქვეყნის ძალას, მთელ სიბრძნეს რომ იტევენ და იმა-თი შურდა, ეჭვიანობდა.

კოჭებამდე გრძელი კაბა ჩაიცვა, კარგა ხანია ასეთ კაბას დღისით აღარ მიჰკარებია, წლები გავიდა იმის მერე, "შანელ 16" დაიპკურა ჯვარედინად ნაუცბათევად და როცა პირველ საათზე ტომის მანქანა ვილა "დაიანას" წინ გაჩერდა, მოვლი-ლი და აყვავებული ბაღივით იყო.

რა კარგია ხელახლა იგრძნო ეს ყველაფერი, ისევ ვიღაცის თაყვანისცემა, თითქოს რაღაცა იდუმალი! ორი ფასდაუდებელი წელი ამოვარდა ლამაზი ქალიშვილის ცხოვრებიდან, თანაც რა დროს, და ახლა თითქოს სურდა შეევსო ის ორი წელი; ტომის, თითქოს ნიკოლის ერთი უთვალავ თაყვანისშცეშელთაგანიაო, ისე შეხვდა და როცა ბაღი გადაჭრეს და სიენის
ბაზრიდან მოტანილი ქოლგისკენ წავიდნენ, თან კი არ მიჰყვებოდა, ოდნავ წინ მიდიოდა. ცხრამეტისა და ოცდაცხრა წლის
მიმზიდველ ქალებს ერთნაირად სჯერათ ხოლმე თავისი თავის;
ოცი წლის მერე კი, ათ წელიწადში, ქალური არსის მომთხოვნელობა უშლის ქალს ხელს, რომ სამყაროს ცენტრად იგრძნოს თავი. ცხრამეტწლიანების კადნიერი გულდაჯერება კადეტის შამლაყინწაობასა ჰგავს, ოცდაცხრაწლიანები კი, ამ მხრივ უფრო ორთა ჭიდილში გამარჯვებულ მოკრივეებს შეედრებიან,
ამაყი სვლით რომ მოდიან ხოლმე.

მაგრამ ცხრამეტი წლის ქალიშვილს თუ ზედმეტი ყურადღებით ანებივრებენ, ოცდაცხრა წლის ქალს გულდაჯერებისთვის უფრო დახვეწილი მასალა აქვს საზრდოდ. წყურვილი
თუ კლავს, ბრძნულად ირჩევს აპერიტივებს, ანდა, დაკმაყოფილებული, გეგონება ხიზილალააო, თავის პოტენციურ ძალას ატანს გემოს. საბედნიეროდ, არც ერთ შემთხვევაში იგი
არ ფიქრობს მომდევნო წლებზე, როცა ალღოს სულ უფრო
ხშირად აუმღვრევს პანიკური შიში, როცა შეჩერება შეაშინებს და წინ წასვლისაც შეეშინდება, მაგრამ ცხრამეტი და ოცდაცხრა, კიბეებშუა ბაქანია, სადაც შეიძლება არ გეშინოდეს — არც ჰოლში და არც დერეფანში დათვი არ არის.

ნიკოლს რაიმე ბუნდოვანი და სულიერი რომანი კი არ უნდოდა — "საქმე" უნდოდა, ცვლილება სჭირდებოდა. ფიქრობდა რა დიკის ფიქრებით, ესმოდა, რომ ერთი შეხედვით უაზრობა და ვულგარულობა იქნებოდა უსიყვარულოდ, უემოციოდ აჰყოლოდა გატაცებას, რაც, კარგს არავის არას უქადდა,
მაგრამ იმავ დროს, მიაჩნდა, რომ ამ ვითარების შექმნაში ახლა დიკს მიუძღოდა უფრო ბრალი და გულწრფელად ფიქრობდა, ასეთი ცდა საკურნებელი იქნებაო. მთელ ამ ზაფხულ<sup>1)</sup>
ბევრის ცხოვრებას აკვირდებოდა, როგორც უნდოდათ, ისე
ცხოვრობდნენ, ამით არარა უშავდებოდათ და ესეც აძლევდა
ძალას — უფრო მეტიც, მიუხედავად იმისა, რომ გადაწყვიტა,
თავი არასდროს მოვიტყუოო, ერჩივნა ახლა დაეჯერა, რომ

მხოლოდ მოსინჯვა თუ უნდოდა თავისი გზისა, ეს თავისი ნება იყო და რა წუთსაც კი მოისურვებდა, შეეძლო უკან დაეხია...

გრდილში რომ მოექცნენ, ტომიმ, გეგონება თეთრმა იხვმა, ფრთა აიქნია, მკლავი გაშალა და ნიკოლი თავისკენ მიიზიდა. თვალებში ჩახედა.

"არ გაინძრეთ", უთხრა ნიკოლმა. "დიდხანს უნდა გიყუროთ

ახლა".

ტომის თმას რაღაც სურნელი და თეთრ კოსტიუმს კი ოდნავ საპნის სუნი დაჰკრავდა. ნიკოლი არ იღიმებოდა, ტუჩები მაგრად მოეკუმა. ერთ წუთს უბრალოდ ასე იდგნენ და ერთმანეთს უყურებდნენ.

"მოგწონთ, რასაც უყურებთ?" ხმადაბლა ჰკითხა.

"ფრახგულად ილაპარაკეთ".

"კარგი", ფრანგულად უთხრა ნიკოლმა და იგივე ჰკითხა. "მოგწონთ, რასაც უყურებთ?"

ტომიმ უფრო მიიზიდა.

"მე თქვენი ყველაფერი მომწონს". ცოტა ხანს გაჩერდა, "მეგონა, რომ კარგად ვიცოდი თქვენი სახე, მაგრამ თურმე არის კიდევ რაღაცა, რაც ადრე არ შემიმჩნევია. რამდენი ხანია რაც ასეთი უწყინარი ყალთაბანდის გამოხედვა გაქვთ?".

შემცბარმა და ბრაზმორეულმა ნიკოლმა განზე გაიწია და

ინგლისურად წამოიყვირა:

"ამიტომ გსურდათ ფრანგულად რომ გველაპარაკა?" დაინახა, მსახურს ხერესი და ორი ბოკალი მოჰქონდა, ამათკენ მოდიოდა და ხმას დაუწია. "უფრო იოლად რომ წარმოგეთქვათ შეურაცხმყოფელი სიტყვები?"

აღშფოთებული მივიდა სკამთან და პატარა საჯდომით ვერ-

ცხლისფერი ფარჩა ჩაზნიქა.

"სარკე თან არა მაქვს", ისევ ფრანგულად, ოღონდ უფრო მკვახედ განაგრძო, "მაგრამ თუ გამოხედვა შემეცვალა, ეს იმის გამო, რომ მე უკვე ისევ კარგადა ვარ და რაკი კარგად ვარ, ჭეშმარიტი ბუნებაც ისევ დამიბრუნდა — მე მგონია პაპაჩემი იყო ყალთაბანდი და მემკვიდრეობით გადმომეცა, ეს არის და ეს. დაკმაყოფილდა თქვენი ლოგიკური გონება?"

ტომი უყურებდა და ვერ გაეგო რაზე ლაპარაკობდა ნიკო-

ლo.

"დიკი სად არის — ჩვენთან ერთად არ ისაუზმებს?"

ნიკოლი მიხვდა, — თავის სიტყვებს ტომი დიდ რამედ არ მიიჩნევდა და გაიცინა, რომ წყენა წაეშალა.

"დიკი პროვანსშია", თქვა მან. "როზმერი ჰოიტი გამოჩნდა და ან იმასთან ერთად წავიდა, ანდა გრძნობები ისე აეშალა, რომ მარტოობაში ისურვა მასზე ეოცნება".

"მაინც რაღაც ცოტა უცნაური ქალი ხართ, ნიკოლ".

"არა, რას ამბობთ!" სწრაფად მიუგო ნიკოლმა. "სავსებით ჩვეულებრივი, მართლა — ოღონდ ჩემში ბევრი ქალია ერთად და — ყველა სხვადასხვა".

მარიუსმა ნესვი და ყინულიანი პატარა სათლი მოიტანა. ნიკოლი ფიქრობდა. ტომის სიტყვები, უწყინარი ყალთაბან- დის გამოხედვაო, თავიდან არ შორდებოდა; ეს კაცი ერთი იმათგანი იყო, ვინც მთელი კაკლებით იცოდა გამასპინძლება, იმის მაგივრად, რომ გაეტეხა და ისე, ლებნებად მიერთშია.

"რად შეგიშალეს ხელი, დარჩენილიყავით ისეთივე, როგორიცა ხართ". ისევ დაიწყო ტომიმ. "თქვენი ბედი ამაღელვებელია, ასეთ პიროვნებას სხვას არც კი ვიცნობ".

ნიკოლმა არაფერი თქვა, არ იცოდა რა ეპასუხა.

"ოჰ, ეს ჭირვეულთა მომრჯულებლები!" ირონიულად ჩაიფრუტუნა ტომიმ.

"ყველა საზოგადოებაშია გარკვეული", დაიწყო ნიკოლმა, იდაყვთან თითქოს დიკი ედგა, მისი აჩრდილი აძლევდა რჩე-ვას, და მაშინვე გაჩერდა, ტომის ხმას, მის ტონს დაემორჩილა.

"ჩემს ცხოვრებაში ბევრი კაცისთვის მისწავლებია ჭკუა ძალით, მაგრამ ქალთან ასე ვერ მოვიქცეოდი, ასეთი "კეთი-ლი" ჭირვეულობა, მე თუ მკითხავთ, უარესია. ვის რად არგია — თქვენ, მას, ანდა, კიდევ — ვინმე სხვას?"

ნიკოლს გული შეეკუმშა, თითქოს სადღაცა ჩაუვარდა, ძალიან კარგად იცის ნიკოლმა, რასაც უნდა უმადლოდეს დიკს.

"მე მგონია, მე მაქვს..."

"თქვენ გაქვთ ძალიან ბევრი ფული", მოუთმენლად შეაწყვეტინა ტომიმ. "ამით ბრკოლდება ყველაფერი. დიკს ეს ვერ გადაუტანია". სანამ ნესვს გაიტანდნენ, ნიკოლი ჩუმად იჯდა, ფიქრობდა, "როგორ გგონიათ, რა უნდა ვქნა ახლა?"

ამ ათ წელიწადში პირველად გრძნობდა სხვა კაცისა და არა თავისი ქმრის გავლენას, ტომის ყველა სიტყვა და ფრაზა სამუდამოდ შეესისხლხორცა ამიერიდან.

იმ ერთ ბოთლ ხერესს სვამდნენ, ფიჭვის ტოტებში ნიავი ნავარდობდა და წიწვებს არხევდა, მოთენთილი შუადღის სი- ცხე დამაბრმავებელ ჭორფლს აყრიდა ჭრელ საფარებელს მაგიდაზე. ტომი ადგა, მხრებზე ხელი შემოხვია, მერე თითები მოიქცია თავის ხელებში, ლოყა ლოყას შეეხო, და ბაგე ბაგეს—და ნიკოლს ლამის სული შეეხუთა ვნებისა თუ გაოცებისგან, რომ ასე ძლიერი იყო ეს ვნება...

"არ შეიძლება, გუვერნანტი შუადღით ბავშვებთან ერთად გაუშვათ სადმე სასეირნოდ?"

"ბავშვებს მუსიკის გაკვეთილი აქვთ, თანაც — არ მინდა აქ დარჩენა".

"კიდევ მაკოცე".

ცოტა ხნის მერე, მანქანაში, ტომის და ნიკოლს ნიცისკენ რომ მიაქროლებდა, ნიკოლი ფიქრობდა: მაშ მე უწყინარი ყალთაბანდის გამოხედვა მაქვს, არა? იყოს ასე, პურიტან ფსიქოპათს ისევ ჯანსაღი ყალთაბანდი ჯობია იყო.

თითქოს ამითი მოეხსნაო მთელი ბრალი და დანაშაული, ახლებურად დაინახა თავისი თავი და სიხარულის ჟრუანტელ- მა დაუარა. სულ სხვა ხედები იშლებოდა იმის წინ ახლა, ბევრ კაცს უნდოდა მასთან შეხვედრა და არ სჭირდებოდა მორჩი-ლება თუნდ ერთ მათგანთან, ან ჰყვარებოდა ერთი მათგანი. სული მოითქვა, მხრები შეარხია და ტომის მიუბრუნდა.

"მთელი გზა უნდა გავიაროთ და იმ ოტელშია მისვლა საჭირო, სადაცა ცხოვრობთ, მონტე-კარლოში?"

ტომიმ ისე მკვეთრად დაამუხრუჭა მანქანა, რომ სალტეების ღრჭიალი გაისმა.

"არა!" წამოიძახა მან. "და, ღმერთო ჩემო, არასოდეს ვყოფილვარ ისე ბედნიერი, როგორც ამ წუთში".

ნიცას უკვე გამოსცდნენ და გზა ცისფერი სანაპიროსი, მიხვეულ-მოხვეულად ადიოდა კორნიშისაკენ, მაგრამ ტომიმ მკვეთრად მოატრიალა მანქანა მარჯვნივ, დალაბრა კონცხი გა-

იარა და ზღვისპირა პატარა ოტელის უკან გაჩერდა.

ასეთმა რეალობამ წამით ნიკოლს შიში მოჰგვარა. კანტორასთან ვიღაც ამერიკელი გაუთავებლად კამათობდა ერთ კლერკთან სავალუტო კურსის თაობაზე. გულში რაღაც საწყლად
და ბეჩავად, მაგრამ გარეგნულად აუღელვებელი და მშვიდი
ნიკოლი იცდიდა, ვიდრე ტომი სარეგისტრაციო ფურცლებს
ავსებდა, თავისთვის — თავის სახელზე და ნიკოლისთვის —
გამოგონილზე. მათი ოთახი ისეთი იყო, როგორც ყველა ხმელთაშუა ზღვის აგარაკების ოტელებში — თითქმის მარმარა,
თითქმის ასკეტური, დარაბებით, ზღვის თვალმომჭრელი ელვარების დასაფარავად. უბრალო, სადა თავშესაფარი უბრალო სიამოვნებათათვის. ტომიმ კონიაკი შეუკვეთა, როცა ოფიციანტი გავიდა და კარი გაიხურა, იმ ერთადერთ სავარძელში
ჩაჯდა, ნამზეური, ლამაზი, მორკალული წარბებით, გამართული და ლოყაზე ნაჭრილობევით — მღელვარე პეკი, ოცნებაში
ჩაძირული სატანა.

კონიაკი ჯერ ბოლომდე არ დაელიათ, რომ რაღაცა ძალამ წამოაყენა უცებ ორთავე და ერთმანეთს მიაგდო; მერე საწოლ- ზე დააწვინა ტომიმ ნიკოლი და მაგარ, და ნამზეურ მუხლებს კოცნიდა. ნიკოლი არ გასძალებია, მხოლოდ ოდნავ თუ, და თავმოკვეთილი ნადირივით, უკვე დაავიწყდა დიკიც, თავისი ახალი გამოხედვაც, დაავიწყდა ტომიც, და ღრმად, უფრო

ღრმად იძირებოდა იმ წუთებსა და იმ წამებში.

...როცა ტომი წამოდგა და ფანჯარასთან მისულმა დარაბა გახსნა, რათა გაეგო რა ხდებოდა ფანჯრებქვევით და რა ხმაური შემოდიოდა, ნიკოლს დიკზე უფრო მზედაკრული და ძლიერი ეჩვენა იგი; მზეზე კუნთები დაჭიმული და სრიალა ჩანდა. რაღაცა წუთში ტომისაც დაავიწყდა ნიკოლი და როცა სხეულით მოწყდა მის ხსეულს, ნიკოლმა უცებ თითქოს იგრძნო, რომ ყველაფერი მხოლოდ ისე არ იქნებოდა, როგორც ელოდა. ეს ის შიში იყო, რომელსაც სახელი არა აქვს და წინ უსწრებს ხოლმე სიხარულსაც და მწუხარებასაც, გარდაუვალი, ისე რო-გორც ჭექა-ქუხილი ქარიშხლისა და გრიგალის წინ.

ტომიმ ფრთხილად გადაიხედა აივნიდან და მერე მოახსე-

ნა:

"არაფერი ჩანს, ამ აივნის ქვევითა აივანზე ორი ქალია, ამერიკულ საქანელებში სხედან და ამინდზე ლაპარაკობენ, ეს არის და ეს".

"და იმათგან მოდის ეს ხმაური?"

"არა, ხმაური სადღაც უფრო ქვევიდან მოდის. მოუსმინე".

ოჰ, იქ, სამხრეთში, იმ მიწაზე, ბამბა რომ მოჰყავთ, ოტელები ცარიელია და ბიზნესი ურჩებათ ოხრად, აბა, რას ნახავ...

"ამერიკელები არიინ".

ნიკოლმა მკლივები გაშალა საწოლზე და ჭერს მიაშტერდა; პუდრის სინოტივისაგან ტანი თითქოს რძისა გაუხდა, მოსწონდა ეს შიშველი ოთახი, ერთადერთი ბუზის ბზუილი ჭერთან ახლო. ტომიმ საწოლთან მისწია სავარძელი და ზედ რაც ელაგა, ძირს დაყარა, რომ დამჯდარიყო; ნიკოლს ისიც მოსწონდა, რომ თან ახლა ასე ცოტა რამ ჰქონდათ, ესპადრილები, ქარზე უფრო უმსუბუქესი კაბა, ესეც ტომის ქერელის ტილოს შარვალთან ერთად ეყარა იატაკზე.

ტომი საროტანს აკვირდებოდა, თეთრი ტორსი მკვეთრად ემიჯნებოდა ყავისფერ კიდურებსა და თავს, მერე თითქმის სერიოზულად, მაგრამ სიცილით უთხრა:

"ახალდაბადებული ბავშვივითა ხარ".

"ყალთაბანდის თვალებით".

"ამას მოვუვლით".

"ძალიან ძნელია თვალების მოვლა, მეტადრე მაშინ, თუ ჩიკაგოშია გაკეთებული".

"არაფერია, მე კარგად ვიცი ლანგედოკური ყველა ხალხური საშუალება".

"მაკოცე, ტუჩებში, ტომი". .

"ეს ძალიან ამერიკულია", თქვა ტომიმ, ოღონდ, მაინც აკოცა. "ბოლო დროს ამერიკაში ყოფნისას ბევრ ქალიშვილს შევხვდი, ლამის ტუჩები დაგაგლიჯონ და თვითონაც დაიგლიჯონ, ისე გკოცნიან, სისხლი მოაწვებათ ხოლმე სახეზე და ტუჩები უსკდებათ — მაგრამ ამაზე შორს აღარ მიდიან".

ნიკოლი წამოიწია და იდაყვს დაეყრდნო.

"მოძწონს ეს ოთახი", თქვა მან.

"ჩემი აზრით, ცოტა ღარიბულია. ძვირფასო, რა კარგია, რომ მონტე-კარლომდე მოცდა არ ისურვე".

"რად არის ლარიბული? შესანიშნავი ოთახია, ტომი — სე-

ზანისა და პიკასოს შიშველი მაგიდებივითაა".

"არ ვიცი". და არც უცდია გაეგო მისთვის. "ისევ ის ხმაურია. ღმერთო ჩემო, რა ამბავია, კლავენ ვიღაცას?"

ფანჯარასთან მიბრუნდა და ისევ მოახსენა:

"მე მგონია, ორი ამერიკელი მეზღვაურია, ორი ჩხუბობს, სხვები კი აქეზებენ. თქვენი კრეისერიდან არიან, რეიდზე რომ დგას". თეძოებზე პირსახოცი შემოიხვია და აივანზე გავიდა. "თან გოგოები ჰყავთ. ახლა ასე შემოიღეს — ეს ქალები პორტიდან პორტამდე მიჰყვებიან. მაგრამ როგორები! კაცმა რომ თქვას, იმდენი კი აქვთ, შეუძლიათ უკეთესი ქალები ნახონ რა ქალებს ვხვდებოდით თუნდაც კორნილოვის ჯარში! რაღა ქალი და რაღა ბალერინა!"

ნიკოლს ესეც უხაროდა, რომ ტომი ბევრ ქალს შეხვედროდა ცხოვრებაში, იმდენად ბევრს, რომ თვითონ სიტყვა "ქალი" ახლა აღარაფერს იწვევდა, და ძალიან კარგიც, ვიდრე ნიკოლში ქალურ სილამაზეზე უფრო მეტს ხედავს, იოლად

შეძლებს ტომის "დაჭერას".

"ეგრე, მი-დი!"

"ჰეი, მიარტყი, მანდ მტკივნეულია, გეუბნები!"

,,20-00-0!"

"მარჯვენათი, როგორც გითხარი!"

"რას შვრები, დულშმიტ, ოხრიშვილო!"

,,20-00-0!"

"მი-დი-ი!"

ტომი ოთახში შემობრუნდა.

"აქ გაჩერება აღარა ღირს, თანახმა ხარ?"

თანახმა იყო, მაგრამ ჩაცმამდე ისევ მიეკვრნენ ერთმანეთს და რაღაც წუთებში ეს ღარიბული ოტელი კი არა, სასახლესავით ადგილი იყო...

ბოლოს და ბოლოს ტომიმ ჩაიცვა, ფანჯარაში გაიხედა და Podmodobo:

"ღმერთო ჩემო, ეს ორი ქალი აივნის ქვეშ, საქანელებში ისე სხედან და ლაპარაკობენ, შებრუნებაც არ უფიქრიათ, ვითომდა რაო, რა მოხდაო; აქ იმისათვის ჩამოვიდნენ, რათა მომჭირნედ გაატარონ შვებულება და ვერც ამერიკის სამხედრო ფლოტი და მთელი ევროპის მეძავებიც ვერ დაურღვევენ მყუდროებას".

ნიკოლთან მივიდა და ნაზად მოეხვია, ჩამოცურებულ სამხრეს კბილებით უსწორებდა, რომ სწორედ ამ დროს რაღაცა გრიალი გაისმა: ქრ-ექ-ბუუშ-მ-შ! კრეისერი უხმობდა თავის მეზღვაურებს.

მაშინვე, იმათი ფანჯრის ქვეშ საშინელი ორომტრიალი ატყდა — ჯერ არავინ იცოდა საით მიდიოდა ხომალდი, რად-გან არავინ აცხადებდა. ოფიციანტები აუღელვებლად მოითხოვდნენ ანგარიშის გასწორებას და მათი ხმები ლანძღვასა და აღშფოთებულ წამოძახილებში ირეოდა; ისმოდა ბანკნოტების შრიალი, ხურდისა და წვრილი ფულის, მონეტების ჩხარუნი, ვიღაცას წამოდგომის თავი აღარა ჰქონდა და ძმაკაცებს მიჰყავდათ, და მთელ ხმაურს ფარავდა სამხედრო-საზღვათ პოლიციის ჩინოსანთა მოკლე და სწრაფი ბრძანებები. ბოლოს ყვირილი, ტირილი, თხოვნა, დაპირებები. ნაპირს პირველი ბარკასი მოშორდა და ნავმისადგომთან შეყრილი ქალების ქვითინიცა და კივილიც თან გაიყოლა.

ტომიმ დაინახა, ერთი ქალიშვილი ქვევითა აივანზე ავარდა, მოაჯირს გადააწვა და გაშმაგებით მოჰყვა რესტორანის
თეთრი ხელსახოცის ქნევას, და სანამ იმ ინგლისელი ქალების
სიფათებს შეხედავდა, საქანელებში რომ ისხდნენ და გაიგებდა, ამ ამბით მაინც თუ დაერღვათო უშფოთველობა, ვიღაცამ
ამათ კარზე დააკაკუნა. ქალების აღელვებული ხმები ისმოდა.
იხვეწებოდნენ, კარი გაგვიღეთო, ნიკოლი თანახმა იყო და
ტომიმ გაუღო. კარს იქით ორი ქალიშვილი იდგა, ორი გოგო,
ბარბაროსებსა ჰგვანდნენ, ვინ იყვნენ, ვის დაჰკარგოდათ. ერთი მათგანი გულამოსკვნით ტიროდა.

"შემოგვიშვით, თქვენი აივნიდან დავუქნევთ ხელს!" ძლიერი ამერიკული აქცენტით იხვეწებოდა მეორე. "ძალიან გთხოვთ, თუ შეიძლება, შემოგვიშვით! ხელს დავუქნევთ მეგობარ ბიჭებს? ძალიან გთხოვთ! სხვა ოთახები დაკეტილია".

"სიამოვნებით", მიუგო ტომიმ.

. ქალიშვილები აივნისკენ გავარდნენ და იმ გრიალსა და

ხმაურში იმწამსვე გაისმა ორი გულგამგმირავი დისკანტი.

"ჩარლი! ჩარლი, მოიხედე!"

"ნიცაში მოიწერე მოთხოვხამდე!"

"ჩარლი! ვერ მხედავს".

ერთმა ქალიშვილმა უცებ კაბა აიწია, ვარდისფერი ტრუსი გაიძრო, შუაზე გახია და ველურივით მოჰყვა ამ სახელდახელო დროშის ქნევას. "ბენ! ბენ!" გაჰკიოდა თან. როცა ტომი და ნიკოლი ოთახიდან გამოდიოდნენ, ისევ ირხეოდა ლურჯი ცის ფონზე ეს ნაზი ფერი, სხეულის ფერი — კრეისერის ანძაზე კი ვარსკვლავწინწკლება დროშა იწევდა მეტოქესავით, მაღლა და მაღლა.

მონტე-კარლოში ისადილეს, ახალ, ზღვისპირა კაზინოში... გვიან საღამოს კი, როცა ბოლიეში გაჩერდნენ, მონაკოსა და ნისლში გახვეული მენტონის გამოღმა, ფოსფორესცენციური წყლის თასის ზემოთ, უფერო კენჭებისა და ქვების რკალში მთვარის შუქი ხვიმირივითა ჩანდა, და იქ იბანავეს. ნიკოლს მოსწონდა, რომ ტომიმ ამ ადგილს მოიყვანა, აღმოსავლეთისკენ რომ ჰქონდა პირი და სად ქარის ქროლაც ახალი იყო და წყლის ლივლივიც, ისევე, როგორც თვითონვე იყვნენ სულ ახლები ერთმანეთისთვის. ახლა თითქოს დამასკელი ტყვე ქალი იყო, მოიტაცეს და ჯვარედინად დააკრეს ზედ უნაგირს და თვალუწვდენელ უდაბნოს მისცეს, გადაკარგეს. ყველაფერი, რაც მანამდე ასწავლა დიკმა, საოცრად მალე მიეცა უკვე დავიწყებას და შორეულ სახეს უბრუნდებოდა, ქალის პროტოტიპს, ვის გულისთვისაც ამა ქვეყნის ხმალშემართულებს შებმა სწყუროდათ ურთიერთთან, და მთვარითა და სიყვარულით გადაქანცული, შმაგი საყვარლის თავაწყვეტით ხარობდა ახლა.

ერთ და იმავ დროს გაიღვიძეს. მთვარე უკვე გადასული იყო, გრილოდა. თავს ძალა დაატანა, წამოდგა და რომელი სა-ათიაო, იკითხა. ტომიმ თქვა, რომ სამი ხდებოდა.

"დროა, შინ წავიდე".

"მე მეგონა მონტე-კარლოში გავათენებდით".

"არა, სახლში გუვერნანტი და ბავშვები არიან. განთიადამდე უნდა დავბრუნდე". "როგორც შენ გინდა".

წასვლისას ერთხელაც ჩავიდნენ ზღვაში, ამოსვლისას, ტომიმ შეხედა, ნახა, ნიკოლი კანკალებდა და მაგრად შეამშრალა პირსახოცით. მანქანაში ჩასხდნენ. თმა ისევ სველი ჰქონდათ, წყლის მერე ახლა კანი უხურდათ. არ უნდოდათ აქედან წასვლა. რიჟრაჟდებოდა და ტომი რომ კოცნიდა, ნიკოლი გრძნობდა, რომ ტომისთვის ახლა აღარაფერი არსებობდა, გარდა ნიკოლის ფერმიხდილი ღაწვებისა და თეთრი კბილების, გრილი შუბლის და თითებისა, ნაზად რომ უფერებოდა ტომის სახეზე. ნიკოლი რაღაც ლაპარაკს ელოდა, რაღაცა ახსნას, როგორც ეს დიკთან იყო ხოლმე, მაგრამ ტომი ჩუმად იყო. და როცა მიხვდა, გახარებული და გეგონება ბურანში მყოფი, რომ საუბარი არ იქნებოდა, მოხერხებულად ჩაჯდა, ჩასთვლიმა და ასე იყო, სანამ ძრავას შეცვლილი ხმით მიხვდებოდა, რომ აღმართზე ადიოდნენ და ვილა "დაიანას" უახლოვდებოდნენ. ტომის ჭიშკართან გამოეთხოვა და თითქმის მექანიკურად აკოცა. ბილიკზე თითქოს სხვა მიდიოდა, წარსულში, დიდი ხნის წინათ მიკარგულ ხმებს გამოსცემდა ამ ღამეს ბაღი და მაინც უხაროდა შინ დაბრუნება. მალი სტაკატოთი ჩათავდა დღე და სიამოვნების მიუხედავად, მისთვის ეს მაინც უჩვეულო დაძაბვა იყო.

## IX

მეორე დღეს, ოთხ საათზე ჭიშკართან ვაგზლის ტაქსი გაჩერდა და იქიდან დიკი გადმოვიდა. ნიკოლმა ტერასა ჩაირბინა მის შესახვედრად, ძველებურად თავის დაჭერას ლამობდა და სუნთქვა ეკვროდა.

"მანქანა სად არის?" ჰკითხა ნიკოლმა.

"არლში დავტოვე. მომბეზრდა საჭესთან ჯდომა".

"ბარათის მიხედვით, მე მეგონა რამდენიმე დღით მიდიო-დი".

"მისტრალსა და წვიმაში მოვყევი".

"კმაყოფილი ხარ?"

"როგორც ყველა, ვინც იმისათვის მიდის, რათა რაღაცას გაექცეს ხოლმე. როზმერი ჩავიყვანე ავინიონამდე და იქ მატა-რებელში ჩავსვი". ნიკოლთან ერთად გავიდა ტერასაზე, სადაც

თავისი ჩანთა დადო. "ამაზე არაფერი მითქვამს ბარათში, შეიძლება ათასი რამ გეფიქრა".

"ზრუნვისთვის "გმადლობ". ნიკოლმა ისევ გულდაჯერება

იგრძნო ახლა.

"მინდოდა გამეგო, შეიძლება თუ არა როზმერისგან რამეს ელოდო, ამიტომ უნდა მენახა მარტო".

"მერე — "შეიძლება თუ არა? "

"როზმერი არ გაზრდილა, ისეთივეა", მიუგო დიკმა. "ალბათ ასე უკეთესიც არის. შენ რას აკეთებდი?"

ნიკოლმა იგრძნო, ბოცვერივით შეუთრთოლდა სახე.

"გუშინ საღამოს საცეკვაოდ წავედი — ტომი ბარბანთან ერთად. წავედით..."

დიკი შეიჭმუხნა, შეაწყვეტინა:

"არ გინდა ამის მოყოლა, შენ შეგიძლია, რაც შენა გსურს ის გააკეთო, ოღონდ, მე არ მინდა რამე ვიცოდე".

"არც არაფერია საცოდნელი".

"კარგი, კარგი", მერე, თითქოს ერთი კვირით ყოფილიყო წასული: "ბავშვები როგორ არიან?"

სახლში ტელეფონის ზარი გაისმა.

"თუ მე მიკითხეს, შინ არა ვარ". დიკი საჩქაროდ შეტრიალდა. "ფლიგელში შევალ, რაღაცებია მისახედი".

ნიკოლმა შეიცადა, სანამ დიკი ჭას გასცდებოდა, მერე სახლში შევიდა და ტელეფონი აიღო.

"ნიკოლ, მანდ როგორა ხარ?"

"დიკი შინ არის".

ტომის ოხვრა აღმოხდა.

"შევხვდეთ აქ, კანში", შესთავაზა ტომიმ. "უნდა მოვილაპარაკოთ".

"არ შემიძლია".

"მითხარი, რომ გიყვარვარ". ნიკოლმა უსიტყვოდ დაიქნია თავი ტელეფონთან; ტომიმ გაუმეორა, "მითხარი, რომ მე გიყვარვარ".

"ჰო, ასეა, მაგრამ ახლა შეუძლებელია".

"არ არის შეუძლებელი", მოუთმენლად თქვა ტომიმ. "დიკმა ხომ იცის, რომ თქვენ შორის გათავდა ყველაფერი, თვითონ დაიხია, ეს ცხადია და რაღას უნდა ელოდოს შენგან?" "არ ვიცი. არ ვიცი, მე ჯერ-" კინაღამ უთხრა: "—ჯერ ლიკს ვკითხე", მაგრამ დროზე შეიკავა თავი და ასე დაამთავ- რა: "ხვალ დაგირეკავ და მოგწერ".

სახლს გარს უვლიდა, კმაყოფილი თავისი თავით, რომ ასე გოიქცა. იცოდა, რაც დააშავა და ეს ცოდნა ანიჭებდა კმაყო-ფილებას; ჯობია ასე, დამწყვდეულ გარეულ ფრინველზე მონადირე მაინც აღარ იქნება ამის მერე. გუშინდელი დღე ახსენებდა თავს, ბევრი რამ თვალწინ წარმოუდგა, ეს დეტალები მეხსიერებიდან საუკეთესო, იმ ადრეულ წუთებს დევნიდნენ, როცა დიკი უყვარდა და ახლა ცოტა გულგრილადაც კი უყურებდა იმ სიყვარულს, ეჩვენებოდა, რომ თავიდანვე ეს უფრო მეტად სანტიმენტალური შეჩვევა იყო. ცვალებად ქალურ მეხსიერებას ძლივს ახსოვდა ის ბედნიერება, ქორწინებამდე ის და დიკი ერთმანეთისა რომ გახდნენ ფარულად, და თითქმის ერთ თვეს სამყაროს ხან ერთ შესახვევში იმალებოდნენ და ხან რა იდუმალ სხვა ადგილას ამ სამყაროსი. წუხელ ღამეს კი ტომის ასევე ატყუებდა, ეფიცებოდა, რომ არასოდეს ჰქონია ასე წამლეკავი, ასეთი სრული...

...მერე კი, სინანულმა ამ ღალატის გამო, თავისდა საამებლად ასე იოლად ათი წელიწადი რომ წაშალა ცხოვრებისა, იმ სინანულმა მიატრიალა ახლა დიკის თავშესაფრისკენ.

უხმაუროდ მიუახლოვდა, დაინახა, დიკი კლდის ძირას, კოტეჯის უკან სკამზე იჯდა და ნიკოლის მისვლა არ გაუგია. ერთხანს იდგა და ასე, ჩუმად უყურებდა მას. დიკი ფიქრებში
წასულიყო, მხოლოდ თავის სამყაროში ჩაძირულიყო და სახეზე ოდნავი ცვლილებითაც, ხან წარბებს რომ ასწევდა ზევით
ან შეიქმუხნებოდა, თვალებს ხან ლამის ხუჭავდა და მერე ახელდა, პირს ხან კუმავდა, ან ოხრავდა, ხელების შფოთიანი
მოძრაობით, ნიკოლი ხვდებოდა — ახლა იგი მთელი თავისი
ცხოვრების ყველა ფაზას ზომავდა და აკვირდებოდა, ყველა
ფაზას მხოლოდ თავისი ცხოვრებისა, ცალკე — ნიკოლის ცხოგრებისგან. ერთხელაც, მუშტები მომუჭა და წინ გადაიხარა,
ერთხელაც სახეზე ტანჯვა და სასოწარკვეთა გამოეხატა და
როცა გადაუარა, კვალი დააჩნდა სახეზე, ისევ თვალებში
ედგა. თითქმის პირველად თავის სიცოცხლეში, ნიკოლს შეეცოდა იგი — იმათ, ვისაც სულიერი დაავადება გადაუტანიათ,

ძნელად რომ შეეცოდოთ კარგად მყოფი და თუმცა ნიკოლი ხშირად ამბობდა, რომ მხოლოდ დიკმა დააბრუნა ამ სამყა- როში, მაინც ისე ფიქრს მიეჩვია, თითქოს ულევი ძალა ჰქონდა დიკს და არ იცოდა რა იყო დაღლა — დაავიწყდა, რაც მის გამო გადაიტანა დიკმა, ისევე, როგორც აღარ ახსოვდა ის, რაც თვითონ გადაიტანა. იცოდა დიკმა, რომ მისი უფლება და მისი ძალაც, გათავდა უკვე? უნდოდა კი დიკს, რომ ასე ყოფილიყო? — ამაზე არ ფიქრობდა, მხოლოდ ენანებოდა, როგორც ხანდახან — ეიბი და ეიბის ისე უღირსი ხვედრი, ბავშვებისა და მოხუცების უმწეობა რომ ენანებათ, მხოლოდ ისე ენანებოდა ახლა დიკი.

ახლო მივიდა, მხრებზე შემოხვია ხელები, საფეთქელი სა-

ფეთქელზე მიადო და უთხრა:

"არ გინდა ასე, სევდიანი ხარ".

დიკმა ცივად შეხედა.

"არ შემეხო!"

ნიკოლი შეცბა, დაიხია.

"მაპატიე", დაბნეულად უთხრა დიკძა. "სწორედ შენზე ვფიქრობდი — იმაზე, თუ რას ვფიქრობ შენზე…"

"შეგიძლია შენი წიგნები შეავსო ამით".

"მე მგონია კარგი იქნება — "გარდა ჩამოთვლილი ფსიქოზებისა და ნევროზებისა..."

"მე აქ საჩხუბრად არ მოვსულვარ".

"მაშინ, რისთვის მოხვედი, ნიკოლ? შენთვის მე უკვე ველარაფერს გავაკეთებ. ახლა იმასღა ვცდილობ მხოლოდ, ჩემი თავი გაღავარჩინო".

"რომ ჩემგან არაფერი გადაგედოს?"

"ჩემი პროფესია ხანდახან საეჭვო ხალხსაც შემყრის ხოლმე".

აღშფოთებისა და ბრაზისაგან, ნიკოლი ატირდა.

"ლაჩარი ხარ! ცხოვრებაში ხელი მოგეცარა, შენა ხარ დამ-

ნაშავე და გინდა, რომ მე დამაბრალო".

დიკმა არ უპასუხა, მაგრამ ნიკოლმა უკვე იგრძნო მისი გონების წინანდელი, ხანდახან უნებლიე, მაგრამ ყოველთვის ჭეშმარიტების რთულ სუბსტრატზე დაყრდნობილი ჰიპნოზუ-რი ზემოქმედება, რისი გარღვევის ან გამტვრევის ძალაც ნი-

კოლს არ შესწევდა, და ისევ ბრძოლაში ჩაება, იბრძოდა თავისი პატარა, მაგრამ მშვენიერი თვალებით და მოზეიმის უებრო გულდიდობით და ქედმაღლობით, ებრძოდა სხვა კაცთან სიახლოვის სიახლით, და წყენით, რაც კი წლების მანძილზე დაუგუბდა; იბრძოდა თავისი ფულით და იმით, რომ მხარში თავისი და ედგა, ვისაც იმთავითვე არ უყვარდა დიკი; იმის ფიქრით, რომ ახალი მტრები გაიჩინა მწარე ენით ბოლო ხანს დიკმა, და იმით, რომ ახლა ვერაგულად დასცინოდა დიკს ძველი ლხენის, პურ-მარილის და პურ-ღვინოს გამო, თავის სილამაზესა და სიჯანსაღეს უპირისპირებდა დიკის ფიზიკური ძალის დაცემას, თავის უპრინციპობას — მის ზნეობრივ პრინციპებს, თავისი სისუსტეც კი გამოიყენა ამ ბრძოლისთვის — მამაცურად და გაბედულად იბრძოდა და იყენებდა ძველ ქილებსა და სურებს, ქაშანურს, მონანიებული ცოდვებისა და შეცდომების, საქციელის ახლა უკვე გამოუსადეგარ საჭურჭლეს და უცებ, ორ წუთში მოიპოვა გამარჯვება, გაამართლა თავისი თავი თავის წინაშე და არც სიცრუისთვის მიუმართავს და არც სხვა რაიმე ხერხისათვის, საბოლოოდ გადაჭრა თოკი. მერე, როცა ტირილითაც გული იჯერა, შეტრიალდა და ფეხარეული, მაგრამ გრილი, თავის სახლისკენ წავიდა ნელა, ბოლოს და ბოლოს, უკვე თავისი იყო ეს სახლი.

დიკმა მანამდე შეიცადა, სანამ ნიკოლი თვალს მიეფარა. მერე წინ გადაიხარა და პარაპეტს დაადო თავი. პაციენტი მორჩა. დოქტორი დაივერი თავისუფალი იყო ახლა.

X

ლამის ორ საათზე ნიკოლი ტელეფონის ხმამ გამოაღვიძა და გაიგონა, რომ დიკმა უპასუხა იმ ოთახიდან, სატანჯველის

სარეცელს რომ ეძახდნენ დაივერები; იქ იწვა დიკი.

"დიახ, დიახ... ვის ველაპარაკები?.. დიახ..." გაკვირვებისაგან დიკს მაშინვე გაუკრთა ძილი. "მაგრამ, შეიძლება, რომ ერთ-ერთ ლედის ველაპარაკო, ბატონო ოფიცერო? ორთავე ლედი მაღალი წრიდან არიან, წარჩინებული ოჯახებიდან, ისე რომ შეიძლება ამას მეტად სერიოზული პოლიტიკური გართულებები მოჰყვეს... დიახ, ფაქტია, დამიჯერეთ... მე გითხარით და თვითონ ნახავთ..."

დიკი ადგა, ცდილობდა კარგად გაეაზრა ვითარება იმის მიხედვით, რაც ტელეფონში უთხრეს, მაგრამ უკვე იცოდა, რომ თავის თავზე აიღებდა საქმის მოგვარებას — ადრინდელი საბედისწერო ხიბლი და ძალა შეირხა მასში, თითქოს ეძახდა— "გამომიყენე!" ახლა წავა და ყველაფერს თავის ადგილს შიუჩენს, გაუგებრობას ააცილებს თავიდან ყველას, გაუგებრობას, რასთანაც თვითონ, კაცმა რომ თქვას, რა საქმე აქვს, და ამას მხოლოდ ძველი ჩვევა ჩაადენინებს — რომ ჰყვარებოდათ, ეს ჩვევა შეიძლება იმ წუთებიდან გაუჩნდა, როცა იგრძნო, რომ თვითონ იყო დაშლილი კლანის უკანასკნელი იმედი. მაშინაც, ლამის ასეთივე გარემოებაში, ციურიხის ტბაზე, დომლერის კლინიკაში შეიცნო თავისი ძალა და აირჩია; ოფელია ამოირჩია, ტკბილი შხამი ამოირჩია და შესვა იგი. ყოველთვის, ყველაზე მეტად ისა სურდა, რომ გამბედავი და კეთილი ყოფილიყო და ამაზე უფრო ის უნდოდა, რომ ჰყვარებოდათ. ასე იყო და ასეც იქნება, გაიფიქრა, როცა მილს დებდა და ჟღარუნი გაისმა, ტელეფონი ძველმოდური იყო.

კარგა ხნის დუმილის მერე ნიკოლმა გამოსძახა, "რა მოხდა, ვინ დარეკა?"

დიკი უკვე იცვამდა.

"პოლიციის უფროსმა ანტიბიდან — იქ მერი ნორთი და ის სიბლი-ბირსი დაუკავებიათ. რაღაც სერიოზული ამბავია, მაგ-რამ არ მითხრა, მხოლოდ ერთსა და იმავეს გაიძახოდა, "მსხ-ვერპლი არ არის, არც ავარია". მაგრამ გადამიკრა, რომ სხვა ყველაფერი".

"მაგრამ შენ რა შუაში ხარ, რად დაგირეკეს? არ მესმის".

"მოითხოვენ, რომ თავდებით გაუშვან და თავდებად კი მხოლოდ ის პირი შეიძლება დაუდგეს, ვისაც ზღვისპირა ალ-პებში საკუთრება აქვს".

"თავხედობაა!"

"არაფერია, წავალ. ოტელში შევივლი მაინც, და გოსსაც გავიყოლებ…"

დიკის წასვლის მერე ნიკოლი დიდხანს ტრიალებდა საწოლში, ვერ მიმხვდარიყო რა უნდა ჩაედინა იმ ორ ლედის; ბოლოს ჩაეძინა. როცა ოთხი საათისთვის დიკი დაბრუნდა, მაშინვე შემკრთალი წამოხტა და "რაო?" ისე თქვა, გეგონება სიზმარში ნახა ვიღაცა და იმას ჰკითხაო.

"სიგიჟეა და მეტი არაფერი — " დიკი საწოლზე, ნიკოლის ფეხებთან ჩამოჯდა და უამბო; მოხუც გოსს კარგა მაგარი ელ-ზასური ძილით ეძინა და ძლივს გააღვიძა, გააგებინა რაც უნდოდა, სალაროდან მთელი ფული ამოაღებინა და ორივე ერთად პოლიციის უბანში წავიდნენ.

"სულაც არ მინდა იმ ინგლისელი ქალისთვის რამე გავაკეთო", ბუზღუნებდა გოსი.

მერი ნორთი და ლედი კეროლაინი, ორთავე ფრანგი მეზღვაურის სამოსში, და გაწამებულ-მოქანცულები, ორი მკრთალად განათებული კამერის გარეთ ისხდნენ სკამზე. ლედი კეროლაინი — შეურაცხყოფილი ღირსებით იმ ბრიტანელისა, ვინც ელის, რომ ხმელთაშუა ზღვის მთელი ფლოტი დაიძვრება იმის საშველად. მერი მინგეტი პანიკას მოეცვა, ძალიან იყო დაბნეული — დიკი რომ დაინახა, მაშინვე თითქმის მუცელზე მივარდა, გეგონება, ყველაზე კარგად ახლა ეს ადგილი უშველიდა, და ხვეწნასა და მუდარას მოჰყვა, როგორმე ყველაფერი მოაგვარეო. ამასობაში პოლიციის უფროსი საქმის ვითარებას აცნობდა გოსს, რომელიც უხალისოდ ისმენდა ყველა სიტყვას და არ იცოდა რა უფრო გამოეხატა, ის, რომ სათანადოდ აფასებდა ოფიცრის თხრობის ნიჭსა და უნარს თუ ის, რომ ძალიან უნდოდა დაენახვებინა, იმდენი ხანი კი ვიმსახურე, აღარაფერი გამაკვირვებსო. "ეს უბრალოდ, ხუმრობა იყო, გიჟმაჟობა", აგდებით ჩაილაპარაკა ლედი კეროლაინმა, "ვითომ მეზღვაურები ვიყავით და ნაპირზე გადასვლის ნებართვა გვქონდა, ორმა სულელმა გოგომაც დაიჯერა, პატარა სასტუმროში თან წამოგვყვნენ, მერე შეეშინდათ და საშინელი სცენა გამართეს".

დიკი უსმენდა, ქვის იატაკს ჩასცქეროდა და მხოლოდ ხანდახან უქნევდა თავს, იმ მღვდელივით, სააღსარებოდ რომ მისულან მასთან; ძლივს იკავებდა სიცილს, მაგრამ ძალაუნებურ სურვილსაც გრძნობდა, კარგა მაგრად გაეჯოხათ და ერთი ორი კვირა მარტო წყალსა და პურზე დაესვათ ეს შარისთავები; თანაც, ლედი კეროლაინი, აქაოდა, რა მოხდა, ისეთი რა იყო, და თუ რამე იყო, ისიც იმ პროვანსელი შტერი გო-

გოების სიმხდალისა და პოლიციის გონებაშეზღუდულობის ბრლიაო, უხერხულობაში აგდებდა; კარგა ხანია იმ დასკვნამდე მივიდა დიკი, რომ ინგლისელთა გარკვეული კატეგორია ანტისოციალურობის ისეთი ექსტრაქტითაა გამოკვებილი, რომ ნიუ-იორკის ყველა მახინჯი მხარე ამასთან, ნაყინის ქამისაგან ავად გამხდარ ბავშვსა ჰგავს მხოლოდ.

"სანამ ჰოსეინი გაიგებს, მანამდე უნდა დავაღწიო თავი ამ ადგილს". ტიროდა მერი. "დიკ" თქვენ შეგიძლიათ ყველაფე-რი მოაგვაროთ — თქვენ ხომ ყოველთვის შეგეძლოთ ხოლმე, უთხარით, რომ დავტოვებთ აქაურობას, უთხარით, რომ გადავიხდით, რამდენსაც გვთხოვენ".

"მე არ გადავიხდი", ქედმაღლურად თქვა ლედი კეროლაინმა. "ერთ შილინგსაც კი. მაგრამ იმაზე კი გიზრუნებ, რომ რაც შეიძლება მალე მიაღწითს ამ ამბავმა საკონსულომდე კანაში. იმასაც ვნახავ, რას ეტყვიან იქ".

"არა, არა!" წამოიძახა მერიმ. "აქედან უნდა გავიდეთ, ამაღამვე".

"ვნახავ, ვეცდები მოველაპარაკო", თქვა დიკმა და დაუმატა: "მაგრამ, ცხადია, უფულოდ არაფერი გამოვა". ისე უყურებდა, თითქოს მართლა მიამიტები და უმანკოები არიანო, რასაც თავისთვის არამც და არამც არ ფიქრობდა, თავი გადაიქნია. "არ გინდა ამისთანა სიგიჟე მოიფიქრო!"

ლედი კეროლაინმა გულმხიარულად გაიღიმა.

"თქვენ გადარეულების ექიმი ხართ, ასე არ არის? ესე იგი შეგიძლიათ შველა, გოსი კი — მაგას კიდევაც ევალება".

დიკი გოსთან ერთად განზე გადგა, რომ გაეგო, რას ელაპარაკებოდა პოლიციის ჩინოსანი. საქმე უფრო სერიოზული
ჩანდა, ვიდრე ეგონათ — ერთ-ერთი პროვანსელი ქალიშვილი,
ამათ რომ წაჰყვა, კარგი ოჯახიდან იყო და ოჯახში აღშფოთდნენ, ან, ისე იჭერდნენ თავს, ვითომ აღშფოთდნენ,
მათთან რაღაც შეთანხმება იყო საჭირო. მეორე კი — პორტის
ერთ-ერთი გოგო იყო და აქ შედარებით იოლადაც მოგვარდებოდა ყველაფერი. მაგრამ საქმე თუ სასამართლომდე მივიდოდა, მაშინ, საფრანგეთის კანონების მიხედვით, ორთავეს
ციხე არ ასცდებოდათ, ანდა, უკეთეს შემთხვევაში, გააძევებდნენ. მდგომარეობა უფრო იმითაც რთულდებოდა, რომ აქა-

ურები სხვადასხვაგვარად უყურებდნენ უცხოელებს, ერთნი ხვირში იყვნენ იმათგან, სხვები კი გაბეზრებულები ჩანდნენ და ფასების თანდათან ზრდასაც ამათ აბრალებდნენ. გოსშა აწონ-დაწონა ყველაფერი და თავისი მოსაზრება დიკს გაუ-ზიარა. დიკი პოლიციის უფროსთან მოლაპარაკებას შეუდგა.

"თქვენ ალბათ იცით, რომ საფრანგეთის მთავრობას ამეროკელი ტურისტების მიზიდვა უნდა, იმდენად, რომ ამ ზაფხულს პარიზში სპეციალური ბრძანებაც კია, რომლის მიხედვით ამერიკელების დაპატიმრება, თუ მეტად სერიოზული შემთხვევა არ არის, აკრძალულია".

"ეს საკშაოდ სერიოზული შემთხვევაა, ღმერთო ჩემო".

"მაგრამ, ნება მომეცით გკითხოთ — თქვენ ნახეთ შათი დოკუმენტები?"

"არა ჰქონდათ დოკუმენტები. არაფერი, ორასი ფრანკისა და რამდენიმე ბეჭდის გარდა. ფეხსაცმლის ზონრებიც კი არ გააჩნდათ, რომ თავის ჩამოხრჩობა შესძლებოდათ!"

რაკი საქმეში დოკუმენტები არ ერია, დიკმა ახლა მშვი-

დად განაგრძო.

"იტალიელმა გრაფინიამ ამერიკის მოქალაქეობა შეინარჩუნა. იგი შვილიშვილია — "დიკი დინჯად, სერიოზული სახით აბამდა ტყუილს ტყუილზე, "ჯონ დ. როკფელერ მელონისა, ალბათ გაგიგიათ ეს სახელი? "

"რა თქმა უნდა, ღმერთო ჩემო, ვინა გგონივართ?"

"გარდა ამისა, იგი დისწულია ლორდ ჰენრი ფორდისა და, ამგვარად, საქმე აქვს რენოსა და სიტროენის კომპანიებთან"— იფიქრა, დროა გავჩერდეო, მაგრამ ნახა, რომ იმისმა ხმამ და ამ სიტყვებმა დიდი ეფექტი მოახდინა და დაუმატა: "გინდა ეგ დაგიჭერიათ და გინდა ინგლისში სამეფო გვარის პი-როვნება, ეს ხომ იცით რას გამოიწვევს — შეიძლება ომიც კი ატყდეს!"

"მაგრამ ინგლისელ ქალზე რაღას იტყვით?"

"ახლა იმაზე გადავდივარ. ეს ინგლისელი ქალი უელსის პრინცის ძმის — ჰერცოგ ბაკინგემის დანიშნულია".

"ჩინებული საცოლე კი ჰყოლია".

"და ახლა მზადა ვართ გადავიხადოთ—" დიკმა სწრაფად იანგარიშა, "ათას-ათასი ფრანკი ორივე ქალიშვილს— და ათასი ფრანკიც იმ "წესიერი" ქალიშვილის მამას. გარდა ამისა, კიდევ ორი ათასი თქვენი ხარჯებისთვის, როგორც საჭიტოდ მიიჩნევთ, ისე გამოიყენებთ, თქვენი საქმეა — "დიკმა მხრები აიჩეჩა, "—პოლიციელებისთვის, ესენი რომ დააპატიმრეს, სასტუმროს მეპატრონისთვის და ასე შემდეგ. მე ახლა გადმოგცემთ ხუთი ათას ფრანკს, რომ დაუყოვნებლივ ჩაუშვათ საქმეში და ალბათ თავდებით გაუშვებთ მათ, ხვალ კი, რომ გორც კი ჯარიმის თანხა გაირკვევა, ასე ვთქვათ, წესრიგის დარღვევის გამო, შიკრიკის მეშვეობით შევიტანთ მას მომრიგებელ მოსამართლესთახ".

სანამ ოფიცერი რამეს იტყოდა, დიკი უკვე მიხვდა, რომ საქმე მოგვარდა. "რამდენადაც უდოკუმენტებოდ არიან, ისი-ნი მე რეგისტრაციაში არ გამიტარებია — მომეცით ფული და ვნახავ, რის გაკეთება შეიძლება". ცოტა ყოყმანის მერეთქვა კაცშა.

ერთი საათის მერე დიკმა და მესიე გოსმა ქალები მანქანით მიიყვანეს ოტელ "მაჟესტიკთან, სადაც ლედი კეროლაინის "ლანდო" იდგა და შოფერს საჭესთან ეძინა.

"არ დაგავიწყდეთ, რომ მესიე გოსს ას-ასი დოლარი უნდა გადაუხადოთ". თქვა დიკმა.

"რა თქმა უნდა", მაშინვე დაეთანხმა მერი. "ხვალვე გამოვუგზავნი ჩეკს და კიდევ რაღაცას მივუმატებ".

"მე არა!" ყველა გაშტერდა და ლედი კეროლაინისკენ შეტრიალდნენ. დაბნეულობას უკვე გაევლო და სამართლიან მრისხანებას მოეცვა. "ეს ყველაფერი აღმაშფოთებელია. მე თქვენთვის არ მითხოვია ასი დოლარი მიგეცათ იმ ხალხისთვის".

ჩათქვირებული გოსი ავტომობილის კართან იდგა, უცებ წამოჭარხლდა და თვალები აენთო.

"თქვენ არ გინდათ გადამიხადოთ?"

"გადაიხდის, რა თქმა უნდა", თქვა დიკმა.

მაგრამ ამ მთვარიან ღამეს გოსს გაახსენდა და ერთბაშად მოაწვა, რაც კი ლონდონში ბიჭობისას წყენა და ლანძღვა აეტანა და მუქარით გაიწია ლედი კეროლაინისკენ.

ჯერ სიტყვების კორიანტელით გაუმასპინძლდა, რაც გაე⁼ გონა და იცოდა მასზე, ყველაფერი მიახალა, მაგრამ ლედი კეროლაინმა გაყინული ღიმილით შეაქცია ზურგი და მაშინ გოსმა, მკვირცხლად გადადგა ნაბიჯი მისკენ და განთქმულ მი-ზანში რბილად ჩარგო თავისი პატარა ფეხი. მოულოდნელო-ბისაგან ლედი კეროლაინმა ხელები გაშალა, თოფნაკრავივით წინ გადაქანდა და მეზღვაურის სამოსიანი, ეგრევე გაიშხლარ-თა ტროტუარზე.

დიკის ხმა შეერია ლედი კეროლაინის გაცოფებულ ყვირილს: "მერი, გააჩუშე! თორემ ათი წუთიც და ხომ იცით, სადაც ამოყოფთ თავს, ორთავეს ბორკილი არ აგცდებათ!"

გზად, ოტელისკენ, ბებერ გოსს კრინტი არ დაუძრავს, მხოლოდ მაშინ, როცა ჟუან-ლე-პენის კაზინოს გასცდნენ, სა-იდანაც ისევ ისმოდა ჯაზის ხველა და ჯაზის ქვითინი, გოსმა ამოიოხრა და დაილაპარაკა:

"ამისთანა ქალებს არ შევხვედრივარ ცხოვრებაში, ბევრ ცნობილ კურტიზანს ვიცნობდი და ბევრ მათგანს პატივსაც ცცემდი, მაგრამ ასეთი ქალები, ესენი რო არიან, დღემდე არ მინახავს".

## XI.

დიკს და ნიკოლს ჩვევადა ჰქონდათ, ერთად წასვლა პარიკმახერთან, თმის შესწორებ-დასაბანად, იქ გვერდიგვერდ
ოთახებში ისხდნენ ხოლმე და ნიკოლს მოსწონდა იქითა მხრიდან რომ ესმოდა მაკრატლების ღრჭიალი და ხურდის გადათვლა, გაუთავებელი წამოძახილები "Voilà" "Pardon!" და
დიკის დაბრუნების მეორე დღესაც წავიდნენ კანაში, რომ შესწორება-დაბანის მერე ფენის სურნელიან ნიავზე გაეშროთ
თმა.

ოტელ "კარლტონის" ფანჯრებწინ — ზაფხულს სულაც რომ არ იმჩნევდა, გეგონება რა ფანჯრები — სარდაფების კარებიაო, — მანქანამ ჩაიარა. მანქანაში ტომი ბარბანი იჯდა, ჩაფიქრებული და დარდიანი ჩანდა, მაგრამ მოჰკრა თუ არა თვალი ნიკოლს, ღრუბელგადაყრილს, თვალები გაუნათდა. ნიკოლმაც უმალ შეამჩნია ეს წამიერი ცვლილება და აფორი-აქდა. მოუნდა, ახლა ისიც მჯდარიყო იმ მანქანაში და ტომისთან ერთად წასულიყო იქ, სადაც იგი მიდიოდა. მთელ საათს პარიკმახერთან ყოფნა ერთ იმ გულისგადამლევ ინტერვალად

ეჩვენებოდა, მის ცხოვრებას რომ შეადგენდა და ცოტა ციხეში ჯდომასაც ჰგავდა. პარიკმახერ ქალს თეთრი ხალათი ეცვა, გამლღვალი პომადისა და ოდეკოლონის სუნი ასდიოდა და მედიცინის დებს ახსეხებდა.

მეორე ოთახში წინსაფარაკრულ დიკს სახეზე საპნის ქაფი ესვა და თვლემდა. ნიკოლი სარკეში იყურებოდა, სარკეში მამაკაცებისა და ქალების ოთახებშუა გასასვლელი ჩანდა და უცებ, ლამის წამოხტა ადგილიდან, დაინახა, რომ ტომი ბარბანი შემოვიდა და მაშინვე მამაკაცების სალოხისკენ გაქახდა, მღელვარებისა და გახარებისაგან წამოწითლდა, მიხვდა, მკვეთ-რი და გულახდილი ლაპარაკი რომ ექნებოდათ.

უკვე ესმოდა იმათი საუბრის ფრაგმენტები.

"ჰელო, თქვენთან ლაპარაკი მინდა".

"...სერიოზული?"

"...სერიოზული?

"...ძალიან კარგი, თანახმა გარ".

ერთი წუთის მერე დიკი ნიკოლთან მივიდა, სახელდახელოდ ჩამობანილ სახეს გაჯავრებული იწმენდდა პირსახოცით.

"შენს მეგობარს რაღაც ცეცხლი წაეკიდა, ლაპარაკი ისურვა ორთავესთან და დავთანხმდი, მინდა, რომ ჩქარა გაათავოს, წავიდეთ!"

"მაგრამ თმა ჯერ არ შემიჭრია".

"არაფერია, მერე შეიჭრი, წავიდეთ!"

რას იზამდა, გაოცებულ პარიკმახერს ნიკოლმა პირსახოცების შემოხსნა სთხოვა. გრძნობდა რა მორთულიცა და რა მოკაზმულიც იყო ახლა, დიკს ოტელიდან გაჰყვა. ტომი გარეთ იცდიდა და მისი ხელისკენ დაიხარა.

"კაფე "კავშირში" წავიდეთ", თქვა დიკმა.

"სულ ერთია სად იქნება, სადაც არავინ შეგვიშლის ხელს", მიუგო ტოძიძ.

ხეების კაშაროვანში, ზაფხულის ამ გრილოში დასხდნენ და დიკმა იკითხა:

"ნიკოლ, დალევ რამეს?"

"მხოლოდ ლიმონის წვენს".

"მე ერთ კათხა ლუდს", თქვა ტომიშ.

"ბლექ-ენდ-უაიტ", სიფონით", თქვა დიკმა.

4,50

"გლექ-ენდ უაიტ" არა გვაქვს. არის მხოლოდ "ჯონი უოკერ".

"Johngo".

ხმას არ იღებს, ჩერდება მაგრამ არაფერია, ვეღარ დამიჯერია, ესეც სიზმრისფერია...

"თქვენ ცოლს არ უყვარხართ", უცებ თქვა ტომიმ. "მე ვუყვარვარ მას".

ერთმანეთს შეხედეს, ორთავეს საოცრად წაშლილი, არა
რა გამომეტყველება ჰქონდა სახეზე. ასეთ სიტუაციაში ლა
შის შეუძლებელია ორი მამაკაცის ურთიერთობა, რადგან პირდაპირი არ არის იგი, ამას ის არკვევს, თუ იმათგან ვის და

რამდენად ეკუთვნის ქალი, ვისაც ამბავი ეხება და მათი
გრძნობები ამ ქალის ორმხრივ არსებაში ისე გადის, როგორც

რაღაცა დაზიანებულ კომუტატორში.

"ერთი წუთით", თქვა დიკმა. "მომიტანეთ ჯინი და სიფონი"-

"კარგით, მესიე".

"განაგრძეთ ტომი, გისმენთ".

"ჩემთვის სავსებით ცხადია, რომ ნიკოლთან თქვენი ქორწინება ვერ გაგრძელდება. აღარ სჭირდებით. ხუთი წელი ველოდი, რომ ეს მომხდარიყო".

"რას იტყვის ნიკოლი?"

ორთავემ ნიკოლს შეხედა ახლა.

"ტომის ძალიან შევეთვისე, დიკ".

დიკმა უსიტყვოდ დაუქნია თავი.

"შენ მე უკვე აღარ გიყვარვარ", განაგრძო ნიკოლმა. "ჩვეგაღა დარჩა. როზმერის მერე უკვე ისე არ იყო ხოლმე, როგორც წინათ".

მაგრამ ტომის საქმის ასე შეტრიალება ხელს არ აძლევდა და მაშინვე ჩაერია:

"თქვენ ვერ უგებთ ნიკოლს. იმის გამო, რომ ოდესღაც ავად იყო, მთელი ცხოვრება ისე ექცევით, როგორც პაციენტს".

უცებ ამათ ვიღაც აბეზარმა ამერიკელმა შეაწყვეტინა საუბარი. ყველას ახალ "ჰერალდსა" და "ნიუ-იორკ ტაიმზს" სთავაზობდა ჩაციებით.

Scanned by CamScanner

"აიღეთ, ძმებო, აქ ყველაფერია. დიდი ხანია აქა ხართ?" "თავი დაგვანებეთ! წადით აქედან!" დაუყვირა ტომიმ და დიკისკენ მიტრიალებულმა განაგრძო: "ვერც ერთი ქალი ვერ აიტანდა ასე..."

"ძმებო!" ისევ შეაწყვეტინა იმ ამერიკელმა. "თქვენი აზრით მე ფუჭად ვკარგავ დროს, იყოს ასე — სამაგიეროდ, სხვები არ კარგავენ". თავის საფულეს რაღაც დააძრო — დიკს იგი თითქოს ეცნაურა — კარიკატურა, გაყვითლებული გაზეთიდან, — ამერიკელები დოკზე ნაკადად გადმოდიოდნეს საფრანგეთში, თავიანთი ოქროს ტომრებით, "თქვენ გგონიათ, მე ჩემსას ვერ დავითრევ? ამასაც ვნახავთ, ნიციდან ტურ დეფრანს ველორბოლის გულისთვის საგანგებოდ ჩამოვედი".

როცა ტომიმ გაცოფებულმა დაუყვირა, და გააგდო იგი,

მხოლოდ მაშინ გაახსენდა დიკს, სად ენახა.

ის კაცი იყო, ხუთი წლის წინათ ერთხელ პარიზში რუ დე სენტ ანჟზე რომ გადაეყარა.

"აქ როდის იქნება ტურ დე ფრანსი?" მიაძახა დიკმა.

"წუთი წუთზე, ძმაო".

ბოლოს, როგორც იქნა, გაეცალა მათ, მხიარულად დაუქნია ხელი და ტომი ისევ დიკს მიუბრუნდა.

"Elle doit avoir plus avec moi qu'avec vous"¹. "ინგლისურად ილაპარაკეთ! რა არის — doit avoir?"

"Doit avoir? — ჩემთან უფრო ბედნიერი იქნება იგი". "ჰო — სიახლის ხიბლი, ძაგრამ მე და ნიკოლი ბედნიერებიც ვიყავით, ტომი".

"ოჯახური ბედნიერება", აგდებით ჩაიცინა ტომიმ.

"თქვენ და ნიკოლი თუ დაქორწინდებით, ოჯახური ბედნიერება არ იქნება?" ქუჩიდან ხმაური მოისმა და დიკმა ვეღარ გააგრძელა; ხმაური თანდათან მატულობდა, იქაურობას ავსებდა უკვე. ბორდიურზე ხალხი ბრბოდ იდგა და მოცლილები საიდანღაც ემატებოდნენ.

პატარა ბიჭები — სპრინტერები ველოსიპედებით მოდიოდნენ, ქუჩებში მოსრიალებდნენ საგანგებოდ მორთული, ვიმპელებიანებით სავსე ავტომობილები, ბუკ-საყვირის ხმა ისმო-

<sup>1 &</sup>quot;ჩემგან მეტი რამ უნდა მიიღოს, ვიდრე იგი თქვენგან იღებდა" (ფრანგ.).

და და ველორბენის მოახლოებას აუწყებდა ხალხს, რესტორანების კარებს უწინსაფრო მზარეულები აწყდებოდნენ, მოსახვევში წითელჯემპრიანი პირველი მრბოლელი გამოჩნდა,
გულდაჯერებით მოდიოდა ველოსიპედით და არეულ-დარეულ, გამამხნევებელ. შეძახილებსა და ღრიანცელში მოჰყავდა
იგი. დაფიონიდან იმას კიდევ სამი მრბოლელი მოჰყვებოდა,
გახუნებული ჰარლეკინები, ჯამბაზ-მრბოლელნი, მტვრისა და
ოფლის ყვითელი ფენა დასდებოდათ ფეხებზე და დაღვრემილი, გაშტერებული სახეები და მეტად დაღლილი თვალები
ჰქონდათ.

ტომი დიკის წინ დადგა და თქვა:

"ნიკოლი ალბათ გაყრას მოინდომებს — იმედია არ დააბრკოლებთ?"

პირველ მრბოლელთა მერე ერთი ორმოცდაათი მაინც გამოჩნდა ორას იარდზე გაჭიმული; ზოგი მორცხვად იღიმებოდა, ზოგს ქანცგაწყვეტა ეტყობოდა, ბევრს კი მაინც სახეზე უფრო გულგრილობა და დაღლა ეხატა. პატარა ბიჭების
ამალამ გაიარა, მერე იმ რამდენიმე ჩამორჩენილმა, თავიდან
რომ ფახაფუხით დაეწყოთ და სულ ბოლოს კი დიდმა მანქანამ, ის მრბოლელები რომ მოჰყავდა, ვინც ავარიაში დაშავდა, ანდა, ბოლომდე ვეღარ გაუძლო და მარცხი იგემა. თავიანთ მაგიდას დაუბრუნდნენ. ნიკოლს უნდოდა დიკს ჩაეგდო
ინიციატივა ხელში, მაგრამ დიკი მშვიდად იჯდა, — იმისი ჯერაც გაუპარსავი პირისახე ნიკოლის ჯერაც შეუჭრელ თმას
ეხამებოდა.

"შენ ხომ უკვე კარგა ხანია ბედნიერი არა ხარ ჩემთან?" დაილაპარაკა ნიკოლმა. "მე რომ არა, შენ ისევ საქმეს მიხედავ-დი — უკეთესადაც, რაკი ჩემზე საწუხარი და საფიქრალი აღარ გექნება".

ტომის მოუთმენლობა შეეტყო.

"რა საჭიროა ეს ლაპარაკი, ნიკოლს და მე ერთმანეთი გვიყვარს, და თავისთავად ეს ფაქტი ყველაფერს ამბობს".

"ესეც ასე", თქვა დოქტორმა დაივერმა, "რაკი გაირკვა ყველაფერი, იქნებ ისევ პარიკმახერთან წავსულიყავით?"

ტომის ჩხუბი უნდოდა: "არის ზოგი რაშ..."

"ზოგ რამეზე მე და ნიკოლი მოვილაპარაკებთ", თქვა დიკ-

მა. "ნუ ღელავთ — პრინციპში მე თანახმა გარ და ნიკოლი და მე გავუგებთ ერთმანეთს. სამკუთხა სჯა-ბაასს თუ ავირი-დებთ, უსიამოვნების შანსიც უფრო მცირე იქნება".

ტომის არ შეეძლო არ ეღიარებინა, რომ დიკი მართალი იყო, მაგრამ მისი ბუნება მოითხოვდა, რომ ბოლოსაც თვი-

თონ ეთქვა სიტყვა.

"მინდა, გახსოვდეთ, რომ ამ წუთიდან", თქვა მან, "მე ნიკოლის მფარველი ვარ და პასუხსაც მოგთხოვთ, თუ ჯერჯერობით ერთ ჭერქვეშ ყოფნას ნიკოლთან ერთად, ოდნავ მაინც გამოიყენებთ".

"მშრალ სატრფიალოს ტრფიალი მე არასოდეს არა ვყოფილვარ", თქვა დიკმა.

თავი დაუკრა და ოტელ "კარლტონის" მხარეს წავიდა, ნიკოლის ფიქრიანი მზერა გაჰყვა თან.

"საკმაოდ კარგად ეჭირა თავი", აღიარა ტომიმ. "ძვირფასო, საღამოს ხომ ერთად ვიქნებით?"

"მე ასე მგონია".

მაშ ასე, მოსახდენი მოხდა და ტრაგედიაც თითქმის არ იყო; ნიკოლი ისე გრძნობდა, თითქოს გაუგეს რაც იზრახაო, და მიხვდა, რომ ქაფურის მალამოს ეპიზოდიდან დიკი უკვე ელოდა ამას. და მაინც, ბედნიერს, უხაროდა, ღელავდა და ცოტა არ იყოს ახირებული სურვილი, რომ კარგი იქნებოდა, ყველაფერი დიკისთვის ეამბნა, მალე გაუქრა. ოღონდ, თვალმოუშორებლივ უყურებდა დიკს მანამდე, სანამ წერტილად იქცეოდა და ზაფხულის ბრბოს სხვა წერტილებს შეერეოდა.

## XII

რივიერიდან წასვლის მთელი წინა დღე დოქტორმა დაივერმა თავის ბავშვებთან გაატარა. უკვე იმ ასაკში აღარ იყო, რომ კარგ რამეზე ეფიქრა ანდა ეოცნება და უნდოდა კარგად დახსომებოდა თავისი შვილები. ბავშვებს უთხრეს, რომ ზამთარს ლონდონში, დეიდასთან გაატარებდნენ, მერე კი ამერიკაში წავიდოდნენ და მამას ნახავდნენ. ფროილაიხი მათთახ დარჩებოდა და როგორც შეთანხმდნენ, დიკის უნებართვოდ არ დაითხოვდნენ. უხაროდა, რომ ბევრი რამ მისცა თავის პატარა გოგოს — გიჭისადმი კი გულდაჭერება ამ მხრივ აკლდა — ისედაც, არა-სოდეს იცოდა კარგად, რა უნდა მიეღოთ მისგან ამ დაუდე-გარ, უმწეო და ჭერ ისევ მკერდზე მიკრულ პატარებს. მაგ-რამ, მშვიდობითო, როცა მათ უთხრა, უნდოდა აეწია ეს ორი მშვენიერი თავი, გულში ჩაეკრა, მერე საათებს გაევლო და მაინც ამათთან ყოფილიყო.

დიკი მოხუც მებაღეს, ვილა "დაიანაში" ამ ექვსი წლის წინათ პირველად რომ დარგო ყვავილები, გადაეხვია; აკრცა პროვანსელ გოგოს, ბავშვების მოვლაში რომ ეხმარებოდა და თითქმის ათი წელი იყო ამათთან, და ახლა მუხლებზე დავარდა და გულამოსკვნით ტიროდა, სანამ დიკმა ძალით არ წამოაყენა და სამასი ფრანკი არ აჩუქა. ნიკოლს ჯერ ისევ ეძინა — ასე დათქვეს, დიკმა მას ბარათი დაუტოვა, ერთიც — ბები უორენს, სარდინიიდან რომ დაბრუნდა და ახლა ამათთან იმყოფებოდა. მერე სამფუტიანი სიმაღლის ათკვარტიანი ბოთლიდან, ვილაცამ დაივერებს რომ აჩუქა, ბრენდი დაისხა და კარგად დალია.

მანქანაში ჩაჯდა, გადაწყვიტა, რომ ბარგს კანის ვაგზალში ჩააბარებდა და დაბრუნდებოდა, რომ საბოლოოდ შეევლო თვალი გოსის პლაჟისთვის.

ჯერ იქ მხოლოდ გოგო-ბიჭების ავანგარდი იყო, იმ დილას ნიკოლი და თავისი და პლაჟზე რომ გავიდნენ. თეთრი ცისა-გან წახეული უთმენი თეთრი მზე ვარვარებდა. სიო არ იძვ-როდა. ბარში ოფიციანტები ყინულს ამატებდნენ; ამერიკელ ფოტოგრაფს პატარა ჩრდილი ენახა, თავისი აპარატი დაედგა იქ და ქვის კიბეზე ფეხის ხმის გაგონებისთანავე მალიმალ შაღლა იღებდა თავს. რიჟრაჟზე ჩაძინებულ იმის მუშტრებს ოტელის დაბნელებულ ოთახებში ისევ ჟძინათ.

კაბინიდან გასულმა ნიკოლმა უცებ დიკი დაინახა, პლაჟისთვის არ ეცვა და ზევითკენ, დიდ ქვაზე იჯდა. ნიკოლმა სწრაფად დაიხია, თავისი კარვის ჩრდილს შეეფარა. წუთის მერე ბებიც მოვიდა და უთხრა:

"დიკი ჯერ აქ არის". "ჰო, დავინახე". "მე მეგონა ეყოფოდა ტაქტი და ადრე წავიდოდა".

"ეს დიკის ადგილია — ასე თუ ისე, დიკმა აღმოაჩინა აქაურობა. მოხუცი გოსი ყოველთვის ამბობს, რომ დიკის მადლიერია ყველაფრისათვის".

ბებიმ მშვიდად შეხედა დას.

"არ იყო საჭირო მაგის ველოსიპედით ექსკურსიებისგან ჩამოშორება", შენიშნა მან. "მაღლა რომ აიწევიან, თავგზა ებ-ნევათ და ამას ვერავითარი ლამაზი ბლეფით ვერ ფარავენ".

"ექვსი წელი დიკი კარგი ქმარი იყო ჩემთვის", თქვა ნიკოლმა. "ამ ხნის მანძილზე ერთხელაც არ მოუყენებია ტკივილი და ყოველთვის ცდილობდა, დავეფარე რამე ვნებისგან".

ბების ქვედა ყბა ოდნავ წამოეწია, როცა თქვა:

"ამისთვისაც სწავლობდა იგი".

დები ცოტა ხანს გაჩუმდნენ; ნიკოლი დაღლილად ფიქრობდა რაღაცებზე, ბები ვარაუდობდა, ღირდა თუ არა გაჰყოლოდა მისი ხელისა და ფულის მთხოვნელ ახალ კანდიდატს, ხალასჯიშიან ჰაბსბურგს, თუმცა მაინცდამაინც არ ფიქრობდა
ამაზე ისე, როგორც უნდა ეფიქრა ამ დროს. ბების ყველა ამბავი უკვე ისე ძალიან ჰგავდა ერთმანეთს, რომ რაც კი წლები ემატებოდა და ჭკნებოდაღა, მხოლოდ ლაპარაკისთვის თუ
უნდოდა ის ამბები და ბების ემოციებიც არსებითად ამისთვის
იყო — სალაპარაკოდ.

"წავიდა?" ცოტა ხნის მერე იკითხა ნიკოლმა. "მე მგონია მისი მატარებელი თორმეტზე გადის",

ბებიმ კაბინიდან გაიხედა.

"არა, ტერასაზე ავიდა და ვიღაც ქალებს ელაპარაკება. მაგრამ აქ ხალხი უკვე იმდენია, ვერც კი შეგვამჩნევს".

დიკმა ისინი შეამჩნია, მაშინვე, თავიანთი საფარიდან რომ გამოვიდნენ და თვალს ადევნებდა, ვიდრე ისევ გაუჩი-ნარდნენ. მერი მინგეტისთან ერთად იჯდა მაგიდასთან და ანი-სის არაყს სვამდა.

"იმ ღამეს, საშველად და გადასარჩენად რომ მოხვედით, ისევ ისეთი, ძველებური დიკი იყავით", ამბობდა მერი. "ოღ-ონდ, ბოლოს საშინლად მოექეცით კეროლაინს. რატომ არ გინდათ ყოველთვის ისეთი კარგი იყოთ? ხომ შეგიძლიათ".

დიკს ახლა ფანტასტიკური ეჩვენებოდა მთელი ეს სიტუაცია, როცა მერი ნორთს შეეძლო მისთვის ექადაგა და დაემოძღვრა.

"მეგობრებს ახლაც უყვარხართ, დიკ, მაგრამ როცა დალევთ, აუტანელ რაღაცებს ეუბნებით ხალხს. მთელი ეს ზაფხული ისე მიდის, რომ სულ თქვენ გიცავთ და გექომაგებით".

"დოქტორ ელიოტის ერთ-ერთი კლასიკური რემარკაა".

"არა, მართლა, სვამთ თუ არა სვამთ, ეს კი არ არის ვინმეს საქმე —" ცოტათი შეყოყმანდა, "ეიბიც კი, რამდენიც უნდა დაელია, თქვენსავით გულს არ ატკენდა ხალხს".

"რა მოწყენაა თქვენთან ყველასთან", თქვა დიკმა.

"მაგრამ აქ მხოლოდ მე და თქვენა ვართ!" წამოიძახა მერიმ. "თუ რიგიანი ხალხი არ მოგწონთ, მიდით სხვებთან და ვნახოთ, როგორ მოგეწონებათ! ხალხს მხოლოდ ისა სურს, რომ სიამოვნება მიიღოს და თუ ჩაუშხამებთ, მაშინ თავის თავს მასულდგმულებელ წყაროს უშრობთ".

"მქონდა კი ასეთი წყარო?" იკითხა დიკმა.

მერი კარგ დროს ატარებდა ახლა და თვითონაც არ იცოდა ეს — დიკთან ერთად ხომ უფრო შიშის გამო დაჯდა. ისევ უა- რი უთხრა დალევაზე და თქვა: "გასაგებია სადაც მარხია ძა- ღლის თავი — თავისი თავის შეღავათი სისუსტის გამო. ეიბის მერე ცხადია, ხვდებით რასაცა ვგრძნობ ასეთ რამეზე — იმ-ის მერე, რაც ალკოჰოლმა ჩემ თვალწინ კარგი კაცი დაღუ- პა..."

საფეხურებზე თეატრული ხალისით ჩამოირბინა ლედი კე-

დიკი კარგ ხასიათზე დადგა — დროს, დღეს გაუსწრო და იმ მდგომარეობას მიაღწია, როგორსაც კარგი სადილის მერე აღწევენ ხოლმე, მაგრამ ჯერ ეს მხოლოდ მერის მიმართ თავაზიან, შესამჩნევად თავშეკავებულ ინტერესში ვლინდებოდა. მისი ბავშვსავით სუფთა მზერა მერის თანაგრძნობას ითხოვდა და უკვე თანდათან ეპარებოდა ის, რასაც წინათ გრძნობდა ხოლმე, — შთაენერგა ამისთვის, რომ მთელ ქვეყანაზე ერთი კაცი ესღა იყო და ეს ქალი კი ის ერთადერთი, ვინც ქვეფანას შემორჩა ბოლოს.

...მაშინ იგი იქით აღარ გაიხელავდა, იმ კაცისა და ქალისაკენ, მკაფიოდ რომ ისახებოდნენ შავად და თეთრად, ცის ფონზე ახლა...

"ერთ დროს ხომ მოგწონლით?" იკითხა მახ.

"მოგწონდითო! — მე თქვენ მიყვარდით, ყველას უყვარდით. ყველა ქალი გამოგყვებოდათ, ოლონდაც კი თქვენ დაგეძახათ..."

"ჩვენ შორის ყოველთვის რაღაც იყო".

მერი ხალისით წამოეგო ანკესზე. "მართლა, დიკ?"

"ყოველთვის — შე ვიცოდი ყველა თქვენი საწუხარი და ვხედავდი, რა ვაჟკაცურად გეჭირათ თავი". მაგრამ შიგნით უკვე ედებოდა ძველი სიცილი და მიხვდა, დიდხანს ვერ გაუ-ძლებდა.

"მე ყოველთვის გუმანით ვგრძნობდი, რომ თქვენ ბევრი რამ იცოდით ჩემზე", აღფრთოვანებით უთხრა მერიმ. "უფრო მეტი, ვიდრე როდისმე იცოდა ვინმემ. იქნებ ამიტომაც მეშინოდა თქვენი იმის მერე, რაც ერთმანეთთან ძველებურად აღარ ვიყავით".

დიკმა, თითქოს გამოუთქმელის თქმა უნდაო, თბილად და ალერსით შეხედა მას; მათი მზერა ერთმანეთს შეხვდა დაძა-ბულად, უცებ შეერთდა, შეერწყა, მაგრამ ის სიცილი ისე ხმა-მაღლა ისმოდა უკვე, საცაა მერიც გაიგონებდა და დიკმა სი-ნათლე გამორთო და რივიერის მზეს დაუბრუნდნენ.

"უნდა წავიდე", თქვა მან და წამოდგა. ოდნავ ირწეოდა; თითქოს რაღაცა თვალთ დაუბნელდა — თითქოს სისხლი უჩე-რდებოდა. მარჯვენა ხელი ასწია და მაღალი ტერასიდან მთელ პლაჟს პირჯვარი გადასწერა. აქეთ-იქითა ქოლგებიდან გაკვირ-ვებით ამოიხედეს.

"მივალ მასთან", ნიკოლი მუხლზე წამოიწია.

"არა, არ მიხვალ", ტომიმ ძალით დასვა ადგილზე. "მორჩა, გათავდა".

## XIII

თავისი ახალი გათხოვების მერე ნიკოლს მიწერ-მოწერა ჰქონდა დიკთან; საქმეებზე და ბავშვებზე სწერდა. ხშირად იტყოდა ხოლმე, "მიყვარდა დიკი და გერ დავივიწყებ", რაზედაც ტომი მიუგებდა, "რაღა თქმა უნდა, არა — რად უნდა

დაივიწყო?"

დიკმა პრაქტიკა ბაფალოში დაიწყო, მაგრამ, ეტყობა საქმე არ გამოვიდა. ნიკოლმა ვერ გაარკვია რის გამო, ოღონდ, რამდენიშე თვის მერე გაიგო, რომ ნიუ-იორკის შტატის პატარა ქალაქ ბატავიაში გადავიდა და იქ ზოგად მედიცინაში ჰქონდა პრაქტიკა, ცოტა მოგვიანებით კი შეიტყო, რომ ლოკპორტში იყო და იქაც იგივეს აკეთებდა. რაღაც შემთხვევის წყალობით დიკის ლოკპორტში ცხოვრებაზე მეტი ამბებიც ესმოდა ნიკოლს: რომ ბევრს დადიოდა ველოსიპედით, რომ ქალები აღმერთებდნენ და რომ მაგიდაზე დასტა-დასტად მუდამ ელაგა ქაღალდები, ამბობდნენ, რომ საყურადღებო ტრაქტატი იყო მედიცინაში და საცაა უკვე დაამთავრებდა. მას დახვეწილი მანერების კაცად თვლიდნენ და ერთხელ, მიტინგზე, შესანიშნავი სიტყვაც წარმოთქვა ნარკოტიკებზე; მაგრამ რაღაც ამბავში გაეხვია ერთ ქალიშვილთან, ბაკალეადან, და ამას ისიც დაემატა, რომ ვიღაცა პაციენტის გამო სასამართლომდე მივიდა საქმე; ასე რომ, დატოვა ლოკპორტი.

ამის მერე უკვე აღარ თხოულობდა, რომ ბავშვები გაეგზავნათ ამერიკაში და როცა ნიკოლმა მისწერა, ფული ხომ არა
გჭირდებაო, არ უპასუხა. თავის უკანასკნელ წერილში იტყობინებოდა, რომ პრაქტიკა ჰქონდა ნიუ-იორკის შტატის ქალაქ
ჟენევაში და ნიკოლს ისეთი შთაბეჭდილება შეექმნა, რომ იქ
ვიღაცასთან ერთად იყო, ვინც მისი სახლის საქმეს უვლიდა.
ნიკოლმა ატლასზე მოძებნა ჟენევა და გაიგო, რომ ეს თვალწარმტაცი ციდა ქალაქი ფინგერ ლეიკსის შუაგულშია. იქნებ—
უყვარდა ხოლმე ფიქრი ნიკოლს— მისი დიდება თავის
დროს ელის, როგორც გრანტისა გალენაში; სულ ბოლოს
კი ღია ბარათი მოვიდა მისგან, ფოსტის შტემპელით — ნიუიორკის შტატის ქალაქ ჰორნელიდან გამოგზავნილი, მეტად
პატარა ქალაქია და ცოტა შორს არის ჟენევიდან; ასე თუ ისე,
ეტყობა ახლაც იქ არის სადღაც, ან ჟენევაში, ანდა ჰორლენ-